

~~Ex libris Joannis Valentinus~~
~~Lib. X. m. 1609~~

Cim. 8548

CIMELIA	
F	8548

Handwritten in blue ink:
Handwritten signature/initials, possibly "Handwritten" or "Handwritten" with a flourish.

Handwritten in red ink:
A. 189

GENERALIS CONTROVERSID DE INDVLGENTIIS.

A

M. VALENTINO LAVRENTIO VIDA VIENSI,
PHILOSOPHIAE, ET S. THEOLOGIAE DOCTORE,
conscripta: & authoritati, atq; iudicio
Sanctæ sedis Apostolicæ Romanæ
subiecta.

Canticorum 2.

SVB VMBRA ILLIVS, QVEM DESI-
DERAVERAM, SEDI: ET FRVCTVS
EIVS, DVLCIS GVTTVRI MEO.



CRACOVIAE,
In Archityp: Regia & Ecclesiast. Lazari,
Anno. M. D. XCIII.

Donus Gregorius Graecorum Secretarius Iesu impressus Cithare.

2. ad Corinth. 7.

HAS ERGO HABENTES PROMISSIONES
CHARISSIMI, MVNDEMVS NOS AB OM-
NI INQVINAMENTO CARNIS ET SPIRI-
TVS, PERFICIENTES SANCTIFICATIO-
NEM IN TIMORE DEI.

ILLVSTRIS.

ILLVSTRISSIMO, RYDISSIMO,
& Sapientissimo Principi, Domino,
D. GEORGIO RADZIVIL,
S. R. E. TITVLI SANCTI SIXTI,
PRESBYTERO CARDINALI: CRACOVIENSIS EPISCOPA-
tus Administratori perpetuo: Academię Cracouiensis
Cancellario: Duci Seuerien. Olicæ & Nieswierz, &c.

Domino, Principi, & patrono optimo, & præstantiss^o,

VALENTINVS LAVRENTIVS VIDAVIENSIS,

*Salutem plurimam, gratiam, pacem, cum omni
genere bonorum.*



DISPUTATIONVM GENERA MVLT-
ta esse, docet Aristoteles: Illustriss. & Reue-
rendiss. Princeps: sed vnum illud certissi-
mum, cuius causa inuenta res ipsa est; vt sci-
amus, & possimus fartam tectam, sanam &
integram fidem, doctrinam, & veritatem
Catholicam retinere, propagare, & eadē fi-
de, qua à maioribus accepimus, posteris per manus tradere: tūm
contra eos, qui fidei doctrinæ, & veritati Catholicæ contradi-
cunt, authoritati sacre scripture aduersantur, & Spiritui Sancto
resistunt, arguere: errantes in viam reducere: &, quod rei caput
est, de rebus incorruptè iudicare; vt talem vnamquamque existi-
memus, qualis ipsa est: ne vilia sectemur, tanquam pretiosa, aut
pretiosa tanquam vilia reijciamus: ne vituperemus laudanda, né-
ue laudemus vituperanda: quia scriptum est Isaia cap. 5. Væ, qui
dicitis malum bonum, & bonum malum: ponentes tenebras
lucem, & lucem tenebras: ponentes amarū in dulce, & dulce in
amarum. Et tales, sicut & inobedientes, vaniloquos, & seducto-
res hæreticos oportet scholastica disputatione redargui. Sed ex
omni genere disputationum, illas extraordinarias, priuatas, &

P R Æ F A T I O.

vagas disputationes, quæ cum sophistis hæreticis peruersis, non palam in Ecclesia coram clero & sacerdotibus, aut coram deputatis ab officio prudentibus, honestis, & fide dignis testibus, neq; in scholis, & Academijs Catholicis, coram idoneis & doctis auditoribus, sed ex insidiis clam, domi, labijs dolosis, lingua magniloqua, verbis malignis, sermone sophistico, fraudis & doli mali pleno, coram imperita & seducta plebe fieri solent; præsertim sine consilio seniorum, sine licentia, & benedictione proprii Pontificis, aut eius Vicarij, nunquam probaui: nullo modo ad eas tanquam ad idolotita, & in lege prohibitas carnes, consentire potui, 2 Machab. 6. tum quia tales disputationes Sacra scriptura, sed inprimis Apostolus pluribus locis prohibuit: tum quia frustra sine capite, Palæmone, iusto, proprio, & sine legitimo iudice suscipiuntur; & propterea nulla sententia, nullo decreto dirimuntur, nullo ordine procedunt, nullo fine clauduntur: tum quia corrumpunt bonos mores: nam sæpenumerò molestissimis litibus, ac contentionibus, clamore graui, tantum non bello, finiuntur. In summa, istæ priuatæ cum hæreticis disputationes sunt suspectæ, inutiles & vanæ: nam talibus disputationibus hæretici non conuertuntur, & simplices sacerdotes aliquando, Deo permittente, seducuntur, & in errorem mittuntur, iuxta illud Psalm. 17. Et cum peruerso peruerteris. Vnde Sapiens Proverb. cap. 8. Non litiges cum homine linguato, & non strues in ignem illius ligna. Et paulò post ibidem: Cum fatuis consilium non habeas, non enim poterunt diligere, nisi quæ eis placent. Beatus vir qui non abiit in consilio impiorum. Et Apostolus, 1. ad Corinth. cap. 11. Si quis autem videtur contentiosus esse, nos talem consuetudinem non habemus, neque Ecclesia Dei. Verum enim uerò, si quando priuato homini cum hæretico disputandum est: disputandum non uerbo, sed scripto: tum quia hæretici falsis scriptis ad rescribendum frequenter prouocant, & dant occasionē & causam rescribendi: tum quia disputatio, quæ scriptis instituitur & committitur, minus trahit absurdi, minus scandalī, minus periculi, & possunt utiq; talis disputationis plura dari ex.

ri exempla. Nam D. Ambrosius scriptis refutauit Nouatianos, & alios hæreticos. D. Augustinus non minus copiosè, quàm acutè scripsit contra multos hæreticos, vt contra Pelagianos, Manichæos, contra Faustum, Manichæum, Donatistas, & alios. Similiter D. Hieronymus contra Iouinianum, Vigilantiū, & alios. Et Vincentius Lirineñ. aureo suo libello plurimos hereticos, vt Arianos, Nestorianos, Nouatianos, &c. doctissimè, & felicissimè refutauit. Hi, & alij sancti Patres, per quos Spiritus Sanctus loquutus est, disputationes istas, quæ præsentibus verbis, communi sermone, & familiari colloquio cum hæreticis fiunt, semper vbique ex industria fugiebant: nolebant, exemplo stulti Menalcæ Virgiliani, suam bonam mentem committere cum hæreticorum insania. Benè sciuerunt Patres istud Apostoli i. ad Timoth. cap. i. hæretici non intelligunt quæ loquuntur, neq; de quibus affirmant: ergo ad disputandum ita sunt inepti, sicut Asinus ad lyram. Quãobrem Sapiens admonet Prouerb. 26. Ne respondeas stulto, iuxta stultitiam suam, ne efficiaris illi similis. Responde stulto secundum stultitiam suam, ne sibi sapiens esse videatur. D. Hieronymus: Non hæc, inquit, inuicem sibimet contraria debent videri, Non respondere stulto secundum stultitiam eius: &, respondere stulto iuxta stultitiam eius. vtrumq; enim pro temporum, locorum, & personarum diuersitate commendat, dum & stultus contemnitur; quia non percipit sapientiam, & stulta superbia alia decutitur stultitia, iuxta, quod Apostolus dicit: Factus sum insipiens, vos me coëgistis. Potest etiam dici, & conciliari sic: Ne respondeas stulto, iuxta stultitiam suam, hoc est, præsentibus verbis, & ore ad os loquendo. Responde stulto, id est scriptis, ne sibi sapiens esse videatur. Sed vt iam, missis alijs, de re præsentipauca dicam: Ego, vt hanc Controuersiam contra hæreticos, qui sanctas Indulgentias suo extremo malo blasphemant, oppugnant, & persequuntur, scriberem, multis causis sum adductus. Nam commune bonum, communi consilio, studio, & opera, bona fide omnes tueri, defendere, & conseruare debemus: quia si boni filij thesaurū, & hæreditate morte maiorum relictā

P R A E F A T I O.

magnis vigilijs custodiunt: & Catholici profecto, sed praecipue sacerdotes, caelestem thesaurum indulgentiarum in Ecclesia depositum, traditum, & relictum, magno studio & labore custodire, & conseruare debent, iuxta illud Prouerb. cap. 1. Ne dimittas legem matris tuae, & Lucae cap. 12. Beati serui illi, quos, cum venerit Dominus, inuenerit vigilantes. &c. Et post pauca: Hoc autem scitote, quoniam si sciret paterfamilias, qua hora fur veniret, vigilaret utique, & non sineret perfodi domum suam. Ergo nihil turpius, nihil ab officio Catholici magis alienum videri debet, quam vigilante Iuda, in re tanti momenti, dormire Petrum, & vndique grassantibus lupis, pastorem sui gregis curam abijcere, ac huius demum seculi, imò tenebrarum filios in sua generatione magis, quam in Christi regno lucis filios sapere, & prudentiores esse. Proinde, quia Christi seruus sum, nolui pecuniam Domini mei, mihi creditam abscondere, nolui talentum fodere in terram; & quia homo peccator sum, & oratione sanctae matris Ecclesiae Catholicae opus habeo, indulgentiam meditor, indulgentiam sicut miluus pluuiam desidero: & sicut ceruus fontes aquarum sitio. Propterea ut possim cum poenitentibus esse particeps indulgentiarum; generalem controuersiam de indulgentijs methodo scholastica, stilo communi, & quo scholastici utuntur scripsi: currentibus calcar addidi: & illos, qui paucos habent libros, quantum potui, & quantum per cathedram licuit, iuui. Quoniam verò sua cuique virtuti laus debetur, idcirco memor ego officij mei, quia me multum Pastori, & Cancellario illustris & almae Vniuersitatis Cracouien. debere agnosco, dum nobilissima, & frequentissima vrbs Cracouia, una cum sua Academia, & alijs ordinibus Illustriss. Celsitudini Vestrae, sanum, saluum, & felicem in patriam reditum, & optatissimum ac solennem ad Episcopatum bonis auibus ingressum, pro suo officio gratulatur, ego fructum lucubrationum mearum, Controuersiam de Indulgentijs, ad laudem, gloriam, & honorem Dei Omnipotentis, & ad vtilitatem sanctae matris Ecclesiae Catholicae scriptam, Reuerendis. Celsitudini Vestrae, bono & alacri animo dedico, & offero.

P R A E F A T I O.

fero. Nam Illustriss. Celsitudo Vestra pro suo officio, ac potius pietate, & sapientia, quàm primùm Cracouiam Romàrediisset, & Ecclesiam de suo Sponso, & Episcopo certiolem fecisset; omnes nos, omnium laborum, & peregrinationũ suarum participes esse voluit, & fecit. Nam pretiosam negotiationis suę margaritam, Indulgentiam sanctam, quam quæsiuit, & apud S. D. N. Clementem Octauum, Summum Pontificem Romanum, & superioribus annis Regni Poloniae foelicissimũ pacificatorem, inuenit, obtinuit, attulit: cum Ecclesia multis modis communicauit: esurientes Catholicos spiritualibus impleuit bonis, & diuites & hæreticos dimisit inanes. Deum Opt. Max. precor, vt Reuerendiss. Celsitudinem Vestram, sanum, saluum, & incolumem in multos annos esse velit, iubeat, faciat: deinde vt hanc administrationem Illustriss. Celsitudinis vestræ, hoc difficili tempore, propitiustueatur: & vt pios conatus Amplitudinis Tuæ in suam æternam gloriam, benè fortunet. Cracouiae, in maiori Collegio, Calendis Martij. Anno Domini M. D. XCIII.

Ecclesiast. 33.

TIMENTI DEVM NON OCCVRRENT MALA: SED INTENTATIONE DEVS ILLVM CONSERVABIT, ET LIBERABIT A MALIS. SAPIENS NON ODI MANDATA, ET IUSTITIAS: ET NON ILLIDETVR, QVASI IN PROCELLA NAVIS. HOMO SENSATVS CREDIT LEGI DEI: ET LEX ILLI FIDELIS.

AD LECTOREM.



Saias Capite Quinquagesimo quinto dicit: Quærite Dominum, dum inueniri potest: inuocate eum, dum propè est. Derelinquat impius viam suam: & vir iniquus cogitationes suas: & reuertetur ad Dominum, & miserebitur eius: & ad Deum nostrum, quoniam multus est ad ignoscendum. Non enim cogitationes meæ, cogitationes vestræ: neq; viæ vestræ, viæ meæ, dicit Dominus. Quia sicut exaltantur cæli à terra, sic exaltatæ sunt viæ meæ à viis vestris: & cogitationes meæ, à cogitationibus vestris. Inter vias Dei, quibus venire solet ad homines, est indulgentia: & inter vias hominum, quibus venire & appropinquare solent ad Deum, est conuersio, contritio, confessio, pœnitentia, & satisfactio. Habet igitur Deus vias suas, quibus venire solet ad homines: & homines vicissim habent vias suas, quibus veniunt, redeunt, appropinquant, & appropinquare debent ad Deum. Viæ Dei sunt, de quibus dicit Propheta, Psalmo vigesimo quarto: Vniuersæ viæ Domini misericordia, & veritas, requirentibus testamentum eius, & testimonia eius. Viæ autem hominum sunt multiplices, & variæ: verumtamen omnes patent oculis Dei: Prouerb. cap. sedecimo. In summa, viæ hominum quædam recta, quædam obliqua: Viæ recta est viæ media, viæ angusta, ut fides, spes, charitas, prudentia, iustitia, temperantia, fortitudo, humilitas, obedientia, pœnitentia, patientia, castitas, perseuerantia, &c. Hac quæritur & inuenitur Deus: & hæc ducit ad vitam. Vnde David Psalmo sexagesimo octauo, & centesimo quarto: Quærite Deum, & viuet anima vestra: quærite faciem eius semper. Viæ obliqua est, viæ spatiosa, lata, & quæ non nisi per extrema vagatur: & hac impij recedunt à Deo. Huius viæ vltima meta Præcipitat captos, voluitq; per ardua saxa: ista ducit ad infernum. Vnde Saluator Matth. cap. septimo: Intrate per angustam portam: quia lata porta, & spatiosa viæ est, quæ ducit ad perditionem: & multi sunt qui intrant per eam. Quam angusta porta, & arcta viæ est, quæ ducit ad vitam: & pauci sunt, qui inueniunt eam. Verum enim verò Sancta mater Ecclesia Catholica, quia est sponsa summi sponsi Messia, mediatoris, redem-

AD LECTOREM.

redemptoris, & saluatoris domini nostri Iesu Christi, dum præcedentem ad illam supernam civitatem Ierusalem sponsum, & mediatorem suum sequitur, semper ubiq; mediam viam, non solum ipsamet eligit, & tenet; verumetiam filiis & pueris suis ostendit, & demonstrat, & non nisi per mediam viam, usque ad finem, & scopum perducit. Contra, vias obliquas, vias extremas, prohibitas, & suspectas: quia hæresis, erroris, insidiarum, scandalorum, laqueorum, fraudis, & periculorum plenæ sunt: semper, ubique cum suis ex industria declinat, & fugit cane peius & angue. Verbi gratia: Mittit sancta mater Ecclesia sacerdotem quempiam ad docendum & prædicandum Evangelium cum authoritate; statim ostendit illi viam mediam, & dicit cum beato Apostolo ad Romanos cap. duodecimo: Dico enim per gratiam, quæ data est mihi, omnibus qui sunt inter vos, non plus sapere quam oportet sapere: sed sapere ad sobrietatem, & unicuique sicut Deus diuisit mensuram fidei. Similiter, quoties in Ecclesia ad laudem, honorem, & gloriam omnipotentis Dei, & necessitatem atque utilitatem Ecclesiæ, siue orandum, vigilandum, ieiunandum, speculandum, vel aliquod pietatis opus, aut sacrum officium faciendum, toties sancta mater Ecclesia, teste D. Ambrosio, super cap. quartum Lucæ, medium tenendum, observandum, & amplectendum, docet ac præcipit: iuxta illud Apostoli, ad Rom. cap. duodecimo: Rationabile obsequium vestrum. Sed & Horatius lib. 1. Epistola sexta ad Numitium dicit:

Insani sapiens nomen ferat, æquus iniqui,

Ultra quàm satis est, virtutem si petat ipsam.

Et certè, Melius est (inquit D. Hieronymus, super sedecimum caput Prouerbiorum) in simplici conuersatione Deo deuotè seruire, quàm multis abundantem virtutibus: verbi gratia, elemosynis, orationibus, ieiuniis, castitate, doctrina, proximorum facta despicere, & de sua quasi singulari sublimitate gloriari. Si igitur sanctam matrem Ecclesiam Catholicam sequemur ducem, aberrabimus nunquam. Semper autem meminisse debemus illius verbi sancti Ambrosii: quia diabolus suo laqueo neminem captiuat, nisi per extrema vagantem: qui tenent viam mediam, tutiores sunt. Ab hac via media deerrauerat aliquando Propheta San-

A D L E C T O R E M.

Etus Iob: Iob capite tredecimo: sed statim seipsum correxit, emendavit, & in viam rediit, unde dicit: Etiam si me occiderit, in eo sperabo: verumtamen vias meas in conspectu eius arguam, & ipse erit saluator meus. Et David Psalmo vigesimo quarto: Vias tuas Domine demonstra mihi: & semitas tuas edoce me. Dirige me in veritate tua: & doce me, quia tu es Deus saluator meus, & te sustinui tota die. Et Psalmo centesimo decimo octavo: Erravi sicut ovis quæ periit: quære seruum tuum, quia mandata tua non sum oblitus. Propterea Propheta Isaias, cap. quadagesimo clamat: & vox clamantis sanctus Ioannes Baptista, Ioan. cap. 1. clamat: Parate viam Domini: rectas facite in solitudine semitas Dei nostri. His vocibus, præceptis, & exemplis, alii corrigunt semetipsos, redeunt in viam: & postquam redierint in viam, semper ubique exemplo matris Ecclesiæ tenent medium. Adde, quia & in hac causa indulgentiarum, omnibus Catholicis tenendum est medium. Nam Ecclesia, omnes, & singulas superstitiones, omnes & singulos prauos quæstus, & abusus, tanquam extrema per excessum, semper ubique, sed præcipue in Sacrosancto Concilio Tridentino seuerè prohibet, punit, tollit, abrogat, damnat, & anathematizat. Et ex aduerso aliam impietatem hæreticorum, quæ temerè, stultè, impiè, negat, blasphematur, oppugnat, & persequitur sanctas indulgentias, eodem modo tanquam extremum per defectum punit, tollit, damnat, & anathematizat. Atque hoc pacto, sancta mater Ecclesia, mediam viam tenendo, non solum ipsamet indulgentiis benè, & legitime utitur; sed etiam aliis, verum, proprium, & legitimum usum indulgentiarum demonstrat, & commendat. Et meritò sanè, nam neque Hesperus, neque Lucifer in cælo ita admirabilis, sicut indulgentia pœnitentibus in Ecclesia Catholica: nam indulgentia conscientiam hominis purgat, & serenam efficit: intellectum illuminat: voluntatem perficit: hominem infirmum, tanquam aqua in piscina probatica, ministerio angelorum sanat: publicanos, & peccatores lassatos in via iniquitatis ad Deum appropinquare facit: iram Dei auertit: omnes inimicitias, tam inter Deum & hominem, quàm inter angelos & homines componit, & aufert: concordiam introducit: discordantes reconciliat: ex prodigis & desperatis, filios adoptiuos, & charos efficit:

A D L E C T O R E M.

efficit: miseros, & perditos mortales, ad consequendam & possidendam æternam hæreditatem præparat, disponit, aptos & idoneos reddit: in summa, ex inimicis, amicos dei efficit: si modò fortes in fide, doctrinæ præceptis, & consiliis sanctæ matris Ecclesiæ obtemperare, obsequi, & pro viribus satisfacere voluerint. Solem igitur de mundo tollere videntur, qui indulgentiam ex Ecclesia Catholica tollunt, qua nihil à Deo Opt. Max. melius habemus, nihil iucundius, nam si libertatis, profectò & indulgentiæ, vel ipsum nomen, est charum. Quæ verò est ista hæreticorum istorum pœnitentiam cum indulgentiis contemnentium supina securitas & specie quidem blanda, sed re ipsa semper ubiq; prudentibus virginibus repudianda. Quòd si laborem, et pœnitentiam fugimus, virtus, iustitia, indulgentia, et medicina spiritalis fugienda. Spernant igitur spernendi hæretici indulgentiam. Nos verò in Ecclesia Catholica, sicut ceruus desiderat umbram: & sicut mercenarius præstolatur finem operis sui: sicut egenus, et pauper in pulvere expectat eleemosynam, et pollutus communes aquas et balneas; ita & nos gementes, & flentes, dum sumus in hac lachrymarum valle, sanctam indulgentiam summopere expectamus, & desideramus. Expectamus indulgentiam, quia peccauimus cum patribus nostris, iniuste egimus, iniquitatem fecimus. Et propterea cum Chananæa clamamus: Miserere nostri Domine fili David: Domine adiuua nos: fac nos participes indulgentiarum, vel saltem micarum, quæ cadunt de sancta mensa tua. Matth. cap. 15. Et iterum cum filio prodigo: Pater peccaui in cælum, & coram te: iam non sum dignus vocari filius tuus: fac me sicut unum ex mercenariis tuis: Luc. 15. Teneamus ergo indeclinabilem fidei confessionem, & petamus a Deo indulgentiam: solus vnus est, qui sine peccato natus est in similitudine carnis peccati: sine peccato vixit inter aliena peccata: sine peccato mortuus est, propter nostra peccata. non declinemus in dextram aut in sinistram. In dextram enim declinare, est seipsum decipere, dicendo, se esse sine peccato. In sinistram autem, per nescio quam peruersam, atque prauam securitatem, se tanquam impune dare peccatis. Vias enim, quæ à dextris sunt nouit Dominus, qui solus sine peccato est, & nostra potest delere peccata: peruersæ autem sunt, quæ à sinistris sunt

A D L E C T O R E M.

sunt amicitia cum peccatis. Talis etiam illi viginti annorum adolescentuli figuram noui populi præmiserunt, qui in terram promissionis intrârunt: qui nec in dextram, nec in sinistram dicti sunt declinasse. Non enim (inquit D. Augustinus, de peccatorum meritis, & remissione contra Pellagianos libro secundo, cap. trigésimo quarto) ea viginti annorum ætas comparanda est innocentia paruulorum: sed ni fallor, hic numerus mysticum aliquid adumbrat, & reserat. Vetus enim Testamentum, in Quinq. Moy- si libris excellit: Nouum autem, quatuor Euangeliorum authori- tate præfulget, qui numeri per se multiplicati ad vicenarium perueniunt. quater enim quini, vel quinquies quaterni, viginti sunt. Talis populus ut prædixi eruditus in regno calorum, per duo Testamenta vetus & nouum, non declinans in dextram super- ba præsumptione iustitiæ, neque in sinistram secunda delectatione peccati, & desperatione, in terram illius promissionis intrabit; ubi iam peccata ulterius nec nobis donanda optemus, nec in nobis pu- nienda timeamus, ab illo redemptore liberati, qui non venunda- tus sub peccato redemit Israël, ab omnibus iniquitatibus eius, siue propria cuiusque vita commissis, siue originaliter tractis. Et quia confitemur Vnum baptisma in remissionem peccatorum: creda- mus quoq. & confiteamur sacramentum pœnitentiæ in reparatio- nem, reformationem, sanctam methamorphosim, & renouatio- nem relapsorum: deinde agamus Deo gratias, pro thesauro re- demptionis, pro indulgentiis sanctis: & dicamus cum Propheta, Psalmo centesimo secundo: Benedic anima mea Domino: & om- nia quæ intra me sunt, nomini sancto eius. Benedic anima mea Domino, & noli obliuisci omnes retributiones eius. Qui propitia- tur omnibus iniquitatibus tuis: qui sanat (indulgentia) omnes in- firmitates tuas. Qui redimit de interitu vitam tuam: qui coronat te in misericordia, & miserationibus. Qui replet in bonis deside- rium tuum: renouabitur ut aquila iuuentus tua. Et cum Zacha- ria, Luc. cap. 1. Benedictus Dominus Deus Israël, quia visita- uit, & fecit redemptionem plebis suæ. Et erexit cornu salutis no- bis, in domo David pueri sui. Sicut locutus est per os sanctorum, qui à seculo sunt Prophetarum eius. Salutem ex inimicis nostris, & de manu omnium qui oderunt nos, etc. Et cum sancta Dei ge- nitricæ

A D L E C T O R E M.

nitrice virgine Maria. Magnificat anima mea Dominum. Et exultavit spiritus meus, in Deo salutari meo, etc. Et misericordia eius à progenie in progenies timentibus eum, etc. Huic ergo, cuius misericordia confirmata est super nos, & cuius veritas manet in æternum, sit laus, honor, & gloria, in secula seculorum, Amen. Vale Lector, & pro me Deum ora. Cracoviæ, in Collegio maiori, Calendis Martij, Anno Domini, M. D. XCIII.

Ad Colof. Cap. 3.

INduite vos ergo sicut electi Dei, sancti, & dilecti, viscera misericordiæ, benignitatem, humilitatem, modestiam, patientiam, supportantes invicem, & donantes vobismetipsis: si quis aduersus aliquem habet quærelam, sicut & Dominus donauit vobis, ita & vos. Super omnia autem hæc, charitatem habete, quod est vinculum perfectionis: & pax Christi, exultet in cordibus vestris, in qua & vocati estis, in vno corpore, & grati estote.



Epigrammata.

BOETIVS LIBRI TERTII, METRO PRIMO.

*Qui serere ingenium volet, agrum
Liberat arua prius fruticibus,
Falce rubos, filicemq; resecat;
Ut noua fruge grauis Ceres eat.
Dulcior est apum mage labor,
Si malus ora prius sapor edat:
Gratius astra nitent, vbi Notus
Desinit imbriferos dare sonos.
Lucifer, vt tenebras pepulerit,
Pulchra dies roseos agit equos.
Tu quoq; falsa tuens, bona prius
Incipe colla iugo retrahere;
Vera dehinc animum subierint.*

DANIEL SIGONIVS LELOVIENSIS, Pio Lectori.

*Vt possis Stygias errorum vincere noctes,
Inq; viam visa luce referre pedem;
Hæc firmo credas animo teneasq; per æuum
Dogmata, quæ sacro promittit ab ore liber,
Insignis pietate viri sudore paratus:
Dignus, qui letos viuat agatq; dies.*

EXPLI-

EXPLICATÆ HOC LIBRO CONTROVERSIÆ.

1. Circa primam Conclusionem ponitur & explicatur Controversia: Vtrum tota Lex vetus omninò sit euacuata, abrogata, destructa & funditus sublata: an aliquid remaneat ex lege?

Ibidem, circa Corollarium Tertium, de signis & miraculis, quæ fieri solent suo tempore & loco in Ecclesia Catholica, præcipuè sub Indulgentijs.

2. Circa secundam Conclusionem: Vtrum proximus pro peccatis proximi possit & debeat satisfacere?

3. Circa Quartam Conclusionem: Vtrum in veteri lege fuerunt Indulgentiæ?

4. Circa Quintam Conclusionem ponitur & explicatur controversia: Vtrum passiones, merita, & Satisfactiones Sanctorum, vnà cum Christo thesaurisent in Ecclesia thesaurum Indulgentiarum.

5. Circa Sextam Conclusionem: Vtrum solus Papa habeat potestatem concedendi Indulgentias? &c.

Item conciliantur loca sacra scripturæ.

Primus locus Prouerbiorum 26. Ne respondeas stulto secundum stultitiam suam, ne efficiaris illi similis: Responde stulto secundum stultitiam suam, ne sibi sapiens videatur.

Secundus locus Deutero. 22. & ad Galat. cap. 6. Vnusquisque onus suum portabit, & alter alterius onera portate: & sic adimplebitis legem Christi.

Tertius locus, ad Rom. cap. 8. Non sunt condignæ passiones huius temporis ad futuram gloriam, quæ reuelabitur in nobis. Et 2. ad Corinth. 4. Id quod in præsentis est momentaneum & leue tribulationis nostræ, supra modum in sublimitate æternæ gloriæ pondus operatur in nobis, &c.

Præterea probantur Indulgentiæ traditionibus, Authoritate sacra scripturæ, Sacris Concilijs, Testimonijs Sanctorum Patrum, & Rationibus.

Prouerb.

Prouerb. 25.

AVFER RVBIGINEM DE AR-
GENTO: ET EGREDIE-
TVR VAS PVRISSIMVM.

GENERALIS

QVÆSTIO.

VTRVM AD IVSTIFICATIONEM PECCATORIS CONCVRRANT, CONDVCANT, ET NECESSARIO REQVIRANTVR INDVLGENTIÆ?

CONCLUSIO PRIMA.

Catholici summo consensu credunt, confitentur, prædicant, & docent, Messiam, legislatorem, mediatorem Christum Dominum, Indulgentias, vnâ cum Sacerdotio, Lege, Sacrificio, & benedictione, ex Synagoga, ad Ecclesiam transtulisse, reformasse, & perfecisse. ad Hebræ. capit. 7. & 8. Item redemptorem, & saluatorem eundem Christum Dominum, indulgentiarum potestatem in Ecclesia reliquisse: atque vsum Indulgentiarum Christiano populo summo opere necessarium, & maximè salutarem esse.

COROLLARIA.

1. Fidelis sermo, & omni acceptione dignus, quia Messias, Legislator, & Mediator, Dominus noster Iesus Christus, Indulgentias vnâ cum Sacerdotio, Lege, Sacrificio, & benedictione, ex Synagoga ad Ecclesiam transtulit, reformauit, & perfecit.
2. Indulgentiæ sunt de fide: quia ad decimum articulum fidei, Credo remissionem peccatorum, reducuntur.
3. Sicut sine fide impossibile est placere Deo; ita sine fide impossibile est consequi Indulgentiam, & remissionem peccatorum: quia Christus Dominus Matth. cap. 9. dixit: Confide fili, remittuntur tibi peccata tua.
4. Credendum est omnes orationes Ecclesiæ, Eleemosynas quoque, & opera iustitiæ, succurrere recognoscenti mortem suam ad conuersionem.

CONCLUSIO SECUNDA.

Credendum est orationibus, ieiuniis, & eleemosynis, proximum à proximo, non solum in Ecclesia, verumetiam in purgatorio, & præcipue sub indulgentia, iuuari: atque proximum pro peccatis proximi, Deo adiuuante, satisfacere posse.

COROLLARIA.

1. Nemo potest satisfacere Deo, nisi satisfecerit & proximo.
2. Satisfactio simpliciter paucorum est: sed satisfactio secundum quid, est communis.
3. Nemini desperandum de indulgentia, quicumque in toto corde cōuersus, contrito corde egerit pœnitentiam: quia nullum est peccatum, quod per veram pœnitentiā non deleatur; sed pœnitendum de omnibus.
4. Secundum verbum & sententiam Domini, cuicumque sub Indulgentia plus dimittitur, ille plus debet diligere: nam cui minus dimittitur, minus diligit.

CONCLUSIO TERTIA.

Sicut alia media à Deo ordinata, sunt necessaria ad iustificationem; ita & indulgentiæ.

COROLLARIA.

1. Vota, peregrinationes, offertoria, & alia spiritualis vitæ exercitia commendat sacra scriptura: nam per huiusmodi exercitia, homines vt plurimum consequuntur indulgentiam & iustificationem.
2. Qui peregrinantur, debent peregrinari nō in feruore, qui fit ad tentationem; sed communicantes Christi passionibus. 1. Pet. 4.
3. Ne despicias hominem auertentem se à peccato: neque improperes ei: memento quoniam omnes in corruptione sumus. Eccl. 8.

CONCLUSIO QUARTA.

Quamuis Indulgentiarum nomen, non ita frequenter
 lega-

legatur in Scripturis; res tamen ab origine mundi
semper adhuc fuit in usu.

COROLLARIA.

1. Indulgentiarum usus in Ecclesia non est res noua, ut falsò credunt heretici: quia sicut in lege sub Moyse, Sacerdotibus, & Prophetis Iudei suo modo necessariò Indulgentijs utebàtur; ita in Euangelio sub Petro, Apostolis, & successoribus Petri, per traditionem usque adhuc Christiani Indulgentijs necessariò vtuntur.

2. Moyses in passione & improperijs Christi maiores aestimauit repositas diuitias; quàm in thesauro Ægyptiorum: & propterea, ut esset particeps promissionum & Indulgentiarum, magis eligebat affligi cum populo Dei, quàm temporalis peccati habere iucunditatem. ad Heb. 11.

3. Quoniam passio Christi, hoc egit implenda seu futura, quod iam facit impleta atq; præterita; propterea Fides & Indulgentiæ, tam veteris quàm Noui testamenti, subiecto sunt eadem; sed ratione differunt. D. Augustinus.

4. Quia Indulgentiæ veteris testamenti, figura & vmbra fuerunt Indulgentiarum Noui testamenti: itaq; scripturæ, quæ leguntur de Iubileis & Indulgentijs veteris testamenti, sunt priuilegia Iubileorum & Indulgentiarum Noui testamenti.

5. Vel sola traditio Sanctorum Patrum, possessio, & perpetuus ususfructus Indulgentiarum in Ecclesia Catholica, benè, legitime, & sufficienter probant, & confirmant causam Indulgentiarum contra hæreticos.

6. Vbicunq; in sacris Concilijs, & Canonibus historia Indulgentiarum habetur; inducitur non tanquam noua institutio; sed tanquam memoria rei antiquæ.

7. Sicut morbus & medicina sunt simul naturæ: ita peccatum & Indulgentia simul naturæ.

8. Indulgentiæ in stationibus Romæ à B. Gregorio sunt institutæ.

9. Non esse laborandum de nomine, quando de re constat.

10. Quòd si ministratio mortis literis deformata in lapidibus fuit in gloria, ita ut non possent intendere filij Israël in faciem Moyse, propter gloriam vultus eius, quæ euacuatur; quomodo non magis ministratio spiritus erit in gloria? Nam si ministratio damnationis in gloria est; multò magis abundat ministerium iustitiæ. 2. ad Corinth. cap. 3. & Exod. cap. 34.

CONCLUSIO QUINTA.

Ex superabundantia satisfactionum, supererogationum, passionum, & meritorum Messiae, mediatoris, redemptoris, & saluatoris Domini nostri Iesu Christi, Beatae Dei genitricis virginis Mariae, & omnium electorum, à primo iusto, usque ad ultimum, hoc est Capitis, & membrorum, sicut Synagoga, ita Ecclesia Catholica habet caelestem thesaurum indulgentiarum.

COROLLARIA.

1. Vniuersalis Indulgentia incipiendo ab Hierosolyma, & inde ab Ecclesia sancta Romana, in omnem terram, & in fines orbis terrae, per omnes & singulas Ecclesiae Catholicae partes, exit, manat, ac fundatur, sicut fluuius Paradyfi, qui irrigat terram: sicut unguentum in capite, quod descendit in barbam, barbam Aaron, quod descendit in oram vestimenti eius, sicut ros Hermon, qui descendit in montem Sion. Psalm 132. Osee 14. Lucae 24.

2. Christus peccata nostra ipse pertulit in corpore suo super lignum; ut peccatis mortui, iustitiae viuamus: cuius liuore sanati estis. 1. Pet. 2.

3. Beata Dei genitrix virgo Maria, cum saepe alias, tum in hora passionis Christi thesaurum Indulgentiarum Ecclesiae thesaurizauit, quando gladius doloris animam eius pertransiuit. Lucae 2.

4. Sancti, thesauro redemptionis & Indulgentiarum ita utebantur; ut etiam ipsi aliquid apponerent, non solum propter praeceptum & exemplum Christi; verum etiam quia non debent filij parentibus thesaurizare, sed parentes filijs. 2. ad Corinth. 12.

5. Haec duo non pugnant, nempe, Non esse condignas passiones huius temporis ad futuram gloriam, quae reuelabitur in nobis, ad Ro. 8. & tamen fieri posse per adiutorium gratiae Dei, ut possint inueniri passiones condignae: quia scriptum est, id quod in praesenti est momentaneum & leue tribulationis nostrae; supra modum in sublimitate aeternum gloriae pondus operatur in nobis. 2. Corinth. cap. 4.

6. Sancta mater Ecclesia Catholica est fidelis depositi thesauri Indulgentiarum testis & custos: nam ab immemorabili tempore ita Indulgentijs utitur; ut & ipsa suis meritis promoueat filios ad indulgentiam, &

CONCLUSIONES.

5

tiam, & iustificationem, tanquam Rebecca Iacobum filium ad benedictionem. Gene 27.

7. Deus, sicut contra peccatum originale procurauit, ordinauit, & dedit circumcisionem, & fontem Baptismi; ita contra peccata actualia procurauit, ordinauit, & dedit poenitentiam, absolutionem, satisfactionem, & fontem Indulgentiarum.

8. Deus vult vt peccatores adulti per aliqua officia poenalia fiant participes Indulgentiarum.

9. Necessesse est sub Indulgentijs maiore patientia, iustitia, & humilitate portare crucem, & non dimittere iniunctas poenitentias: tum quia scriptum est Eccl. cap. 5. De propitiatu peccatorum noli esse sine metu, & ne adijcias peccatum super peccatum: tum quia in multis offendimus omnes, Iac. 3. tum quia satisfactionis opera sunt preferuatiua à futuris peccatis, teste D. Thoma.

10. Indulgentiæ suppleunt vicem satisfactionis, vt est satisfactio poenitiua, non vt est medicatiua. D. Thomas.

11. Fidelis sermo & omni acceptione dignus, quòd Christus Iesus venit in hunc mundum peccatores saluos facere, quorum primus ego sum: sed ideò misericordiam consequutus sum; vt in me primo ostenderet Christus Iesus omnem poenitentiam ad informationem eorum, qui credituri sunt illi in vitam æternam. I. ad Timoth. 1.

CONCLUSIO SEXTA.

Solus Papa, cui primò & principaliter dispensatio vnà cum clauibus credita & tradita est, habet plenariam potestatem dandi indulgentias: Concilium autem, Legati, Episcopi, Commissarii, & alii, secundum taxationem & dispensationem eius. D. Thom.

COROLLARIA.

1. Thesaurus Ecclesiæ non est diuisus in Ecclesia, sed est vnus & indiuisus in tota Ecclesia: ideoq; ad vnum & primum caput Ecclesiæ, hoc est, ad Papam potissimùm spectat eius dispensatio; Episcopis verò competit, tanquam coadiutoribus summi Pontificis, qui in partem sollicitudinis Ecclesiæ gubernandæ sunt assumpti.

2. Solus Petrus Romanus claudit & aperit, regna cælorum; alij verò ab eo

rò ab eo missi, claudunt & aperiunt regnum cœlorum. Orig. sup. Mat.

3. Oecumenicum generale Concilium, legitime cum autoritate consensu Summi Pontificis in Spiritu Sancto congregatum, habet plenam iurisdictionem Indulgentias concedendi. sed capitulum Cathedralis Ecclesię sede vacante, non habet auctoritatem dandi Indulgentias : quia est potestas Episcopalis.

4. Indulgentiæ dantur extra sacramenta : quia pertinent ad clauem iurisdictionis.

5. Nullus potest sibi soli dare indulgentiam; sed potest uti ea quã dat pro alijs.

6. Homo per se cadere potest; sed sine gratia Dei resurgere non potest, contra Pelagium.

7. Dispensatores indulgentiarum, quia redemptionis thesaurum dispensant, & mediatoris officio funguntur, debent exemplo mediatoris sui capitis Christi medium tenere : non debent esse nimium seueri propter infirmos, neq; nimium faciles propter discolos & inquietos, ne disciplina Ecclesiastica eneruetur.

8. Apud liberalem Dominum, dispensator non debet esse parcus. D. Chrysostomus.

9. Indulgentiæ non dantur pro temporalibus secundum se; sed ut temporalia ordinantur ad spiritualia : ideò non est Symonia.

10. Indulgentiæ non mensurantur secundum deuotionem, vel laborem recipientis, aut secundum quantitatem dati, aut secundum causam pro qua dantur; sed secundum intentionem dantis.

11. Indulgentiæ datæ ab existenti in mortali peccato, tantum valent, quantum à sanctissimo, cum non remittat ex vi suorum meritorum; sed ex vi meritorum depositorum, creditorum, & reconditorum in thesauro Ecclesiæ.

12. Cum indulgentiarum beneficium opus sit gratiæ diuinæ, nihil nisi Dei amicis valere potest: unde sequitur, quia indulgentiæ non valent existenti in mortali peccato propter obicem.

CONCLUSIO SEPTIMA.

Indulgentiæ tantum valent, quantum sonant : si adsit autoritas dantis, charitas recipientis, & rationabilis, iusta, & pia causa.

COROLLARIA.

Prædi-

CONCLUSIONES.

7

1. Prædicatores nunquam debent assertiuè publicare indulgentias; sed recitatiuè, vel opinatiuè; ne falsas prædicent, & alios in errorem inducant.

2. Forma indulgentiarum nisi ad iniunctas, vel nō iniunctas pœnitentias coarctetur, vniuersim de omnibus intelligitur, idque quantum ad pœnas temporales, quæ vel hîc, vel in purgatorio sunt nobis decretæ.

3. Antiquitus in more fuit, indulgentias nō nisi de iniunctis pœnitentijs coferri; non tamen lata est lex, ne de alijs conferantur; quoniam nullibi talis lex est scripta.

4. Ecclesia nunc non modò de iniunctis; sed absolutè de omnibus pœnis indulgētias tribuit, absq; vlla iniunctarum pœnitentiarum mentione.

5. Qualitatem commendat numerus.

6. Spirituum ponderator est Dominus. Proverb. 16.

7. Consilium solum & sanum, quod absque curiosa discussione de præcisa, vel euidenti & certa quantificatione, seu mensuratione indulgentiarum studeat homo prius, secundum possibilitatem suam, & qualitatem deuotionis suæ tales acquirere, pondus autem valoris illi relinquere, qui omnia fecit, & facit in numero, pondere, & mensura. Sapient. 11.

8. Melius est meritum & præmium in infinitum, quàm quæcunque indulgentiæ.

9. Beati quorum remissæ sunt iniquitates, & quorum tecta sunt peccata. Beatus vir cui non imputauit Dominus peccatum, nec est in spiritu eius dolus. Psalm. 31.

CONCLUSIO OCTAUA.

Catholici summo consensu credunt, confitentur, affirmant, & docent, Christum Dominum, Beato Petro clauigero, & eius successoribus, thesaurum Ecclesiæ reliquisse & cōmisisse, salubriter fidelibus dispensandum, & pro pijs & rationalibus causis, nunc pro totali, nunc pro partiali remissione pœnæ temporalis pro peccatis debite, tam generaliter, quàm specialiter, verè pœnitentibus, & confessis, misericorditer applicandum.

COROLLARIA.

1. Catholici credunt, cofitentur, & docent, in confeſſione debita poenitentis, & ordinata ac legitima abſolutione ſacerdotis, poenam æternam cum culpa remitti; ſed temporalem poenam ſæpè remanere.
2. Sententia ſacerdotis, qua hominem vel ſolvit ad gratiam, vel ligat ad poenam, rata eſt apud Deum.
3. Spontanea poenitentia huius ſæculi, plus valet ad remiſſionem poenæ, quàm æqualis in purgatorio, & hoc intelligitur ceteris paribus.
4. Poenam temporalem intelligimus, tum in præſenti vita, tum in futura, ſive in purgatorio. ſed poena alterius vitæ, propriè peccatis omnibus & ex condigno debetur; poena autem huius vitæ ſolùm ex congruo certis peccatis à Deo infligi ſolet.
5. Poena purgatorij acerbior eſt, quàm aliqua quæ ſit in hac vita.
6. Reatum poenæ temporalis, qui interdum remanet poſt reconciliationem cum Deo, bonis operibus redimi poſſe: & per laborioſa opera, quæ etiam ſpontè ſuſcipiuntur, per partes minui & expiari.
7. Quamvis aliena ſatisfactione poteſt poena temporalis remitti; tamen indignus aliena ſatisfactione pro poena ſibi debita, non confequitur veraciter fructum indulgentiæ.
8. Quanquam Deus & Eccleſia, fingit laborem in præcepto Pſal. 93. tamen omnia poſſibilia ſunt credenti. Marc. 9.

CONCLUSIO NONA.

Quia actus actiuorum ſunt in patiente prædiſpoſito; idcirco, quantò quis melius ſe præparat, & diſponit ad indulgentiam; tantò maiorem acquirit & reportat indulgentiarum gratiam.

COROLLARIA.

1. Sincerum eſt, niſi vas quodcunque infundis aceſcit.
2. Non modò ceſſatio à peccatis, & eorum deteſtatio, cor contritum & humiliatum, fides, ſpes, charitas; verumetiam timor Dei, prudentia, iuſtitia, fortitudo, temperantia, patientia, confeſſio, abſolutio, ſatisfaction, oratio, ieiumum, eleemoſyna, & alia pia ſpiritualis vitæ exercitia, vtiliter præparant & diſponunt hominem ad indulgentiam, & fideliter præſervant à futuris peccatis.

3. Pars

3. Pars est satisfactionis, Charitas erga Deum & proximū: signum autem charitatis erga proximum, Si tu dissolvas colligationes impietatis, solvas fasciculos deprimentes, & ubi iniqua est cautio, ubi iniqua chirographa, ubi opprimuntur pauperes calumnia; ibi fasciculi cautionum, & omnia iniquitatis vincula sunt rumpenda: quia facere misericordiam & iudiciū magis placet Deo quā victimæ. Prouer. 21.

4. Qui querit & petit indulgentiam in Ecclesia, si quod habet odium erga proximum, abijciat, abijciat iram, vindictam, malitiam, & eat prius reconcilietur proximo suo; & tunc veniens, quærat, pulset, & petat in Ecclesia indulgentiam: quia scriptum est Eccl. 28. Relinque proximo tuo nocenti te, & tunc deprecanti tibi peccata soluentur. Homo homini reſeruat iram, & à Deo quærit medelam. In hominem ſimilem ſibi non habet miſericordiam, & de peccatis ſuis deprecatur. Ipſe dum caro ſit, reſeruat iram, & propitiationem petit à Deo. Quis exorabit pro delictis illius? memento nouiſſimorū, & deſine inimicari.

5. Extra Eccleſiam Catholicam, nulla pœnitentia, nullus iubileus, nulla indulgentia, nulla peccatorum remiſſio, nulla ſalus.

6. Tentat Chriſtum, qui ſub indulgentia non indulgentia, ſed plagis & carcere digna committunt.

7. Ad euitanda ſcandala, vt non vituperetur miniſterium Eccleſiæ, Sacroſanctum Tridentinum Concilium, omnes & ſingulos abuſus circa indulgentias, vt ſunt prauī quæſtus, ſuperſtitiones, ignorantie, & irreuerentiæ, ſub anathemate prohibet, abrogat, tollit, & damnat.

8. Fidelem & prudentem Chriſtianum, abuſus non poſſunt nec debent ſcandalizare: quoniam pax multa diligentibus legem Dei, & Eccleſiæ indulgentias, & non eſt illis ſcandalum. Pſalm. 118.

9. Sacroſanctum Concilium Tridentinum generali decreto decreuit, ordinauit, & mandauit, vt loci ordinarij omnes & ſingulos abuſus circa indulgentias deferant: & vt ſancta ſedes Apoſtolica, eosdem abuſus corrigat & emendet; ne hoc inſigne & ſanctum nomen indulgentiarum ab hæreticis blaſphemetur.

10. Hæretici, qui indulgentias negant, blaſphemant, & oppugnant, toto cælo errant neſcientes ſcripturas: de fide ſine fide diſputant: cœci ſunt & duces cœcorum: qui non ſolū alijs & ſibi iniuriam faciunt; ſed etiam ore ſuo ſe indulgentia, gratia, & auxilio Dei indignos, & pœna dignos iudicant & condemnant: homines alioqui miſeri & infirmi cū ſint; tamen cum ſuperbis Pharifæis, Scribis, & Pelagianis, medicum cum medicina, tanquam infani contemnunt, ſpernūt, & conculcant: inimici crucis Chriſti, principia religionis, contra conſcientiam, contra ſenſum & conſenſum omnium fidelium, impuden-

puidentissimè negant: tenebras pro luce, lutum & sordes pro fonte & lauacro, maledictionem pro benedictione, carcerem pro luce publica stultissimè & iniquissimè peruersi eligunt: nesciunt de quibus affirmēt, vel negent. & ideò metas contradictionis ipsi manifestè incurrunt; & iam rei contradictionis publicè tenentur, quia remissionem peccatorū ponunt, & indulgentias negant. Vē illis, qui in contradictione Chore perierunt. Ergo iustè à Synodo Tridentina anathematizantur.

11. Qui nocet, noceat adhuc: & qui in sordibus est, sordescat adhuc: & qui iustus est, iustificetur adhuc, & sanctus sanctificetur adhuc. Apocal. 22.

12. Infinitus & indiuisus est thesaurus indulgentiarum: quo, qui vñ sunt, participes facti sunt amicitiae Dei. Sapient. cap. 7.

13. Nemo vnquam Catholicus pro indulgētia & remissione peccatorum (magis quàm gentiles pro aris & focis, pro Repub. & libertate) mortem oppetere dubitauit.

14. QVÆSTIO CVM SVIS CONCLVSIONIBVS ET COROLLARIIS ad intentionem & Canonem sacræ scripturæ, iuxta definitionem sanctæ matris Ecclesiæ Catholicæ, Apostolicæ, Romanæ, secundum sensum & consensum sanctorum Patrum, est vera, & non nisi catholicè defendenda.



CONTROVERSID DE INDVLGENTIIS.

Vtrum ad iustificationem peccatoris, concurrant, conducant, & necessario requirantur Indulgentiæ.



T VIDETVR QVOD NON: quia Scribæ, & Pharifæi in Euangelio Matth. Cap. 9. Lucæ 11. &c. contradicunt Christo vnâ cum Indulgentiis.

Item, NOVATIANI HAERETICI, in peccatum prolapsi, & ad Ecclesiam lachrymis, gemitu, & dolore cordis, (vt Diui Cypriani verbis vtar) pulsantibus, diuine pietatis, & bonitatis paterne solatia, & subsidia claudebant: nec ad fouenda

vulnera admittebant vulneratos; sed sine spe pacis, & communicationis relictos, ad luporum rapinam, & diaboli prædam proijciebant.

Isti ad suam hæresim scripturis abutebantur. Eccls. ca. 7. vbi legitur sic: *Considera opera Dei: quod nemo possit corrigere, quem ille despexerit.*

Item, Ieremiæ cap. 13. *Si mutare potest Æthiops pellem suam: aut pardus varietates suas: & vos poteritis benefacere, cum didiceritis malum.*

Item, Malach. ca. 1. & ad Ro. 9. *Iacob dilexi, Esau autem odio habui.*

Item, ad Hebr. ca. 6. *Impossibile enim est eos, qui semel sunt illuminati, gustauerunt etiam donum cælesti, & participes facti sunt Spiritus Sancti, gustauerunt nihilominus bonum Dei verbum, virtutesq; seculi venturi, & prolapsi sunt, rursus renouari ad pœnitentiam.*

Item, ad Hebr. 12. *Ne quis fornicator, aut prophanus vt Esau, qui propter vnâ escam vendidit primitiua sua. Scitote enim quoniam & postea cupiens*

cupiens hæreditare benedictionem, reprobatus est. Non enim inuenit pœnitentiæ locum, quanquam cum lachrymis inquisisset eam.

Et, 1. Ioan. cap. 5. *Qui scit fratrem suum peccare peccatum non ad mortem, petat & dabitur ei vita, peccanti non ad mortem. Est peccatum ad mortem: non pro illo dico vt roget quis. Omnis iniquitas peccatum est: & est peccatum ad mortem.*

Item, VALDENSES asserunt Papam nullam prorsus habere potestatem indulgentias concedendi: quas si concefferit, dicunt esse nullius virtutis.

Item, IOANNES WICLEFF, qui nunquam à Valdensibus deficit, Quadragesimo primo Articulo dicit: Fatuum est credere Indulgentias Papæ, & Episcoporum.

Item, IOANNES VESTPHALVS, eandem tenet & tutatur hæresim.

Item, MARTINVS LVTHERVVS asserit, indulgentias nullius esse momenti, & dicit eas esse pias fraudes fidelium.

Adhæc hæretici Lutherani contra Indulgentias arguunt sic.

PRIMA RATIO, Scriptum est, quia Deus est qui iustificat: Ergo nulla indulgentia ad iustificationem necessaria.

CONSEQUENTIA ab autoritate.

ANTECEDENS, ad Romanos capite octauo.

SOLVTIO. Negatur consequentia: tum quia in alio sensu dicit S. Apostolus illa verba, & in alio accipiunt & malè intelligunt hæretici: tum quia Deo iustificanti non aduersantur; sed subseruiunt indulgentiæ, tanquam media à Deo ordinata, & tanquam instrumenta proprio artifice. Nam Deus quando via ordinaria iustificat, tum per media ordinata iustificat, inter quæ numerantur Indulgentiæ.

SECUNDA RATIO. Sola fides iustificat: ergo non Indulgentiæ.

CONSEQUENTIA à diuersis.

ANTECEDENS, Abacuc 2. ad Rom. cap. 3. & ad Galat. 3. Deus ex fide iustificat gentes.

SOLVTIO. Non valet consequentia: tum quia in scripturis *Fides iustificat* legitur, sed *sola fides iustificat* non legitur: tum quia fides cum indulgentia concurrunt ad iustificationem, tantum abest vt se mutuo excludant, aut repugnent.

TERTIA RATIO. In Euangelio non legitur alia potestas remitti-

remittendi peccata, nisi illa Ioann. 20. Quorum remisistis peccata, remittuntur eis. &c. sed illa potestas solum intelligitur de remissione, quæ fit in sacramento Pœnitentiæ, relaxatio autem per Indulgentias fit extra sacramentum : ergo illa non legitur in Euangelio.

MAIOR nota.

MINOR probatur : quia peccatum extra sacramentum remittere seu quò ad culpā, seu quò ad pœnam, est potestatis excellentiæ, quam Christus habuit & nulli commisit : ergo id Ecclesia facere non potest.

PRIMA SOLVTIO. Ad hoc argumentum respondet S. Thomas super 4. Distinct. 20. Articul. 3. quòd effectus sacramentalis absolutio- nis est minuere pœnam peccato debitam; sed tamen extra sacramen- tum per Indulgentias non est pœnam dimittere aut diminuere, sed soluere : nam qui indulgentiam confert, applicat thesaurum Ecclesiæ, quo suscipiens pœnam soluit : tenere enim videtur quòd collatio in- dulgentiarum non est absolutio à pœna, sed potius solutio.

SECUNDA SOLVTIO. Ad maiorem respondetur, quòd remittere peccata quòad culpam, alligatum est sacramētis; sed non quòad pœ- nam : quia ipsa sine nouæ gratiæ infusione solubilis non est.

TERTIA SOLVTIO. Negatur Consequentia : quia potestas remit- tendi peccata per indulgentias, legitur Matth. 16. *Et tibi dabo clauēs regni cælorum: & quodcunq; ligaueris super terram, erit ligatum & in cæ- lis: & quodcunq; solueris super terram, erit solutum & in cælis.*

QUARTA RATIO. Vbi est indulgentia ibi debet esse recō- ciliatio & pro peccatis satisfactio. sed nulla potest pro peccatis à peccatore fieri satisfactio : igitur nulla est reconciliatio & Indul- gentia.

MAIOR, secundum communem legem iustitiæ.

MINOR. Quodnam æquiualens offeret homo Deo suo pro pecca- to ? nullum. Adde, quia nusquam legitur in scripturis verbum *Satis- factio* : igitur nulla est Satisfactio.

CONSEQUENTIA Quia non licet aliquid in Ecclesiam introduce- re, quod non sit expresse positum in scripturis: quia scriptum est, *Non addes, non minues.* Apocalip. 22.

ANTECEDENS est notum, & patet legenti scripturas.

PRIMA SOLVTIO. Negatur consequentia : pro cuius rei euidentia notandum : quia æquiualentis æquiualentia aliquorum ad inuicem multipliciter dicitur. nam interdum respicit valorem rerum naturali- um, quæ quantitatem mollis vel virtutis consequitur ; veluti sunt res diuersarum specierum, quæ sicut naturali perfectione, ita etiam valo-

ris diuerſitate diſtinguitur: atque ita inter huiuſmodi res ſpecie diſſe-
rentes nulla poteſt eſſe æquiualentia.

2. ALIO MODO. æquiualentia reſpicit commodum humanæ ſocietatis, vt videre eſt in com-
mutationibus rerum, & ſic non eſt ad propoſitum: quia peccatum ad
commodum humanæ vitæ referri non poteſt.

3. ALIO MODO. reſpicit dictamen iuſtitie diſtributiue, pro qualitate cuiuſque operis
præmia, vel pœnas decernentis: & hoc quidem dupliciter: aut ſecun-
dum rigorem ſtriſtiſſimæ iuſtitie; ita vt lex iuſta nihil demere poſſit
in præmijs, nec addere in pœnis, & hoc modo nulla actio præſentis
vitæ poteſt reddere æquiualens pro peccato quo læditur Deus, qui
eſt bonum infinitum: propterea nulla pœna poteſt eſſe ita mala, quan-
tum malum eſt Dei offeſa. AUT ſecundum voluntariam acceptio-
nem illius, cui redditio æquiualentis erit facienda: & ſic accipitur ſa-
tisfactio noſtra ſecundum liberaliſſimam Dei acceptionem.

4. ADDE, quia ſatisfactio Chriſti vt eſt ſuppoſitum, eſt infinita, &
noſtra ſatisfactio innititur ſatisfactioni Chriſti: ergo ſic Deo eſt acce-
ptabilis, & quodammodo æquiuales. Porro, ſi quis velit humanæ natu-
ræ vires ita defendere, vt dicat, ſicut homo ſpontè cecidit, ita etiã ſpon-
tè poteſt reſurgere & ſatisfacere, nõ procul aberit ab heresi Pelagiana.

SECUNDA SOLVTIO. Non valet conſequentia: tum quia ex purè
negatiuis nihil concluditur: tum, quia teſte Ariſtotele, plures ſunt res
quàm verba: tum quia Antecedens eſt falſum. nam verbum ſatisfacti-
onis expreſſè legitur, Leuit. cap. 10. Actu. 17. 1. Pet. 3. Sed & in alijs
multis ſcripturæ locis facile poteſt inueniri, ſi non expreſſè, tamen im-
plicitè ſatisfactio.

TERTIA SOLVTIO. Ad minorem dico, licèt homo non poteſt pro
peccato ſatisfacere Deo ſimpliciter; poteſt tamen ſecundum quid.

QVINTA RATIO. Miniſtris Eccleſiæ non eſt tradita po-
teſtas à Deo ad deſtructionem, ſed ad ædificationem. 2. Corinth.
13. ſed poteſtas largiendi, ſeu concedendi indulgentias eſt huius-
modi: deſtruit enim ſatisfactionem, & dignos fructus pœniten-
tiæ, qui plurimum profunt pœnitentibus: ergo indulgentiæ non
ſunt neceſſariæ.

MAIOR vera.

MINOR nota.

SOLVTIO. Negatur conſequentia: quia indulgentiæ ſi modò le-
gitimè & ordinatè fuerint conceſſæ, & in charitate, corde contrito
ſuſceptæ, non deſtruunt, ſed ædificant: quia hominem ex faucibus di-
aboli liberant, eripiunt, & conſeruant; tum ad amicitiam & gratiam
Dei pœnitentes promouent. Signum eſt, quia multi publicè confiten-
tur ſub indulgentijs in Eccleſia ſe tantum beneficij accepiffe ſenſibili-
ter, ac ſi quis ſarcinarum onus ex eis depoſuiſſet.

SEX-

SEXTA RATIO. Quidquid eneruat & funditus euertit Ecclesiasticam disciplinam; illud ad iustificationem & iustitiam non est necessarium. sed indulgentia eneruat & funditus euertit Ecclesiasticam disciplinam: ergo indulgentia ad iustitiam & iustificationem non est necessaria.

MAIOR à repugnantibus.

MINOR probatur. Cùm enim homines à pœnis temporalibus per indulgentias se credunt absolutos; nō solū pietatis opera negligunt; sed sine timore Dei, sine pudore hominum perpetrant mala, iuxta illud Ecclesiast. cap. 8. *Etenim, quia non profertur citò contra malos sententia, absq; timore nullo filij hominum perpetrant mala.*

SOLVTIO. Negatur consequentia: quia alia intentione largitur Ecclesia indulgentias: nam ad ædificationem, non ad destructionem, Vnde Innocentius de Pœnitentia & remissione cap. Cùm ex eo prudentes, inquit, viri tantum absunt ab hoc crimine; vt nihil magis ad bonorum operum culturam internamq; animi pietatem alliciat. Etenim pia mater Ecclesia largitione indulgentiarum, pios filios suos feruentiores reddit, errantes reuocat, desides excitat, otiosos animat, desperatos confortat, deniq; omnes filios suos armat, lætificat, & munit. Bonorum ergo, & non malorum indulgentiarum, largitio mater est & origo, qua fides crescit, spes nutritur, charitas augetur, conscientia purgatur, totius populi Christiani deuotio feruet, pietas propagatur, mali beneficio non pœna ad officium & disciplinam reformantur & reducuntur, sacramenta frequentantur, morbi curantur, & omnia bona fidelibus pariter cum indulgentia veniunt. Ergo, qui sanctis indulgentijs derogant, ipsi profectò disciplinam Ecclesiasticam eneruant, & sine causa Ecclesiam Catholicam calumniantur: sed proprium est hæreticis benefacta Ecclesiæ sanctæ in malam partem interpretari, aliena curare, suorum obliuisci.

SEPTIMA RATIO Paganorum ex D. Augustino. Quidquid in Repub. eneruat & extinguit disciplinam, & bonos mores corrumpit, illud ad iustitiam & iustificationem non est necessarium. sed indulgentia in Republica eneruat & extinguit disciplinam, & bonos mores corrumpit: igitur indulgentia neq; ad iustificationem, neq; ad iustitiam est necessaria.

MAIOR à repugnantibus.

MINOR est Terentij in Heautontimorumenon Act. 3. Sce. 1. vbi senex quidam Chremes dicit: *Nam deteriores omnes sumus licentia.*

SOLVITIO huius argumenti legitur apud D. Augustinum super Psalmum centesimum primum, ubi dicit sic: *Hodieq; Paganorum opprobrium quale in nos est? Quid putatis fratres, quid eos putatis dicere nobis? Vos corrupistis disciplinam, moresq; generis humani peruertitis. Quid inueberis? Dic, quamobrem? Quid fecimus? Dando, inquit, hominibus pœnitentiæ locum, promittendo impunitatem omnium delictorum: ideo homines malè faciunt securi: quòd eis cùm conuersi fuerint, omnia dimittuntur. Hinc ergo opprobrium: quoniam cinerem sicut panem manducaui, & potum meum cum fletu miscebam. O qui insultas, inuito te ad istum panem. Non enim audes te dicere non esse peccatorem. Discute conscientiam tuam: ascende tribunal mentis tuæ: noli tibi parcere: examina te: loquatur tibi medulla cordis: vide utrū audeas innocentiam profiteri. Hic planè, si se respexerit, conturbabitur: si se non palpauerit, confitebitur. Et quid agis miser, si nò erit portus impunitatis? si sola fuit peccandi licentia, & nulla peccatorum est indulgentia, ubi eris? quo ibis? Certè & pro te factum est, ut pauper iste cinerem sicut panem manducaret, & potum suum cum fletu misceret: non te iam delectat tale conuiuium? Sed tamen, inquit, augent homines peccata spe veniæ: imò augent peccata desperatione veniæ. Nōne attendis, quàm licentiosa crudelitate viuant gladiatores? unde hoc? nisi iam tanquam ad ferrum & victimam destinati explere volunt libidinem, antequam fundant sanguinem. Nōne hoc & tu tibi diceris: iam peccator sum, iam iniquus, iam damnandus, nulla veniæ spes est; cur iam nò faciam quidquid libet, et si non licet? cur non impleam quantum possum, quæcunq; desidero; si post hæc non restant nisi sola tormenta? Nōne hoc tibi diceris, & desperatione ipsa peior fieres? Potius ergo te corrigit, qui indulgentiam promittit, & dicit Isaia 46. Ezech. 18. Redite præuaricatores ad cor: nolo mortem impij, tantum ut reuertatur & uiuat. Hoc proculdubio portu proposito, deponis vela iniquitatis, conuertis proram, uelificas ad iustitiam, & speras vitam, non negligis medicinam. Nec in hoc tibi displicet Deus, tanquam per istam indulgentiæ promissionem securos fecerit peccatores. Etenim, ne desperatione homines peius uiuerent, promisit indulgentiæ portum: rursus, ne spe veniæ peius uiuerent, fecit diem mortis incertum, prouidentissimè utrumque constituens, & reuertentes quò recipiantur, & differentes unde terreantur. Manduca cinerem velut panem, fletum tuum cum potu misce: per hoc conuiuium uenies ad mensam Dei. Noli desperare, promissa est indulgentia tibi. Deo gratias, inquit, quia promissa est: teneo promissum Dei. Ergo iam bene uiue. Cras, inquis, bene uiuam. Indulgentiam tibi Deus promisit, crastinum diem tibi non promisit: si malè uixisti, bene uiue iam hodie: Stulte, hac nocte auferetur à te anima tua, Luc. 12. non dico, quæ parasti, cuius erunt? sed secundum quòd uixisti, ubi eris? Corrige ergo te, ut possis in corpore Christi habere.*

ſi habere vocem iſtam, quam niſi fallor libenter agnoſcis: Quoniam cinerem ſicut panem manducaui, & potum meum cum fletu miſcebam. Hæc D. Auguſtinus.

SECUNDA SOLVTIO. Negatur conſequentia: nam datur inſtantia ad Rom. 2. *An diuitias bonitatis eius, & patientiæ, & longanimitatis contemnis? ignoras, quoniam benignitas Dei ad pœnitentiam te adducit? ſecundum autem duritiam tuam & impœnitens cor, theſaurizas tibi iram in die iræ, & reuelationis iuſti iudicij Dei, qui reddet unicuique ſecundum opera eius.*

OCTAVA RATIO. Quæ diuina ſunt ordinata voluntate, nemo mortalium impedire, auertere, ſeu peruertere poteſt. ſed pœnas Deus in peccatores ſtatuit: ergo pœnas à Deo ſtatutas in peccatores mortalium nemo impedire, auertere, nemo peruertere, aut euadere poteſt.

MAIOR. Act. ca. 5.

MINOR multipliciter patet in ſcripturis.

SOLVTIO. Pœnarum genus duplex eſt. Vnum quidem medicinale præſeruatium, quo ſanè quidam præſeruantur, ne maculent veſtimenta ſua, ſicut licet videre in flagellis pœniſq; Iob Prophetæ, & cœcitate Thobiæ: qui, cùm Deo acceptiſſimi eſſent, grauiffimis tamen pœnis ſunt affecti. Aliud verò ſatisfactorium, cuiusmodi in Dauid perſequentionibus & afflictionibus conſpicitur. Itaq; pœnas medicinales, quæ augendi meriti, vel cauendi peccati cauſa à Deo immittuntur, nos impedire non poſſumus, nec debemus: ſatisfactorias autem, proprijs vel alienis laboribus, qui habentur & acceptantur à Deo, ac ſi proprij eſſent, propter communionem, coniunctionem, & vinculum charitatis, ſoluere poſſumus. In quo ſanè Domino Deo noſtro plurimùm placeamus, tantùm abeſt, vt aliquã Dei offenſam incurramus. læſæ namq; diuinæ iuſtitie pro poſſibilitate noſtra ſatiſfit, & à Deo Opt. Max. in recompensatione acceptatur: alioqui ſi pœnas diuinitus nobis decretaſ impedire non poſſumus; quomodo vera erit illa ſententia Iſaię. 39. qua alloquutus eſt Regem Ezechiam: *Morieris tu, & non viues?* Iam decreta erat Ezechie pœna mortis, quam tamen ſanctarum precum feruore, & lachrymarum profluuiio placaffe, & auertiſſe ſcriptura commemorat. Denique, ſi ita ſe res haberet, fruſtrà quotidie precaremur: *Dimitte nobis debita noſtra*: quia iam pœna nobis eſt decreta, quam mutare non valemus, quod eſt falſum, ne dicam impium.

NONA RATIO. Si homines abſoluerent à pœna indulgentiæ, vel à pœna inferni, vel à pœna purgatorii, vel à pœna flagelli

Dei, vel à pœna, quam spontè & voluntariè subit peccator. sed nihil horum est dicendum : igitur indulgentiæ non absoluunt homines à pœnis.

SEQUELA à sufficienti partium, seu specierum enumeratione.

MINOR probatur pro omnibus partibus : nam pœna inferni recompensationem non recipit. Pœna purgatorij est secundum iustitiæ ordinem præfixa & determinata, quam aliter soluere non licet. Pœna, quæ vocatur flagellum Dei, à Deo immediatè infligitur, & humano nō subiacet consilio & iudicio. Pœnam, quam ultro, spontè, & voluntariè subit peccator, *Quoniam*, inquit David, *ego in flagella paratus sum.* Psalm. 37. si quis vellet auferre, grauiter in Euangelium offenderet, quod omnino præcipit, vt faciamus dignos fructus pœnitentiæ. A quibus ergo pœnis homines absoluunt indulgentiæ ?

SOLVTIO. Negatur sequela, siue maior : quia non est sufficiens enumeratio partium, siue specierum. nam illis quatuor iam enumeratis, addenda est quinta pœna, quæ scilicet post iustificationem remanet soluenda temporaliter, cuius solutio, sicut pœnæ purgatorij & voluntariè assumptæ, iudicio Summi Pontificis Romani subditur, subordinatur, & subseruit.

DECIMA RATIO. Nullum inuentum & figmentum humanum ad iustificationem est necessarium. omnis indulgentia est inuentum & figmentum humanum : ergo nulla indulgentia ad iustificationem est necessaria.

MAIOR Act. 4. & 5. *Obedire oportet Deo magis quàm hominibus.*

MINOR : quia sunt traditiones Papæ & Episcoporum, quas prohibuit Christus in Euangelio. Matth. 15. & Marci. 7. Nam isti propter suum quæstum & lucrum (vt dicit Erasmus in Colloquijs in Dialogo qui inscribitur, Peregrinatio religionis ergo) finxerunt indulgentias, quibus seducunt populum.

SOLVTIO PRIMA. Negatur consequentia : tum quia præmissæ sunt falsæ. MAIOR falsa : propterea, quia sunt quædam humana consilia & inuenta ex Deo, quæ peccatores excitant, & promouent ad iustificationem. MINOR quoque simpliciter falsa, & probatio illius est blasphemia, & contumelia : quia hæretici blasphemant, & contumelia afficiunt sine causa Ecclesiam Catholicam.

SOLVTIO SECUNDA. Ad hoc sophisticum argumentum hæreticorum iam pridem respondit ipsemet B. Paulus Apostolus 1. ad Corint. cap. 4. dicens : *Sic nos existimet homo, vt ministros Christi, & dispensatores mysteriorum Dei.* Ergo omnis indulgentia originaliter, primò, principali-

principaliter, & per se est à Deo, tanquam datum optimum, & donum perfectum, descendens à Patre luminum; à Papa autem & Episcopis est tanquam à ministris, & dispensatoribus præordinatis ministeriorum, gratiarum, & indulgentiarum Dei.

AD ILLUD AUTEM, quia sub indulgentia fiunt & fieri debent oblationes in Ecclesia, respondetur sic: quia Iudei, in suis solennitatibus & tempore indulgentiarum, in suis Synagogis non apparebant in conspectu Dei vacui, Deut. 16. sed offerebat unusquisque secundum quod habuit, iuxta benedictionem Domini Dei sui, quā dabat ei: & Christianus populus, populus acquisitionis, gens sancta, regale sacerdotium, cui dictum est Matth. 5. *Tunc veniens offeres munus tuum ad altare*, erit fortassis tam stultus, tam barbarus, tam ingratus, ut nihil offerat ad Ecclesiam? absit verò tanta stultitia, tanta barbaries, tanta ingratitudo à populo Dei. Vnde Apostolus 1. ad Corinth. cap. 9. *Si nos vobis spiritualia seminamus, magnum est si nos carnalia vestra metamus*. Et D. Thomas super 4. Distinct. 20. *Sub indulgentia non prohibetur subsidium, ut, quod qui dat auxilium ad fabricam Ecclesie, intelligitur tale auxilium, quod fiat secundum facultatem auxiliantis, & quod sit conveniens ei, qui auxilium dat: & secundum quod accedit ad hoc, secundum hoc plus vel minus de indulgentia consequitur*. Unde etiam aliquis pauper dans unum denarium, consequitur totam indulgentiam: non autem dives, quem non decet ad opus tam pium & fructuosum ita parum dare; sicut non diceretur rex alicui homini auxilium facere, si ei obulum daret.

IAM VERO ad illas autoritates scripturæ, quibus contra indulgentias abutuntur hæretici, respondent sancti Patres.

D. THOMAS AQUINAS super cap. 6. ad Hebræ. Lect. 1. exponens illa verba B. Pauli Apostoli: *Impossibile est enim eos, qui semel sunt illuminati, gustaverunt etiam donum cæleste, & participes facti sunt Spiritus Sancti, gustaverunt nihilominus bonum Dei verbum, virtutesque sæculi venturi, & prolapsi sunt, rursus renouari ad pœnitentiam*, inter cætera sic dicit: *Notandum est, quod nō dicit, lapsi simpliciter; sed, prolapsi, id est, totaliter lapsi: quia si lapsi tantum essent; non ita difficile foret resurgere*. Prouer. 14. *Septies in die cadit iustus, & resurgit*. Quod si diceret Apostolus, illos, qui prolapsi sunt, impossibile est resurgere; tunc posset dici, quod in hoc notat maximam difficultatem resurgendi; scilicet, & propter peccatum, & propter superbiam; sicut patet in dæmonibus: sed quia dicit, illos, qui semel prolapsi sunt, non posse rursus renouari ad pœnitentiam: nec est aliquod peccatum in hoc mundo, à quo non potest homo pœnitere; ideo aliter est intelligendū. Unde sciendum est, quod ex hoc loco sumpsit Nouatus quidā, qui fuit Presbyter Ecclesie Romanæ, occasione errandi: voluit enim, quod nullus post Baptismum

posset ad pœnitentiam resurgere. sed ista positio falsa est, sicut dicit Athanasius in Epistola ad Serapionem: quia ipse Paulus recepit incestuosum Corinthium, sicut patet 2. ad Corinth. 2. Et similiter ad Gal. cap. 4. quia dicit: Filioli mei, quos iterum parturio. &c. Est ergo intelligendum, sicut dicit Augustinus in libro de vera & falsa pœnitentia cap. 2. quod non dicit, quod impossibile est pœnitere; sed quod impossibile est, Rursus renouari, id est baptizari, ad Titum 3. Per lauacrum regenerationis, & renouationis. &c. Nunquam enim potest homo sic pœnitere, quod posset iterum baptizari: & hoc dicit Apostolus: quia secundum legem Iudei multoties baptizabantur, sicut patet Marci 7. & ideo ad istum errorem remouendum dicit hoc Apostolus. Contra istum Nouatum scripsit D. Ambrosius multa lib. 1. de Pœnitentia. &c.

Idem D. AMBROSIVS super cap. 6. ad Hebræ. super iisdem verbis Apostoli dicit sic: Impossibile est, inquit, non difficile: impossibile inquit, in desperationem eos misit, secundo baptizari non posse: quia impossibile est, quod fieri non potest; difficile verò, quod quamuis cum labore, fieri tamen potest. &c. Si in peccata iterum incidetis, impossibile est vos renouari iterum ad pœnitentiam. ad pœnitentiam dixit, hoc est, per pœnitentiam. Quid igitur? exclusa est pœnitentia post baptismum? Absit: sed renouatio per sacri baptismatis lauacrum secunda vice fieri non potest: renouari dixit, hoc est, nouum fieri. nouum quippe facere hominem sacri baptismatis est, de quo Propheta Psalmo 102. ait: Renouabitur ut aquilæ iuuentus tua, cuius virtus, id est baptismatis sacri, in cruce & sepultura Christi constat. Hæc D. Ambrosius.

Ad illam autem authoritatem ad Hebræ. 12. Non enim inuenit pœnitentiæ locum, quanquam cum lachrymis inquisisset eam: D. THOMAS AQUINAS: Sed contrari: quia dicitur Ezechielis 18. Quacunque bona ingemuerit peccator. &c. Respondeo: dicendum est, quod quam diu præsens vita agitur, potest agi vera pœnitentia. Interdum tamen aliquis pœnitet non propter amorem iustitiæ, sed propter timorem pœnæ, vel damni temporalis, & sic pœnituit Esau: non quia vendiderat primogenita, sed quia perdidit: unde non dolebat de peccato venditionis, sed de damno perditionis: & ideo pœnitentia eius non fuit accepta; quia non erat vera: sic etiam pœnitent dammati in inferno. Sapient. 5. Pœnitentiam agentes: non quia peccauerunt; sed, quia exclusi sunt. Hæc Diuus Thomas.

E R G O scripturæ loca benè intelligenda, & in eo sensu quem tenet sancta mater Ecclesia Catholica, cuius est iudica-

est iudicare de vero sensu, & interpretatione sacrarum scripturarum semper accipienda.

Sed contrà, est quod Dominus Deus Leui.

cap. 25. præcipit dicens: *Sanctificabisq; annum, & vocabis remissionem cunctis habitatoribus terræ tuæ. Ipse est enim Iubileus.* Et per Isaiam cap. 1. dicit: *Lauamini & mundi estote, auferte malum cogitationum vestrarum ab oculis meis: quiescite agere peruersè, discite benè facere: quærite iudiciũ, subuenite oppresso, iudicate pupillo, defendite viduam, & venite, & arguite me dicit Dominus. Si fuerint peccata vestra vt coccinum, quasi nix dealbabuntur: & si fuerint rubra quasi vermiculus, velut lana alba erunt.*

Item, Isaiæ cap. 4. *Et erit omnis, qui relictus fuerit in Sion, & residuus in Ierusalem, sanctus vocabitur omnis, qui scriptus est in vita in Ierusalem. Si ablucrit Dominus sordem filiarum Sion, & sanguinem Ierusalem lauerit de medio eius in spiritu iudicij, & spiritu ardoris.* &c. D. Albertus Magnus super cap 13. Zachariæ, hæc verba Isaiæ de indulgentijs interpretatur.

Item, Ieremiæ cap. 3. *Vulgò dicitur, si dimiserit vir uxorem suam, & recedens ab eo duxerit virum alterum; numquid reuertetur ad eam ultra? numquid non polluta erit & contaminata mulier illa? Tu autem fornicata es cum amatoribus multis: tamen reuertere ad me dicit Dominus.* &c. *Conuertimini filij reuertentes, dicit Dominus: quia ego vir vester, & assumam vos.*

ET IN NOVO TESTAMENTO Matth. 11. *Venite ad me omnes, qui laboratis & onerati estis, & ego reficiam vos. Tollite iugum meum super vos, & discite à me, quia mitis sum & humilis corde, & inuenietis requiem animabus vestris: iugum enim meum suauis est, & onus meum leue.*

Item Isaiæ 61. & Lucæ 4. *Spiritus Domini super me: eò quòd vnxit me: ad annunciandum mansuetis misit me, vt mederer contritis corde, & prædicarem captiuis indulgentiam, & clausis apertionem: vt prædicarem annum placabilem Domino, diem ultionis Deo nostro: vt consolarer omnes lugentes.*

Atque hoc ipsum pluribus rationibus potest confirmari.

PRIMA RATIO. Contra negantes principia, non est disputandum. sed hæretici negantes indulgentias, negant principia: igitur contra hæreticos non est disputandum.

MAIOR vera est Aristotelis lib. 1. Physicorum.

MINOR

MINOR probatur. Quæcunq; omnibus naturaliter, primò, & per se nota sunt; illa sunt principia. sed indulgentiæ omnibus naturaliter, primò, & per se notæ sunt: igitur indulgentiæ sunt principia.

MAIOR vera est Aristotelis I. Physicorum.

MINOR probatur communi sensu naturæ, & publica voce hominum: nam passim proximus interrogatus à proximo, quò vadis? ad tēplum, inquit, pro indulgentijs.

Nec refert, siue cognitione confusa, siue distincta, sint notæ omnibus indulgentiæ, siquidem constat: sed illud certum est, quia naturaliter omnibus primò, per se sunt notæ.

SECUNDA RATIO, Quicquid reducitur ad articulos fidei, & est pars fidei; illud ad iustificationem necessariò requiritur. sed omnis indulgentia Catholica reducitur ad articulos fidei, & est pars fidei: igitur omnis indulgentia Catholica necessariò requiritur ad iustificationem.

MAIOR vera à definitione, siue à causa ad effectum.

MINOR probatur: quia omnis indulgentia reducitur ad articulum decimum, qui est sancti Simonis Apostoli, *Credo remissionem peccatorum*, tanquam species ad suum genus, vel pars ad suum totum. Vnde D. Hieronymus Epist. 154. ad Desyderium, quem hortatur, ut indulgentiarum nomine veniat ad loca sancta, ubi dicit, Certè adorasse, ubi steterunt pedes Domini, pars fidei est.

Audiant hæretici negantes indulgentiam; quia fidem negant: blasphemantes indulgentiam; quia fidem sanctam blasphemant: oppugnant indulgentias; quia fidem sanctam, oppugnant.

TER TIA RATIO. Quidquid reducitur ad præcepta Dei decem, & ad quinq; præcepta Ecclesiæ; illud ad iustificationem necessariò requiritur. sed omnes indulgentiæ reducuntur ad præcepta Dei decem, & ad quinq; præcepta sanctæ matris Ecclesiæ Catholicæ: igitur omnes indulgentiæ ad iustificationem necessariò requiruntur. MAIOR vera à definitione Mat. 19.

MINOR probatur: quia indulgentiæ reducuntur ad tertium Dei præceptum: *Memento ut diem Sabbati sanctifices*. Nam sicut Deus præcepit sanctificare sabbata; ita & iubileos & indulgentias, ut patet Levit. 25. & in aliis sacræ scripturæ locis. Itaq; illud quod præcipitur in genere, *Sabbata sanctifices*; hoc idem explicatur multis locis in specie, videlicet, *Sanctifices diem septimum, Neomenias, mensem septimum, annum septimum, & annum septies septimum*, id est, quinquagesimum, annum

annum Iubileum, quem communiter annum Sanctum dicimus, & sanctificare debemus de præcepto.

Præterea, reducitur indulgentiæ ad illud Ecclesiæ præceptum, quo præcipitur: Dies festos, indictos ab Ecclesia, celebra.

QUARTA RATIO. Quidquid Deus ex Synagoga in suam Ecclesiam transtulit, transplantauit, reformauit, confirmauit, auxit, & perfecit; illud est, & necessariò requiritur ad iustificationem. sed omnes indulgentias Pontificum, & benedictiones sacerdotum suorum, vnà cum lege, sacerdotio, & sacrificijs, Deus ex Synagoga in suam Ecclesiam transtulit, transplantauit, reformauit, confirmauit, auxit, & perfecit: igitur in Ecclesia Catholica sunt indulgentiæ, & necessariò requiruntur ad iustificationem.

MAIOR est in figura Ioan. ca. 6. *Colligite, quæ superauerunt fragmenta ne pereant. Collegerunt ergo, & implerunt duodecim cophinos fragmentorum, ex quinq. panibus bordeaceis, quæ superfuerunt his, qui manducauerunt.* Non ergo perierunt fragmenta benedictionum & indulgentiarum, quibus utebatur Synagoga; sed seruata sunt in cophinis per Apostolos. Vnde Aristoteles lib. 1. de Cælo. & 3. de Ani. Deus & natura, nihil faciunt frustra.

MINOR est Apostoli ad Hebræ. 7. Translato enim sacerdotio, necesse est, vt & legis translatio fiat: & per consequens translato pontificatu & sacerdotio ex Ierusalem in Romam, necessariò sequitur: quia lex Euangelij, & sacrificia, & indulgentiæ, & benedictiones ex Synagoga ad Ecclesiam Catholicam sunt translatae.

QUINTA RATIO. Si nullas haberemus in Ecclesia Sancta Catholica (vt volunt hæretici) indulgentias; sequeretur quia felicior, perfectior, iustior, & sanctior olim fuisset in sua religione Synagoga Iudæorum, quàm est nunc Ecclesia Catholicorum. sed Ecclesia Catholicorum in sua religione multò est felicior, perfectior, iustior, & sanctior, quàm olim Synagoga Iudæorum: igitur in Ecclesia Catholica, Dei gratia, maiores nunc habemus indulgentias, quàm olim fuerunt in Synagoga.

SEQUELA à destructione consequentis, ad destructionem antecedentis.

MINOR est Apostoli pluribus locis; sed præcipuè ad Galat. 3. ad Coloss. cap. 2. *Lex umbra futurorum, ad perfectum adduxit nihil.* Ad Hebræ.

Hebræ. 7. *Euangelium autem est lex perfectæ libertatis.* Iacobi cap. 1. & ad Coloss. 1. Propterea sancta mater Ecclesia Catholica, tanquam felicior, perfectior, pulchrior, iustior, & sanctior inuitat Synagogam ad indulgentias, tanquam ad conuiuium Catholicorum ca. 5. dicens: *Veni in hortum meum soror mea sponsa, messui myrrham meam cum aromatibus meis, comedi fauam cum melle meo, bibi vinum meum cum lacte meo, comedite amici, & bibite, & inebriamini charissimi.* Id est, vt gratia indulgentiarum inebriari possitis: cum displicentia, & detestatione omnia peccata vestra deponere, & eorum perpetuo obliuisci. Vnde Synagoga miratur sanctam Ecclesiam Canticorum cap. 6. dicens: *Quæ est ista, quæ progreditur, quasi aurora consurgens, pulchra vt luna, electa vt sol, terribilis vt castrorum acies ordinati?*

SEXTA RATIO. Cuius priuatio mala, habitus est bonus. sed indulgentiarum priuatio est mala: ergo indulgentiarum habitus est bonus. & per consequens, indulgentiæ sunt in Ecclesia, quibus priuata est Synagoga, & necessario requiruntur ad iustificationem.

MAIOR est vera, & est Aristotelis lib. 3. Topicorum cap. 1.

MINOR probatur exemplis. Quando Deus reuocauit indulgentiam sub Noë, diluuium submersit, extinxit, & in profundum misit mundum: quando Deus reuocauit indulgentiam sub Abraham & Loth, ignis de cælo cōsumpsit Sodomam, Gomorram, & alias ciuitates conuertit in fauillam: quando Deus reuocauit indulgentiam à Iudeis sub Tito, & Vespasiano; Iudæi Rempub. & regnum, & legem, & Ecclesiam, & gentem, & sacerdotium, & victimas, & sacrificia cum omnibus benedictionibus amiserunt, & iam ante oculos christianorum dati & positi sunt in exemplum.

SEPTIMA RATIO. Quidquid est in natura, in mundo, in cælo, in Republica, & in ciuitate; hoc idem abundantius & melius est in Ecclesia Catholica. sed indulgentia est in natura, est in mundo, in cælo, est in Republica, & in ciuitate: igitur indulgentia abundantius & melius est in Ecclesia Catholica.

MAIOR est vera: quia Ecclesia superat naturam, gratiam, mundum & cælum, superat ordine & hierarchia: quia & cælum creatum est in ministerium Ecclesiæ: vincit Rempublicam & ciuitatem legibus, moribus, honestate, dignitate, iustitia, virtute: iuxta illud Prouerb. 31. *Multæ filiæ congregauerunt diuitias, tu sancta mater Ecclesia Catholica supergressa es vniuersas.*

MINOR

MINOR pro singulis partibus : primò indulgentiam esse in natura, in mundo, & in cælo, docet princeps Poëtarum Virgilius lib. 2. Georgicorum, sic dicens :

*Non alios prima crescentis origine mundi
Illuxisse dies, aliūmuc habuisse tenorem
Crediderim, Ver illud erat, Ver magnus agebat
Orbis, & hybernis parcebant flatibus Euri ;
Cum primūm lucem pecudes hausere, virūmq;
Ferrea progenies duris caput extulit aruis,
Immissæq; feræ syluis, & sydera cælo.
Nec res hunc teneræ possent perferre laborem,
Si non tanta quies iret, frigusq; caloremq;
Inter, & exciperet cæli indulgentia terras.*

Deinde indulgentiam esse in Republica, & in ciuitate : quia in Republica, & in ciuitate, & captiui, & serui redimuntur, manumittuntur, & libertate ac indulgentia donantur. Vnde Simo senex apud Terentium in Andria Act. 1. Sce. 1. ad Sofiam dicit sic :

*Ego postquam te emi à paruulo, ut semper tibi
Apud me iusta, & clemens fuerit seruitus
Scis, feci è seruo, ut esses libertus mihi,
Propterea, quòd seruiebas liberaliter.*

Item, MINOR probatur sic. Est alteratio in natura : ergo & indulgentia in Ecclesia. CONSEQUENTIA Ioël. 1. non vult Deus, ut homines tanquam iumenta computrescant in stercore suo. ANTECEDENS Aristotel. 1. de Generat. & omnium Peripateticorum Philosophorum.

OCTAVA RATIO. Cuius rei Christus posuit signum, ostendit & dedit exemplum, & tradidit præceptum in Euangelio ; illa est & debet esse in Ecclesia. sed indulgentiæ Christus posuit signum, dedit exemplum, & tradidit præceptum in Euangelio : igitur indulgentia est, & esse debet in Ecclesia.

MAIOR vera ab autoritate.

MINOR. Ioan. 13. posuit signum : quia lotionem externam pedum, propter internā conscientiae ablutionem, dedit exemplum : quia Petro & discipulis, proprijs manibus Dominus & Magister lauit pedes. tradidit præceptum, quia dixit : *Si ergo ego laui pedes vestros Dominus & Magister, & vos debetis alter alterius lauare pedes. Exemplum enim dedi vobis, ut quemadmodum ego feci vobis, ita & vos faciatis.*

Est in Ecclesia excommunicatio : igitur & indulgentia.

CONSEQUENTIA nota ex Topica Aristotelis. Posito vno contrari-
orū in esse, necessariò ponitur & aliud. ANTECEDENS patet ad sensū.

NONA RATIO. Messia Christi redemptoris merita, bea-
te Dei genitricis virginis Mariæ, & omnium electorum à primo
iusto vsq; ad vltimum, hoc est capitis & membrorum, ad iusti-
ficationem peccatoris necessariò requiruntur: ergo & indulgen-
tia cum Iubileo.

CONSEQUENTIA à causa ad effectum.

ANTECEDENS est Apostoli ad Hebræ. cap. 9. & 12. *Si enim sanguis
bircorum & taurorum, & cinis vitulæ aspersus inquinatos sanctificat ad
emundationem carnis; quanto magis sanguis Christi, qui per Spiritum San-
ctum semetipsum obtulit immaculatum Deo, emundabit conscientiam no-
stram ab operibus mortuis, ad seruendum Deo viuenti?*

DECIMA RATIO. Vota cum peregrinatione ad loca san-
cta, confessio cum contritione, poenitentia cum satisfactione,
vigilia cum lachrymis & oratione sine intermissione, sacrificia
cum oblatione & offertorijs, dolor pro peccatis præteritis, cu-
stodia à futuris, applicatio thesauri Ecclesiæ, his qui in tenebris
& in vmbra mortis sedent, &c. requiruntur ad iustificationem:
igitur & indulgentiæ necessariò requiruntur ad iustificationem.

CONSEQUENTIA ab officio peccatoris indulgentiam quærentis.

ANTECEDENS patet in vsu Ecclesiæ Catholicæ, & quotidianis plu-
rimorum exemplis, & probatur, quò ad singula puncta Notabili. 6.

VLTIMA RATIO. Pro quo Ecclesia sine intermissione orat
ad Deum, illud est necessarium ad iustificationem. sed Ecclesia
sine intermissione pro indulgentia orat ad Deum: ergo indul-
gentia est necessaria ad iustificationem.

MAIOR vera ab autoritate.

MINOR probatur vsu perpetuo sanctæ matris Ecclesiæ: *Et dimit-
te nobis debita nostra; sicut & nos dimittimus debitoribus nostris.*

D E C R E T U M.

Possunt & alia sexcenta in eam rem argumenta, contra blasphe-
mos & impios hæreticos produci: sed breuitatis causa omittuntur: &
quia

quia aduersus hunc errorem hæreticorum, sanctas indulgentias ridentium, differuit copiosè Ioannes Roffensis, vir eximia eruditione, & christiana pietate clarus, ab Articulo decimoseptimo, vsq; ad vigesimū septimū, vbi grauitè, acutè, & euidenter Lutheri impietatem refutat, & conuincit. Et post illum Martinus Ledesmius, & ante hos innumeri Doctores scholastici in 4. Sententiarum Distinct. 20. & Decretorum Doctores in capite Indulgentiæ, de Pœnitentia, & remissione lib. 6. & alijs in locis.

Item Dominicus à Soto, & Hannibal Roselli in lib. de Sacramen. & alij plurimi. Verū tamen si hæretici Lutherani, isti duræ ceruicis homines, adhuc temerè resistunt Spiritui sancto, si contradicunt verbo Dei, si in scripturis agnitam veritatem oppugnant, & fanis sermonibus & doctrinis sanctæ matris Ecclesiæ Catholicæ non acquiescunt; audiant igitur sacrosancti concilij Tridentini Patrum horribile decretum, qui Sessione 25. decreto de indulgentijs contra hæreticos pronunciauerunt sic: *Cum potestas conferendi indulgentias à Christo Ecclesiæ concessa sit, atque huiusmodi potestate diuinitus sibi tradita, antiquissimis etiam temporibus illa usæ fuerit; Sacrosancta Synodus, indulgentiarum usum, Christiano populo maximè salutarem, & sacrorum Conciliorum auctoritate probatum, in Ecclesia retinendum esse, docet & præcipit, Eosque ANATHEMATE DAMNAT, QUI AUT INVTILES ESSE ASSERVNT, VEL EAS CONCEDI IN ECCLESIA POTESTATEM ESSE NEGANT. In his tamen concedendis, moderationem iuxta veterem & probatam in Ecclesia consuetudinem adhiberi cupit; ne nimia facilitate, Ecclesiastica disciplina eneruetur. Abusus verò, qui in his irrepserunt, & quorum occasione, insigne hoc indulgentiarum nomen ab hæreticis blasphematur, emendatos, & correctos cupiens, præsentis decreto generaliter statuit; prauos quæstus omnes pro his consequendas, unde plurima in Christiano populo abusu causa fluxit, omninò abolendos esse. Cæteros verò, qui ex superstitione, ignorantia, irreuerentia, aut aliunde quomodocunque prouenerunt, cum ob multiplices locorum, & prouinciarum, apud quas hi committuntur corruptelas, commodè nequeant specialiter probiberi, Mandat omnibus Episcopis, vt diligenter quisque huiusmodi abusus Ecclesiæ suæ colligat, eosq; in prima Synodo prouinciali referat, vt aliorum quoque Episcoporum sententia cogniti, statim ad Summum Romanum Pontificem deferant, cuius auctoritate & prudentia, quod vniuersali Ecclesiæ expediet, statuatur, vt ita sanctarum indulgentiarum munus, piè, sanctè, & incorruptè, fidelibus dispensetur.*

Pro maiori euidentia quæstionis,
 TERMINORVM, CONCLVSIONVM,
 Corollariorum, & pro resolutione dubiorum, & ar-
 gumentorum in nomine Domini, fit hoc

NOTABILE PRIMVM.

Caput I.

DE NOMINE INDVLGENTIA.

Indulgentiam Græci *συγγνωμη*, *ms. n.* appellant: nam *συγγινωσκω* indulgeo dicitur. Est autem indulgere secundum Priscianum obsequi, inferuire, consentire, & facile ignoscere. Sic Imperatores dicti sunt indulgentissimi, quod sint benefici; tum ad gratificandum & ignoscendum propensi. Sic mater dici solet indulgentissima: quia multa pueris condonat, ignoscit. non solum mater, sed & ipse Menedemus pater apud Terentium in Heautontimorumenon Act. 4. Scena 8. hoc nomine, quia Clinia filio nimium indulget, malè audit; nam hoc illi obiicit senex ille vicinus Chremes dicens: *Nimium illi Menedeme indulges.* Aliquando indulgere, idem est, quod maius spatium dare, ut apud Virgilium lib. 4. *Æneid. Indulgere hospitio, causasq; innecte morandi.*

Volunt autem latini, *lij*, indulgere seu indulgentia verbum esse medium, quod in bonam & malam partem accipiat. Indulgere, seu indulgentia in malam partem accipitur, pro eo, quod est immodicam licentiam alicui facere, ad aliquid quod non licet perpetrandum, siue vivere extra disciplinam: & hoc nomine apud M. Ciceronem lib. 1. de legibus Epicurei malè audiunt, & ciuitate prohibentur, & excluduntur à societate hominum: Epicuri, inquit, sibi indulgentes, & corpori deseruientes, atque omnia quæ sequantur in vita, quæque fugiant voluptatibus & doloribus ponderantes, &c. istos, ut ab omni societate Reipub. paulisper faceessant, rogemus. Idem Cicero de Amici. Sed obsequium multò molestius quod peccatis indulgent, id est, cōsentiant, præcipitem amicū ferri sinit. Idem ibidem: Spernere veteres amicitias, & indulgere nouis. Et F. Quintilianus lib. 1. Oratoriarum institutionum cap. 3. Utinam liberorum nostrorum mores non ipsi perderemus, infantiam statim deliciis soluimus. Mollis illa educatio, quam indul-

indulgentiam vocamus, neruos omnes, & mentis & corporis frangit. Addit Statius causam dicens: *Vultus & egregiæ tanta indulgentia formæ.* Et Horatius lib. 1. Carminum Ode 2.

Crescit indulgens sibi dirus hydrops:

Nec sitim pellit, nisi causa morbi

Fugerit venis, & aquosus albo

Corpore languor.

Vnde & in Prouerb. dicitur: Indulgere genio, Indulgere Baccho, indulgere gulæ, indulgere Veneri. &c.

CONTRA, vbi in bonam partem eodem verbo Indulgere, & Indulgentia, probati vtuntur authores, pluribus locis potest probari & ostendi: nam idem ipse M. T. Cicero in Oratore dicit: Consuetudini auribus indulgenti libenter obsequor. Idem lib. 1. de Officijs: Magnus vir, inquit, in primis, & qui perindulgens in patrem, idem seuerus in filium. Et Vergilius lib. 2. Georgicorum.

Nec res hunc teneræ possent perferre laborem,

Si non tanta quies iret frigusq; caloremq;

Inter: & exciperet cæli indulgentia terras.

THEOLOGI AUTEM, ET ECCLESIA CATHOLICA, hoc verbo Indulgere, & Indulgentia, non nisi in bonam partem vtuntur: vtuntur autem non quasi cōsentientes, vt malum fiat (quod absit) sed pro pietate Christiana per misericordiam & compassionem, condolendo his, qui ignorant & errant, peccatum & malum quod fecerunt ignoscendo, & donando, sicut & Christus nobis donauit.

Vtuntur etiam PATRES hoc verbo Indulgentia. D. Hieronymus super 4. caput Daniel. D. Augustinus super Psalm. 101. Et D. Cyprianus in Epistola ad Iubaianum & alibi.

Obseruant etiam SCHOLASTICI (vt Dominicus à Soto Distin. 21. Quæstione 1. Articulo 2.) quia hæc Synonima sunt, & voce tantum inter se non significatione differunt, atque nihil aliud nisi absolutionem sonant; vt indulgentiæ, relaxationes, remissiones, veniæ, misericordiæ, miserationes, propitiatio, aliquando dispensatio, & solutio, recompensatio, pars satisfactionis, vel satisfactio, & sanctificatio.

Item, dies Indulgentiarum dicuntur dies salutis, dies propitiationis, dies expiationis, sanctificationis, & tempus acceptabile, sæpè numero pro eodem. Item nota, quia Caietanus in Tract. ad Iulium medic. capit. 6. plurimum verborum consumat, vtrum participalius sit absolutio quàm dispensatio, an verò dispensatio quàm absolutio: & in hanc partem propendet, quòd est primùm absolutio. Dominicus à Soto Distinct. 21. Quæst. 1. Articulo 2.

Caput II.

DE NOMINIBUS INDULGENTIARUM.

EXprimuntur autem indulgentiæ alijs diuersis vocabulis, vt scribit frater Osualdus libro 4. Rosarij Theologiæ, & alij: nam Indulgentia dicitur Carena, à carentia conuersationis hominum, vel etiam cibari-
orum: nam illis quadraginta diebus homines includuntur in aliquo loco secreto iuxta Ecclesiam, vbi non habent consortium hominum: vnde colligitur ex gestis Summorum Pontificum, quia differentia est inter septenam, vel septenariam quadragenam, & carenam, quæ etiam Carentena aliquando dicitur. Nam CLEMENS Papa primus constituit QVADRAGENAM, per quam designauit poenitentiam quadraginta dierum cum septem annis sequentibus, quam poenam iniungebat ratione vnius peccati mortalis; ita quod per istos septem dies, poenitentes excludebantur ab Ecclesia, & incedebant capite discooperto sparso cinere, & post eosdem dies iniungebatur illis poenitentia septennis. De quo vide latius alios, & fratrem Osualdum, vbi supra & intra hos annos septem, non utebantur carnibus, nec vino, nec lecto, nec balneo; sed dormiebant in terra aspersa, vel lapide: Et expletis illis annis, tunc primum licuit ipsis communicare corpore Dominico.

SEPTENAM, INNOCENTIUS PAPA PRIMVS, iniungebat pro vno peccato mortali: & poenitentia huiusmodi vocabatur septenaria, vel septena Innocentij. Et quid poenitentes singulis illis poenitentiae diebus facere tenebantur, legito apud alios.

Sed CARENA, siue Carentena erat poena includens poenitentiam Quadragenæ & septenæ: quia sic poenitentes abstinebant à cibis, & à conuersatione hominum, & ieiunabant in pane quadraginta diebus; licet modò Canones poenitentiales sint arbitrij, poenæq; arbitrariæ.

Modò autem Papa dans Quadragenam, vel Septenam, vel Carentenam, siue Carenam, in literis Indulgentiarum; vult & intendit absolute illos, qui faciunt quod in se est, & seruant præcepta Indulgentiæ, & qui debite vtuntur indulgentijs, vel tantam gratiam remissionis conferre, quantâ isti per poenitentias meruerunt: & sic per annum poenitentialem, confert tantam gratiam remissionis, quantam homo meretur per se poenitendo per annum.

Quibusdam etiam aliquando datur propter rationabilem causam absolute, sine poenitentia & confessione.

Hic, si fortè quis quærat, quid est facere, quod in se est? Respondet Alexander

det Alexander de Ales, parte 3. quæstione 69. Articulo 3. *Ad videndum*, inquit, *quid est facere quod in se est*, est notandum, quod in quolibet homine per naturam est recta ratio: & hæc rectitudo boni, est notio indita à creatore, qua quælibet anima potest cognoscere suum principium, scilicet Deum, secundum illud Psalm. 99. Scitote quoniam Dominus ipse est Deus, ipse fecit nos, & non ipsi nos. Per hoc enim, quod quodlibet naturaliter scit se non semper fuisse, scit se factum esse, & ita scit se habere principium, & scit quod ab illo in principio habet quicquid habet, & non à se. Scit etiam quod ab illo debet petere bonum, quodq; per illum debent suppleri omnes sui defectus. Si ergo secundum istam notionem operatur homo suo arbitrio, recurrendo ad illum, quem scit suum esse principium, & quem scit esse adorandum, & petit ab illo lumen cognitionis fidei & boni; facit quod in se est, & hoc est facere, quod in se est generaliter in quolibet homine. Plus autem est in fideli existente in peccato mortali de lumine: quia ipse habet fidem informem: quia sine charitate. Hæc autem fides informis, radiat ad duo: scilicet ad diuinam iustitiam damnantem reprobos; & ad diuinam misericordiam saluantem iustos: ex primo creabitur timor in eo, & ex secundo spes. Et hoc est facere, quod in se est, vt docet Alexander de Ales, loco superius allegato.

Porro, peccatori facienti quod in se est, dat Deus gratiam, quam non daret, nisi quod in se est faceret, secundum illud Zacha. 1. *Conuertimini ad me, & ego conuertar ad vos.* Et Iaco. 4. *Appropinquate Deo, & appropinquabit vobis.*

Caput III.

DISTINGUITUR MULTIPLEX.

MAGISTER SENTENTIARVM lib. 4. Distin. 26. annotauit: quia vocabulum Indulgentiæ in sacra scriptura est multiplex: nã diuersis modis accipitur.

PRIMÒ, pro concessione gratiæ.

SECUNDÒ, pro remissione pœnæ, pro venia, pro remissione peccatorum.

TERTIÒ, pro permissione. Et est permissio in Nouo Testamento de minoribus bonis, & de minoribus malis. De minoribus bonis est coniugium, quod non meretur palmam, sed est in remedium. De minoribus malis, id est de venialibus est coitus, qui fit causa incontinentiæ. Illud, scilicet coniugium, indulgetur, id est, conceditur: illud verò, id est, coitus talis permittitur, id est, toleratur, ita quod non prohibetur.

QVARTO, pro dispositione.

QVINTO, pro auctoramento, vel remedio, quod valet ad multæ liberationem.

Similiter ORIGENES, Homelia secunda super Leuit. cap. 1. & 2. (quem locum nos obseruabimus diligenter contra Nouatianos: & illam authoritatem, quam pro se trahunt, ex Epistola B. Pauli Apostoli ad Hebræ. 6.) obseruat, & scribit, quia vocabulum indulgentiæ, seu remissionis est multiplex, vbi inter alia sic dicit. *Sed fortasse dicant auditores Ecclesiæ. Melius ferè agebatur cum antiquis quàm nobiscum, vbi oblati diuerso ritu sacrificijs, peccantibus venia præstabatur; apud nos vna tantummodo venia est peccatorum, quæ per lauacri gratiam in initijs datur, nulla post hæc peccanti misericordia, nec venia ulla conceditur. Deceat quidem districtioris esse disciplinæ Christianum, pro quo Christus oblatus est: pro illis oues, hirci, boues, iugulabantur, & aues, & similia conspergebantur; pro te Dei filius iugulatus est, & iterum te peccare delectat? Et tamen, ne tibi hæc non tam erigant animos pro virtute, quàm pro desperatione deiciant, audisti, quanta sint in lege sacrificia pro peccatis, audi nunc quantæ sint remissiones peccatorum in Euangelio.*

Est ista PRIMA, qua baptizamur in remissionem peccatorum.

SECUNDA remissio est in passione martyrij.

TERTIA, quæ pro eleemosyna datur: dicit enim Saluator. Luc. II. Verumtamen date eleemosynam, & ecce omnia munda sunt vobis.

QVARTA, nobis fit remissio peccatorum per hoc, quod & nos remittimus peccata fratribus nostris: sic enim dicit ipse Dominus & Saluator noster Mat. 18. Quia si dimiseritis fratribus vestris ex corde peccata ipsorum, & vobis remittet pater vester peccata vestra. Quod si nõ remiseritis fratribus vestris ex corde, nec vobis remittet pater vester. Et sicut in Oratione nos dicere docuit: Remitte nobis debita nostra, sicut & nos remittimus debitoribus nostris.

QVINTA remissio peccatorum est, cum conuerterit quis peccatorem ab errore viæ suæ: ita enim dicit scriptura diuina Iac. cap. 5. Quia qui conuerterit peccatorem ab errore viæ suæ, saluat animam eius à morte, & cooperit multitudinem peccatorum.

SEXTA quoque fit remissio per abundantiam charitatis, sicut & ipse dominus dixit, Lucæ 7. Amen dico tibi, remittuntur ei peccata multa, quoniam dilexit multum. & Apostolus 1. Petri 4. dicit: Quoniam charitas cooperit multitudinem peccatorum.

Est adhuc & SEPTIMA, licet dura, & laboriosa per pœnitentiam remissio peccatorum, cum lauat peccator in lachrymis stratum suum, & fiunt ei lachrymæ suæ panes die ac nocte: & cum non erubescit Sacerdoti domini indicare peccatum suum, & quærere medicinam secundum eum,
qui

qui ait Psal. 31. Dixi, pronuntiabo aduersum me iniustitiam meam Domino, & tu remisisti impietatem cordis mei. In quo impletur & illud, quod Apostolus Iac. cap. 5. dicit: Si quis autem infirmatur, vocet Presbyteros Ecclesie, & imponant ei manus, ungentes eum oleo in nomine Domini, & oratio fidei saluabit infirmum, & si in peccatis fuerit, remittentur ei.

I. Et tu ergo cum veneris ad gratiam baptismi, vitulum obtulisti: quia in morte Christi baptizaris.

II. Cum vero ad matrimonium duceris, hircum obtulisti: quia auctorem peccati diabolus iugulasti.

III. Cum vero eleemosynam feceris, & erga indigentes affectum misericordie sollicita pietate dependeris, altare sacrum hircis pinguibus onerasti.

IIII. Nam si ex corde remiseris peccatum fratri tuo, & in candide tuore deposito, mitem intra te, & simplicem recollegeris animum; immolasse te arietem, vel agnum in sacrificium obtulisse, confide.

V. Porro autem si diuinis lectionibus instructus meditando sicut columba, & in lege Domini vigilando die ac nocte, ab errore suo conuertens peccatorem, & abiecta nequitia ad simplicitatem eum columba reuocaueris, atque adherendo sanctis, feceris eum societatem turturis imitari; par turturum, aut duos pullos columbarum Domino obtulisti.

VI. Quod si illa, quae spe & fide maior est charitas, abundauerit in corde tuo, ita ut diligas proximum tuum, non solum sicut te ipsum, sed sicut ostendit ille, qui dicebat Ioan. 15. Maiorem charitatem nemo habet, quam ut animam suam ponat quis pro amicis suis; panes similagineos, in charitatis oleo subactos, sine ullo fermento malitiae & nequitiae, in azimis sinceritatis & veritatis te obtulisse cognosce.

VII. Si autem in amaritudine fletus tui fueris, luctu, lachrymis, & lamentatione confectus: si carnem tuam macenueris, & ieiunijs ac multa abstinentia aridam feceris, & dixeris, quia sicut fruxorium confrixerunt ossa mea; tum sacrificium similes a sartagine, vel a craticula obtulisse te noueris. Et hoc modo inueneris tu verius & perfectius secundum Evangelium offerre sacrificia, quae secundum legem iam offerre non potest Israel.

Caput III.

DE DEFINITIONE.

Quemadmodum, ut dicit Cicero lib. 2. de Oratore, ad consilium de Repub. dandum caput est nosse Rempublicam; ita ad disputationem (quam vellem sub regula fidei sobriam, & ad aedificationem) de Indulgentia caput est nosse Indulgentiam, & quidnam sit Indulgentia. Quamuis au-

uis autem Indulgentia definiri definitione essentiali non possit; propterea quia constat (vt in Catechismo Romano scriptum est) quod mater Ecclesia Catholica immensa vi, & infinita Dei virtute peccata remittit, & homines ex iniustis iustos reddit, quam eandem in excitandis mortuis, & in mundi creatione necessariam esse credimus: quin etiam vt D. August. sententia Tra. 71. in Ioan. cōfirmatur, maius opus estimandum est, aliquem ex impio pium facere, quàm cælum & terram ex nihilo creare, cū ipsa creatio, non nisi ex infinita virtute possit existere; consequens est, vt multò magis remissio peccatorum infinitæ potentiæ tribuenda sit: à nobis tamen cum timore Domini, Indulgentia, definitionibus descriptiuis, prout intellectus humanus concipere & apprehendere potest, & prout communiter à Patribus, & à Doctoribus in Scholis solet definiri, definitur.

SACROSANCTVM CONCILIVM TRIDENTINVM, Sessione vigesima prima capite nono de Reformatione: Indulgentias, CAELESTES THESAUVROS, appellat.

Pro definitionis huius euidencia sciendum, quia Spiritus Sanctus in scripturis, tam veteris quàm Noui testamenti, Indulgentias thesaurum appellat. In Veteri testamento Nume. ca. 20. Dominus ad Moysen dicit: *Aperies thesaurum tuum, fontem aquæ viuæ, vt satiati cesset murmuratio eorum.* hæc sunt per allegoriam de Indulgentijs dicta.

In NOVO TESTAMENTO Matth. cap 13. *Simile est regnum cælorum,* id est, Ecclesia Catholica militans, *thesauro abscondito,* id est, Indulgentiis, quæ latent, & *sunt absconditæ à sapientibus & prudentibus,* id est, superbis, præsumptuosis, & inflatis hæreticis, & qui nolunt audire, obedire ecclesiæ. *Sed reuelantur paruulis,* id est, mitibus, poenitentibus, mansuetis, & humilibus Catholicis, *in agro,* id est, in passione & meritis redemptoris & saluatoris domini nostri Iesu Christi, beatæ dei genitricis virginis Mariæ, & omnium electorum, à primo iusto, vsq; ad vltimum, hoc est capitis & membrorum.

Dicitur autem hic thesaurus cælestis, ad differentiam thesauri terrestris: vnde saluator Matth. cap. 6. *Nolite thesaurizare vobis thesauros in terra, vbi crugo & tinea demolitur, & vbi fures effodiunt & furantur. Thesaurizate autem vobis thesauros in cælo, vbi neque crugo, neque tinea demolitur, & vbi fures non effodiunt nec furantur.*

Dicitur etiam hic thesaurus Indulgentiarum cælestis: *Quia omne datum optimum, & omne donum perfectum desursum est, descendens à Patre luminum, apud quem non est transmutatio, nec vicissitudinis obumbratio.* Iacob. cap. 1.

Hunc thesaurum cælestem, Dominus & Saluator noster Iesus Christus filius

stus filius Dei viui, hinc abiens in regionem longinquam accipere regnum & reuerti, deposuit, seruauit, & reliquit in Ecclesia Catholica: clauces autem cælestes ad hunc cælestem thesaurum vnà cum admirabili virtute, & authoritate; tum dispensationem cum magna prudentia & fidelitate credidit, & tradidit Summo Pontifici Romano, suo Vicario & Ecclesiæ pastori Petro, sic dicens Matth. 10. *Et ego dico tibi, quia tu es Petrus, & super hanc Petram ædificabo Ecclesiam meam, et portæ inferi non præualebunt aduersus eam. Et tibi dabo clauces regni cælorum, & quodcunq; ligaueris super terram, erit ligatum & in cælis: & quodcunq; solueris super terram, erit solutum & in cælis.*

CAIETANVS in opusculo 21. Quæstionum quæst. 1. definit sic: *Indulgentia est quædam absolutio & remissio respectu illius, qui Indulgentias suscipit: quia ille non soluit: sed est solutio respectu Christi, & sanctorum, qui soluerunt pro eo.*

Idem alibi: *Indulgentia est relaxatio pœnitentiæ iniunctæ. Atqui nunc conceditur etiam quantum non ad iniunctam pœnitentiam.*

DOMINICVS A SOTO Distinct. 21. Quæst. 1. Artic. 1. definit sic: *Indulgentia Ecclesiastica est relaxatio pœnæ peccato debitæ, quæ fit extra sacramenta.*

Legitur extra de Pœnitent. & Remiss. cap. Quod autem. &c. *Indulgentia est quædam remissio pœnæ debitæ pro peccato, post contritionem habitam de eo. Et hac communiter vtuntur Theologi.*

HANNIBAL ROSELLI in libro de Sacramentis Distincti. 13. cap. 1. *Indulgentia est relaxatio pœnæ, quam quis iuste pro culpis subire, & pati debuisset, & est solutio ex publico thesauro Ecclesiæ ad persoluendam diuinam iustitiam sumpta, & pœnitenti applicata.*

Item, *Indulgentia est remissio pœnæ temporalis debitæ pro peccato actuali iam dimisso, concessa existenti in gratia, de thesauro Ecclesiæ à Prælato data. Dicitur pro peccato actuali, ad differentiam peccati originalis, quod remittitur per Baptismum, vnà cum pœna damni: sicut in indulgentia remittitur peccatum actuale vnà cum pœna sensus.*

Idem, *Indulgentia est ordinaria pœnæ diuinæ temporalis, id est, quæ iuxta diuinas leges facta iustificatione in animo perseuerat, vel ex peccato veniali contrahitur ex alienis meritis extra sacramentum, Ecclesiastica authoritate facta compensatio.*

Ordinaria, inquit, pœnæ compensatio, in quo à Canonicis pœnis & censuris, quæ iudiciali absoluteione disponuntur, secernitur extra sacramenta: quia non ita hoc negotium agitur, sicut in sacramento absolutionis, siue sacramento pœnitentiæ.

Item, *Indulgentia est relaxatio pœnæ temporalis, post confessionem, iustificationem, & reconciliationem debitæ.*


Item,

Item, *Indulgentia*, est quædam satisfactio ex alienis operibus pœnalibus, qua homo sanctæ quadam metamorphosi transformatur in nouam creaturam iuxta illud Psalm. 50. *Lauabis me & super niuem de albor.*

Caput V.

DE DIVISIONE.

Ex Dominico à Soto Distinctione 21. Quæstione 1. Articulo 1.



Item alia est indulgentia simpliciter, & alia secundum quid. Indulgentia simpliciter, datur extra sacramenta: Indulgētia secundum quid, mediante sacramento Pœnitentiæ.

Item, alia est actiua, & alia passiua. Actiua est quam dat Pontifex: Passiua est quam recipit subditus Pontificis.

Nota-

NOTABILE SECUNDUM.

Caput I.

Quàm multiplex, & quid sit indulgentia, iam diximus. Sequitur, ut indulgentiarum antiquitatem cum potestate, & quomodo sancta mater Ecclesia Catholica semper fuit in possessione, & usufructus indulgentiarum, traditione, autoritate scripturæ, Conciliorum & testimoniis, ac exemplis sanctorum Patrum, contra hæreticos comprobemus. Quod priusquàm facimus, causam apostasiæ Lutheri, & causam, cur contra indulgentias Ecclesiasticas insurrexerit, cur inuectus & bacchatus fuerit, & cur easdem impiè blasphemauerit, breuiter ostendamus.

GABRIEL PRATEOLVS MARCOSSIVS, sacræ Theologiæ Doctor, libro 10. hæresum, titulo Lutherani, scripsit sic. *Lutherum, turbarum omnium Germaniæ causam esse, fatetur Ioachimus Camerarius, (si fidem meretur Ioannes Soltzius) culpamq; omnium ærumnarum, quibus adhuc conflictatur Respub. transfert in illius contentiones. Illud ergo nouæ doctrinæ genus, cum magna ingenioli ostentatione, maximaq; lactaret verborum contentione Lutherus; contigit Leonem Romanum Pontificem, templi Romæ D. Petro à Iulio Secundo inchoati, tandem absolucendi, aut (ut ait Tilius) Turcici belli causa indulgentias, atq; peccatorum condonationes, siue pœnarum relaxationes, elargiri: quas Archiepiscopo Moguntino per Germaniam credidit distribuendas. Has Augustiniani commendatas solebant populo proponere. Verùm Moguntinus hoc tempore, illas ad Dominicanos transtulit inuulgandas: unde simultas inter illorum mendicantium ordines, haud sanè leuis exorta fuit. Lutherus, ut erat ingenio acri, ubi quæstum ad se, suosq; redire solitum, aliò, cum animi dolore, reiç. culinariæ detrimento, videret translatum, cum non valeret eripere; studuit saltem impedire, aliisq; optatam illam prædam imminuere; ut si totam non excuteret, saltem maiori ex parte auerteret. Publicè igitur Anno Domini 1516. Lutherus in indulgentiarum vim atque efficaciam inter concionandum, magna cum animi contentione est inuectus: huic turbæ frigidam suffundebat Staupetius Augustinianorum Prouincialis, vehementer illis obtrectans, earumq; vim extenuans.*

Contra TETZELIVS Dominicanus, sua pro auctoritate illas propugnabat & defendebat. Mutus ergo & contrarijs assertionibus populo Saxonie dubitandi ansam præbuere, opinionibus per contentionum studia, in peius declinantibus; cum Lutherus initiò indulgentiarum potius abusum quàm
D legittimum

legittimum earum usum, quem antea laudarat, fuerit insectatus, qui & ipse, cum suis, ob earum promulgationem, maximopere speratum soliti iam quæstus lucrū multò sanè maximum captaret. Hac igitur inter ipsos oborta, cum infirmorū scandalo, contentione, de indulgentiarum viribus & efficacia, Ecclesiæ pax atq; fidei vnitas, dolendum in modum, cum certa plurimorum Christianorum pernicië, fuit has in sectiones diuulsa, atq; interturbata. Hac Prateolus.

Caput II.

PRIMÒ PROBANTVR INDVLGENTIAE, TRADITIONE SANCTORVM PATRVN CONTRA HAERETICOS.

Quia Traditio est origo sacræ scripturæ Exod. 4. & 2. Pet. 1. &c. idcirco primò traditione probabimus Indulgentias. Probabimus autem in genere siue in communi & vniuersali: quia vniuersale est causa suorum singularium, teste Aristotele lib 1. Posteriorum.

BEATVS PAVLVS Apostolus 2. ad Thes. ca. 2. dicit: *State & tenete traditiones, quas didicistis siue per sermonē, siue per Epistolam nostram.* Et hoc nomine laudat suos Corinthios, 1. Corint. 11. quòd Apostolica præcepta, quæ viua voce tradita iam acceperant, sedulò custodirent. Tum admonet Thessalonicenses 2. ad Thessal. 3. vt ab omni se fratre subducant, qui inordinatè, & non secundum traditionem ab Apostolis acceptam ambulat.

Huius præcepti memores Sancti Patres, semper vbiq; traditionum Dei, & sanctæ matris Ecclesiæ, fuerunt & ipsimet obseruantissimi: & vt à suis perpetuò obseruarentur, sedulò operam dabant: inde multa de traditione scripserunt.

TERTVLLIANVS, de corona militis, postquam enumerauit multas species traditionum, infert & concludit: *Harum & aliarum huiusmodi disciplinarum, si legem expostules, scripturam nullam inuenies: traditio tibi prætendatur auctrix, consuetudo confirmatrix, & fides obseruatric.* &c. Et paulò post: *His igitur exemplis renunciatū erit, posse etiam non scriptam traditionem in obseruatione defendi, confirmatam consuetudine idonea teste, probatæ tunc traditionis ex perseuerantia obseruationis. Consuetudo autem, etiam in ciuilibus rebus pro lege suscipitur, cum deficit lex.*

D. HIERONYMVS in Epistolis. *Ego illud te breuiter admonendum puto, traditiones Ecclesiasticas, præsertim quæ fidei non officiant, ita obseruandas, vt à maioribus traditæ sunt.*

D. AVGVSTINVS in Epistolis: *Si quid diuinæ scripturæ præscribit auctoritas,*

thoritas, non est dubitandum, quin ita facere debeamus ut legimus. Similiter etiam, si quid per orbem frequentet Ecclesia: nam hoc, quin ita faciendum sit, disputare insolentissimæ insanix est.

Idem Epistola 86. In his, inquit, de quibus nihil certi statuit diuina scriptura, mos populi Dei, & statuta maiorum pro lege tenenda sunt: & sicut præuaricatio diuinarum legum; ita contemptores Ecclesiasticarum consuetudinum coercendi sunt.

Item de Ciuitate Dei lib. 19. cap. 18. Unde, inquit, certa fide tenenda sunt, non solum quæ scripturis expressè sunt prodita; sed etiam quæ per traditionem Ecclesiæ Catholicæ credenda accepimus, & quæ definita sunt super fidei & morum negotijs per Cathedram Petri, vel per Concilia generalia legitime congregata.

LEO MAGNVS, Sermone I. de Ieiunio Pentecostes ait: Dubitandum non est, quidquid in Ecclesia in consuetudinem est deuotionis retentum, de traditione Apostolica, & de Sancti Spiritus prodire doctrina.

IRENAEVS lib. 4. contra hæreses cap. 43. Obaudire oportet Presbyteris Ecclesiæ, qui successionem habent ab Apostolis, qui, cum Episcopatus successionem charisma, veritatis certum secundum placitum Patris acceperunt: reliquos verò, qui absistunt à principali successionem, & quocunque loco colliguntur, suspectos habere, vel quasi hæreticos & malæ sententiæ, vel quasi scindentes, & elatos, & sibi placentes, aut rursus ut hypocritas, quæstus gratia & vanæ gloriæ hoc operantes.

ORIGENES, qui celebris & peruetustus est author, ita scripsit super Epistolam ad Titum: Hæreticus nobis habendus est omnis ille, qui Christo se credere profitetur, & aliud de veritate Christianæ fidei credit, quam habeat definitio traditionis Ecclesiasticæ.

Idem lib. 1. Periarchon. Illa sola credenda est veritas, inquit, quæ in nullo ab Ecclesiastica discordat traditione.

D. CHRYSOSTOMVS, in 2. Thessa. 2. Homilia 4. in illa verba: Stete, & tenete traditiones. Hinc patet, quòd non omnia per Epistolam traderint; sed multa etiam sine literis. Eadem verò fide digna sunt, tam illa quàm ista: itaq; traditionem quoque Ecclesiæ fide dignam putamus. TRADITIO EST, NIHIL QVAERAS AMPLIUS. Cuius rei causam adfert D. Basilivs li. 8. de Spi. ca. 27. Hæc, inquit, est ratio, cur quædam citra scripturam tradita sunt, ne dogmatum cognitio, propter assuetudinem, vulgo veniret in contemptum.

Idem D. BASILIUS, ibidem: Quæ in Ecclesia prædicantur, inquit, quædam habemus è doctrina scripto prodita, quædam rursus ex Apostolorum traditione in mysterio, id est in occulto tradita recepimus, quorum utraque parem vim habent ad pietatem, nec his quisquam contradicit, quisquis

sanè & tenuiter expertus est, quæ sint iura Ecclesiastica: nam, si consuetudines, quæ scripto proditæ non sunt, tanquam haud multum habentes momenti, conemur rejicere, imprudentes; et ea damnabimus, quæ in Evangelio necessaria ad salutem habentur, imò potiùs ipsam fidei prædicationem ad nudum nomen contrahemus. Et paulò pòst: Aliud, inquit, est δόγμα & aliud κηρυγμα, Dogmata, inquit, si ^{ἐν}teguntur: κηρυγματα publice prædicantur. Hæc Basilius.

Constat igitur traditionem, & scripturam eandem vim & auctoritatem habere, atq; adeò traditione ipsa magis spirituale quid, vt Dionysius, magis autem arcanum, vt Basilius docet, contineri.

THEOPHILACTVS, super 2. Thes. 2. in illa verba: State & tenete traditiones. Vel hinc etiam perspicuum est, quod plenè etiam sine scriptis per sermonem, id est viua voce tradiderunt, non solum per Epistolam. Similiter autem & hæc, & illa fide digna sunt. Itaq; & Ecclesiæ traditionem fide dignam existimamus: traditio est, nihil amplius quæras.

CONCILIVM SECVNDVM NICOENVM Actione 7. in ipsa definitione. Fatemur autem vnanimiter, nos Ecclesiasticas traditiones, siue scripto, siue consuetudine valentes, & decretis retinere velle, quarum de numero est imaginum effiguratio, & indulgentiarum concessio secundum Concilium Tridentinū Sess. 25. Decreto de Indulgentiis. Et infrà. Igitur, qui ausi fuerint aliud sentire, aut docere, aut more impiorum hæreticorum Ecclesiasticas traditiones contaminare, aut contra ista vafre & improbè aliquid excogitare, quod sit contra constitutionem Ecclesiasticam, si fuerint Episcopi, aut Clerici deponuntur: si monachi aut laici, communione priuantur. Et paulò pòst. Si quis traditionem Ecclesiæ, siue scripto, siue consuetudine valentem, non curauerit, anathema sit.

Caput III.

PROBANTVR INDVLGENTIAE AVTHORITATE SCRIPTVRAE VETERIS TESTAMENTI.

Si nullas scripturas haberemus, vti Dei gratia habemus: vel sola antiquissima traditione, perpetua successione, legitima possessione, & usufructu matris Ecclesiæ Catholicæ, sanctas indulgentias, benè & iustè deffendere, atque luculenter, & sufficienter contra hæreticos probare, Deo adiuuante, poterimus. Sed neque scripturæ defunt, quibus indulgentiæ comprobantur: communes quidem auctoritates scripturæ sunt illæ; quia Deus Opt. Max. promisit nobis indulgentiam:

tiam; sed sub conditione, si videlicet, nos ad Dominum Deum nostrum fuerimus ex animo conuersi. Sic namque Dominus per Isaiam cap. 1. dicit: *Lauamini & mundi estote, auferte malum cogitationum, etc.* Item Isaiæ cap. 33. *Populus qui habitat in ea, auferetur ab eo iniquitas: quem locum patres Cathedismi Romani de indulgentiis accipiunt,*

Item Ezechielis cap. 18. & 36. *Si autem impius egerit pœnitentiam ab omnibus peccatis suis, quæ operatus est, & custodierit vniuersa præcepta mea, & fecerit iudicium & iustitiam; vita viuet, & non morietur: in iustitia, quam operatus est, viuet. Nunquid voluntatis meæ est mors impij, dicit Dominus Deus, & non vt conuertatur à viis suis & viuat? Si autem auerterit se iustus à iustitia sua, & fecerit iniquitatem, secundum omnes abominationes, quas operari solet impius; nunquid viuet? Omnes iustitiæ eius, quas fecerat, non recordabuntur: in præuacatione sua, qua præuacatus est, & in peccato suo, quod peccauit, in ipsis morietur. Item Ezechielis 37. Et faciam eos in gentem vnā in terra in montibus Israhel, etc. vsque ad finem capituli.*

Item Osee cap. 14. *Hæc dicit Dominus Deus, Couerte Israhel ad Dominum Deum tuum: quoniam corruisti in iniquitate tua. Tollite vobiscum verba, & conuertimini ad Dominum, & dicite ei: Omnem aufer iniquitatem, & accipe bonum, & reddemus vitulos labiorum nostrorum. Assur non saluabit nos, super equos non ascendemus, nec dicemus vltra, dii nostri, opera manuum nostrarum: quia eius qui in te est, misereberis pupilli. Sana. bo contritiones eorum, diligam eos spontaneè, quia auersus est furor meus ab eis. Ero quasi ros Israhel, germinabit quasi lilium, & erumpet radix eius vt Libani: Ibunt rami eius, & erit quasi oliua gloria eius, & odor eius vt Libani. Conuertentur sedentes in umbra eius, viuent tritico, & germinabunt quasi vinea, memoriale eius sicut vinum Libani. Ephraim quid mihi vlti idola? Ego exaudiam & dirigam eum ego, vt abietem virentem, ex me fructus tuus inuentus est. Quis sapiens & intelliget ista? intelligens: & sciet hæc, quia rectè vi. e. domini, & iusti ambulabunt in eis: præuacatores verò corruent in eis.*

Item Ioel cap. 1. *Hæc dicit Dominus, conuertimini ad me in toto corde vestro, in ieiunio, in fletu, & planctu, & scindite corda vestra, & non vestimenta vestra: & conuertimini ad Dominum Deum vestrum, quia benignus & misericors est, patiens, & multæ misericordiæ, & præstabilis super malicia. Quis scit, si conuertatur & ignoscat Deus, & relinquat post se benedictionem, sacrificium, & libamen Domino Deo nostro?*

Item Zachariæ cap. 8. *Hæc dicit Dominus Deus exercituum: Sicut cogitaui, vt affligerem vos, cum ad inuicendam me prouocassent patres vestri, & non sum misertus; sic conuersus cogitaui in diebus istis, vt benefaci-*

am domui Iuda, & Ierusalem : nolite timere . Hæc sunt ergo verba, quæ facietis. Loquimini veritatem unusquisq; cum proximo suo, veritatem & iudicium pacis iudicate in portibus vestris, & unusquisq; malum contra amicum suum ne cogitetis in cordibus vestris, & iuramentum mendax negligatis. Omnia enim hæc sunt quæ odi, dicit Dominus. Et factum est verbum domini exercituum ad me dicens : Hæc dicit Dominus exercituum, Ieiunium quarti, & ieiunium quinti, & ieiunium septimi, & ieiunium decimi, erit domui Iudæ in gaudium & leticiam, & in solennitates præclaras : veritatem tantum & pacem diligite, dicit Dominus exercituum.

Ex his & aliis plurimis Sacræ scripturæ autoritatibus, manifestum est; quia Deus Opt. Max. promisit conuersis pœnitentibus indulgentiam : vnde Dauid Psal. 144. *Fidelis dominus in omnibus verbis suis, & sanctus in omnibus operibus suis.* Et Apostolus ad Heb. cap. 10. *Fidelis enim est, qui repromisit.* Et paulò post ibid. *Patientia enim vobis necessaria est; vt voluntatem Dei facientes, reportetis promissionem.*

Caput IIII.

QVOMODO PROMITTIT, ET QVOMODO DAT DEVS INDVLGENTIAM.

Ezechielis 36. Idcirco dices domui Israël, *Hæc dicit dominus Deus: Non propter vos ego faciam domus Israël; sed propter nomen sanctum meum, quod polluistis in gentibus, ad quas intrastis: Et sanctificabo nomen meum magnum, quod pollutum est inter gentes, quod polluistis in medio earum; vt sciant gentes, quia ego dominus: dicit dominus exercituum, cum sanctificatus fuero in vobis cum eis. Tollam quippe vos de gentibus, & congregabo vos de vniuersis terris, & adducam vos in terram vestram. Et effundam super vos aquam mundam, & mundabimini ab omnibus inquinamentis vestris, & ab vniuersis idolis vestris mundabo vos: & dabo vobis cor nouum, & spiritum nouum ponam in medio vestri: Et auferam cor lapideum de carne vestra, & dabo vobis cor carneum, & spiritum meum ponam in medio vestri. Et faciam, vt in præceptis meis ambuletis, & iudicia mea custodiatis & operemini: & habitabitis in terra quam dedi patribus vestris: & eritis mihi in populum, & ego ero vobis in Deus. Et saluabo vos ex vniuersis inquinamentis vestris: & vocabo frumentum, & multiplicabo illud; & non imponam vobis famem: Et multiplicabo fructum ligni, & genimina agri, vt non portetis vltra opprobrium famis in gentibus: Et recordabimini viarum vestrarum pessimarum, studiorumq; non bonorum, & displicebunt vobis iniquitates vestrae, & scelera vestra: Non propter vos*

pter vos ego faciam, ait dominus Deus, notum sit vobis: confundamini & erubescite super viis vestris domus Israhel. Hæc dicit dominus Deus, in die qua mundauero vos, ex omnibus inquinamentis vestris etc. scient gentes &c. quia ego Dominus locutus sum. Propterea Dauid Psalmo 24. orat his verbis: Propter nomen tuum domine, propitiaberis peccato meo, multum est enim. Et 1. Ioan. cap. 2. Scribo vobis filioli, quoniam remittentur vobis peccata, propter nomen eius.

Caput V.

ORANT CONVERSI PRO INDVLGENTIA.

Sciuit hanc bonitatis plenam promissionem Dei Manasses Rex Iuda, propterea 2. Paralipomenon 36. cum teneretur captus in Babylo- ne sic orat: Tu domine, secundum multitudinem bonitatis tuæ, promissisti poenitentiam & remissionem iis, qui peccauerunt tibi: & multitudine miserationum tuarum, decreuisti poenitentiam peccatoribus in salutem.

Sciuit Iudith, sicut scriptum est Iudith cap. 8. Posuisti vos tempus miserationis domini, & in arbitrium vestrum diem constituistis ei: sed quia patiens est dominus, in hoc ipso poeniteamus, & indulgentiam eius fuis lacrymis postulemus: non enim quasi homo, sic Deus cominabitur: nec sicut filius hominis, ad iracundiam inflammabitur: & ideo humiliemus illi animas nostras, & in spiritu constituti humiliato, seruientes illi, dicamus flentes domino; vt secundum voluntatem suam sic faciat nobiscum citò misericordiam suam; vt sicut conturbatum est cor nostrum in superbia eorum; ita etiam de nostrâ humilitate gloriemur. Sciuit Rex & Propheta Dauid, propterea Psalm. 38. orat pro indulgentia, teste D. Ambrosio, dicens: Remitte mihi, vt refrigerer priusquam abeam, & amplius non ero.

Item Psalm. 50. Miserere mei Deus, secundum magnam misericordiam tuam, & secundum multitudinem miserationum tuarum, dele iniquitatem meam. Amplius laua me ab iniquitate mea, & à peccato meo munda me etc.

Item Psalm. 84. Benedixisti domine terram tuam, auertisti captiuitatem Iacob. Remissisti iniquitatem plebi tuæ, operuisti omnia peccata eorum. Mitigasti omnem iram tuam, auertisti ab ira indignationis tuæ. Conuerte nos Deus salutaris noster, & auerte iram tuam à nobis, etc.

Item Micheæ cap. 7. Quis Deus similis tui, qui aufers iniquitatem & transfers peccatum reliquiarum hereditatis tuæ? Non imittet vltm furorem suum, quoniam volens misericordiam est: Reuertetur & miserebitur nostri: deponet iniquitates nostras, & projiciet in profundum maris omnia peccata nostra: dabis veritatem Iacob, misericordiam Abrahæ, quæ iurasti

patribus nostris à diebus antiquis.

Non solum autem orant, sed absoluti & consolati gratias agunt: Sic Dauid Psalmo 101. *Scribantur hæc in generatione altera, & populus qui creabitur laudabit dominum. Quia prospexit de excelsis suis, dominus de cælo in terram aspexit, ut audiret gemitus compeditorum, ut solueret filios interemptorum, &c.*

Item Psal. 102. *Benedic anima mea domino, & omnia quæ intra me sunt, nomini sancto eius. Benedic anima mea domino, & noli obliuisci omnes retributiones eius. Qui propitiatur omnibus iniquitatibus tuis, qui sanat omnes infirmitates tuas. Qui redimit de interitu vitam tuam: qui coronat te in misericordia & miserationibus, &c.*

Et infra ibid. *Quoniam secundum altitudinem cæli à terra, corroborauit misericordiam suam super timentes se. Quantum distat ortus ab occidente, longè fecit à nobis iniquitates nostras. Quomodo miseretur pater filiorum; misertus est dominus timentibus se, quoniam ipse cognouit figmentum nostrum etc.* Hinc illud Psalm. 145. *Dominus soluit compeditos, dominus illuminat cæcos. Dominus erigit elisos, Dominus diligit iustos.* Et illud, Psal. 146. *Dominus sanat contritos corde, & alligat contritiones eorum.*

Et illud Psal. 147. *Lauda Ierusalem dominum, lauda Deum tuum Sion. Quoniam confortauit senes portarum tuarum, benedixit secundum fidem diuinam indulgentiam filiis tuis in te. Qui posuit finis tuos pacem, pax est effectus indulgentiæ, sicut & benedictio, &c.*

Item Isaia 63. *Miserationum domini recordabor, laudem domino super omnibus, quæ reddidit nobis Dominus, & super multitudine bonorum domui Israël, quæ largitus est eis secundum indulgentiam suam, & secundum multitudinem misericordiarum suarum: & dixit: verumtamen populus meus est, filij non negantes, & factus est eis saluator: in omni tribulatione eorum non est tribulatus, & angelus faciei eius saluauit eos in dilectione sua, & indulgentia sua ipse redemit eos, & portauit eos, & eleuauit eos cunctis diebus seculi.*

Sic Anna 1. Regum cap. 2. Gratias agit pro Indulgentia: *Exultauit cor meum in Domino, & exaltatum est cornu meum in Deo meo: Dilatatum est os meum super inimicos meos; quia letata sum in saluari tuo. Non est sanctus ut est Dominus, neque enim est alius extra te, & non est fortis, sicut Deus noster.*

Sic Isaia cap. 12. *Confitebor tibi Domine, quoniam iratus es mihi, conuersus est furor tuus, & consolatus es me. Ecce Deus saluator meus, fiducialiter agam, & non timebo. Quia fortitudo mea & laus mea Dominus, & factus est mihi in salutem. Haurietis aquas in gaudio de fontibus saluatoris, & dicetis in illa die: Confitemini Domino, & inuocate nomen eius.*

Notas

Notas facite in populis adinventiones eius. Mementote, quoniam excelsum est nomen eius. Cantate Domino, quoniam magnifice fecit, nunciate hoc in vniuersa terra. Exulta & lauda habitatio Sion: quia magnus in medio tui sanctus Israël.

Caput VI.

EXEMPLA PONVNTVR INDVLGENTIARVM IN VETERI TESTAMENTO.

Vidimus scripturas, quibus probatū est Indulgentias in veteri lege fuisse datas Patribus: quia, quod alicui Deus promittit, dat. Videamus exempla Indulgentiarum, & discamus antiquitatem indulgentiarum.

Primus formatus à Deo pater orbis terrarum Adam peccauit, & scriptura Sapient. cap. 10. dicit: *Quia Deus eum custodiuit, & eduxit illum à delicto suo.*

Item Exod. cap. 32. Peccatū idololatrię peccauit populus in deserto: orauit Moyses pro peccato populi dicēs: *Obsecro Domine, peccauit populus iste peccatum maximum, feceruntq; sibi Deos aureos: aut dimitte eis hanc noxam, aut si non facis, dele me de libro tuo quē scripsisti. Cui respondit Dominus: Qui peccauerit mihi, delebo eum de libro meo. Tu autem vade, et duc populum istum, quō loquutus sum tibi, angelus autē meus præcedet te.*

Similiter legimus Numerorum cap. 11. quia peccauit Moyses & Aaron peccatum diffidentię, & Dominus pepercit illis. Item, 1. Regum cap. 1. exemplum in Helcana & Anna vxore eius.

Item, 2. Regum cap. 12. Peccauit Dauid peccatum adulterij & homicidij; quia Bethsabee vxorem Vrię accepit, & Vriam virum iustum occidi fecit. Quod cū Nathan Propheta exprobrasset Dauid, tum dixit Dauid ad Nathan: *peccaui Domino: dixitq; Nathan ad Dauid: Dominus quoque transtulit peccatum tuum, non morieris.*

Item, Peccauit Salomon 3. Regum cap. 11. & Dominus propter patrem Dauid pepercerat illi.

Item, 3. Regum 21. Peccauit Achab, quia occidit Vriam. sed quia humiliavit se coram Domino, & Elia seruo eius, quia poenitentiam egit, hoc est, scidit vestimenta sua, & operuit cilicio carnem suam, ieiunauitque & dormiuit in sacco, & ambulauit demisso capite, Dominus non induxit malum in diebus eius; sed in diebus filij sui.

Item 4. Reg. cap. 20. & Isaia cap. 38. Propter peccatum ingratitude, quia non egit gratias Deo pro victoria Rex Ezechias, *egrotauit vsq; ad mortem, & intrauit ad eum Isaia Propheta, & dixit ei: Dispone domui*

domui tuæ, quia morieris tu, & non viues. Et conuertit Ezechias faciem suā ad parietem, & orauit ad Dominum, et dixit: Obsecro Domine, memento quæso, quomodo ambulauerim coram te, in veritate & in corde perfecto, et quod bonum est in oculis tuis fecerim. Et fleuit Ezechias fletu magno: Et factum est verbum domini ad Isaiam dicens: Vade, et dic Ezechiae, Hæc dicit Dominus Deus Dauid patris tui: Audiui orationem tuam, et vidi lachrymas tuas. Ecce ego adjiciam super dies tuos quindecim annos, et de manu Regis Assyriorum eruam te, et ciuitatem istam, et protegam eam.

Item Ioël cap. 2. Zelatus est Dominus terram suam, et pepercit populo suo. Item Ionæ 3. Dominus Niniuen ciuitati, iam iam propter peccata periturae, pepercit: quia Niniuite coram domino, ad prædicationem Ionæ, sese humiliauerunt, pœnitentiam egerunt, ieiunauerunt etc. Possint & alia huiusmodi exempla, in veteri testamento inueniri: verum ex aliis multis, nunc hæc sufficiant, ad faciendam fidem: quia in veteri lege, Deus populo suo dabat indulgentias. Porro, si tu dicas, quia Deus in veteri lege, frequenter legitur puniuisse delinquentes, & legis transgressores. Esto sanè. Ego verò respondeo: quia illa exempla, vbi Deus punit transgressores, facilius possunt numerari: contra istorum quibus pepercit copia est infinita, & innumerabilia sunt exempla. Vnde Tobia 13. dicitur: Conuertimini itaq; peccatores, & facite iustitiam coram Domino, credentes quod faciat vobiscum misericordiam suam. Et Ezechielis 18. Conuertimini & agite pœnitentiam ab omnibus iniquitatibus vestris, et non erit vobis in ruinam iniquitatis. Projicite à vobis omnes iniquitates vestras, in quibus præuaricati estis. et facite vobis cor nouum, et spiritum nouum. Et quare moriemini domus Isruel? Quia nolo mortem morientis dicit Dominus Deus: reuertimini et viuite.

Caput VII.

PONVNTVR PROPHECIAE SVPER FVTVRIS INDVLGENTIIS IN NOVA LEGE.

Veteris testamenti Patriarchæ & Prophete, quia magis Indulgentias habebant in spe, & mater Ecclesia Catholica in re: itaque à longè aspicientes, ad vberiores & pleniores Indulgentias nouæ legis, ita de illis prophetabant.

Isaias cap. 4. & 12. Haurietis aquas in gaudio de fontibus saluatoris. D. Albertus Magnus super 13. caput Zachariæ, vbi adducit hæc verba dicit: Fontes enim isti manant aquas absolutionis, in gratia sacramentorum, et aquas

et aquas doctrinae in verbo doctorum, et aquas refrigerij (vide indulgentias) in consolatione tentatorum, et aquas humectantes in rigatione aridorum. Genesis 2. Fluvius egrediebatur de loco voluptatis, qui hinc inde diuiditur in quatuor capita.

Item, Isaia 55. Omnes sitientes venite ad aquas, et qui non habetis argentum, properate, emite, et comedite: venite, emite absq; argento, et absque ulla commutatione, vinum et lac.

Item, Zacharia 12. In illa die effundam super domum David, et super habitatores Ierusalem, spiritum gratiae, et precum.

Item, Zacharia cap. 13. In illa die erit fons patens domui David, et habitatoribus Ierusalem, in ablationem peccatoris.

D. Albertus Magnus, super iisdem verbis, qui actualiter peccauit: Actualia. Verò peccata sacramento poenitentiae curantur, et sanantur: poena autem temporalis, tam pro actualibus, quam venialibus, indulgentia relaxatur, & MENSTRVATAE. Idem super iisdem verbis, per quod intelligitur originale peccatum.

Caput VIII.

PONVNTVR FIGVRAE ET PROPHETIAE DE
AUTHORITATE ET IVRISDICTIONE SVMMI
PONTIFICIS ROMANI PAPAE.

Scriptum est Exodi cap. 19. Descenditq; Dominus super montem Sinai, in ipso montis vertice, et vocauit Moysen in cacumen eius. Quò cum ascenderit, dixit ad eum: Descende et contestare populum, ne forte velit transcendere terminos ad videndum dominum, et pereat ex eis plurima multitudo: Sacerdotes quoque, qui accedunt ad dominum, sanctificentur, ne percutiat eos. Dixitq; Moyses ad Dominum: Non poterit vulgus ascendere in montem Sinai: Tu enim testificatus es, et iussisti dicens: Pone terminos circa montem, et sanctifica illum. Cui ait dominus: vade, descende, ascendesq; tu, et Aaron tecum, sacerdotes autem et populus non transeant terminos, nec ascendant ad dominum, ne forte interficiat illos. Descenditq; Moyses ad populum, et omnia narrauit eis: Nota, quòd in hoc capite frequenter repetitur, quia Moyses sanctificauit populum.

Item Exodi 24. Dixit autem Dominus ad Moysen: Ascende ad me in montem, et esto ibi, daboq; tibi duas tabulas lapideas, et legem ac mandata, quae scripsi, vt doceas filios Israhel. Surrexerunt Moyses, et Iosue minister eius: ascendensq; Moyses in montem Dei, senioribus ait: Expectate hic do-

hic donec reuertamur ad vos : Habetis Aaron et Hur vobiscum , si quid natum fuerit quæstionis , referetis ad eos. Cùmq; ascendisset Moyses , operuit nubes montem , et habitauit gloria domini super Sinai , tegens illum nube sex diebus : septimo autem die , vocauit eum dominus de medio caliginis. Erat autem species gloriæ domini , tanquam ignis ardens , super verticem montis , in conspectu filiorum Isniël. Ingressusq; Moyses medium nebulæ , ascendit in montem , et fuit ibi quadraginta diebus , et quadraginta noctibus.

Item , huius rei præcessit figura in Aaron , Exodi cap. 28. Portabitq; Aaron iniquitates eorum , quæ obtulerant , et sanctificauerunt filij Israël , in cunctis muneribus et donatoriis suis.

Item , præcessit huius rei figura in Dauid , 1. Regum cap. 22. vbi scriptura dicit : Et conuenerunt ad eum , id est , ad Regem Dauid , omnes , qui erant in angustia constituti , & oppressi ære alieno , & amaro animo , & factus est eorum princeps.

Præcessit super ea re prophetia Ezechielis cap. 37. vbi scriptum est : Et non erunt vltra duæ gentes : nec diuidentur amplius in duo regna : neq; polluentur vltra in idôlis suis , & abominationibus , & cunctis iniquitatibus suis : & saluos eos faciam de vniuersis sedibus suis , in quibus peccauerunt , & emundabo eos : & erunt mihi populus , & ego ero eis Deus : & seruus meus Dauid Rex super eos , & pastor vnus erit omnium eorum. In iudiciis meis ambulabunt , & mandata mea custodient , & facient ea : & habitabunt super terram , quam dedi seruo meo Iacob , in qua habitauerunt patres vestri : & habitabunt super eam ipsi , & filij eorum , & filij filiorum eorum , vsque in sempiternum : et Dauid seruus meus princeps eorum in perpetuum. Et percutiam illis fœdus pacis , pactum sempiternum erit eis : et fundabo eos , et multiplicabo : et dabo sanctificationem meam in medio eorum in perpetuum. Et erit tabernaculum meum in eis , et ero eis Deus , et ipsi erunt mihi populus : et scient gentes , quia ego Dominus sanctificator Israël , cùm fuerit sanctificatio mea in medio eorum in perpetuum.

Item , Osee cap. 1. Et congregabûntur filij Iuda , et filij Israël pariter , et ponent sibi met caput vnum , et ascendent de terra , quia magnus dies Iezrael.

NOTABILE TERTIUM.

Caput I.

PROBANTVR INDVLGENTIAE AVTHORITATE SCRIPTURAE NOVI TESTAMENTI.

Sancta

SAncta mater Ecclesia Catholica, sicut vincit Synagogam Sacerdotio, Euangelio, Sacrificio, Sacramentis, benedictionibus; ita & Iubileis ac Indulgentiis, iuxta illud ad Heb. cap. 1. & 8. *Christus purgationem peccatorum faciens, nunc melius sortitus est ministerium, quanto et melioris testamenti mediator est, quod in melioribus repromissionibus sancitum est: nam si illud prius culpa vacasset; non utique secundi locus inquireretur: vituperans enim eos, dicit Ierem. 31. Ecce dies veniunt dicit Dominus, et consumabo super domum Israel, et super domum Iuda testamentum nouum; non secundum testamentum quod feci patribus eorum, in die qua apprehendi manum eorum, ut educerem illos de terra Egypti: quoniam ipsi non permanserunt in testamento meo, & ego neglexi eos dicit Dominus. Quia hoc est testamentum quod disposui domui Israel: post dies illos dicit Dominus, dando leges meas in mentes eorum, & in corda eorum superscribam eas, & ero eis in Deum, & ipsi erunt mihi in populum. Et non docebit unusquisque proximum suum, & unusquisque fratrem suum, dicens, Cognosce Dominum: quoniam omnes scient me à minore usque ad maiorem: quia propitius ero iniquitatibus eorum, & peccatorum eorum iam non memorabor. Dicendo autem nouum, veterauit prius. Quod autem antiquatur & senescit, propè interitum est. Item, 1. Pet. 2. Vos autem genus electum, regale sacerdotium, gens sancta, populus acquisitionis: ut virtutes annuncietis eius, qui de tenebris vos vocauit in admirabile lumen suum. Qui aliquando non populus Dei, nunc autem populus Dei: qui non consequuti misericordiam, nunc autem misericordiam consequuti. Qui vero ab accepta iustificationis gratia per peccatum exciderunt, rursus iustificari poterunt, cum excitante Deo per poenitentiae sacramentum, & Indulgentias, merito Christi amissam gratiam recuperare procurauerint. Nam Christus Dominus talibus Indulgentiam promittit. Vnde Matth. cap. 9. Non est opus valentibus medico, sed male habentibus. Euntes autem discite, quid est misericordiam volo, & non sacrificium. Non enim veni vocare iustos, sed peccatores.*

Item Mat. II. dicit: *Venite ad me omnes, qui laboratis, & onerati estis, & ego reficiam vos: tollite iugum meum super vos, & discite à me; quia mitis sum & humilis corde, & inuenietis requiem animabus vestris: iugum enim meum suauis est, et onus meum leue.* VENITE AD ME OMNES QUI LABORATIS ET ONERATI ESTIS. **HILARIUS.** *Legis difficultatibus laborantes, & peccatis seculi oneratos ad se vocat.* **D. HIERONYMVS.** *Gruua enim esse onem peccati. Et Zacharias Propheta cap. 5. testatur: Iniquitatem, dicens, se dere super talentum plumbi. Et Psalmista compleuit Psalm. 31. Quoniam iniquitates meae supergressae sunt caput meum, & sicut onus graue grauatae sunt super me.* **D. Gregorius Magnus lib. 30. Mo-**

ralium cap. 32. *Asperum enim & durum seruitutis pondus est subesse temporalibus, ambire terrena, retinere labentia, velle stare in non stantibus, appetere quidem transeuntia, sed cum transeuntibus nolle transire. Dum enim contra mentem cuncta fugiunt, quæ prius mentem ex desiderio adeptio- nis afflixerant, postea ex pauore amissionis præmunt.* D. Chrysostomus Homilia 39. in Matth. *Non autem dicit venite ille & ille: sed omnes qui in sollicitudinibus, qui in tristitijs, qui in peccatis estis; non ut expectam noxas, sed ut soluam peccata. Venite, non quoniam indigeo vestra gloria; sed quia volo vestram salutem. Unde dicit, Et ego reficiam vos, id est, in omni quiete constituam. Tollite iugum meum super vos, & discite à me quia mitis sum, & humilis corde, & inuenietis requiem animabus vestris. Iugum enim meum suauis est, & onus meum leue.* Simile quid legitur i. Regum cap. 22. *Venerunt ad Dauid omnes, qui erant in angustia constituti, & oppressi ære alieno, & amaro animo, & factus est eorum princeps.*

Et nunc veniunt omnes ad filium Dauid Clementem Octauum, qui regnat in domo Iacob & Dauid, id est in Ecclesia Catholica, afflicti, mi- feri, & qui veniunt cōtrito corde, virtute Christi per manus Clementis, si fuerint infirmi, sanantur: compediti soluuntur, coeci illuminan- tur, elisi eriguntur, mediante sancta Indulgentia. Item, Lucæ 19. *Ve- nit enim filius hominis quærere, & saluum facere, quod perierat*

Item, Ioan. cap. 4. *Qui biberit ex aqua, quam ego dabo ei, non sitiet in æternum: sed aqua quam ego dabo ei, fiet in eo fons aquæ salientis in vitam æternam.* D. Thomas super iisdem verbis: *Non de temporali, sed de spiritali aqua Dominus dicit.* Item, ad Rom. 8. *Si Deus pro nobis, quis contra nos? Qui etiam proprio filio suo non pepercit; sed pro nobis omnibus tradidit illum: quomodo non etiam cum illo omnia nobis donauit? Quis accusabit aduersus electos Dei? Deus, qui iustificat.*

Item, 2. Corint: 5. *Quoniam quidem Deus erat in Christo, mundum re- concilians sibi: nec reputans illis delicta ipsorum, & posuit in nobis verbū re- conciliationis (sanctæ indulgentiæ) Pro Christo ergo legatione fungimur, tanquam Deo exhortante per nos, obsecramus pro Christo, reconciliamini Deo.* Item, i. ad Timoth. cap. 1. *Fidelis sermo & omni acceptione di- gnus, quod Christus Iesus venit in hunc mundum, peccatores saluos facere, quorum primus ego sum: sed ideò misericordiam consecutus sum, ut in me primo ostenderet Christus Iesus omnem patientiam, ad informationem eo- rum, qui credituri sunt illi in vitam æternam.*

Caput II.

ORANDVM ESSE CATHOLICIS PRO INDVLGENTIA.

Multæ

MVLtæ sunt causæ, propter quas in Ecclesia Catholica debeamus orare sine intermissione pro indulgentia. Verùm tamen duæ sunt causæ principales: Prima quidem Christi domini redemptoris exemplū: Secunda verò eiusdem magistri nostri præceptum. EXEMPLVM QVIDEM, quia eleuatis ad Deum patrem in cruce manibus, primum verbum fecit, & primam orationem posuit pro indulgentiis suorum inimicorum dicens: Lucæ 23. cap. *Pater, dimitte illis, non enim sciunt quid faciunt.* Hoc exemplo S. Stephanus, Actuum cap. 7. orat pro inimicis: nam scriptura dicit: *Positis autem genibus, clamabat voce magna, Domine ne statuas illis hoc peccatum.* Hoc exemplo orat mater Ecclesia. PRÆCEPTVM VERÒ, quia magister & præceptor noster Christus dominus, Matth. cap. 6. sic docuit, sic præcepit dicens: *Cum orabitis, dicite: Pater noster, etc. Dimitte nobis debita nostra, sicut & nos dimittimus debitoribus nostris.* Hoc præcepto orat mater Ecclesia Catholica pro indulgentia sine intermissione.

Non solum autem, sed absoluti, & consolati, vel per se, vel per alios gratias agūt. Sic sancta Dei genitrix virgo Maria, nomine ecclesiæ pro indulgentia gratias agit, Lucæ 1. cap. dicens: *Magnificat anima mea dominum, & exultauit spiritus meus in Deo salutari meo, etc. Et misericordia eius à progenie in progenies, timentibus eum, etc. Suscepit Israel puerum suum, recordatus misericordiæ suæ, etc.*

Et Zacharias Propheta, Lucæ cap. 1. *Benedictus Dominus Deus Israel, quia visitauit, & fecit redemptionem plebi suæ. Et erexit cornu salutis nobis, in domo David pueri sui.*

Caput III.

EXEMPLA PONVNTVR INDVLGENTIARVM IN NOVO TESTAMENTO.

Petrus Apostolus, post peccatum negationis, Marci 14. conuersus, obtinuit apud Christum indulgentiam, & factus est Apostolus, Marci 16. vnde potest de illo dici illud Apostoli ad Rom. cap. 5. *Ubi abundauit delictum, superabundauit & gratia.*

Paulus Apostolus persecutor ecclesiæ, 1. Corinth. 15. conuersus, Actuum 9. obtinuit apud Christum indulgentiam, & factus est Apostolus.

Mattheus publicanus thelonearius conuersus, obtinuit apud Christum indulgentiam, & consecutus est promotionem ad honorem A-

postolatus & Euangelistæ, Matth. 9.

Zachæus publicanus thelonearius conuersus, obtinuit apud Christum indulgentiâ, & nomen filij Abrahæ, Luc. 19. Similiter Maria Magdalena, Lucæ 7. Item, Latro ad dexteram pendens in cruce, Luc. 23. conuersus in articulo mortis, obtinuit indulgentiam apud Christum.

Item, 1. Corinth. 15. & 2. Corint. 2. Ille profanus Corinthius fornicator, quem propterea B. Paulus Apostolus excommunicauerat, conuersus & absolutus ab eodem Apostolo, obtinuit indulgentiam: nam condonauit illi culpam & pœnam æternam, sed non temporalem.

Vnde beatus Paulus Apostolus ad Heb. cap. 4. dicit: *Habentes ergo Pontificem magnum, qui penetrauit cælos, Iesum filium Dei, tenemus spei nostræ confessionem. Non enim habemus Pontificem, qui non possit compati infirmitatibus nostris: tentatum autem per omnia pro similitudine absq. peccato. Adeamus ergo cum fiducia, ad thronum gratiæ eius; ut misericordiam consequamur, & gratiam inueniamus in auxilio opportuno.*

Caput IIII.

PROBANTVR INDVLGENTIAE TESTIMONIIS SANCTORVM PATRVM.

D. GREGORIUS MAGNVS, super Psalmum pœnitentialem, qui quinquagesimus est, super illis verbis: *Et secundum multitudinem miserationum tuarum, dele iniquitatem meam*, Indulgentiam preciosissimum thesaurum æstimat, sic dicens: *Tu domine, immensas & innumera- biles mundo exhibuisti misericordias, quando genus humanum de seruitute diabolicæ tyrannidis eripuisti, & à peccatis suis, in sanguine tuo electos tuos lauisti. Lauet sanguis iste peccatorum meorum maculas, qui totius mundi potuit delere offensas. Non postulo à te aurum: non lapides pretiosos: non laboribus & naufragiis exquisita commercia: non peregrinas merces, de remotis terrenarum regionum, multo ad nos discrimine delatas, quæ etiam fortium sæpè virorum mentes effœminant, et falsæ pulchritudinis imagine illectas captiuant; verum, quod omnibus his est præstantius, & pretiosius, remissionem peccatorum expeto. Quæ tunc veni esse probabitur, si addito fructu pœnitentiæ, gratiæ tuæ muneribus cumulatur. Quid enim mihi prodest malorum, quæ feci, impunitas, nisi etiam benè operandi subsequatur facultas? &c.*

D. AMBROSIVS de pœnitentia lib. 1. cap. 17. *Quid expectamus, ut mortui mereantur veniam, qui mortem sibi intulerunt cum viuerent? Satis est, inquit, ei qui talis est obiurgatio hæc, quæ fit à pluribus; ita ut è con-
tuario*

trario magis donetis & consolemini, ne fortè abundantiore tristitia absorbeatur. Si satis ad condemnationem est obiurgatio, quæ fit à pluribus; satis est quoq; ad remissionem peccati obsecratio, quæ fit à pluribus. Moralit magister, & nostræ fragilitatis conscius, & pietatis diuinæ interpres, vult donari peccatum, vult consolationem adhiberi; ne tristitia pœnitentem tædio longæ dilationis absorbeat. Ideò ergo donauit Apostolus: nec solum donauit; sed etiam confirmari in eam charitatem voluit. QVI CHARVS EST, NON HABET DVRTIAM, SED MANSVETVDINEM. Non solum donauit ipse, sed voluit etiam omnes donare, & se propter alios donasse dixit, ne multi propter unum diutius contristarentur. 2. Corint. 2. Si cui, inquit, donastis, & ego: nam & ego propter vos in persona Christi, vt non circumueniamur à Satana: nec enim versutias eius ignoramus. Rele potest serpentem cauere, qui eius potest versutias non ignorare, quæ multæ ad nocendum sunt: vult enim semper nocere, semper circumuenire, vt mortem inferat. Sed debemus cauere, ne remedium nostrum fiat eius triumphus: circumuenimur enim ab eo, si per nimiam tristitiam pereat, qui potest liberari per indulgentiam. Et vt sciremus, quia de baptisato dicit: addidit 1. Corint. 5. Scripsi vobis in epistola, ne commisceamini fornicariis, non utiq; fornicariis huius mundi: Et infra subiunxit. Nunc autem scripsi vobis, non commisceri: si quis frater nominatur fornicator, aut auarus, aut idòlis seruiens. Quos simul subiunxit ad pœnam, simul voluit etiam ad veniam pertinere: Si quis autem talis est, inquit; cum hoc nec cibum sumere. Quàm seuerus pertinacibus, quàm indulgens rogantibus: aduersum illos Christi armatur iniuria; his Christi inuocatio suffragatur. At ne quis fortè eo moueatur, quia scriptum est: Tradidi huiusmodi hominem Satanae, in interitum carnis, & dicat: Quomodo potuit ad veniam pertinere, cuius omnis interierit caro, cum manifestum sit in utroq; redemptum hominem, in utroq; saluari: neq; animam sine carne, neque carnem sine anima, cum sibi sint gestorum operum consortiis copulatæ, sine consortio vel pœnæ esse, vel præmii? Is sibi responsum hoc habeat, quòd interitus non consumatā absorptionem carnis significet; sed castigationem: sicut enim mortuus peccato, Deo viuit; ita illecebra carnis interit, & cupiditatibus suis moritur caro; vt castitati cæterisq; bonis operibus reuiuifcat, & quod aptius exemplum, quàm de matre sumamus? Namque ipsa de qua assumpti sumus terra, intermisso exercitio, cultuq; videtur deserta, et aut vineis quibus consitus est ager, aut oleis moritur; succum tamen proprium, velut quandam sui animam, non amittit. Deniq; repetita cultione, & creditis seminibus, quibus habilis aestimatur, feracior assurgit fructibus. Non ergo alienum, si etiam nostra caro interire sic dicitur; vt repressa magis, quàm assumpta credatur. Nota, sicut S. Paulus, ita nunc Papa in persona Christi largitur nobis indulgentias.

Item, D. AMBROSIVS, super Psalm. 38. exponens illa verba. *Re-mitte mihi vt refrigerer, priusquàm eam, & amplius non ero*, dicit. *Hoc est, híc mihi remitte, vbi peccaui: nisi híc remisseris mihi; ibi remissionis requiem inuenire non potero. Quod enim in terra ligatum manserit, ligatum manebit in cælo: quod solutum in terra fuerit, solutum erit in cælo. Propheta enim, & prædicator ecclesiæ congregandæ, euangelico spiritu indulgentias domini præuidebat, & præcipienda Apostolis, ei dominus reuelabat. Imò hæc erat vetus sententia, vt qui se ligasset in terris, vinctus migraret à corpore. Ideò dominus, quod antè erat iudicij sui, dedit Apostolis, peccata remittendi æquitatem, ne citò soluenda, diu ligata manerent. Deniq; audi dicentem: Tibi dabo claues regni cælorum: et, quodcunq; ligaueris super terram, erit ligatum & in cælo: &, quodcunq; solueris super terram, erit solutum & in cælo. Tibi, inquit, dabo claues regni cælorum, vt et soluas, et liges. Hoc Nouatianus non audiuit, sed ecclesia Dei audiuit: ideò ille in lapsu, nos in remissione: ille in pœnitentia, nos in grãtia. Quod Petro dicitur; Apostolis dicitur: non potestatem vsurpamus; sed seruimus imperio, ne postea cùm venerit dominus, & ligatos inuenerit, quos oportuit solui, commoueatur aduersus dispensatorem, qui ligatos seruauerit seruos; quos dominus iusserat solui dicens: Quoniam qui cognouit voluntatem domini sui, & non fecit secundum voluntatem eius, vapulabit multum: qui autem non cognouit, & fecit digna plagis, vapulabit minus. Meritò ergo David remitti sibi postulat, quod sciebat, non esse iis, qui secundum Aaron erant, sacerdotibus attributum; sed euangelio seruatum. Cui ergo non remittitur, in exilio est, in peregrinationis iniuria perseuerat. Híc ergo petenda est venia. Híc enim dictum est: Beati qui nunc fletis, quia ridebitis. Híc locus est veniæ postulandæ. Deploremus igitur in terris, vt mereamur indulgentiam. Nisi remissum peccatum híc fuerit, non habebimus requiem: si requies non fuerit, non erit vita æterna: si vita æterna non fuerit, non erimus: ideò petit remitti sibi antequam eat vt sit. Si enim remissum non fuerit; Non ero, inquit, cum iis qui sunt, cum ijs qui in paradysum merentur ascendere. Qui autem non est, consumetur cum descendentibus in lacum, qui in catenis, & in carcere fuerit derelictus.*

D. AVGVSTINVS Tractatu 33. in Ioannem, super cap. 8. Ioan. super illa verba. *Vade: deinceps iam noli peccare. Ergo & Dominus damnauit, sed peccatum, non hominem: nam si peccatorum fautor esset, diceret: nec ego te condemnabo, vade, & viue, vt vis: de mea liberatione esto secura: ego, quantumcunq; peccaueris, te ab omni pœna, etiam gehennæ, & inferni terroribus, liberabo. Non hoc dixit. Intendant ergo qui amant in domino mansuetudinem, & timeant veritatem: etenim dulcis & rectus Dominus: ama, quòd dulcis est: time, quòd rectus est. Tanquam*
mansue-

mansuetus dixit, Tacui: sed tanquam iustus, Nunquid semper tacebo? Misericors & miserator Dominus; ita plane: ad huc adde, longanimis: ad huc adde, & misericors: sed time, quod est in nouissimo & verax. Quod enim modo sustinet peccantes, iudicaturus est contemnentes. An diuitias longanimitatis & mansuetudinis eius contemnis? ad Rom. 2. Ignoras quia patientia dei, ad poenitentiam te adducit? Tu autem secundum duriciam cordis tui, & cor impoens thesaurizas tibi iram, in die irae, & reuelationis iusti iudicii dei, qui reddet unicuique secundum opera sua. Mansuetus dominus: longanimis Dominus: misericors Dominus: sed & iustus Dominus: & verax Dominus. largitur tibi spatium correctionis; sed tu plus amas dilationem, quam emendationem. Malus fuisti heri, hodie bonus esto: & hodiernum diem in malicia peregisti: vel cras mutare: semper expectas, & de misericordia dei tibi plurimum polliceris; quasi ille, qui tibi per patientiam promisit indulgentiam, promiserit tibi etiam prolixiorē vitam. Unde scis, quid pariat crastinus dies? Recte dicis in corde tuo, quando me correxero: Deus mihi omnia peccata mea dimittet. Negare non possumus, quod correctis atque conuersis indulgentiam Deus promisit. Nam in quo mihi Propheta legis, quia promisit correcto indulgentiam? non mihi legis: quia promisit tibi Deus longam vitam. Ex utroque igitur homines periclitantur: & sperando, & desperando: contrariis rebus, contrariis affectionibus. Sperando, quis decipitur? Qui dicit: Bonus est Deus, misericors est Deus, faciam quod mihi placet, quod libet: laxem habenas cupiditatibus meis, impleam desideria animae meae. Quare hoc? Quia misericors est Deus, bonus est Deus, mansuetus Deus. Spe isti periclitantur. Desperatione autem, qui cum inciderint in grauiora peccata, putantes sibi non posse iam ignosci poenitentibus, et statuantes se ad damnationē, sine dubio destinatos dicunt apud semetipsos: iam damnandi sumus: quare non quod volumus facimus? Animo gladiatorum, ferro destinatorum: ideò molesti sunt desperati. Iam enim quod timeant, non habent, & vehementer timendi sunt. Istos desperatio vocat, spes illos: inter spem & desperationem fluctuat animus. Metuendum est, ne te occidat spes: & cum multum speras de misericordia, incidas in iudicium. Metuendum est rursus, ne te occidat desperatio: & cum putas iam tibi non ignosci, quae grauiora commisisti, non agas poenitentiam, et incurris in iudicem Sapientiam, quae Prouer. 1. dicit: Et ego vestrae perditioni super ridebo. Quid ergo ait dominus, cum periclitantibus utroque morbo? Illis qui spe periclitantur, haec dicit Ecclesiastici 5. Ne tardes conuerti ad dominum, neque differas de die in diem: subito enim venit ira illius, & in tempore vindictae disperdet te. Illis, qui desperatione periclitantur, quid dicit Ezechiel. cap: 18? In quacunque die iniquus conuersus fuerit, omnes iniquitates eius obliuiscar. Propter illos ergo qui desperatione periclitantur, proposuit indulgentiae

portum: Propter illos, qui spe periclitantur, & dilationibus illudantur, fecit diem mortis incertum: quando veniat ultimus dies, nescis: ingratus es, quia hodiernum habes, in quo corrigaris? Sic ergo dixit ad istam mulierem: Nec ego te condemnabo: sed facta secura de præterito, caue futura: Nec ego te condemnabo: deleui quod commisisti: observa quod præcepi, ut inuenias quod promisi, Hæc D. Augustinus. Item, D. AUGUSTINVS multa scribit de indulgentiis, in libro de vera & falsa poenitentia.

D. HIERONYMVS super cap. 58. Isaia, & 43. Ezechielis, dicit, quia peccatores, & iusti, Domini propitiatione saluantur.

Caput V.

PROBANTVR INDVLGENTIAE CANONIBVS ET DECRETIS SACRORVM CONCILIORVM.

DEinde consulenda sunt SACROSANCTA Concilia, quid de hac re determinauerint: Inprimis autem SANCTA NICOENA Synodus, capite vndecimo: *De his, inquit, qui præter necessitatem præuicati sunt, aut propter ablationem facultatum, aut propter periculum, aut aliquid huiusmodi, quod factum est sub tyrannide Lycinij, placuit sanctæ Synodo, licet indigni sint misericordia, tamen aliquid circa eos humanitatis ostendi. Si quos ergo ex animo poenitet; tribus annis inter poenitentes habeantur: si tamen fideles sunt, septem annis aliis inter poenitentes sint: duobus autem annis iidem sine oblatione, in oratione sola, participant populo. Si qui vero per Dei gratiam vocati, primò quidem ostenderunt fidem suam, deposito militiæ cingulo: post hæc autem ad proprium vomitum reuersi sunt, ut & pecunias darent, & ambirent redire rursus ad militiam: isti decem annis sint inter poenitentes, post primum triennium, quo fuerint inter audientes. Ab omnibus verò illud præcipue obseruetur, ut animus eorum, & fructus poenitentiae attendatur, obseruetur. Quicumque enim cum omni timore & lachrymis perseuerantibus, & operibus bonis, conuersationem suam, non verbis solis, sed opere & veritate demonstrant, quum tempus statutum etiam ab his fuerit impletum, & omni-
onibus iam cæperint communicare; licebit etiam Episcopo, humanius circa eos aliquid cogitare. Qui verò indifferenter habuerint lapsum, & sufficere sibi, quòd ecclesiam introierunt arbitrantur; isti omnimodo tempora statuta complebunt. Hæc ibi. Sensus est, licebit Episcopo de præscriptis poenis, vel omnes, vel partem condonare.*

CONSILIVM ANCYRANVM, paulò ante Nicoenum celebratū. In eo itaque Concilio, his qui ad idola defecerant, erant poenæ taxatæ, atq; præscriptæ: Sed Episcopo concessa fuerat facultas eas mitigandi, seu remouendi.

remouendi. *Episcopum*, inquit cap. 5. *hanc habere licentiam oportet, ut perspecta singulorum conuersatione, normam regulamq; conuersationis tribuat: id est, ut humanius agens, secundum conuersationis modum, tempus alicui pœnitentiæ breuiare, aut etiam prolixius, quod correctioni necessarium duxerit addere.*

CONCILIVM LAODICENVM Canone 2. *His, qui diuersorum peccatorum lapsus incurrunt, & oratione, & confessione, & pœnitentia malorum suorum, perfectam conuersationem demonstrant; pro qualitate peccati, tempus attribuendum est, propter misericordiam & bonitatem dei. Qui ergo huiusmodi sunt, reuocandi, & ad communionem sunt applicandi. Itaque ab initio statim nascentis Ecclesiæ fuerunt indulgentiæ semper in usu: quippe, quia indulgentia nihil aliud est; quàm pœnæ temporalis post confessionem, & iustificationem inflictæ quædam relaxatio. Quâ ob causam non ineptè sanctus Cyprianus Cornelium Papam dicit rectè egisse, qui in condonandis peccatis liberalis fuerat inuentus: docetque ad Antonianum scribens, Trophinum, sine illa pœnitentia, nō tamen sine satisfactione fuisse receptum.*

In Synodo Latheranensi, Innocentius Tertius, indiscretam quorundam Episcoporum, in concedendis indulgentiis, licentiam, reformando compescuit

Item, Innocentius Tertius, & Lateranense concilium: *Nos, aiunt, omnipotentis Dei misericordia, & BB. Apostolorum Petri & Pauli auctoritate confisi, ex illa, quam nobis licet indignis, Deus ligandi atq; soluendi contulit potestatem: omnibus qui laborem propriis personis subierint, & expensis: plenam suorum peccaminum, de quibus liberaliter fuerint corde contriti, & confessi, veniam indulgemus, & in retributione iustorum salutis æternæ pollicemur augmentum.*

Magnum Gregorium plenarias indulgentias concessisse, satis constat: Nam in Epistola ad Episcopos Brittanniæ, absolute indulgentias concessit. *Quibuscunque, ait, verè pœnitentibus peccatorum remissionem, Apostolica freti potestate, largimur: & insuper æternæ beatitudinis gaudia, de omnipotentis Dei misericordia confisi: De pœna, non autem de culpæ remissione loquitur, quæ Summi Pontificis, & Episcoporum potestati subijcitur. Hæc in registro Gregorij leguntur.*

Idem Pontifex fratribus Mafsiliensis monasterij, qui conquerebantur suum Abbatem, à Summo Pontifice detineri. *Rogamus, inquit, vos, ex parte omnipotentis Dei, & amore B. Petri patienter supportare: quia citò, Deo adiuuante, Abbatem vobis lætum remitemus, & auctoritate BB. Petri & Pauli, & nostra, per istos nobis indignis comissa, absolutionem, & indulgentiam promittimus, & cum benedictione concedimus.*

Leo

Leo Primus, sermone de Ieiunio decimi mensis, de Indulgentiis, quæ sunt Romæ in stationibus: & de antiquis vrbis consuetudinibus, sic loquitur. *Quarta, inquit, & sexta feria ieiunemus, & Sabbatho apud S. Petrum Apostolum vigilias celebremus, qui & orationes nostras, et ieiunia, & eleemosynas nostras dignabitur adiuuare. Ex quo aperte ostenditur forma, qua veteres ad stationes, & indulgentias capeffendas, inuitabantur, omnes præsertim, qui Romæ manebant.*

Bonifacius Octauus, in extrauag. antiquorum, omnes peccatorum temporales poenas condonauit, SS. Apostolorum Petri & Pauli tēplum visitantibus. Clemens Sextus scribens ad Archiepiscopū Tornacē. ad singulos quosq; quinquagesimos annos indulgentias plenarias concessit in Extrauagā. Dudum.

Sixtus Quartus, ad vigesimos quintos annos Iubileum reduxit.

CONCILIVM CONSTANTIEN. Sessio. 18. iis qui Missæ, ac processioni, in quibus pro Sigismundo Romanorum, & Vngariæ Rege, ad regem Arragonum eunti, preces publicè fundebantur, præsentibus adessent, centum dies indulgentiarum tribuit.

CONCILIVM BASILIEN. Sessio. 24. iis qui reductionem Græcorum, eleemosynis adiuuarent, semel in vita, & semel in mortis articulo, remissionem plenariam, omnium peccatorum indulgit.

Anno Domini M. D. XXXVI. Quinto Idus Maij, Sacrum Concilium Basiliense pro reductione Græcorum, concessit indulgentiam: Et scribitur ibidem. *Nōne cū passagium generale pro recuperatione terræ sanctæ indictum fuit, proq; aliis magnis Ecclesiæ necessitatibus, indulgentiæ generales concessæ sunt? Nōne ex proximis annis bis, aut pluries pro extirpanda Hæresi Viclefistarum, modis idoneis id ipsum actum est? Si ergo pro illis hīc indulgentiarum modus idoneus indicatus est; cur & nunc pro reductione Græcorum, quo nihil fortè potest dici maius, non censetur conueniens? Quòd et si pro reparatione pontium, ac villarum exustarum Summi Pontificis, & ipse modernus Summus Pontifex EVGENIVS etiam ad instantiam priuatarum personarum plenarias concessit; cur nunc instante Ecclesia sit tanta dilatio? &c.*

Anno Domini M. D. XX. die xxv. Octobris: Leo Decimus in Concilio Lateranē. contra errores, & articulos Martini Lutheri, inter quos articulos, leguntur quidam, quibus blasphemauit, sanctas indulgentias: propterea Sanctiss. Leo Decimus sua Bulla, contra Lutherum, & articulos illius decreuit & pronunciauit sic? *Itaq; de venerabilium fratrum nostrorum consilio, & assensu, ac omnium, & singulorum prædictorum, matura deliberatione, prædicta authoritate omnipotentis Dei, & beatorum Apostolorum Petri & Pauli, & nostra, præfatos omnes*
& singu-

& singulos articulos, seu errores, tanquam (vt præmittitur) respectiue, hereticos, aut scandalosos, aut falsos, aut piarum aurium offensiuos, vel simplicium mentium seductiuos, & veritati Catholicæ obuiantes, damnamus, reprobamus, atq; omnino reijcimus: ac pro damnatis, reprobatis, & reiectis, ab omnibus vtriusq; sexus Christi fidelibus haberi debere, harum serie decernimus, & declaramus: inhibentes in virtute sanctæ obedientiæ, ac sub maioris excommunicationis latæ sententiæ: Necnon quò ad ecclesiasticas & regulares personas, Episcopatum omnium, etiam Patriarchatum, Metropolitanarum, & aliarum Cathedralium Ecclesiarum, Monasteriorum quoque, & prioratum etiam conuentualium, & quarumcunq; dignitatum, aut beneficiorum Ecclesiasticorum, secularium, aut quorumvis ordinum regularium priuationis, & inhabilitatis ad illa, & alia in posterum obtinenda. quò verò ad Conuentus, Capitula, seu domos, aut pia loca secularium, vel regularium etiam Mendicantium: Necnon vniuersitatis etiam studiorum generalium, quorumcunq; Priuilegiorum, indultorum à sede Apostolica, vel eius legatis, aut alijs quomodolibet habitorum, vel obtentorum, cuiuscunq; tenoris existant. Necnon nominis, & potestatis studium generale tenendi, legendi, & interpretandi quasvis scientias, & facultates, & inhabilitatis ad illa, & alia in posterum obtinendi: prædicationis quoq; officij, ac amissionis studij generalis, & omnium Priuilegiorum eiusdem, &c.

Anno Domini, M. D. LXII. die xvi. Iulij, sub Pio Quarto Pontifice Maximo, Sacrosanctum Concilium Tridentinum, Sessione 21. Decreto de Reformatione, cap. 9. tradidit, & recapitulauit sic: Cùm multa à diuersis antea Concilijs, tam Lateranensi, ac Lugdunensi, quàm Vienneſi, aduersus prauos Eleemosynarum, Quæstorum abusus, remedia tunc adhibita, posterioribus temporibus reddita fuerint inutilia, potiusq; eorum malitia, ita quotidie magno fidelium omnium scandalo, et querela excreſcere depræhendatur; vt de eorum emendatione, nulla spes amplius relicta videatur: Statuit, vt post hac in quibuscunq; Christianæ religionis locis, eorum nomen, atq; vsus penitus aboleatur, nec ad officium huiusmodi exercendum vllatenus admittantur, non obstantibus Priuilegijs, Ecclesijs, Monasterijs, Hospitalibus, pijs locis, & quibusvis, cuiuscunq; gradus, status, & dignitatis personis concessis, aut consuetudinibus etiam immemorabilibus. Indulgentias verò, aut alias spirituales gratias, quibus non ideo Christi fideles decet priuari, deinceps per ordinarios locorum, adhibitis duobus de Capitulo, debitis temporibus, populo publicandas esse decernit. Quibus etiam eleemosynas, atq; oblata sibi charitatis subsidia, nulla prorsus mercede accepta, fideliter colligendi facultas datur; vt tandem hos cælestes ecclesiæ thesauros, non ad quæstum, sed ad pietatem exerceri omnes verè intelligant.

Idem

Idem Sacrosanctum Concilium Tridentinum, Sessione xxv. Decreto de Indulgentiis, omnes & singulos, quicumque contradicunt indulgentiis, vel easdem blasphemant, damnat, excommunicat, anathematizat.

Anno Domini, M. D. LXXI. primis diebus Octob. Cum Veneti ad Cyprum, siue Candiam, bellum haberent cum Turca: Romanus Pontifex Pius Quintus, Indulgentiam quadraginta horarum Romæ instituit, indixit, celebrauit: & Deo adiuuante, ecclesia orante, Veneti ex Turcis ad Echinadas die 7. Octobris reportauerunt victoriam & triumphum.

Caput VI.

PONVNTVR PRIVILEGIA ET AVTHORITATES EX SCRIPTURA NOVI TESTAMENTI, SVPER IVRISDICTIONE ET AVTHORITATE PAPAE, CVM AD MVLTa ALIA, TVM AD INDVLGENTIAS CONFERENDAS.

Quia Summus Pontifex Romanus Vicarius Christi, Successor legitimus sancti Petri, purgando, illuminando, & perficiendo Ecclesiam, largitur indulgentias; facit officium sicut fidelis seruus, & prudens, quem propter ea & alia constituit Dominus super familiam suam, illis verbis, Matth. 16. cap. *Et ego dico tibi, quia tu es Petrus, & super hanc petram ædificabo Ecclesiam meam, & portæ inferi non præualebunt aduersus eam: & tibi dabo clauēs regni cælorum, & quodcunq; ligaueris super terram, erit ligatum & in cælis, & quodcunq; solueris super terram, erit solutum & in cælis.*

Item Ioan. cap. 13. *Scitis quid fecerim vobis? Vos vocatis me magister & Domine, & benè dicitis, sum etenim. Si ergo ego laui pedes vestros Dominus & Magister, & Vos debetis alter alterius lauare pedes. Exemplum enim dedi vobis, vt quemadmodum ego feci vobis, ita & vos faciatis. Amen amen dico vobis, non est seruus maior Domino suo, neque Apostolus maior est eo, qui misit illum. Si hæc scitis, beati eritis, si feceritis ea.*

Item, Ioannis cap. 21. Cum ergo prandissent, dixit Simoni Petro Iesus: *Simon Ioannis, diligis me plus his? Dicit ei, etiam Domine, tu scis quia amo te: Dicit ei, Pasce agnos meos. Dicit ei iterum, Simon Ioannis diligis me? Ait illi: etiam Domine, tu scis quia amo te: Dicit ei iterum, Pasce agnos meos. Dicit ei tertio, Simon Ioannis amas me? contristatus est Petrus, quia dixit ei tertio, amas me, dicit ei: Domine, tu omnia nosti, tu scis quia amo te: Dicit ei, Pasce oues meas.*

Est

Est igitur boni pastoris, non solum pascere; verumetiam seruare, & lauare oues, quod dandis indulgentiis, facit Pontifex.

Propterea Apostolus 1. ad Corint. cap. 4. dicit: *Sic nos existimet homo, ut ministros Christi, & dispensatores mysteriorum Dei.*

Idem 2. ad Corint. 2. *Cui donastis aliquid, & ego, quod donaui, si quid donaui, propter vos in persona Christi.*

Item 2. ad Corint. cap. 9. *Dispensatio mihi credita est.*

NOTABILE QUARTUM.

PRobauimus Deo adiuuante, traditionum & scripturarum auctoritate: tum Sacrorum Conciliorum canonibus, & testimoniis sanctorum Patrum indulgentias: Sequitur ut de causis earundem Indulgentiarum breuiter dicamus: quia teste Aristo. lib. 10. methaph. Nihil scitur sine causa.

Caput I.

DE NECESSITATE INDULGENTIARVM.

Necessitas Indulgentiarum in Ecclesia Catholica, & scripturis Canonis, & multiplici ratione ostendi, & probari potest. Ac primo quidem auctoritate, Sacre scripture probatur: quia scriptum est Luc. cap. 24. *Quoniam sic scriptum est: & sic oportebat Christum pati, & resurgere a mortuis tertia die: & predicari in nomine eius poenitentiam, & remissionem peccatorum, in omnes gentes, incipientibus ab Hierosolyma.*

Thomas Caietanus, *Non solum dicit, sic scriptum est; sed assumit probatione dicendo: quoniam sic scriptum est, & significatur per SIC, dispositio, modus, & ordo gestarum, & gerendarum rerum, quæ subiunguntur, ET SIC OPORTEBAT, Consequentia vis significatur, coniunctione vim affirmationis habente: ac si dictum fuisset, & consequenter sic oportebat: ita quod sensus est: quoniam sic scriptum est: consequenter sic oportebat: hoc est oportebat illum ordinem, illum modum, illam dispositionem seruare, quæ seruata est, quia sic scriptum erat, & sic oportebat CHRISTVM PATI, ET RESVRGERE A MORTUIS TERTIA DIE, ET PRAEDICARI IN NOMINE EIVS POENITENTIAM. Ubi nota, quia non respicit prædicationem præteritam; sed respicit dispositionem futuræ prædicationis per Apostolos. Est enim sensus, quod oportebat sic, hoc est, talem dispositionem, ordinem, ac modum ad prædicandum efficere; qualis modus, qualis ordo, qualis dispositio effecta est; ut, scilicet Iesus, colligeret discipulos, testes miraculorum, vitæ, prædicationis, passionis & mortis suæ: testes, & prædicatores indulgentiarum, ac custodes thesauri cælestis in Ecclesia, usque ad consummationem san-*

F
ctorum,

etorum, in opus ministerij, in ædificationem corporis Christi. POENITENTIAM ET REMISSIONEM PECCATORVM. Pœnitentia, opus est humanum: remissio peccatorum, opus est Dei. Sed pœnitentia nihil valet sine remissione peccatorum, siue indulgentia: nec indulgentia, siue remissio peccatorum datur sine pœnitentia. Significatur enim oportere prædicari vtrumq, scilicet, malè actæ vitæ pœnitentiam, non quacunq, ratione; sed in nomine Iesu, & tunc in eodem nomine consequentem indulgentiam, seu remissionem peccatorum. Et intendit per hoc prædicandum esse, quod inuocatione Sancti & terribilis nominis Iesu, baptismum suscipientes, & pœnitentiam agentes, consequerentur indulgentiam, siue remissionem peccatorum, IN OMNES GENTES. Ecce extensio prædicationis, ad vniuersas mundi gentes. Non enim decebat amplius, inquit Theophylactus, bipartitum esse humanum genus, in Iudæos & Gentiles: & ideo, ut omnes in vnum venirent, mandauit incipere sermonem à Ierusalem, & ad gentes terminari. Definit ergo locale initium Apostolicæ prædicationis: quia sic scriptum est Psalm. 109. Virgam virtutis tuæ emittet Dominus ex Sion: Et Isa. cap. 2. De Sion exiit lex, & verbum domini de Ierusalem.

Item, ad Romanos cap. 3. Non enim est distinctio, omnes enim peccauerunt, & egent gloria Dei.

D. Anselmus Archiepiscopus Cantuarien. Super omnes æqualiter est gratia, misericordia, iustitia, & indulgentia, per fidem & pœnitentiam, & alia sacramenta, per quæ nobis applicat mater Ecclesia indulgentiam: quia non est distinctio, in accipienda illa iustitia, et indulgentia. Sed siue Iudæus, siue Gentilis fidem habuerit, quæ per charitatem operatur, consequetur indulgentiam & iustificabitur. verè non est distinctio vtrorumque: quia omnes et Iudæi, & Gentiles peccauerunt, vel in se, vel in Adam. Quoniam lex siue in Paradiso data, siue naturaliter insita, siue in literis promulgata, præuaticata est ab ipsis. OMNES ERGO PECCAVERUNT, ET EGENT ADHVC QVOTIDIE GLORIA DEI, id est, ut Deus magis, magisq, glorificetur in eis, tribuendo beneficia gratiæ suæ, per indulgentiam & remissionem quotidianorum delictorum: & multiplicationem virtutum. Non gloria sua egent, ut glorientur quasi de suis meritis; sed egent gloria Dei, id est, omninò necessarium est illis, ut gloria Dei dilatetur in ipsis: nam Deus gloriam & omnipotentiam suam, indulgentiam dando, parcendo, et miserando maximè manifestat. Quia, ut dicit D. Gregorius magnus super I. Regum 3. difficilis est reconciliatio criminis. Nostra autem gloria (aut veriùs Sancti Apostoli) est testimonium conscientiae nostræ 2. ad Corint. cap. 1.

Verùm hæc ipsa necessitas indulgentiarum, pluribus rationibus probari potest.

PRIMA RATIO, Contra Pelagium, Quicumque per se cadit in peccato, sicut bos, vel asinus in puteo: sed per se liberari, & resurgere non potest; illi indulgentia & misericordia est necessaria. sed omnis homo per se cadit in peccatum, sicut bos vel asinus in puteum, sed per se liberari & resurgere non potest: ergo omni homini misericordia & indulgentia est necessaria.

MAIOR, est vera.

MINOR est omnium Theologorum principium, & est Lucæ cap. 10. & 14. Nam vulneratus, qui incidit in latrones, non potest sibi consulere, vsque à Samaritano curatur. Dic historiam.

SECUNDA RATIO. Omnis filius infidelis, inobediens, prodigus, malus & miser, necesse habet, vt sub indulgentia, suo bono reconcilietur patri. sed omnis homo, est filius Dei patris, sed infidelis, inobediens, prodigus, malus & miser: igitur omnis homo necesse habet, vt sub indulgentia suo bono reconcilietur patri.

MAIOR vera, quia naturali & diuina lege filius debet honorare patrem, Matth. 1.

MINOR est Psalm. 13. & 115. Item, ad Rom. 3. *Omnes declinauerunt, simul inutiles facti sunt, non est qui faciat bonum, non est vsq. ad unum. Sepulchrum patēs, est guttur eorum, linguis suis dolose agebant, venenum aspidum sub labiis eorum, quorum os maledictione & amaritudine plenum est: veloces pedes eorum, ad effundendum sanguinem, contritio, & infelicitas in viis eorum, & viam pacis non cognouerunt: non est timor Dei ante oculos eorum.*

Exemplum huius infidelitatis, inobedientiæ, irreuerentiæ, & malitiæ, in prodigo filio, Lucæ 15. cap.

TERTIA RATIO. Omnis seruus cæcus & miser, necesse habet quærere vt recipiat visum, & illuminetur. sed omnis homo est seruus Dei cæcus, & miser: igitur omnis homo necessario debet quærere, vt recipiat visum, & à Deo illuminetur.

MAIOR vera.

MINOR Isaia cap. 42. *Quis cæcus nisi seruus meus, & surdus nisi ad quem nuncios meos misi? Quis cæcus nisi qui venundatus est? Et quis cæcus nisi*

cus nisi seruus Domini? Qui vides multa, nonne custodies? Qui apertas habes aures, nonne audies? Et Dominus voluit ut sanctificaret eum, & magnificaret legem, & extolleret: ipse autem populus directus & vastatus.

QUARTA RATIO. Omnis miser, exul, miserabilis, pauper, cæcus, & nudus, necesse habet quærere gratiam apud hospitem, & dominum diuitem, videntem, benè vestitum, & liberalem. omnis homo est miser, exul, miserabilis, pauper, cæcus, & nudus: ergo omnis homo necessariò debet quærere gratiam Indulgentiarum apud hospitem, & Dominum Deum diuitem, videntem omnia, benè vestitum, & liberalem. **MAIOR vera.**

MINOR est Apocalypsis cap. 3. Scio operi tua, quia neque frigidus es, neque calidus: utinam frigidus esses, aut calidus: sed quia tepidus es, & nec frigidus nec calidus; incipiam te euomere de ore meo: quia dicis, quod diues sum, & locupletatus, & nullius egeo: & nescis, quia tu es miser, & miserabilis, & pauper, & cæcus, & nudus. Suadeo tibi emere à me aurum ignitum, probatum; ut locuples fias, & vestimentis albis induaris; ut non appareat confusio nuditatis tuæ, & collyrio iunge oculos tuos ut videas. Ego quos amo, arguo et castigo. Æmulare ergo, & pœnitentiam age. Ecce sto ad ostium et pulso: Si quis audierit vocem meam, et aperuerit mihi ianuam, intrabo ad illum, et cœnabo cum illo, et ipse mecum. Qui vicerit, dabo ei sedere mecum in throno meo, sicut & ego vici, & sedi cum patre meo in throno eius. Qui habet aurem audiat, quid spiritus dicat Ecclesiis.

QVINTA RATIO. Omnis pollutus & immundus, necessariò quærere debet commune balneum, ut possit lauari & mundus esse. sed omnis homo est pollutus & immundus: igitur omnis homo necessariò quærere debet commune balneum indulgentiarum, ut possit lauari & mundus esse.

MAIOR: quia Apostolus præcipit ad Rom. 13. *Sicut in die honestè ambulemus.* Item Isaia cap. 1. *Lauamini & mundi estote: quia non filij eius in sordibus.* Deute. 32. Propterea Dauid Psalm. 50. orat: *Amplius laua me ab iniquitate mea, & à peccato meo munda me.* Et iterum ibidem: *Asperges me Domine Hysopo, id est, merito passionis Christi, sanctorum, & Ecclesiæ, & mundabor, lauabis me, & super niuem dealabor.*

MINOR. Iob 15. *Quid est homo ut immaculatus sit, & ut iustus appareat, natus de muliere? Ecce inter sanctos eius nemo immutabilis, et cæli non sunt mundi in conspectu eius. Quantò magis abominabilis, et inutilis homo, qui bibit quasi aquam iniquitatem?* Hoc idem Iob 9. & 25. cap.

Quis

Quis potest facere mundum de immundo conceptum semine? nonne tu qui solus es?

SEXTA RATIO. Omnis vulneratus & infirmus, necessario debet quærere medicum, & vti medicina. sed omnis homo est vulneratus & infirmus: ergo omnis homo necessario debet quærere medicum, & vti medicina.

MAIOR vera à necessario, siue à causa, sine qua non.

MINOR Isaia. 1. *A planta pedis vsque ad verticem, non est in eo sanitas.*

Item, Lucae 10. *Homo incidit in latrones, qui spoliauerunt eum, & plagis impositis, abierunt semiuiuo relicto.*

Vidit Dauid hanc infirmitatem suam, propterea orat Psalm. 6. dicens: *Miserere mei Domine, quoniam infirmus sum: sana me Domine, quoniam conturbata sunt omnia ossa mea.* Item, Psalm. 40. *Ego dixi, Domine miserere mei: sana animam meam, quia peccaui tibi.* Porro Horatius li. 1. Epist. 16. ad Quinctium. *Stultorum incurata pudor malus - vlcera celat.*

SEPTIMA RATIO. Omnis captiuus, ligatus, & in carcerem missus, necessario debet quærere, vt primo quoque tempore possit educi, solui, & manumitti. sed omnis homo est captiuus, ligatus, in carcerem missus, & sub peccato venundatus: igitur omnis homo prudens necessario debet quærere indulgentiam, vt quam primum possit educi, solui, & manumitti.

MAIOR vera ab officio prudentis & honesti viri.

MINOR est Psalm. 118. *Funes peccatorum circumplexi sunt me.*

Item, Isaia 61.

Item, ad Rom. ca. 7. *Ego autem carnalis sum venundatus sub peccato.*

Item ibidem. *Video autem aliam legem in membris meis, repugnantem legi mentis meae, et captiuantem me in lege peccati, quæ est in membris meis. Infelix ego homo: quis me liberabit de corpore mortis huius? Gratia Dei per Iesum Christum Dominum nostrum.*

OCTAVA RATIO. Quicunque peccatis actualibus, mortalibus, & venialibus sese obstrinxerunt, illi necessario debent quærere indulgentiam. sed homines communiter peccatis actualibus, mortalibus, & venialibus sese obstrinxerunt: ergo homines communiter necessario debent quærere indulgentiam.

MAIOR vera à definitione.

MINOR Ezechiel. cap. 9. Vbi Dominus dicit : *Repleta est terra sanguinibus, et ciuitas repleta est auersione.*

NONA RATIO. Libertas in ciuitate est necessaria : igitur & indulgentia in Ecclesia est necessaria.

CONSEQUENTIA à simili proportionem, & à minori ad maius.

ANTECEDENS probatur. Pecunia in ciuitate est necessaria : igitur & libertas multò magis necessaria.

CONSEQUENTIA ex illo Horatij Poëtæ : *Non bene pro toto libertas venditur auro.*

ANTECEDENS patet ad sensum, tum probatur autoritate scripturæ : *Pecuniæ obediunt omnia.*

DECIMA RATIO. Asylum in Repub. propter fatales est necessarium : igitur & indulgentia in Ecclesia propter criminosos & peccatores est necessaria.

CONSEQUENTIA à simili.

ANTECEDENS Numerorum cap. 35. & Deutero. 19. Deus præcepit primò tres, & postea plures ciuitates priuilegiatas ædificare, ad quas tutò fatales confugere possent.

VNDECIMA RATIO. Probatica piscina Hierosolymis est necessaria : igitur & indulgentia in Ecclesia Catholica necessaria.

CONSEQUENTIA à proprio signo ad proprium signatum.

ANTECEDENS Ioan. cap. 5. Quia in ea & oues lauabantur & infirmi, qui primi post commotionem aquæ eò descendebant, sanabantur, à quacunque detinebantur infirmitate. Dic historiam.

DVODECIMA RATIO. Natatoria Siloë Hierosolymis est necessaria : igitur & indulgentia in Ecclesia Catholica necessaria.

CONSEQUENTIA à proprio signo ad proprium signatum.

ANTECEDENS Ioan. cap. 9. Quia ibi secundum verbum Christi, homo cæcus natus, suos oculos lauit, & recepit visum, ac illuminatus est.

TREDECIMA RATIO. Principi Apostolorum Petro necessaria est indulgentia : igitur omnibus hominibus in genere indulgentia est necessaria.

CONSEQUENTIA à superiori ad inferius.

ANTE-

ANTECEDENS Ioan. cap. 13. *Petre si non laueris te, id est, aqua salutaris indulgentiæ, non habebis partem mecum.*

QVATVORDECIMA RATIO. Pœnitentia omnibus est necessaria: igitur & indulgentia omnibus hominibus in genere est necessaria.

CONSEQUENTIA à proprio antecedente ad proprium cōsequens.

ANTECEDENS Lucæ cap. 13. Dico vobis, *Nisi pœnitentiam habueritis, omnes similiter peribitis.*

Sic quoque benè dici potest, Nisi indulgentiam, & absolutionem mediante pœnitentia obtinueritis, omnes similiter peribitis: nam & pœnitentia sine proprii sacerdotis aut Episcopi absolutione, nihil valet, præsertim his, qui sunt extra ecclesiam.

QVINDECIMA RATIO. Quidquid sancta methamorphosi homines reformat, & ex prodigis filios adoptiuos facit, illud est necessarium. sed indulgentia, sancta metamorphosi homines reformat, & ex prodigis filios adoptiuos facit: igitur indulgentia in Ecclesia est necessaria.

MAIOR vera, quia clamat Apostolus, ad Ephes. cap. 4. *Renouamini spiritu mentis vestræ.*

MINOR ad Galath. cap. 4. *Misit Deus filium suum in mundum, cum Indulgentiis, ut adoptionem filiorum reciperemus.* Et ad Ephes. cap. 1. *Gratificauit nos in dilecto filio suo, in quo habemus redemptionem & remissionem peccatorum.*

SEDECIMA RATIO. Omnes excommunicati necessario debent in Ecclesia sub indulgentia quærere, & petere absolutionem. sed omnes hæretici sunt excommunicati: igitur omnes hæretici necessario debent in Ecclesia sub indulgentia quærere & petere absolutionem.

MAIOR vera, quia scriptum est, Math. 16. *Quidquid ligaueritis super terram, erit ligatum & in cælis.*

MINOR est Sacrosancti Tridentini Concilij, Sessione 25. cap. 2. de reformatione. Item, ibidem titulo de recipiendis & obseruandis decretis concilij. Item, ibidem in acclamationibus, *Anathema cunctis hæreticis? & Anathema Anathema.*

Caput II.

DE CAUSIS INDULGENTIARVM, ET PRIMO DE
MATERIA SIVE SVBIECTO.

Sicut medicinæ subiectum est corpus humanum sanabile; ita indulgentiarum volunt quidam subiectum animam peccatoris, vulneratam, actualibus peccatis, quæ in peccatis dormiat: & cupit, intendit, quærit, & petit à somno & vulneribus peccatorum excitari, & indulgentia sanari iuxta illud Psalm. 40. *Ego dixi, Domine miserere mei, sana animam meam, quia peccaui tibi.*

Alij verò subiectum indulgentiarum ponunt conscientiam peccatoris, funibus peccatorum ligatam, manibus Petri soluendam, auctoritate clauium absoluendam, & manumittendam, iuxta illud Psalm. 118. *Funes peccatorum circumplexi sunt me.* Et illud Math. 21. *Soluite, & adducite mibi.*

Alij dicunt hominem poenitentem, sed in labore poenitiæ deficientem, & orantem cum propheta Psalm. 24. *Vide humilitatem meam, & laborem meum, & dimitte vniuersa delicta mea.*

Sed hæ supradictæ & aliæ his similes opiniones pertinent ad materiam remotam. Proxima autem seu propinqua indulgentiarum materia, sunt poenæ temporales, vt in definitione dictum est. Indulgentiæ enim (secundum communem Scholasticorum sententiam) à temporalibus poenis homines liberant: si tamen prius ab æternarum reatu liberati fuerint. vnde ad indulgentias hoc requiritur; vt qui eas sumit, iam sit in statu gratiæ, & liber à reatu mortis æternæ, & solum pro temporalibus poenis satisfacere teneatur. Pro cuius rei intellectu sciendum, in baptismo culpam pariter & poenam dimitti: in sacramento autem poenitiæ, culpam dimitti, poenam autem reservari. In causa autem est, quia in baptismo homo vetus moritur, & primò fit filius Dei: in sacramento autem poenitiæ desertor fidei reconciliatur: ergo poenitentia est sacramentum reconciliationis: baptisumus autem filiationis. Et hic quidem in baptismo culpas & poenas auferendi modus, innititur diuinæ misericordiæ: in poenitentia verò attenditur iusticia, & innititur iustæ commutationi, ad quam spectant eæ compensationes, quæ secundum iusticiam commutatiuam, quæ in Arithmetica proportionem consistit esse, nominantur. Hæc autem compensandi ratio, ad temporales tantummodo poenas se extendit, quæ post iustificationes sequuntur. Porro, ille compensatio-

penſationes, vel noſtris propriis, vel alienis redimuntur laboribus: quæ tamen compenſationes, propter communem ſocietatis Chriſtianæ charitatem, propriæ reputantur. *Particeps*, inquit, *ego ſum omnium timentium te*, & *cuſtodientium mandata tua*. Itaque remota culpa & dimiſſa pœna æterna, per ſacerdotis abſolutionem, remanet iuſtificatus pœnæ temporariæ obligatus: à qua pœnitentia, ſatisfactione, piis operibus & condonatione Summi Pontificis, per indulgentias ſolui poteſt. Moyſi & Aaron, Deute. 32. dictum eſt: *Quia non credidiſtis mihi, vt ſanctificaretis me, non introducetis populos iſtos*, quibus tamen Deus culpam dimiſerat: vnde & ambo tam ſeuere puniti ſunt; vt neuter eorum terram promiſſionis ingrederetur.

Maria ſoror Moyſi, infamem morbum incurrit, ſiue lepra ſecundum faciem percuſſa eſt, quia contra Moyſen fratrem ſuum murmurauit, cui tamen Dominus culpam condonauerat, Numero. 12. Item, Numeror. 14. Senex ille Heli, vt ſcribitur 1. Regum cap. 2. cum audiſſet à Propheta Samuele, negligentiam ſuam acerbè puniendam, patienter reſpondiſſe fertur, *Dominus*, inquit, *quod bonum eſt in oculis ſuis faciat*. Dauidi quoque ſuum peccatum contrito corde confitenti, 2. Regum 12. à Nathan reſpoſum eſt: *Dominus tranſtulit peccatum tuum*. Poſt culpæ verò obliterationem, pœna temporalis luenda remanſit: nam Amon filius Dauid ſororem Thamar ſœdaſſe dicitur 2. Regum 13. & idem iſte Amon occiſus: Et Abſolon patrem regno pepulit, qui tandem lancea tranſfoſus, miſeram coactus eſt mortem ſubire.

Idem Dauid 2. Regum 24. ob numeratum Populum pœnitentiam agit, & à Deo in gratiam recipitur: & tamen poſt remiſſam culpam, datur illi optio, vt eligat in pœnam peccati, bellum, famem, aut peſtem.

Rex Ozias 2. Paralip. ca. 26. grauem Dei incurrit offenſam, & indignationem, quòd ſacerdotis officium ſibi uſurpauerit: correptus à ſacerdotibus, mox pœnituit eum facti: & cum illi eſſet dimiſſa culpa, remanſit tamen temporalis pœna: nam miſeranda lepra percuſſus, quãdiu vixit, leproſus fuit.

Vbi ſunt ergo qui audent aſſerere, poſt culpæ remiſſionem, nihil pœnarum luendum, & purgandum remanere? cum ſcriptura tam in veteri, quàm in nouo teſtamento aperte reclamet?

Rex Ezechias, vt ſcribitur 4. Regum. 20. & Iſaiæ 38. cap. quia legatis Regis Babylonix theſauros domus ſuæ reſerauit, in filio Manaſſe pœnas dedit: nam Manaſſes carceri Babylonico mancipatus, veram fuiſſe Iſaiæ ſententiam comprobauit.

Simile quiddam Achab regi accidiſſe lib. 3. Regum cap. 21. ſcriptura clariſſimè commemorat. Cum enim impij in Naboth homicidij patrati ab

trati ab Elia Propheta grauius argueretur; poenituit eum nequissimi sceleris, & in cinere & cilicio poenitentiam egit, cui dimissa est culpa, sed poenas tanti facinoris & criminis tota eius posteritas dedit, quæ extincta fuit, & prorsus ab hominum memoria sublata, & ipse quoque interemptus est.

Nabuchodonosor Rex Babylonis Danielis cap. 4. audiuit consilium Danielis: *Peccata tua Eleemosynis redime, & iniquitates tuas misericordijs pauperum: forsitan ignoscet Deus delictis tuis.* De culpæ remissione Prophetam ne quidquam locutum fuisse, ex hoc satis constare potest, quod non ad cordis contritionem, sed ad Eleemosynarum potius largitionem, eum est adhortatus: *nam si tradidero in cibos pauperum omnes facultates meas, charitatem autem non habuero, factus sum velut æsonans, aut cymbalum tinniens.* Non igitur Eleemosynis redimendas docebat Sanctus Propheta præteritas culpas; sed potius poenarum reatus, qui in peccatore iustificato remanent.

Hoc idem Christus Dominus cōsulere videtur Lucæ ca. 21. *Verumtamen, inquit, quod superest, date Eleemosynam: & omnia munda sunt vobis.* In quo non de purgatione culparum Christus est loquutus; sed de reatu poenarum, pro quarum expiatione, eleemosynæ inter cætera satisfactionis opera numerantur. Sunt quoque in eorum numero, Oratio, Ieiunium, & proprii corporis austeritas, & rigor. 1. Corinth. 11. *Si nos ipsos diiudicaremus, non utiq; iudicaremur.* Vnde Nahum Prophetæ cap. 1. *Idem peccatum bis non punitur à Deo.*

Patet igitur ex suprâ dictis, quia dimissa culpa, temporalis remanet poena. Porro ad amouendas, & auertendas poenas & plagas temporales, tanquam remedium, ordinatæ sunt à Deo in Ecclesia Indulgentiæ, infinitus cælestium mysteriorum thesaurus, quo thesauro, auctoritate & gratia Summi Pontificis clauigeri, redimuntur & persoluantur poenæ, & plagæ temporales. Conceduntur autem Indulgentiæ, non ut homines remissiores, sed ut alacriores, & meliores fiant: vulnus sanè pro quâtitate plage congrua requirit spatia medendi; breui enim tempore accipitur; sed non sic breui tempore curatur: non est culpa medici, sed vulneris: nec ideò medicus censendus est ignarus, impotens, impius, & crudelis: nec temerè ita omnia sunt disposita; sed ut peccator cognosceret, quàm grauius offendat, qui in Deum peccat: denique ut intelligas, quia omnes viæ Domini sunt misericordia, & veritas, id est, plenæ misericordia & veritate.

SED DICES, cunctas illas poenas, quæ peccatoribus post culpæ remissionem infliguntur: diuina esse flagella, & correctiones, baculos & virgas, quæ nequaquam sita sunt in hominum voluntate; ut eas homo

homo vitare, declinare, aut aliquo consilio, & modo auertere queat, aut alicui pro illis satisfacere valeat. Satisfactio enim debet esse propria, voluntaria, & libera. Respondeo, illud omninò non probari, neminem scilicet peccare & satisfacere in eo, quòd effugere non potest: cùm quispiam pro suis malis operibus morti adiudicatus, iustitiæ ciuili satisfacit: Sic quoque diuinæ iustitiæ luens pœnas, à diuina iustitia sibi præscriptas. Deinde, Dei non est, innoxium pœnis afficere: atqui multos iustos, siue iustificatos esse nouimus, quibus remissa est culpa; sed pœna temporalis referuata: neque iniuste actum esse cum eis firmiter credere debemus.

SED DICES, Quid ergo crux Christi mihi profuit, si oporteat me crucem propriam baiulare? Multum per omnem modum: crux enim nostra nihil nobis proficeret; nisi crux Christi præcessisset: cuius virtute fit, vt nostra crux nobis prodesse valeat. Pœnam peccatis nostris debitam Christus pertulit in corpore suo super lignum; vt peccatis mortui iustitiæ viuamus, ait Apostolus Petrus, 1. Petri cap. 2. & Apostolus Paulus ad Romanos 6. *Vt exhibeamus, inquit, membra nostra, seruire iustitiæ, ad sanctificationem*: vt sicut fuit sensus noster iuxta sententiam Proph. Baruch ca. 4. vt erraremus à Deo, Decies tantum iterum cōuertentes, requiramus eum. Hoc siquidem est satisfacere: quantum Deum offendisti peccando, tantum tibi eum concilies benè agendo. *Qui furebatur, iam non furetur, magis autem labore operando manibus suis quod bonum est, vt habeat unde tribuat necessitatem patienti.* ad Eph. 4. In istorum numero haberi potest Zachæus Lucæ 19. *Ecce, inquit, dimidium honorum meorum do pauperibus: & si aliquem defraudaui, reddo quadruplum.* Quapropter rectè dictum est à Beato Ambrosio Serm. 15. *Nos quoque, inquit, si tam graue peccatum fuerit, vt minime solis fletibus abluatur, addamus misericordiæ oleum, acrimoniamq; ieiunij.* Nullum enim tam graue delictum est, quod non purgetur abstinentia, eleemosynis extinguatur. *Ista est satisfactio, quæ alio nomine Matth. 3. sic vocatur: Facite, inquit, dignos fructus pœnitentiæ. Similiter & diuinus Apostolus hortabatur in Actis Apostolorum vt pœnitentiam agerent, & conuerterentur ad Dominum Deum, digna pœnitentiæ opera facientes.* Basiliius Homilia 32. in Psalm. *Conuertiatus es, inquit, benè dicito: plus quàm oportet accepisti, reddito: ebrius fuisti, ieiunato: arrogans fuisti, humiliare: inuidisti, cōsolare: occidisti, martyrium pro gratia subi, vel proprium corpus afflige.* Ne cesset, inquit Cyprianus tractat. 5. de lapsis, *in agenda pœnitentia: ne, quod minus esse in qualitate delicti videtur, in neglecta satisfactione cumuletur.*

Iustinus Quæstione 79. *Cùm omnium Regum Israëlitarum, & Iudeorum*

orum ardentissimum religionis studium præstiterit Iosias, inquit; quid factum est, ut gentili gladio vitam cum morte commutaret? In causa, inquit, fuit, quod non obtempemuit Ieremiæ præcepto, qui ei iussu Dei nunciauerat, ne in prælium exiret. Ut igitur eum purum à peccatis reciperet, suæ inobedientiæ gladio gentili pœnas dedit.

D. Augustinus de peccatorum meritis, & remissione lib. 2. ca. 34. rectè colligit: Si dimissa culpa nullus reliquus esset ad pœnam reatus, Adam profecto mortuus non esset, teste Salomone Sapient. 10. Eduxit eum Dominus, inquit, à delicto suo, atque ita dimisso illo delicto, mors quæ est stipendium delicti, in eo locum habere non poterat. Item, Grauius est peccatum mortale actuale, quàm originale: quia illud est naturæ, hoc autem propriæ voluntatis. Sed remota culpa originalis per Baptismum, remanet eius reatus, carnis scilicet concupiscentia: multò ergo magis dimissa mortalis culpa per pœnitentiæ sacramentum, remanet pœna temporalis. Item, in libro de Pœnitentiæ medicina cap. 2. idem Augustinus: In hac, inquit, Pœnitentia, maiorem in se seueritatem vnusquisque debet exercere, ut à se ipso iudicatus, non iudicetur à Deo.

CHRYSOSTOMVS de Lazaro, Concione 3. Vides, inquit, quomodo hic inflicta pœna, liberat à pœna, quæ illic est. Unusquisque igitur se puniat, cruciet, affligat; ut depositis peccatis, multa cum fiducia ad vitam æternam proficiatur.

Rectè ergo dictum est à Propheta Dauid, Psalm. 50. Et delictum meum contra me est semper. Sit ergo ante nos, ut contra nos esse non possit: illud igitur conuersatio nostra non obliuiscatur, compunctio verò recorderetur: illud reatus confessionis ostendat, & virtus satisfactionis abscondat. Hæc Bernardus Sermo. 55. in Cantica.

Philo Iudeus lib. 2. de Monarchia: Manent, inquit, in animis cicatrices quædam, et vestigia nequitie pristinae.

Hoc idem ab Eucherio Lugdunensi Episcopo scriptum est: Si peccatum Dauid, tam detestabile Dominus transtulit; quid est, quod omnia quæ de eodem peccato per Prophetam ei à Domino dicta sunt, post modum tollemuit? Sed procul dubio Dominus delet illud, sed sine ultione non deserit: aut enim ipse hoc homo pœnitens in se punit: aut hoc Deus cum homine vindicans percutit. Nequaquam igitur peccato parcat, quod nullatenus sine vindicta dimittit. Si enim Dauid audire post conuersionem meruit: Dominus transtulit peccatum tuum: tamen & multis post cruciatibus afflictus, ac fugiens, reatum quem perpetrauerat, exsoluit. Si nos salutis vnda à culpa primi parentis absoluit, sed tamen reatum eiusdem culpæ diluentes, absoluti quoque adhuc carnaliter obimus; quia delicta nostra, siue per nos, siue per seipsum refecat, etiam cum relaxat: Ab electis enim suis iniquita-

tum, ma-

tum, maculas stupet, temporali afflictione tergere, quas in eis, in perpetuum non vult vindicare. Quod idem iisdem propè verbis in Moralibus lib. 9. cap. 27. à beato Gregorio magno scriptum legimus, qui fuisse videtur ducentis plus minus annis posterior.

His subscribit Gregorius Nazianzenus in oratione, qua cohortatur ad baptismum. *Cum, inquit, alia non sit, siue detur regeneratio, neque refectio, neque pristinum in statum restitutio; licet ea maximis gemitibus, et lachrymis, ex quibus ut ego quidem sentio, atque statuo vix cicatricis obductio sequitur, inquinamus, etc.* Quam ergo necessaria, & quam benigna est diuina clementia, quæ cum sciat non deesse sanitatis quædam postmodum vulnera, dedit curandis, sanandisque denuo remedia salutaria. Hæc Cyprianus Sermo. 1. de eleemosyna.

ATHANASIUS in libro de blasphemia in Spiritum sanctum, *Inter baptismum, inquit, et poenitentiam, hoc interest, quod cum poenitentiam quis agat, cessat quidem à peccando, sed habet vulnerum cicatrices: qui vero baptizatur, veterem quidem hominem exuit; renouatur autem, ut denuo renatus per Spiritus sancti gratiam.* Basilii quoque in Homelia de poenitentia: *Est spes post peccatum, inquit, est sanatio post vlcus, sed manet cicatrix. Et sic patet, dimissa culpa, manere reliquias peccatorum, quæ per indulgentiam possunt tolli.*

PORRO DE POENIS TEMPORALIBVS, Catholici in summa tria docent.

PRIMÒ. Poenas temporales, in futura vita, quæ in Purgatorio luendæ essent, redimi posse ieiunijs, precibus, eleemosynis, & alijs pijs, ac laboriosis operibus huius vitæ.

SECUNDÒ, poenas temporales huius vitæ, interdum non posse redimi; sed necessariò perpetiendas esse: id quod extra omnem controuersiam esse videtur. Deus enim aliquando ita poenam aliquam constituit, ut nullam pro ea redemptionem accipere velit. Talis imprimis poena mors est, quam nullus quantumvis iustus, vllò pio opere auertere potuit. Talis fuit illa poena Dauid 2. Regum 12. Quia blasphemare fecisti inimicos Domini, propter verbum hoc, filius qui natus est tibi, morte morietur. Tametsi enim Dauid ieiunauerit, & humi prostratus orauerit; non tamen mortem illam filij redimere potuit. Talis etiam fuit poena illa Moysis, ne intraret in terram promissionis ob peccatum, quod ad petram Oreb commiserat: rogauit enim Moyses (ut ipse testatur Deutero. cap. 3.) Deum, ut poenam illam sibi condonaret, & non est exauditus: vide sanctum Gregorium lib. 9. moralium cap. 30. in illa verba sancti Iob, Deus, cuius iræ nemo resistere potest.

TERTIO, Posse aliquando poenas temporales huius vitæ aliis operibus tolli, id quod tam est in scripturis euidens; vt mirum sit ab vlllo negari potuisse. Certe Niniuitæ, ob graua peccata meruerant id, quod Deus illis comminatus fuerat, vt post quadraginta dies Niniue subuerteretur; & tamen ieiuniis, saccis, & precibus Niniuitarum placatus Dominus, ciuitatem illam conseruauit, Ionæ cap. 4.

Caput III.

DE FORMA INDVLGENTIARVM.

IVxta antiquam formam Indulgentiarum, in Ecclesia sancta Catholica Indulgentiæ, non nisi de iniunctis poenitentiis communiter conferebantur: quia in ortu Ecclesiæ, vt poenitentiales Canones testantur, poenitentia ita ad iustum solitæ fuerunt imponi, vt nihil iudicio, & arbitrio sacerdotis relinqueretur in Purgatorio soluendum. Alioqui sancti illi Patres, non arbitrabantur legitimè potestate clauium vti: tunc enim feruor sanguinis Christi, in causa erat; vt Christiani ad nutum essent obsequentes Ecclesiæ. Quamuis autem communiter, hæc moderatio, quod dantur in forma antiqua, solet opponi; tamen non in omnibus indulgentiis illa moderatio legitur: quia nulla lex prohibet, ne de aliis conferantur: quoniam nullibi talis lex est scripta. Quamobrem obseruanda est forma, quæ indulgentiis inscribitur. Amplior enim est, quæ conceditur sub hac forma, *Concedimus vnum annum poenitentiae indulgentiae*: quàm sub hac, *Remittimus vnum annum purgatorij*: eò quod magis satisfaciamus per opera poenalia in hac vita exhibita. Porro indulgentiæ, quæ in forma communi conceduntur, nulla habita ratione ad poenitentias iniunctas: exempli gratia, quando forma indulgentiæ sic est inscripta, *Concedimus quadraginta dies indulgentiarum remissionis peccatorum*: incertum est, an æquiualeant poenitentia expetendæ in Purgatorio, an poenitentia in hac vita luendæ: huiusmodi enim valor ex intentione pendet concedentis, quæ in Bulla non exprimitur. Deinde, non est silentio prætereunda illa clausula, *Concedimus indulgentiam plenariam*: PLENA sanè dicitur indulgentia, per quam pro mortalibus dimissis, omnis poena in eunda dimittitur, siue sit poenitentia iniuncta, siue non: *Plenior*, quando remittitur omnis poena, tam pro mortalibus, quàm pro venialibus luenda peccatis: *Plenissima* verò, cum non solum pro poena, verum etiam pro culpa venialium conceditur.

Cæterum, quando indulgentia conceditur generaliter, absque de-
termi-

terminatione causæ: puta, si conceditur his, qui porrigunt manus adiutrices, ad aliquam Basilicam erigendam, siue restaurandam, indulgentia quadraginta dierum; tunc qui plus erogauerit, ampliorem consequitur indulgentiam, quantum ad intensiorem, æqualem verò, quantum ad extensionem. BONIFACIVS Papa eius nominis OCTAVVS, in Extrauag. Antiquorum: *Vnusquisque, inquit, plus merebitur, & efficacius indulgentiam assequetur, qui Basilicam Petri & Pauli amplius, & deuotius frequentauerit. unde si duo æque diuites, pro construenda Basilica eleemosynam elargiti fuerint, unus quidem decem, alter verò viginti florenos vngaricos: uterq; quadraginta dierum indulgentiam consequitur. sed qui viginti obtulit; ita ei prodest, ac si duplo satisfecisset. In pauperum autem oblatione, animi promptitudo pensatur, non census magnitudo, vt patet Lucæ 21. de eleemosyna viduæ pauperculæ. Quando verò indulgentia causam habet determinatam, utpote, qui audierit Missam Corporis Christi, consequetur 40. dies indulgentiarum tantum. Si quispiam deuotius audierit, non ampliorem consequetur indulgentiam: eò quod non plures dies virtute indulgentiarum remittuntur uni, quam alteri. Siquidem, Indulgentia ex Christi & sanctorum meritis, iuxta voluntatem dispensantis, non autem ex labore & deuotione recipientis proportionem recipit. Dispensans autem, cum non velit plus applicare, nisi quadraginta dies; non plus ergo uni quam alteri tribuitur intensiue aut extensiue: si autem intentio dantis est, ut qui cum maiori labore, maioriq; deuotione acceperit, sicut videtur verisimile, ampliorem indulgentiam consequatur; absque dubio maiorem consequetur.*

In omnibus autem indulgentiis dicitur, VERE POENITENTIBVS, CONTRITIS, ET CONFESSIS, saltem in forma Ecclesiæ.

VERE POENITENTIBVS. In quo verbo intelligitur, quod vis affectus poenitentialis in poenitente vigeat secundum veritatē, & non tantum per exclusionem cōtrarij: & sic verè poenitens hoc modo non potest esse nisi sollicitus ad satisfaciendū per seipsum. Ex quo patet, quod negligentes non consequuntur indulgentiam. Cōstat etiam per aliud verbum cum dicitur, *De iniunctis sibi poenitentijs*: nam poenitentia nō iungitur, nisi parato satisfacere. Ex quo duo sequuntur (ex tali forma verborum) videlicet, quod indulgentia non absoluit, nisi ab iniunctis poenitentijs, & tantum paratos ad satisfaciendum: nam quando indulgentia mixta est cum opere bono, vt puta cum ieiunio, potest esse melior, quam satisfactio poenitentialis: quoniam habet vltra indulgentiam alias virtutes ad hoc requisitas, & officia quæ in poenitentiali satisfactione dignè executæ obseruantur, vt in ieiunio quadruplex effectus consideratur. Hoc enim opus, PRIMò bonum facit ope-

rantē, & ad alia bona opera disponit. SECUNDÒ medetur ex eo, quòd est tale opus, vt ieiunium, quod est medicina contra carnis concupiscentias, & eleemosyna contra auaritiam. TERTIÒ, quod ex charitate procedit, meritorium est vitę æternæ. QUARTÒ ex eo, quod pœnale est. Satisfactorium etiam pro pœna temporali, pro peccato debita inuenitur. Indulgentia autem non succedit loco satisfactionis pœnitentialis, nisi quòd ad vltimum effectum, scilicet satisfactionis: *Non enim ex vi indulgentiæ homo fit bonus, nec medicatur, nec meretur; sed tantum soluit pœnam, quam per pœnitentiam soluisset.* Et propter hoc doctores consulunt assequentibus indulgentias, adimplere nihilominus suas pœnitentias, & meritum longè melius prædicant, quàm indulgentias. Ex quo sequitur, quòd quis frustra faceret sibi imponi magnam pœnitentiam, non intendens per se soluere; sed per indulgentias. Intellige tamen præparatum ad satisfaciendum per id, quod imponitur, vel per aliud æquiualens, vel maius.

Item in Bulla poni solet, MISERICORDITER INDVLGEMVS: Ergo indulgentiarum concessio est vera absolutio, & remissio pœnæ, quæ fit virtute passionis Christi & sanctorum. Est in indulgentia misericordia, est & iustitia: & per misericordiam homo ligatus absoluitur, per iustitiam autem pro eo de thesauro Ecclesiæ soluitur.

Nota: antiquæ formæ indulgentiarum, quę in subsidium hospitalium conceduntur, fit mentio in Concilio Lateranens. cuius Canon refertur cap. Cùm ex eo. de pœnitentia & remissione.

PRÆTEREA, Dubium est hîc, quomodo intelligantur huiusmodi indulgentiæ quadraginta dierum, aut vnius anni, aut septem pœnitentiæ? Quinimo solent nonnunquam inuulgari indulgentiæ, quibus remittuntur quinque annorum millia, aut plura pœnitentiæ, & Quadragenæ totidem. Ad hoc prima fronte responsio dari posset cum Gersone Cancellario Parisiensi. in suo tractatu de absolutione sacramentali, atque in alio de indulgentiis: quòd istæ portentosæ indulgentiæ, non emanant à Papa; sed sunt Quæstorum imposturæ. Quare præfatus Doctor illas irridet. *Et reuera tam immodicos excessus,* inquit Dominicus à Soto Distinct. 21. Quæst. 2. Articulo 1. *non est ferendus: nam audies nonnunquam indulgentias viginti mille annorum, & eò ampliores. At verò, quæ moderatius cōferantur, solidæ sunt, opus est explicare, quid sonat quadraginta dies, aut vnus annus, aut septem pœnitentiæ. Potest enim intelligi, aut de pœna quæ in purgatorio tollenda est; aut de pœnitentia, quæ fit in hoc seculo. Et apparet, quòd intelligatur de pœna in purgatorio luenda, nam indulgentia debet esse certa: illa verò pœnitentia quæ in sacramento imponitur, licet quantum ad tempus sit æqualis; non tamen*
quan-

quantum ad asperitatem & rigorem. Nam antiquitus, licet tam pro adulterio, quam pro homicidio imponerentur septem anni pœnitentiæ; non tamen tot ieiunia & orationes imponebantur in illis annis pro uno peccato, quam pro alio. Imò & secundum qualitatem personarum, etiam eadem pœnitentiæ moderabantur, & vel mitigabantur, vel augebantur. Dum ergo visitantibus talem Ecclesiam, aut conferentibus talem eleemosynam, remittuntur septem anni, si intelligerentur de pœnitentijs huius seculi, non fieret omnibus æqualis remissio: intelligitur ergo de alijs purgatorij, vel de utrisque secundum proportionem. Hæc Dominicus à Soto, vbi suprâ.

Idem Dominicus à Soto ibidem. Inde etiam planè constat, quòd nemo in purgatorio unquam fuit viginti, imò forsan nec decem annis, ne paucioribus dicamus. Quare inane esset centum annos pœnæ purgatorij remittere, cum in indulgentijs, quandoque habeantur mille, & multo plures. Item, animaduertendum, quòd per illos septem annos, non fiebat remissio in purgatorio septem quoque annorum, imò forsan neq; unius mensis, in quo multos deceptos videas. Nam etsi spontanea pœnitentia huius seculi, plus valeat ad remissionem pœnæ, quam æqualis in purgatorio; intelligitur tamen cæteris paribus. Si enim quispiam hîc per unum diem pati posset pœnam tam grauem, quanta est in purgatorio; profectò remitteretur ei pœna unius mēsis: sed tamen, quòd per septem annos hîc quispiam dicat quotidie AVE MARIA, vel ieiunet semel in mēse, vel recitet Psal. pœnitentiales; certè non sufficit ad remittendū in purgatorio pœnam unius mensis; sanè cum illa extra omnem cōparationē sit vehementior & acerbior: igitur remissio septem annorum pœnitentiæ, est remissio pœnæ, quæ in purgatorio respondet pœnitentiæ hîc septem annorum assumptæ. Quòd si dicas, non semper imponebantur omnes illi anni. Respondetur, quòd si pœnitentia imponebatur de iniunctis; sanè non remittebatur nisi pœna purgatorij, quæ respondet iniunctæ si fieret: si autem non fieret talis limitatio, intelligeretur de illis etiam, quæ mediata ratione essent iniungendæ: quarum pœnitens secundum mensuram suorum delictorum reus esset. Et isto modo, nec ridiculum est, nec sanè vanum indulgentias concedere centum, imò mille annorum: nam posset homo commississe centum, imò bis centum peccata mortalia, pro quibus reus esset tot annorum pœnitentiæ: & quamvis homo tantum vivere nequeat, nec decimam partem illius pœnitentiæ facere in hoc seculo; nihilominus in purgatorio, secundum æqualitatem iustitiæ, exigenda est illa pœna, quæ illis omnibus annis responderet. Ex his ergo colligitur, quòd remittere mille annos pœnitentiæ, non est remittere in purgatorio decem. Hæc Dominicus à Soto, vbi suprâ.

Cætera, quæ ad formam indulgentiarum pertinent, lege conclusionē 4. & 5. & 6.

Caput IIII.

DE VALORE INDVLGENTIARVM.

AD hoc autem, quòd huiusmodi Indulgentiæ valeant, requiritur causa rationabilis, sine qua non essent validæ, sed in discreto; & sic eneruarent satisfactionem pœnitentialem, capite Cùm ex eo. de pœnitentia & remiss. Et sic, si darentur pro causa prophana, vt pro nutriendis meretricibus, nullæ essent. Similiter ad efficaciam tantæ indulgentiæ, puta annorum centum, vel mille, exigitur rationabilis causa, non solum indulgentiæ; sed etiam tantæ quantitatis, qua non existente, indulgentia est inualida. Nam sicut Papa non potest ex solo imperio voluntatis, bona temporalia donare, sed ex causa rationabili; ita neque hæc bona spiritualia, quæ preciosiora sunt temporalibus: aliter esset non dispensator, sed dilapidator. Ex quo sequitur, quòd tanta causa sit, pro tanta indulgentia, & maior pro maiori secundum proportionem: aliter causa non esset rationabilis, & consequenter indulgentia inualida. Non enim esset rationabile, quòd iste pro vno, ieiunia haberet centum dies de indulgentia, & alius vt sic haberet mille annos.

Et quoniam posset esse dubium, an causa expressa in Bulla esset rationabilis, & homines semper in ambiguo essent: ideò dico, quòd causa indulgentiæ expressa in Bulla, nisi manifestum contineat errorem, semper debet præsumi rationabilis; sicut sententia lata à iudice, iusta præsumitur, nisi contineat manifestum errorem. Non tamen causa expressa in Bulla in veritate est rationabilis semper: quia Papa in istis potest errare, cùm non sit de his, quæ pertinent ad sententiam iudicalem fidei: licet ad fidem pertineat, quod indulgentia ritè, & legitime data valeat, non tamen in particulari, quòd hæc valeat, nisi supposito, quòd ritè & legitime sit data. Non tamen discutendum est à nobis, an causa sit rationabilis nec ne? nisi error manifestus appareat, & quò ad causam, & quò ad quantitatem indulgentiæ: **ET PRAEDICATORES NVNQVAM DEBENT ASSERTIVE PRAEDICARE HVIVSMODI; SED RECITATIVE, VEL OPINATIVE, NE FALSAS PRAEDICENT, ET ALIOS IN ERROREM INDVCANT.** Et quando dicitur, quòd indulgentiæ tantum valent, quantum sonant; intelligendum est negatiuè, id est, non plus valent, quàm sonent: vel intelligitur de discretis, quò ad causam: vel intelligitur in foro exteriori, in quo statatur præsumptioni iuris, & sic populus in huiusmodi non decipitur ab Ecclesia, sed vel à dante, vel aliunde, si falsæ sint.

D. Tho-

D. Thomas super 4. sententiarum, Distinctio: 20. *Indulgentia tantum valet, quantum sonat, id est, quatum prædicatur: si modò adsit causæ pietas.* Richardus super 4. sent. Distinct. 20. Artic. 3. Quæst. 1. *Indulgentiæ si dantur ab eo, qui potest eas dare, & propter rationabilem causam, scilicet, ad laudem, gloriam, & honorem Dei, & utilitatem Ecclesiæ, valent his qui sunt in statu gratiæ, dum tamen faciunt id, quod continetur in forma indulgentiæ: nam per indulgentias, remittitur vel tota pœna peccatis debita, vel eius portio, secundum ipsarum tenorem.*

Paludeñ. super 4. sente. Distinct. 20. Quæstio. 4. dicit, quòd in valore indulgentiarum triplex est causa: vna ex parte Christi: alia ex parte sanctorum: tertia ex parte Ecclesiæ. Idem, *Indulgentia tantum valet, quantum sonat: hoc est, non solum in foro Ecclesiæ, sed etiam apud Deum, & in purgatorio.* Idem, *Tantum valet, quantum sonat: puta quadraginta dies indulgentiæ, valent quadraginta dies pœnitentiæ, siue sit iniuncta, siue non. Est autem in arbitrio dantis indulgentiam taxare, quantum remittatur de pœna, ut dicit S. Thomas.*

Vel secundum alios, *Tantum valent, quantum sonant*, secundum taxationem factam à sacerdote, vel à lege, vel à diuina iustitia. Si verò detur remissio plenaria omnium peccatorum; ille, qui ipsam lucratur, si tunc moriatur, statim euolabit in paradysum. Et sic vni tantum quandoq; valet plenaria indulgentia ad decem dies, alij ad centum, alij ad mille, quia tantum tenebatur: quibus absolutis, remanet expeditus. Vide Paludeñ. vbi suprà. Alij, *tantum valent, quantum sonant*, intelligunt sic: Si tu pro peccatis tuis, ex substantia tua feceris eleemosynam, iuxta illud Tobia 4. quomodo potueris, ita esto misericors? Si multum tibi fuerit, abundanter tribue: si exiguum tibi fuerit, etiam exiguum libenter impertiri stude. Præmium enim bonum tibi thesaurizas, in die necessitatis: quoniam eleemosyna ab omni peccato, & à morte liberat, & non patietur animam ire in tenebras. Fiducia magna erit coram summo Deo eleemosyna, omnibus facientibus eam. Et Daniel. cap. 4. *Quamobrem Rex Nabuchodonosor, consilium meum placeat tibi, & peccata tua eleemosynis redime, & iniquitates tuas misericordiis pauperum: forsitan ignoscet Deus delictis tuis.*

Valeant itaque indulgentiæ, si implentur conditiones, quæ in Bulla continentur; ut scilicet faciat, vel det hoc, vel illud: et non solum valet illi, qui implet conditionem: verumetiam alij, pro quo hoc fit, siue viuus siue mortuus: dum tamen forma indulgentiæ hoc habeat: ut puta quod dicatur: *Quicumq; hoc fecerit, vel pro quocunq; hoc fecerit, siue viuus siue mortuus, habeat tantum de indulgentia.* Secus autem, si forma hoc non habeat: quia ille, qui dat indulgentiam, est dispensa-

tor, & applicat cui vult, non autem ille, qui non implet conditionem.

PORRÒ, An per modum suffragii, vel iudiciariæ potestatis indulgentiæ valeant defunctis, Scholastici certant. Antiqui Scholastici, vt Alexander de Ales parte 4. Quæstio. 83. membro. 5. & post eum S. Bonauentura lib. 4. Distinctio. 20. Quæstio. 5. Et Gabriel lectione 57. Canonis, vult, tenet, & probat authoritatibus Summorum Pontificum; quòd indulgentiæ valent defunctis per modum suffragii, quando & Summi Pontifices dederunt plenarias indulgentias, pro animabus in purgatorio, visitantibus Ecclesiam beati Laurentii, extra muros vrbs: vide ibi latius.

Et dicitur per modum suffragii, quòd non est intelligendum, quòd quasi modus suffragii tollat efficaciam indulgentiarum; ita quod opus illud, pro quo dantur indulgentiæ, factum pro animabus, non plus valeat animabus factum, quàm si idem opus, vel suffragium factum esset, pro eis, nullis indulgentiis adiunctis, sicut quidam intelligere voluerunt. Sic enim frustrà daretur indulgentia pro animabus. Sed quòd dicitur per modum suffragii, excludit modum iudiciariæ potestatis, qui dicit iudicalem absolutionem & pœnæ debitæ, in aliam pœnam voluntariè ac deuotè assumptam commutationem.

Et ille modus iudiciariæ authoritatis, tantum habet locum in viuis, qui iudicialiter absoluuntur, & quibus pœna debita in aliam voluntariè ab eis, ac deuotè assumptam commutatur.

Viui enim duntaxat assumunt illud opus, vt puta peregrinationem, eleemosynam, orationem, contributionem ad opus salutare, vel aliud huiusmodi pro quo dantur indulgentiæ: & ita indulgentiæ proficiunt eis per modum suffragii, id est, propter aliquod opus ab alio factum, & eis per modum suffragii applicatum. Gabriel multò plura, vbi suprà. Hanc sententiam tenet Alexand. de Ales: & S. Bonauentura, vbi suprà.

CONTRA, Gerson videtur declinare à prædictis parte 4. Sermonem pro defunctis.

Item, Reueren. Pater Hannibal Roselli, cap. 7. de indulgentiis, lege ibi totum.

Præterea, Sanctus Bonauentura, indulgentias vocat relaxationes, & dicit lib. 4. Distincti. 20. vt indulgentiæ valeant, exigitur duplex conditio: scilicet ex parte donantis, & ex parte recipientis. Ex parte donantis requiritur authoritas ordinata, potestas honesta, & causa rationabilis. Ex parte recipientis exigitur confessio, cum vera contritione, & fides cum vera deuotione, vt verè de peccatis sit pœnitens, & verè confidens, quòd pastoris indulgentia valet sibi. Hoc idem tenet Brulifer lib. 4. Distinctio. 20. Quæstione 9. Non discrepat D. Thomas

Thomas, qui ponit quatuor requisita ad valorem indulgentiarum lib. 4. Distinctio. 20. Benè ergo admonet Ioannes Gerson, Cancellarius Parisien. parte secunda, Tractatu de indulgentiis, consideratione 12. *quia indulgentiarum Concessio, non est parui facienda, non est contemnenda; sed deuotè amplectenda in fide, spe, & charitate Domini nostri Iesu Christi, qui potestatem talem clauium Ecclesiasticarum dedit hominibus. Constat enim, quòd fructuosior est, & acceptabilior Deo, & hominibus operatio talibus innitens indulgentiis; quàm altera (& hoc cæteris paribus) non innitens. Cõsiliu igitur est solum & sanum, quòd absq; curiosa discussione de præcisa, vel euidenti, & certa quantificatione, seu mensuratione huiusmodi indulgentiarum studeat homo prius tales acquirere, seu qualitatem & facultatem suæ deuotionis: pondus autem valoris illi relinquere, qui omnia fecit, & facit in numero, pondere, & mensura, Sapient. 11. Timendum enim est, ne nobis dicat Vriel, sicut dixit Esdræ, 4. Esdræ cap. 4. *Tres vias missus sum ostendere tibi, & tres similitudines proponere coram te: de quibus, si renunciaueris vnā ex his, & ego demonstrabo tibi viam altissimi, quam desideras videre, & docebo te, vnde sit cor malignum. Et dixi, loquere Domine meus. Et dixit ad me: vade pondera mihi pondus ignis, aut mensura mihi flatum venti, aut reuoca mihi diem, qui præterijt. Et respondi, & dixi: Quis natorum poterit facere, vt me interroges de his? Et dixit ad me: Si essem interrogatus te, dicens: quantæ habitationes sunt in corde maris, aut quantæ venæ sunt in principio abyssi, aut quantæ venæ sunt super firmamentum, aut qui sunt exitus Paradysi: diceres mihi fortassis, in abyssū non descendi, neq; in infernum adhuc, neq; in cælum vnquam ascendi: nunc autem non interrogaui te, nisi de igne & vento, & dic, per quam transisti, & à quibus separari non potes, & non respondisti mihi de eis. Et dixit mihi: Tu, quæ tua sunt tecum coadolescencia, non potes cognoscere; & quomodo poterit vas tuum capere altissimi viam, & iam exterius corrupto seculo intelligere corruptionem euidentem in facie mea? &c. Ergo pondus & valorem indulgentiarum relinquamus Deo, quia scriptura dicit Prouerb. 16. Spirituum ponderator est Dominus.**

Caput V.

DE CAUSA EFFICIENTE, ET FINE INDVLGENTIARVM.

Efficiēs Causa indulgentiarū est multiplex. PRIMA principalis, immediata, vna causa per se, est Deus, cui propriū est misereri dimittere peccata, & parcere: ille sua diuina gratia, propria authoritate, sine nostris meritis, propter nomen suū, confert, dat, & distribuit liberaliter, mirabili-
ter, &

ter, & inuisibiliter indulgentias iuxta illud Isaia cap. 43. *Ego sum, ego sum ipse, qui deleo iniquitates tuas propter me, & peccatorum tuorum non recordabor. Reduc in memoriam, & iudicemur simul: narra, si quid habes ut iustificeris. Pater tuus primus peccauit, & interpretes tui praeuicati sunt in me, & contaminaui principes sanctos, dedi ad interuersionem Iacob, & Israël in blasphemiam. Sciuit hoc Dauid, propterea orat dicens: Tibi soli peccaui, & malum coram te feci.* Psalm. 50. Idem Ezechiel. ca. 36. ut supra Notabili 2. cap. 4. Item Act. cap. 4. *Tunc repletus Spiritu Sancto Petrus, dixit ad sacerdotes, & magistratus templi, & sacerdotes principes populi, & Seniores Israël. Audite: si nos hodie dijudicamur in beneficio hominis infirmi, in quo iste saluus factus est; notum sit omnibus vobis, & omni plebi Israël, quia in nomine Domini nostri Iesu Christi Nazareni, quem vos crucifixistis, quem Deus suscitauit à mortuis, in hoc iste astat coram vobis sanus. Hic est lapis, qui reprobatus est à vobis ædificantibus, qui factus est in caput anguli, & non est in alio aliquo salus: nec enim aliud nomen est sub cælo datum hominibus, in quo oporteat nos saluos fieri.* Item, ad Rom. cap. 8. *Deus proprio filio suo non pepercit, sed pro nobis omnibus tradidit illum: quomodo non etiam cum illo omnia nobis donauit?*

Item, ad Ephes. cap. 2. *Deus autem, qui diues est in misericordia, propter nimiam charitatem suam, qua dilexit nos: & cum essemus mortui peccatis, conuiuificauit nos Christo (cuius gratia estis saluati) et conresuscitauit, & consedere fecit in cælestibus in Christo Iesu; ut ostenderet in seculis superuenientibus abundantes diuitias gratiæ suæ in bonitate super nos, (quam communicauit nobiscum dando indulgentiam) in Christo Iesu. Gratia enim estis saluati per fidem, & hoc non ex vobis: Dei enim donum est: non ex operibus, ut ne quis gloriatur. Ipsi enim sumus facturi, creati in Christo Iesu, in operibus bonis, ut in illis ambulemus.*

MEDIATA verò Causa efficiens est triplex, suprema, media, infima. Summa, prima, principalis, & meritoria remissionis peccatorum, & indulgentiarum omnium causa, fons & origo est homo Christus Iesus Messias, Dominus, mediator, redemptor, & saluator noster, de quo scriptum est Psalm. 129. *Apud Dominum misericordia, & copiosa apud eum redemptio.* Item, ad Hebræ. 1. *Christus splendor gloriæ patris, & figura substantiæ eius: portansq; omnia verbo virtutis suæ, purificationem peccatorum faciens, sedet ad dexteram maiestatis in excelsis.* Item, 1. Petri 2. *Qui peccata nostri ipse pertulit in corpore suo super lignum, ut peccatis mortui, iustitiæ viuamus, cuius liuore sanati estis.* Item, 1. Ioann. cap. 2. *Filioli mei, hæc scribo vobis, ut non peccetis: Sed & si quis peccauerit, aduocatum habemus apud Patrem, Iesum Christum, iustum. Et ipse est propitiatio pro peccatis nostris, non pro nostris autem*

autem tantum, sed etiam pro totius mundi. Item, ibidem. *Scribo vobis filioli, quoniam remittuntur vobis peccata, propter nomen eius.* Item, Apocal. i. *Christus dilexit nos, & lauit nos à peccatis nostris in sanguine suo, & fecit nos regnum, & sacerdotes Deo, & Patri suo, ipsi gloria, & imperium in secula seculorum, Amen.*

CONCAVSÆ sunt, vt Beata Dei genitrix virgo Maria: omnes electi à primo iusto, vsque ad vltimum: & sancta mater Ecclesia Catholica, cum suis passionibus, & meritis.

Sanctæ Mariæ passiones & merita, cesserunt in thesaurum indulgentiarum, & sunt causæ indulgentiarum: quando impletum est in ea, quod illi dictum fuit à Simeone iusto, & timorato, Lucæ 2. *Et tuam ipsius animam pertransiuit gladius, vt reuelentur ex multis cordibus cogitationes:* Vnde & ipsamet beata Dei genitrix virgo Maria, Deo gratias agens dicit, Lucæ cap. i. *Quia respexit humilitatem ancillæ suæ, ecce enim ex hoc beatam me dicent omnes generationes. Quia fecit mihi magna, qui potens est, & sanctum nomen eius. Et misericordia eius à progenie in progenies timentibus eum.*

Sanctorum passiones & merita, cesserunt in thesaurum indulgentiarum: quia Iob cap. 6. dicit: *Utinam appenderentur peccata mea, quibus iram merui: & calamitas quam patior, in statem: quasi arena maris hæc grauior appareret.*

Item, B. Paulus ad Colossen. cap. i. *Et vos cum essetis aliquando alienati, & inimici sensu in operibus malis; nunc autem reconciliauit in corpore carnis eius per mortem exhibere vos sanctos, & immaculatos, & irreprehensibiles coram ipso: si tamen permanetis in fide fundati stabiles, & immobiles à spe Euangelij, quod audistis, quod prædicatum est in vniuersa creatura quæ sub cælo est, cuius factus sum ego Paulus minister, qui nunc gaudeo in passionibus pro vobis, & adimpleo ea, quæ desunt passionum Christi in carne mea pro corpore eius, quod est Ecclesia.*

De meritis Ecclesiæ Catholicæ, D. Ambrosius lib. i. offic. cap. 28. scribit sic: *Ecclesia quædam forma iustitiæ est, commune ius omnium: in commune orat: in commune operatur: in commune tentatur.* Hoc idem docet D. Augustinus libro de vera & falsa poenitentia. Ergo ex suprâ dictis Corollarijs sequitur, quia opera Ecclesiæ valent ad tollendas aliorum poenas, quorum moderator & distributor est Pontifex Romanus.

CAVSA secundum Deum & Christum prima visibilis, subalternata, ordinata à Deo dependens, gubernans, quæ attingit à fine ad finem fortiter, & disponit omnia suauiter, dispensans, seruiens, & subalternans, est S. D. N. Summus Pontifex Clemens octauus, Papa Romanus feliciter modernus: nam teste D. Thoma Aquinate super 4. Senten. Distinct.

Distin&t. 20. Argument. 4. Similiter Paludeñ. in loco superius allegato, & alijs Scholasticis Doctoribus, SOLVS PAPA HABET PLENARIAM POTESTATEM DANDI INDVLGENTIAS: Alij autem secundum taxationem, & dispensationem eius. Ratio: quia Papę in persona Petri primò, principaliter, & consumatiuè Christus filius Dei viui dixit, Math. 16. cap. *Et tibi dabo claues regni cælorum, & quodcunque ligaueris super terram, erit ligatum & in cælis: & quodcunque solueris super terram, erit solutum & in cælis.* Origenes super Matth. *Solus Petrus*, inquit, *Romanus claudit & aperit regna cælorum: alij verò ab eo missi, claudunt & aperiunt regnum cælorum.* Sed iam ea de re superius Notabili 2. cap. 8. & Notabili 3. cap. 6. diximus, & adhuc Deo adiuuante in Conclusionibus plenius dicturi sumus.

CONCAVSÆ sunt huius primæ visibilis causæ, Episcopi in partem sollicitudinis assumpti, & à Summo Pontifice Romano Papa in mysterium missi. Hi cum Summo Pontifice, & alijs sacerdotibus, portant arcam Testamenti: Deut. 10. & 31. arcam, in qua est reconditus cælestis thesaurus indulgentiarum, cum mysterio reconciliationis: & per eos Deus dat Iubileum & Indulgentiam populo suo, tanquam per media ordinata, electa, & in ministerium Ecclesiæ missa: iuxta illud, 2. ad Corint. cap. 5. *Si qua ergo in Christo noua creatura est, vetera transierunt: ecce facta sunt omnia noua,* (Apocal. 21.) *omnia autem ex Deo qui nos reconciliauit sibi per Christum, & dedit nobis ministerium reconciliationis: Quoniam quidem Deus erat in Christo, mundum reconcilians sibi: nec reputans illis delicta ipsorum: & posuit in nobis verbum reconciliationis.* Pro Christo ergo legatione fungimur, tanquam Deo exhortante per nos. *Obsecramus pro Christo, reconciliamini Deo: cum enim qui non nouerunt peccatum, pro nobis peccatum fecit, ut nos efficeremur iustitia Dei in ipso.* Admonent hoc loco Scholastici, quia generale concilium, legitimè in Spiritu sancto congregatum, potest dare indulgentias; sed non Capitulum Cathedralis Ecclesiæ sede vacante: quia est iurisdictionis Episcopalis. Potest etiam ille dare indulgentias, qui in hoc habet à Summo Pontifice plenitudinem potestatis; vt summus Pœnitentiarius, qui dat centum dies. Legatus potest dare in sua Prouincia indulgentias perennes. Archiepiscopus, potest dare indulgentias per totam prouinciam, nisi sit præcisus, qui subditos non habeat, saltem quò ad vsum iurisdictionis. Episcopus, & superiores quadraginta dies cõmuniter. In dedicatione autem basilicę vnum annum, siue sit vnus, siue plures. Pro anniuersario, non nisi quadraginta dies. Abbas autem non potest dare indulgentias: nec quicunque inferiores Episcopis. De ea re, vide Ioann. Gersonem, Cancellarium Parisiẽ.
parte

parte prima de potestate ecclesiastica, Quis possit dare indulgentias Potest autem dare indulgentias (vt habet Paluden. lib. 4. Distin. 20.) tam bonus quàm malus: vnde Richardus lib. 4. Distinct. 20. Artic. 5. Quæst. 1. ait: *Malus Episcopus potest indulgentias dare: quia non facit indulgentias de proprio merito, quo priuatur per mortale peccatum; sed de thesauro ecclesiæ, cuius peccatum non abstulit sibi dispensationem: si autem non concordat diuinæ intentioni sua dispensatio, nulla est: unde nec bonus nec malus indulgentias concedere potest, nisi ex rationabili causa.* Hæc Richardus. Hinc Gerson, Tractatu de indulgentiis ait: *Concedentes indulgentias taliter, & in intentione, & in verbis, & in scriptis, suas concessiones moderentur; vt nec diuinæ iustitiæ cum misericordia derogetur, nec scandalum maximè pusillorum præbeatur: vel ne facilis concessio maioris indulgentiæ, pro minimis vel exiguis causis, pariat in arduis & legitimis pro Ecclesia & Republica negotijs detrimentum.* Hæc Gerson. Idem Gerson parte secunda de forma absolutionis confessionis sacramentalis scribit, quòd potestas prælatorum in dando indulgentias, non est, nisi quædam potestas dispensationis, quæ debet esse rationalis, & ad ædificationem. Et ideo, si dent sine causa rationabili has vel illas indulgentias, vt puta, pro solo intuitu fauoris humani, vel alio tali modo; non oportet quòd indulgentiæ tantum valeant, quantum sonant: quia dicit S. Bonauentura: *Non enim credendum est alicuius valoris, si quis daret eam euntibus videre torneamētā.* De quo latius Gerson. *Unde Indulgentiæ, vt scribit S. Thomas super 4. Dist. 20. & Richardus Dist. eadem, Artic. 3. Quæst. 1. si dantur ab eo, qui potest eas dare, & propter rationabilem causam, scilicet, pro utilitate Ecclesiæ, valent his, qui sunt in statu gratiæ, dum tamen faciunt id, quod continetur in forma indulgentiæ: per eas enim remittitur, vel tota pœna peccatis debita, vel eius portio, secundum tenorem ipsarum.*

CAUSA MINISTERIALIS SVBDELEGATA infima, est sacerdos cōfessarius, qui habet authoritatem & commissionem à loci ordinario absoluedi in talibus & talibus casibus: iuxta illud Leuitici cap. 16. *Expiabit autem sacerdos, qui vñctus fuerit, & cuius manus initiatæ sunt, vt sacerdotio fungatur pro Patre suo.*

CAUSA FINALIS INDVLGENTIARVM, est gloria, laus, & honor Dei, & communis utilitas Ecclesiæ, ciuitatis, & Reipub. iuxta illud Prouer. ca. 16. *Uniuerſa propter ſemetipſum operatus eſt Dñus.* Hoc idē dicit D. Tho. Aquinas super 4. Dist. 20. Porro, ne lectorem oneremus de utilitate & fructu indulgentiarum, lege Iſaiæ cap. 58. Ezech. cap. 36. & 37. Item Ioël. ca. 2. ad Hebr. cap. 8. Hæc de causis Indulgentiarū. Sed causis in sacramentis & indulgentijs nō propriè vtimur, sed metaphoricè, vt dicit Gabriel super 4. Dist. 3. Quæst. 1.

H NO-

NOTABILE QUINTUM.

EXpositis causis Indulgentiarum, & motu; sequitur, vt de infinito, de loco, & tempore Indulgentiarum dicamus.

Caput I.

DE INFINITO, HOC EST, QVIA THESAURVS
INDVLGENTIARVM EST INFINITVS.

ET quia infinita sunt merita Christi: ergo & cælestis thesaurus indulgentiarum est infinitus. CONSEQUENTIA à causa ad effectum. ANTECEDENS probatur autoritate Clementis Sexti in Extrauagante, *Unigenitus Dei filius*, vbi docet, & determinat meritum Christi esse infinitum, & adducit illum locum Sapient. cap. 7. *Infinitus est thesaurus, quo qui vti sunt, participes facti sunt amicitiae Dei.* Vnde colligit vnā guttam sanguinis Domini, satis abundè satis fuisse pro redimendis hominibus. Vt autem hæc veritas illustrior fiat, sciendum est meritum Christi ex multis causis esse expendendum.

Primùm extensiuè, & quod aiunt Theologi ex sufficientia: cùm enim sufficiat prodesse hominibus infinitis si fierent; ideò habet sufficientiam infinitam. Quod vt intelligas rectè, præ oculis habere oportet illud simile, quod prosequitur B. Paulus Apostolus ad Rom. cap. 5. inquit, quòd Adam est forma futuri, scilicet Christi: nam etiam si decies centena millia hominum nascerentur, suprà eos qui vnquam nascituri sunt; semper omnibus sufficeret ad damnationem vnum peccatum Adæ: tamen hoc non operatur effectiuè, nisi in illis qui generantur actu ex visceribus Adæ: nec diutius operatur in ipsis, quàm manet in Adam. Eodem modo, etsi centies centena millia hominum nascerentur vltra eos qui fuerunt, vel vnquam erunt; sufficeret tamen omnibus saluandis vnum vnus passionis Christi meritum: quia est infinitum. infinitum verò, neque vsu finiri potest, neque ablatione: verùm effectiuè non operatur salutem nisi in illis, qui amplectuntur Christum per fidem, quæ per charitatem operatur: meritum enim, & indulgentia Christi Domini, est immensus & infinitus thesaurus quæsitus, inuentus, relictus, & in Ecclesia Catholica depositus, & conseruatus, propter vtilitatem omnium nascentium in mundo. sed si non quæritur ab homine thesaurus hic absconditus in agro passionis Domini: si non emitur, si non accipitur; non applicatur, non prodest.

Præte-

Præterea, meritum Christi alia de causa dicitur infinitum: quia potens est nos liberare à supplicijs inferni, quæ sunt infinita ex duratione: & potest nos perducere ad gloriam sanctorum, quæ etiam est infinita, obiectivè, & duratione: ob quam causam meritum Christi habet quædam infinitatem. Alia causa huius Catholicæ veritatis demonstrari potest: nam Christus Dominus meruit indulgentiam, & remissionem infinitæ culpæ; si esset infinita cathegoreumaticè: meruitq; remissionem infinitorum hominum infinitæ poenæ, & infinitorum peccatorum: quoniam obtulit se in hostiam & sacrificium, quod est infiniti valoris, & maioris pretij, quàm infinitorum hominum, imò infinitorum mundorum peccata.

Potest etiam dici Christi meritum infinitum: quia actus personæ infinite, siquidem omnia opera Christi fuerunt verbi, tanquam suppositi, quod fuit infinitum: licet illa opera humanitatis Christi non fuerunt verbi, secundum naturam infinitam diuinam; sed secundum naturam humanam finitam.

Amplius, sicut meritum Christi fuit infinitum ratione vnionis hypostaticæ; sic potuit habere præmium infinitum, & thesaurum indulgentiarum infinitum, ratione vnionis hypostaticæ: nam maius est, quod Deus patiat vel minimum cruciatum, quàm quod omnes homines omnium seculorum, infinitos cruciatus patiantur. Ex dictis sequitur, quod Christus non plus meruit, quàm Deus possit præmiare: nam Christus meruit tantum infinitum præmium syncathegoreumaticè: & Pater æternus potest conferre infinitum præmium syncathegoreumaticè.

Postremò ostenditur meritum Christi fuisse infinitum: quia meruit coram Patre æterno de toto rigore iustitiæ: hic autem modus meriti infinitam vim & efficaciam requirit, quemadmodum in creatione, licet id quod creetur finitum sit; modus tamen faciendi ex nihilo requirit infinitam virtutem, ob idq; virtus creandi soli Deo propriè competit.

In hoc itaq; merito Christi, omnia omnium hominum merita fundantur: tum quia fundamentum aliud ponere nemo potest, quàm quod est positum Christus Iesus 1. Corinth. 3. tum quia Christus Dominus tanquam caput in membra, & tanquam vitis in palmites Ioan. 15. perpetuò in suos virtutem influit, iuxta illud Prophetæ Psalm. 132. *Sicut unguentum in capite, quod descendit in barbam, barbam Aaron, quod descendit in oram vestimenti eius, sicut ros Hermon, qui descendit in montem Sion.*

Porro, in his meritis Christi & sanctorum, tanquam in petra firmissima fun-

ma fundantur Ecclesiæ Catholicæ indulgentiæ : & sicut merita Christi & Sanctorum sunt infinita, & indiuisibilia ; ita indulgentiæ sunt infinitæ, & indiuisibiles contra physicos : ergo hæretici & alij desperati, qui diffidunt, & suam nequitiam (inquit Augustinus de vera & falsa pœnitentia cap. 5.) Dei pietati comparant, finem imponunt diuinæ virtuti : dant finem infinito, & perfectionem diuinitatis auferunt Deo, cui nihil deest, quod etiam cogitari non potest.

Caput II.

DE LOCO INDVLGENTIARVM, QVIA SOLET DEVS
ELIGERE, ET RESERVARE SIBI QVAEDAM LOCA.

ITA quidem est, quòd vbique Deus est (imò Deum, cæli cælorum capere non possunt) verùmtamen non vbique æqualiter operatur : *Misericordia Domini plena est terra.* Sed in scripturis tamen legimus, quòd certa loca suis operationibus delegerit : exauditioni, templum Hierosolymitanum : arcam, miraculis & benedictionibus : probaticam piscinam, ægrotorum solatio. Templum quidem ea dignatus est gratia, & honore ; vt si quis etiam exul ad illud versa facie oraret, exaudiretur : quod priuilegium nulli alii loco concessum est legimus. Arcæ porrò tantam virtutem esse voluit ; vt ea præsentē funderentur hostes, Hiericho corrueret, Iordanis retrorsum conuerteretur, Iosue 4. 5. & 6. & domus Obed-Edom consequeretur benedictionem.

Piscinæ verò probaticæ prærogatiuam hanc fuisse, nobis Euangelium Ioannis cap. 5. indicat ; vt qui primus in eam descendisset, quocunque tandem affectus esset morbo, statim ab eo liberatus discederet. Nunquid parem vim ad sanandum aliæ quoque vulgares aquæ habuerunt ? Sic Deus, cuius misericordia pleni sunt cæli, plena est terra : qui cum Iosepho descendit in carcerem, & in vinculis non derelinquit eum : qui fuit cum Daniele, cùm missus fuisset in lacum leonum : & cum tribus pueris, cùm fuissent missi in fornacem ignis ardentis, & qui nullo circumscribitur loco : certa tamen loca esse voluit, in quibus manifestius virtutem suam declararet. In templo Deus olim responsa dabat, in templis angelos videre licuit, Lucæ cap. 1. quos inibi etiam habitare, vel illud nobis esse documento potest, quod à Iosepho memoriæ proditum est, cùm iam iam Hierosolymitanum excidium instaret, angelos in templo auditos esse, qui dicerent : *Recedamus ex his ædibus.* Ita Genesis cap. 28. cùm Iacob euigilasset de som-

de fomno, ait: *verè Dominus est in loco isto, & ego nesciebam.* Et Exod. cap. 3. dicit Dominus ad Moysen: *Solue calciamenta de pedibus tuis, locus enim in quo stas, terra sancta est.*

Item, Exodi 40. *Postquam omnia perfecta sunt, operuit nubes tabernaculum testimonij, & gloria Domini impleuit illud.*

Item, Deuteronomii cap. 12. 14. 15. 16. 17. 18. præceptum est: *Ad locum quem elegerit Dominus Deus vester, de cunctis tribubus vestris, ut ponat nomen suum ibi, & habitet in eo, venietis & offeretis in loco illo holocausta, & victimas vestras, decimas, & primitias manuum vestrarum, & vota atq; donaria, primogenita bouum, & ouium: & comedetis ibi, in conspectu Domini Dei vestri, ac lætabimini in cunctis ad quæ miseritis manum vos, & domus vestrae, in quibus benedixit nobis Dominus Deus vester. Non facietis ibi, quæ nos hîc facimus hodie singuli quod sibi rectum videtur.*

Item, ibidem, *Caue ne offeras holocausta tua, in omni loco, quem videris; sed in eo quem elegerit Dominus: in una tribuum tuarum offeres hostias, & facies quodcumq; præcipio tibi.*

Item, 3. Regum cap. 11. dixit Dominus Salomoni: *Quia hoc habuisti apud te, & non custodisti pactum meum, & præcepta mea, quæ mandavi tibi, dirumpens scindam regnum tuum; & dabo illud seruo tuo. Verumtamen in diebus tuis non faciam, propter David patrem tuum: de manu filij tui scindam illud. Nec totum regnum auferam: sed tribum vnâ dabo filio tuo, propter David seruum meum, & Ierusalem quam elegi.*

Item, ibidem, *Ierusalem ciuitatem elegi ex omnibus tribubus Israël.*

Item, ibidem, *Ierusalem ciuitatem elegi, ut esset nomen meum ibi.*

Item, 4. Regum 21. *In Ierusalem ponam nomen meum.*

Item, 3. Regum cap. 8. & 9. Et 2. Paralipomenon cap. 6. & 7. 12. & 33. *Factum est autem, cum exissent sacerdotes de Sanctuario, nebula impleuit domum domini: & non poterant sacerdotes stare, & ministrare propter nebulam, impleuerat enim gloria Domini, domum domini.*

SED hæc, dicet aliquis, Veteris Testamenti fuisse, nec ad Nouum pertinere quidquam, in quo Samaritanæ Ioan. 4. disertis verbis dictum legimus: *Mulier, crede mihi, veniet hora, quando neq; in monte hoc, neq; Hierosolymis adorabitis Patrem.* Atqui ille ipse, qui hæc dixit, noui testamenti mediator, legislator, & auctor, templo, tantum honoris habuit Math. 21. Ioan. 2. ut cum eiiceret ex eo vendentes & euentes, domum illud sui patris vocauerit. Nunquid non totus mundus domus est illius, qui dixit: *Cælum & terram ego impleo?* Hier. 32. Et Isaia 66. *Cælum sedes mea, terra autem scabellum pedum meorum?* & tamē domum patris sui peculiari modo quoddam templum Christus

appellauit. Quin & in ipsis templis, arcano quodam, & inperscrutabili Dei iudicio fieri videmus, hoc ipso gratiæ tempore; vt terribiliora in vno sint, quàm in alio Dei opera: vt in Italia, Romæ, & in Loreto: in Hispania, in Campostella: in Polonia, Cracouiæ, Gnesnæ, Czestochouiæ, & in Claro monte, in templo S. Crucis. Sic ab Augustino Epistola 137. factum legimus, cùm quidam ex eius sodalitis iuuenis, graue quoddam presbytero crimen intentasset: nec res euidentibus argumentis, aut reffelli posset, aut coargui: quòd iusserit ambos ad locum sanctum (iis enim verbis vtitur) peregrinari, nimirum eum, vbi beati Felicis Nolensis corpus conditum erat; vt ibi ad confessionem vel poenæ miraculo, vel timore compelleretur. Ac mox ea verba subiicit Augustinus: *Ubiq; quidem Deus est, & nullo continetur, vel includitur loco, qui condidit omnia: & eum à veris adoratoribus in Spiritu, & veritate oportet adorare; vt in occulto exaudiens, in occulto etiam iustificet, & coronet: verumtamen ad ista, quæ hominibus visibiliter nota sunt, quis potest eius consilium perscrutari, quare in aliis locis, hæc miracula fiant, in aliis non fiant? Multis enim notissima est sanctitas loci, vbi beati Felicis Nolensis corpus conditum est. etc.* Ac paucis interiectis, mentione facta de miraculis, quæ Mediolani fierent, apud memoriam Sanctorum, Nunquid, inquit, nõ et Affrica sanctorum Martyrum corporibus plena est? & tamen nusquam hîc scimus talia fieri. Sicut enim, quod Apostolus dicit, 1. Corint. 12. non omnes sancti habent dona curationum, nec omnes habent diudicationem spirituum; ita nec in omnibus memoriis sanctorum ista fieri voluit, qui diuidit unicuiq; propria, prout vult. Quare minimè nouum, ac iam indè à multis seculis in orbe Christiano receptum est, quòd propter admirabiliores Dei operationes, vnus locus alio sanctior habitus, & à piis hominibus magis est frequentatus. Qui scripserunt Ecclesiasticam historiam Eusebius, Socrates, Zozomenus, Theodoretus, & alii ante mille ducentos, quin & ante mille trecentos, & amplius annos, & Hierosolymam, & ad martyrum sepulchra, religionis ergò, peregrinationes etiam ex voto susceptas esse memoriæ prodiderunt. Quas adeò non contemnendas putauit D. Ioannes Chrysostomus; vt diceret Homel. 5. de beato Iob, cùm in vinculorum, quibus ligatus erat Paulus, laudem erupisset: *Vellem nunc locis in illis versari, quibus vincula illa manent: & catenas videre, quas timuerunt quidem demones, & horrent, & angeli veneruntur. Si ecclesiasticis curis essem vacuus, & corpus robustum haberem, nequaquam peregrinationem tantam facere recusarem, quòd catenas saltem viderem, & carcerem, quo Paulus vinctus est.*

De Christianorum templis, siue Basilicis refert Augustinus lib. 1. de ciuitate

ciuitate Dei, & in ecclesiastica quoque historia scriptum legimus. Zozomenus lib. 9. cap. 9. quòd etiam ab immanibus barbaris, tantus olim illis honor habitus fuerit; vt quisquis ad ea confugisset, is ab hostium insultu liber esset, Hæc de templis.

LEGITVR QVOQVE DE AQVIS aliquid simile, 4. Regum cap. 5. Fluuii Damasci Abana & Pharphar, non potuerunt Naaman curare, & sanare à lepra; sed aquæ Israël, aquæ Iordanis. Nam consilio Elizei lotus Naaman septies in Iordane, à lepra mundatus est, & recepit sanitatem caro eius. Item, Ioan. cap. 5. *Est autem Hierosolymis Probatica piscina, quæ cognominatur Hebraicæ Bethesda, quinq; porticus habens. In his iacebat multitudo magna languentium, cæcorum, claudorum, aridorum expectantium aquæ motum. Angelus autem Domini descende-
bat secundum tempus in piscinam, & mouebatur aqua: Et qui primò descendisset in piscinam post motionem aquæ, sanus fiebat, à quacunq; detinebatur infirmitate.*

Caput III.

DE VACVO,

EX supràdictis, manifestum est, quia gratia Dei in Ecclesia Catholica sunt indulgentiæ: sed apud Iudæos, Gentiles, Hæreticos, est vacuum, iuxta illud, Prouerb. 14. *Ubi non sunt boues, præsepe vacuum est: ubi autem plurimæ segetes, ibi manifesta est fortitudo bouis.* D. HIERONYMVS super iisdem verbis: *Boues, Doctores Catholicos: Præsepe cœtum auditorum: Segetes, dicit fructus bonorum operum.* Incassum ergo tumet superbus, & indocta eloquentia verberat aures, ac corda subiectorum: quia ubi non sunt docti prædicatores, frustra ad audiendum confluit turba plebium: ubi autem plurimæ operationes apparent virtutum, ibi appertissimè claret, quia non hæreticus aut Iudæus in vanum garrit; sed pro verbi fruge laborauit ille, qui & ipsum verbū casto ore ruminare, & viam veritatis recto discretionis pede noscet incedere. Nec mirandum, cur in Præsepi auditores significari dixerimus; cum bos alatur de præsepi, doctor autem verbo audientes soleat nutrire: Sed intuendum, quia & de labore bouis præsepe impletur, & ipse bos suo fructu de præsepi reficitur. Quia nimirum prædicator fidelis, & audientes verbo reficit, & eadem refecti-
one apud Deum ipse proficit: quod in opere figuratur 3. Reg. 17. *Elizæ, qui Sareptanam viduam pascit, à qua et ipse pascitur.* Hæc D. Hiero.

DIONYSIVS Carthusianus super iisdem verbis. *Spiritualiter autem per boues designantur Prædicatores, Doctores, Prælati, sicut primo ad*

Corint. cap. 9. & Deuter. 25. docet Apostolus illud ex Deuteronomio introducens: *Non alligabis os boui trituranti: Hi enim in agro Dei, id est, in Ecclesia laborant, fidelium corda verbo prædicationis aperiendo, ad suscipiendum semen gratiæ Spiritus sancti, quod inserunt eis, & ea cooperando fœcundant: unde 1. ad Corint. cap. 3. dicit Paul. Adiutores Dei sumus, vos Dei agricultura estis. Itaq; ubi non sunt boues, id est, boni prælati, ac prædicatores; præsepe vacuum est, id est, corda populi: gratia virtutibus atq; indulgentiis carent, quia magistrum et ducem non habent. Ubi autem plurimæ segetes, id est, abundantia actuum virtuosorum, digni fructus poenitentiae: ubi indulgentiæ, ibi manifesta est fortitudo bouis, id est, efficacia doctrinæ prælati, sicut prædicatoris, euidenter relucet in huiusmodi fructu, tanquam in suo effectu.*

Et quoniam Ecclesiæ ager sepius renouatur poenitentiarum indulgentiarum & prædicationis, remissionis peccatorum, aratro fructus Deo adiuuante facere & producere nunquam cessat: apud Iudæos autem nihil, nisi vacuum: est ergo in natura vacuum, quia apud Iudæos, gentiles, & Hæreticos.

Caput IIII.

DE TEMPORE INDVLGENTIARVM,

AD concessionem indulgentiarum, cum loco prædictis causis, necessario requiritur tempus, quia omnis motus fit in tempore. Et quamvis teste D. Ambrosio in libro de Helia, & ieiunio cap. 22. Omne tempus sit opportunum ad indulgentiam, iuxta illud Ezechiel. cap. 18. *Quacumq; boni peccator ingemuerit, omnium iniquitatum eius nō recordabor:* tamen ipsemet Deus adhuc in veteri Testamento, in quo Christianorum futura festa præsignata, & futuræ in Ecclesia Catholica indulgentiæ figuris adumbratæ fuerant, aliqua tempora, tam ad sanctificanda festa, quàm indulgentias celebrandas specialiter elegit, deputauit, designauit, præscripsit & ostendit. Ita enim Exodi. 20. Deuter. cap. 5. scriptum est: *Memento vt diem Sabbathi sanctifices: sex diebus operaberis, et facies omnia opera tua. septimo autem die Sabbathū domini Dei tui est: non facies omne opus in eo, tu, & filius tuus, & filia tua, seruus tuus, & ancilla tua, iumentum tuum, & aduena, qui est intra portas tuas. Sex enim diebus fecit Deus cælum et terram, et mare, et omnia quæ in eis sunt, et requieuit die septimo. Idcirco benedixit Dominus diei Sabbathi, et sanctificauit eum. Nunquid Deo cura de Sabbatho? Non homo propter Sabbathum: sed Sabbathum propter hominem factum.* Marci cap. 2. Sancti-

Sanctificauit ergo Dominus Sabbathum, & benedixit Sabbatho: vt homo querat, petat, pulset, oret ad Deum, pro benedictione, & pro indulgentia in Sabbatho, & sic sanctificabit Sabbathum, & dies indulgentiarum. Idem præceptum de Neomenijs Psalm. 80. *Buccinate in Neomenia tuba, in insigni die solennitatis vestræ.*

Idem præceptum de septimo mense, Leuitici cap. 16. *Mense autem septimo decima die mensis, affligetis animas vestras, nullumq; opus facietis, siue indigena, siue aduena, qui peregrinatur inter vos. In hac die expiatio erit vestri, atq; mundatio. Ab omnibus peccatis vestris comm Domino mundabimini; Sabbathum enim requietionis est. & affligetis animas vestras religione perpetua. Expiabit autem sacerdos, qui unctus fuerit, & cuius manus initiatæ sunt, vt sacerdotio fungantur pro patre suo. Inducturq; stola linea, & vestibus sanctis, & expiabit sanctuarium, & tabernaculum testimonij atque altare, sacerdotes quoque & vniuersum populum. Eritq; hoc vobis legitimum sempiternum, vt oretis pro filiis Israël, & pro cunctis peccatis eorum semel in anno. Fecit igitur, sicut præceperat Dominus Moysi.* Idem præceptum Leuitici 23. *In diebus illis, loquutus est Dominus ad Moysen, dicens: Decimo die huius mensis septimi, dies expiationum erit celeberrimus, & vocabitur sanctus, affligetisq; animas vestras in eo, & offeretis holocaustum Domino. Omne opus seruile non facietis in tempore dici huius, quia dies propitiationis est; vt propitiatur vobis Dominus Deus vester. Omnis anima, quæ afflictæ non fuerit die hac, peribit de populis suis, & operis quippiam fecerit, delebo eam de populo suo. Nihil ergo operis facietis in eo, legitimum sempiternum erit vobis in cunctis generationibus, & habitationibus vestris. Sabbathum requietionis est, affligetisq; animas vestras die nono mensis, à vespere vsque ad vesperum celebrabitis Sabbathum vestrum, dicit Dominus Omnipotens.* Idem præceptum de anno septimo, & de anno quinquagesimo Leuitici cap. 25. *Loquutusq; est Dominus ad Moysen in monte Sinai, dicens: Loquere filiis Israël, & dices ad eos. Quando ingressi fueritis terram quam ego dabo vobis, sabbathizetis sabbathum Domino, sex annis seres agrum tuum, & sex annis putabis vineam tuam, colligesq; fructus eius: septimo autem anno sabbathum erit terræ requietionis Domini: agrum non seres, & vineam non putabis, quæ sponte gignet humus, non metes, & vuas primitiarum tuarum non colliges quasi vindemiam; annus enim requietionis terræ est; sederunt vobis in cibum tibi & seruo tuo, ancillæ tuæ, & mercenario tuo, et aduena, qui peregrinatur apud te: iumentis tuis & pecoribus omnia quæ nascuntur præbeant cibum. Numerabis quoque tibi septem hebdomadas annorum, id est, septies septem, quæ simul faciunt quadraginta nouem, & clanges buccina mense septimo, decima die mensis propitiationis tempore in vniuersa terra vestra, sanctificabisq; annum quinquagesimum, & vocabis remissionem*

cunctis habitatoribus terræ tuæ; ipse est enim Iubileus. Reuertetur homo ad possessionem suam, & unusquisque rediet ad familiam pristinam: quia iubileus & quinquagesimus annus. Non seretis, atque metetis spontè in agro nascentia, & primitias vindemiæ non colligetis ob sanctificationem iubilei, sed statim ablata comedetis. Anno iubilei redient omnes ad possessiones suas. &c. Nolite affligere contribules vestros; sed timeat unusquisque Deum suum: quia ego Dominus Deus vester. Facite præcepta mea, & iudicia mea custodite, & implete ea, ut habitare possitis in terra absque ullo pauore, & gignat vobis humus fructus suos quibus vescimini, usque ad saturitatem nullius impetum formidantes. Quod si dixeritis, quid comedemus anno septimo, si non seuerimus, neque collegerimus fruges nostras? Dabo benedictionem meam vobis anno sexto, & faciet fructus trium annorum, seretisq; anno octauo, & comedetis veteres fruges usque ad nonum annum, donec noua nascantur edetis vetera.

Et secundum hoc præceptum Domini, sancta mater Ecclesia Catholica, quolibet anno quinquagesimo, solebat celebrare vniuersaliter annum sanctum Iubileum magnum, solenni ritu, usque ad annum Domini millesimum, quadringentesimum, septuagesimum quintum, quò Pontifex Romanus Sixtus Quartus Iubileum tenuit, simulq; constituit, ut iam nò quinquagesimo Iubileus annus celebretur; sed ab annis viginti quinque, usq; ad vigesimum quintum rursus seruari debere, eò quòd ætas hominũ cum decrefcentis mundi tempore semper abbreviatur. Ioan. Eccius Homel. 1. die Pentecostes.

Neque illud omittendum, quia anno Domini 1571. primis diebus Octobris, cum Veneti in Cypro, siue Candia, obsiderentur à Turca, & bellum haberent cum Turca, Romanus Pontifex Pius Quintus indulgentiam quadraginta horarum Romæ instituit, indixit, celebrauit: & Ecclesia orante, & Deo Opt. Max. adiuuante, Veneti ex Turcis ad Echinnadas die septima Octobris victoriam reportauerunt. Sed ad tempus Iubilei gratiæ, & indulgentiarum redeamus. Sciuit hæc præcepta Dei & seruauit Isaias Propheta: sciuit & seruauit Paulus Apostolus, & propterea ambo, quasi vno spiritu & ore docent: Isaiæ 49. & Apostolus 2. ad Corinth. cap. 6. *Adiuuantes autem exhortamur, ne in vacuum gratiam Dei recipiatis: ait enim, Tempore accepto exaudiuite, & in die salutis adiuui te. Ecce nunc tempus acceptabile, ecce nunc dies salutis, nemini dantes ullam offensionem, ut non vituperetur ministerium vestrum. Sed in omnibus exhibeamus nosmetipsos sicut Dei ministros in multa patientia, in tribulationibus, in necessitatibus, in angustiis, in plagis, in carceribus, in seditionibus, in laboribus, in vigilijs, in ieiunijs, in castitate, in scientia, in loganimitate, in suauitate, in Spiritu Sancto, in charitate non fi-*

*non ficta, in verbo veritatis, in virtute Dei, per arma iustitiæ, à dextris
 & à sinistris, per gloriam et ignobilitatem, per infamiam & bonam famam,
 vt seductores & venices, sicut qui ignoti & cogniti, quasi morientes &
 ecce viuimus, vt castigati, & non mortificati, quasi tristes, semper autem
 gaudentes, sicut egentes, multos autem locupletantes, tanquam nihil habentes,
 & omnia possidentes.*

NOTABILE SEXTV M.

Postquam diximus de causis, de motu, de infinito, de loco, & vacuo, ac de tempore indulgentiarum; sequitur vt dicamus de votis, peregrinationibus, & offertorijs quæ offeruntur in Dei nomine pro gratia indulgentiarum.

Caput I.

DE VOTIS QUÆ NVNCVPANTVR SANCTIS.

ERasmus in Colloquio, quod inscribitur Naufragium, miro modo ridet Vota, quæ sanctis nuncupantur. De hæreticis autem omnibus, nulla potest esse dubitatio, quin nos pro idololatriis habeant ob ea vota, quæ passim sanctis nuncupamus: & ratio esse potest: quia votum est actus religionis soli Deo debitus, qualis est etiam iuramentum, & sacrificium, vt patet ex diuinis literis, vbi perpetuò vota dicuntur fieri Deo, vt Leuitici cap. 6. & 27. Numero. 30. Deutero. 23. in Psalmis passim, & præcipuè Isaia 19. vbi legimus, *Colent cum in hostijs, & muneribus, & vota vouebunt Domino, & soluent.* Verùm tamen posse aliquo modo sanctis vota nuncupari, certissimum est, & probatur testimonijs antiquorum Patrum.

EVSEBIVS lib. 13. Præparat. Euangelicæ cap. 7. loquens de martyribus, nomine omnium Christianorum: *Nos, inquit, veræ pietatis milites, vt Dei amicos honorantes, ad monumenta illorū accedimus, vota q; illis facimus, tanquam viris sanctis, quorum intercessione ad Deum non parum iuari profitemur.*

THEODORETVS lib. 8. ad Græcos, vbi dixerat varia à martyribus peti, subdidit: *Piè, inquit, fideliterq; precatos, ea maxime consequi, quæ desiderant, testantur illa, quæ votorū rei persoluunt: nam alij quidem oculorum, alij verò pedum, alij manuum simulachra suspendunt, ex argento, aurōue confecta. &c. 1. Regum 6.*

PALLADIVS in historia Lausiaca ca. 113. scribit sanctū Philoronum, ex voto Apostolis nuncupato, venisse Romam ad limina Apostolorum, & dein

& deinde Alexandriam ad S. Marcum.

PRUDENTIVS in hymno de SS. Hemeterio & Chelidonio.

*Illitas cruore sancto,
Nunc arenas incolæ
Confrequentant obseruantes
Voce, votis munere.*

PAVLINVS natali primo de sancto Felice.

Hunc liceat celebrare diem: pia reddere vota. Coram etc.

Et natali secundo. *Coram vota tibi: coram mea corda dicauit.*

Et natali quarto. *Annua vota mihi remeant, simul annua linguæ
Debita. &c.*

MATHIAS MIECHOVIEN. lib. 2. historiæ Polonorum cap. 4. Et Martinus Cromerus lib. 3. in vita Boleslai Chrobrij Primi Polonorum Regis, narrant Anno Domini 999. Ottonem Ruffum tertium, eius nominis Imperatorem Romanum, cum ægrotaret, vouisse votum limina sancti Adalberti martyris Gnesnæ visitare: cum autem sanus factus esset, in Poloniam venit, & à Poshania vsque Gnesnam, hoc est septem miliarium spatium, non aliter quàm pedes confecit.

GREGORIUS TVRONICVS lib. 2. historiæ Francorum cap. 37. meminit voti, quod nomine Clodouei Regis sancto Martino fecerunt ministri eius: *Domino, inquit, gratias agentes, & vota B. confessori promittentes, leti nunciauerunt Regi. etc.*

ACCEDAT aduersariorum testimonium: nam Faustus apud D. Augustinum lib. 20. contra Faustum cap. 3. *Idola, inquit, vertistis in martyres, quos votis similibus colitis.* Ex quo Fausti testimonio discimus, vltatissimum in primitiua Ecclesia fuisse, vt martyribus vota fierent.

Iam habemus testimonia, non solum sanctorum Patrum Ecclesiæ Catholicæ, sed etiam hæreticorum, quia licet sanctis nuncupare vota. Sed hoc ipsum potest rationibus confirmari.

PRIMA RATIO. Capiti cum membris, licet nuncupare vota. sed Christi capitis sancti sunt membra: Ergo sanctis licet nuncupare vota.

MAIOR vera: quia non licet diuidere & soluere Christum, qui est caput: nam qui soluit Christum, antichristus est. i. Ioan. cap. 4.

MINOR est Apostoli ad Ephes. cap. 4. & 5. & ad Colos. cap. 1. & 2.

SECUNDA RATIO. Amicis Dei, quos Deus honorat, licet nuncupare vota. sed sancti sunt amici Dei, quos Deus honorat: ergo sanctis licet nuncupare vota.

MAIOR

MAIOR vera ab authoritate & meritis.

MINOR Psalm. 138. & Ioan. 15.

TERTIA RATIO. Patribus, qui cū Christo colligunt, & thesaurizant filijs, licet nuncupare vota. sed patres sancti cū Christo colligunt, & thesaurizant filijs: ergo licet sanctis vota nūcupare.

MAIOR vera ab authoritate & meritis.

MINOR Lucæ II. & 2. ad Corint. 12. *Nec enim debent filij parentibus thesaurizare, sed parentes filijs.*

QVARTA RATIO, Quorum animæ in manu Dei sunt, & memoria æterna in benedictionibus; illis licet vota nuncupare. sed sanctorum animæ in manu Dei sunt, & memoria æterna in benedictionibus: ergo sanctis licet vota nuncupare.

MAIOR à summa felicitate Sanctorum, apud quos miseris licet mendicare. MINOR Sap. cap. 3. Item, Psalm. III. & Eccles. 45.

QVINTA RATIO. Quorū memoria in populis placatur Deus, illis licet vota nuncupare. sed memoria sanctorum in populis placatur Deus: ergo licet sanctis vota nuncupare.

MAIOR ab efficientibus, vel à signo.

MINOR Ecclesiastici cap. 45. *Deus Moysen (& per consequens sanctos) elegit ab omni viuente offerre sacrificium Deo, incensum & bonum odorem, in memoriam placare pro populo suo.*

Possunt plurima argumenta ad eam rem produci, & scripturis sacris confirmari. sed ea breuitatis causa omitto.

AD ARGVMENTVM AVTEM, quod nos ipsi initio capitis proposuimus, respondet B. Thomas, in secunda secunde Quest. 88. Arti. 4. *Vota quæ fiunt sanctis, vel prælatis, includere duas promissiones: vnā quæ fit sanctis, et illam non esse formaliter votum, sed materiam voti: alteram quæ fit Deo, et illam esse formaliter votum, vt cum quis dicit: VOVEO B. MARIAE, ME AD EIVS DOMVM PEREGRINATVRVM: promittit virgini hanc peregrinationem: sed hæc promissio non est votum. et simul promittit Deo, se implēturum promissionem virgini factam: et hæc secunda promissio verè est votum. At ista rectè se habent in votis, quæ includunt promissionem homini mortali factam. Nam qui vouet obedientiam Prælato; reuera votum non Prælato, sed Deo facit, licet ipsi Prælato obedientiam promittat: non enim illo voto Prælatum, sed Deum colere et honorare intendit. Similiter, qui vouet perpetuò ministrare in Xenodochio, vel Ptochodochio, tametsi in utili-*

tatem et commodum Xenodochij, vel Ptochodochij faciat. At qui vouet ieiunium, vel peregrinationē sanctis; ipsos sanctos religiosè honorare intendit. Et præterea, Caietanus in eum articulū B. Thomę probat ex ipsa professione Fratrum Prædicatorum, vota verè fieri sanctis. nam dum profitentur, dicunt: *Voueo Deo, et B. Mariæ, et omnibus sanctis, me Prælato tali, vel tali obediturum.* Vbi ex duabus promissionibus vna dirigitur ad Prælatum, & illa est materia voti: altera ad Deum & sanctos simul, & illa est formaliter votum. Caietanus igitur adfert aliam solutionem, ac dicit, Vota fieri sanctis, non vt sunt creaturæ quædam rationis participes; sed vt in eis Deus habitat per gloriam: ita & vota, quę fieri dicuntur sanctis, fiunt Deo in sanctis, quomodo maledicta in sanctos dicuntur blasphemia; quia Deus in sanctis maledicatur.

SED OBIICIET FORTASIS ALIQUIS, aut vota quę fiunt Deo in sanctis, terminantur ad solum Deum, quo modo sacrificium soli Deo offertur, licet in memoriam & honorem sanctorum. aut terminantur etiam ad ipsos sanctos; ita vt reuera ipsis vota fiant: quomodo eleemofyna, quę datur Christo in paupere, verè datur ipsi pauperi. Si primum accipiat: ergo non verè vota fiunt sanctis. Si secundum: ergo idololatram videmur.

Respondeo: Secundo modo fieri vota sanctis, nec tamen nos esse idololatrias: nam nō eadem ratione fit votum sanctis, & Deo. & solum votum, quod fit Deo, est cultus latriæ. Animaduertendum est enim inter omnes conuenire verè & propriè sanctis aliquid promitti, sicut verè & propriè promittitur Deo. Id enim B. Thomas concedit, & per se patet: nam si licet sanctis ædificare sepulchra & basilicas, ornare eorum reliquias, accendere coram eis cereos, & similia; cur non liceat eis ista promittere? Rursum inter omnes Catholicos conuenit, aliter promitti munus Deo, aliter sanctis. Nam Deo promittitur in signum gratitudinis erga primum principium bonorum omnium, & in recognitionem beneficij ab ipso tanquam à primo authore accepti: & proinde illa promissio est cultus latriæ. At sanctis promittitur aliquid in signum gratitudinis, erga mediatores & intercessores, per quos à Deo beneficia accipimus: & proinde illa promissio, non est cultus latriæ, sed duliæ.

Solum videtur dubium esse, an ista promissio facta sanctis possit dici Votum, id est, An Votum sit nomen generale, quod dicitur analogicè, de promissione facta Deo, & sanctis: quomodo nomē orationis, & nomē cultus se habēs: an verò sit nomen speciale, quod solum dicitur de promissione Deo facta, sicut sacrificium nō dicitur, nisi de munere, quod offertur Deo. Et si autem controuersia vocabuli, cum de re constet, nos torquere non debeat; existimo tamen secundum

usum ecclesiæ, nomen voti esse generale: nam nullus auderet dicere, Sacrifico Deo, & B. Marię: vel etiam absolute, Sacrifico B. Marię: & tamē dicimus: Voueo Deo & B. Marię: & etiā simpliciter, Voueo B. Marię.

Præterea, nomen Voti, ita est coniunctum cum nomine orationis; vt Græcè dicatur votum *ευχῆ*, oratio verò *προσευχῆ*, vt notat Gregorius Nyssenus oratione prima in orationem Dominicam. Latine autem sapissimè accipitur votum pro oratione. Et ratio est: quia, vt ibidem docet Nyssenus, vota ordinantur ad orationem. Solemus enim, cū impetrare aliquid volumus, prius votis conciliare eum, à quo volumus petere: deinde petere id, quod volumus. Vnde est illud *Æneid.* 6. *Æneas cessas in vota precesq;* Sicut ergo orationis nomen, non solum dicitur de illa petitione, qua à Deo postulamus beneficia, quæq; est actus latriæ; sed etiam de illa qua postulamus à Sanctis, vt nostram orationem iuuent, quam fundimus ad Deum; ita etiam voti nomen, non solum conuenit promissioni quæ fit Deo, quæ est actus latriæ, sed promissioni, quæ fit sanctis, & quæ non est actus latriæ. neque his repugnat, quod in scripturis nomen voti semper accipiat pro promissione facta Deo: nam cū scriberentur scripturæ sanctæ, nondum cœperat vsus vouendi sanctis.

SED OBIICIES, Si promissio facta sanctis mortuis potest dici Votum: cur non etiam promissio facta sanctis adhuc viuentibus nobiscum? Respondeo, non valet consequentia. PRIMÒ: quia promissio facta sanctis cum Christo regnantibus est similior promissioni, quæ fit Deo, quàm sit promissio, quæ fit homini mortali. Nam quemadmodum id, quod promittimus Deo, non est illi vtile sed nobis, & solum fit in signum honoris & gratitudinis; ita etiam quod promittimus sanctis in cælo regnantibus non est illis vtile, sed nobis: neque enim illis rebus nostris indigent, cū sint beati, & solum illis ista promittimus, & offerimus in signum memoriæ, honoris, & gratitudinis. At, quæ hominibus hîc viuentibus promittimus, illis vtilia sunt, vel certè esse possunt, cū ipsi multis rebus egeant.

SECUNDÒ: quia votum non conuenit sanctis, nisi quatenus sunt Dei per participationem. At sanctos cum Christo regnantes, certò scimus esse tales: de viuentibus nobiscum, non scimus certò, sed suspicamur tantum.

TERTIÒ, quia sancti in cælo, iam sunt actu & re ipsa beati, & gloriosi, & filij Dei, ac dii quidem per participationem: quia sunt confirmati in illo statu, neq; excidere possunt. At sancti, qui viuūt nobiscum, potentia sunt sancti, & modò sunt sancti, modò non sancti, & magis in spe, quàm in re sunt beati & gloriosi. Rectè igitur quæ mortalibus

promittuntur, non dicuntur vota: dicuntur autem, si beatis hominibus in cælo degentibus promittuntur.

Caput II.

DE PEREGRINATIONIBVS.

HÆresis & error fuit Claudij Taurinen. apud Ionam lib. 3. de cultu imaginum, inanes esse peregrinationes ad loca sanctorum. Eundem sequuti sunt,

PETROBRVSIANI, teste auctore vitæ sancti Bernardi lib. 3. cap. 5.

WICLEFISTAE autem, teste Thoma Valden. Tomo 3. titulo 15. idololatriæ damnabant eos, qui ad loca sancta peregrinabantur.

ERASMV'S Rotherodamus fabulosus, in Colloquiis, titulo Peregrinatio, religionis ergò, multa ineptè & scurriliter, ne dicam impiè contra peregrinationes fabulatur.

IOANNES Caluinus lib. 4. Institutionis cap. 13. § 7. peregrinationes votiuas ad loca sanctorum, non solum inanes, sed etiam plenas manifesta impietate esse dicit: non tamen aliter probat, quàm communi suo axioma, quòd omnis voluntarius hominis cultus Deo displiceat.

MAGDEBVRGENSES Centuria 4. cap. 6. columna 458. tempore Constantini cœpisse volunt abusum peregrinationum ad loca sanctorum: sed non diu postea refutatum fuisse longa oratione à Gregorio Nysseno. Quam orationem totam recitant eadem Centuria 4. cap. 10. columna 936. & sequentibus. Ex qua oratione sumuntur hæc argumenta.

Primum. Christus, Math. 5. inter ea quæ homines beatos faciunt, non posuit peregrinationes.

Secundum. Multa sunt pericula spiritualia in itineribus, ac præsertim mulieribus, vt notum est.

Tertium. Nihil inuenire possumus Hierosolymis, quod in nostra regione non habeamus: nam Deus non magis est ibi, quàm alibi: vt patet ex eo, quòd homines regionis illius, non sunt meliores cæteris, sed fortassis peiores. Porro res Dei, id est templa & altaria, vbique inueniri possunt. Poterant addere Hieronymi Epistolam ad Paulinum, de Institutione Monachi, in qua multis argumentis probat, non expedire peregrinationem ad loca sancta suscipere: & adducit exempla sancti Antonii, & aliorum Monachorum, qui licet in vicinia sanctorum locorum habitarent; tamen nunquam ad illa venerunt.

SED

SED NIHIL HORVM NOS MOVERE DEBET. Sunt enim peregrinationes, ad loca sancta, pia, & religiosa, vt sacrosanctum Concilium Tridentinum, Sessione 25. rectissimè docet. Id probatur primùm scripturæ testimonio. Exodi 23. *Peregrino molestus non eris*: Scitis enim aduenarū animas: *quia et ipsi peregrini fuistis in terra Ægypti*. Item, ibidem Exodi 23. & Deute. 16. Deus instituit, vt omnes filii Israël, ter in anno ad tabernaculum, vel templum Domini peregrinarentur: quod præceptum studiosè seruabat Helcana, & Anna vxor eius lib. 1. Regum ca. 1. Nec non Christus ipse cum Maria matre sua, & S. Iosepho, Luce 2. Item, Ioan. 12. etiam Gentiles veniebant adorare in Ierusalem, propria regione relicta. Item, Actuum 8. Eunuchus æthiops ex longinqua regione veniebat adorare in Ierusalem. Item, Actuum 20. Paulus ipse festinabat in itinere, vt in Ierusalem faceret Pentecosten, quem locum adducit Hieronymus in Epist. 17. ad Marcellam, vt ostēdat bonum esse ad loca sancta peregrinari. Quin & modum peregrinationis ostendit 5. S. Petrus Apostolus 1. Petri ca. 4. dicens: *Charissimi, nolite peregrinari in seruire*, (qui ad tentationem vobis fit) *quasi noui aliquid vobis contingat, sed communicantes Christi passionibus*. Hæ itaque authoritates scripturæ, & hæc exempla, imò plura alia in scripturis posita, quæ nullo modo reprehendi possunt, satis indicant, non esse inanem peregrinationem.

Secundò probatur ex patribus. Eusebius lib. 6. cap. 9. Historiæ. *Alexander*, inquit, *Hierosolymam adorandi, & locorum sanctorum videnti causa propenauit*. Idem refert Hieronymus libro de viris illustribus in Alexandro. Porro iste Alexander floruit centum annis ante tempora Constantini: & martyr fuit sanctissimus, quem etiam mirificè laudant Magdeburgenses Centuria 3. cap. 10. in principio. Ex quo apparet, mendacium esse Magdeburgensium, quòd cœperint peregrinationes ad loca sancta tempore Constantini.

SANCTVS NICOLAUS quoque adolescens, ante Constantini imperium, voti causa peregrinatus est in Ierusalem, auctore Symone Metaphraste.

Idem Eusebius lib. 3. de vita Constantini: & Ambrosius Oratione de obitu Theodosij, laudant Helenam, quòd religionis causa Hierosolymam iuerit.

GAUDENTIVS Episcopus Brixianus, in Sermone de Dedicatione templi, scribit se peregrinatum in Ierusalem, & in itinere, cùm transiret per Cæsaream Capadociæ, accepisse dono, à duabus sanctis mulieribus, neptibus Magni Basilij, reliquias 40. martyrum.

IOANNES Chrysostomus Homelia 66. ad populum Antiochenum

circa finem, comparans sepulchra Martyrum, cum sepulchris regum. *Itaq;* inquit, quò regias quidem aulas videat, nullus vnquam peregrinatus fuerit: multi verò reges, plerumq; huius spectaculi gratia peregrinati sunt: futuri namq; iudicij vestigia, & signa sanctorum ædes exhibent, ubi demones flagellantur, corriguntur homines, & liberantur.

HIERONYMVS Epistola 17. ad Marcellam: Longum est, inquit, nūc ab ascensione Domini, usq; ad præsentem diem, per singulas ætates currere, qui Episcoporum, qui Martyrum, qui eloquentium in doctrina ecclesiastica virorum, venerint Hierosolymam, putantes minus se religionis, minus habere scientiæ, nec summam vt dicitur, manum accepisse virtutum; nisi in illis Christum adomissent locis, de quibus primum Euangelium de patibulo corruscauerat. Item, in Epistola 27. de obitu Paulæ: Cuius, inquit, gentis homines ad loca sancta non veniunt?

Item, in Epistola 46. ad Rusticum, qui venerat peregrinari ad loca sancta Palestinæ: Redde, inquit, quod præsentem Domino spondidisti: incerta est vita mortalium: ne antè nupiaris, quàm tuam impleas sponsonem.

Denique Epistola 154. ad Desiderium, hortatur illum, vt veniat ad loca sancta, & inter alia dicit: Certè adomse, ubi steterunt pedes Domini, pars fidei est.

SULPITIUS lib. 2. Sacræ Historiæ describens acta Helenæ dicit, illud esse mirandum Hierosolymis, quòd in loco, vnde Dominus cælum ascendit, adhuc feruentur pedum eius vestigia: & cum ad eum locum vndique fideles confluant, & rapiant aliquid calcati pulueris, damnum tamen arena non sentiat.

PAVLINVS Epistola vndecima ad Seuerū: Non aliter, inquit, affectus homines ad Hierosolymam rapit; nisi vt loca, in quibus corporaliter præsens fuit Christus, videant atq; contingant.

Et Natali 3. S. Felicis, scribit turbas innumerabiles, ex remotissimis locis, peregrinari solitas ad corpus sancti Felicis. PRUDENTIUS in Hymno de SS. Hemiterio & Chelidonio.

Exteri nec non & orbis,

Huc colonus aduenit:

Fama nam terras in omnes

Præcurrit proditrix;

Hic patronos esse mundi

Quos precantes ambiant.

AVGVSTINVS Epistola 137. ad Clerum & populum Hipponensem: Elegi, inquit, aliquid medium, vt certo placito se ambo constringerent, ad locum sanctum se peregrinatu-
ros.

CASSIANVS lib. 4. de institutis renunciantium, cap. 31. meminit
Mona-

Monachorum, qui orationis causa ad loca sancta pergebant. *Quidam*, inquit, *fratrum ad loca sancta de Ægypti partibus orationis causa conue-*
nerant.

SOCRATES libro 7. cap. penultimo scribit, Eudociam Theodosij iunioris vxorem, ex voto Hierosolymæ peregrinationem suscepisse.

SANCTVM ALEXIVM peregrinatum ad nobiliores ecclesias mundi, scribit Simon Methapraustes in eius vita.

BEDA lib. 5. Historiæ, cap. 7. scribit regem Cæduallam peregrinationem ad limina Apostolorum suscepisse, cupientem ibi baptismum suscipere, & mox à baptismo, ex hac vita migrare: quorum vtrumque impetrauit. Nam in Sabbatho sancto à Papa Sergio baptizatus, in ipsa Hebdomada Paschæ in Albis positus, leui morbo correptus, migravit ad Dominum.

Item, cap. 20. scribit regem Cænredum, relicto regno peregrinationem ad Apostolorum limina suscepisse, & apud eadem limina, in ieiuniis, & precibus vsque ad vitæ finem permansisse.

NICOLAVS I. in Epistola ad Michaëlem scribit, multa millia hominum, ex omnibus terræ finibus confluere solita, ad limina Apostolorum religionis causa.

PALLADIUS, in Historia Lausiaca, cap. 113. scribit, Philoronaum Presbyterum, bis voti causa peregrinatum Hierosolymam, & item ex voto peregrinatum, Romam ad limina Apostolorum, & Alexandriam ad reliquias S. Marci.

Idem, cap. 118. scribit Molaniam Hierosolymæ occupatam, in suscipiendis peregrinis, ex toto orbe venientibus.

HIS ADDE CONCILIVM CABILONEN: sub Carolo magno celebratum, quod Canone 45. docet, eorum deuotionem omnibus probari debere, qui pœnitentiæ causa, ad limina Apostolorum, vel alia sancta loca peregrinantur.

PROBATVR vltimò ratione sumpta ex vtilitate peregrinationum: nam præter cætera, tria bona adferunt.

Primò, cedunt in honorem Dei, & sanctorum non mediocrem: Est enim manifestum signum, Deum & Sanctos à nobis magni fieri cum laborem & pericula itinerum sponte suscipimus, vt sanctorum reliquias inuisamus.

Secundò, Peregrinatio, est opus pœnitentiæ, & satisfactionis: quia laboriosum & pœnale.

Tertiò, Auget deuotionem: nam præsentia loci sancti, vix dici potest, quantum incutiat horrorem, quantam excitet reuerentiam: & licet vbique sint aliqua sancta loca; tamen sæpè alibi sunt sanctiora,

ad quæ vtile est peregrinari: vel si non sint sanctiora; sunt tamen alia ab his, quæ in nostra patria inueniuntur, & ipsa nouitas iuuat ad excitandam deuotionem. Sæpè etiam peculiari amore ferimur erga sancti alicuius memoriam, quæ procul abest à nobis, & eò accedere non parum iuuat, licèt habeamus domi memorias celebriores.

Ex his ad argumentum *Caluini* dico: Cultum voluntarium dici eum, qui sine ratione suscipitur, vt si quis voueat se non iturum ad mensem, nisi bis lauerit manus. At cultus, qui exhibetur Deo per actus virtutum, non dicitur voluntarius, licèt non sit præceptus, vt patet Numer. 30. vbi Dominus iubet impleri vota rerum non præceptarum.

Ad Magdeburgenses dico duo: Primò forte non esse Nysseni illam Orationem: nam nec habetur in operibus eius: nec scitur, quis eam verterit in sermonem Latinum, & fortè etiam Græcè non inuenitur.

Secundò dico, in ea oratione non reprehendi absolutè peregrinationem in Ierusalem, sed reprehendi eiusmodi peregrinationem in certis personis, id est, monachis & sanctimonialibus: nam de talibus solum eo loco agitur.

QVAMVIS AVTEM PEREGRINATIO SIT BONA: tamen non omnibus conuenit: quidam enim sunt, quibus non conuenit peregrinari: quales sunt mulieres, nisi magnum & tutum habeant comitatum. Item monachi, qui in claustris, in silentio, precibus ac ieiuniis exercentur: illorum enim maius bonum impeditur, minore bono peregrinationis. Adde, quòd multum interest, qua intentione, quouè animo, & modo quis peregrinetur. Vnde Apostolus D. Petrus, 1. Petri cap. 4. *Charissimi, nolite peregrinari in feruore, qui ad tentationem vobis sit, quasi noui aliquid vobis contingat: sed communicantes Christi passionibus*: & hoc modo Ionas lib. 3. respondet ad calumnias Claudii, contra Abbatem Theodemirum: dixerat enim Claudius Abbati, laudanti peregrinationes ad urbem. Quare tu monachos tuos retines in monasterio, & non mittis omnes Romam? Respondet Ionas pro Abbate, quia peregrinatio est bona; sed non conuenit monachis: sicut & nuptiæ bonæ sunt; sed non conueniunt professoribus continentiae. Sic etiam Hieronymus, qui tam multa dixit, in laudem peregrinationum: tamen Paulinum Monachum dehortatur à peregrinatione, quia proposito eius magis conueniebat quies, & stabilitas monasterii. vbi etiam rectè monuit idem Hieronymus sanctum Antonium, quia monachus erat, nunquam peregrinatum ad loca sancta. Hilarionem autem, quia in Palestina degebat, semel tantum loca sancta inuississe: ne videretur contemnere religionem eorū locorum, quæ in vicinia erant. Sic ergo & Gregorius Nyssenus facit,

facit: nam alioqui, quomodo credibile est, Nyssenum voluisse reprehendere, quod sciebat factum à sancto Alexandro martyre, suæ religionis homine, & quod non ignorabat laudari ab omnibus Doctoribus suæ ætatis.

SED DILVAMVS OBJECTIONES. Ad primam rationem dico, ea probari solum, peregrinationem non esse opus necessarium ad perfectionem, vel ad salutem. Et ad hoc solum probandum adfertur à Gregorio: nam monachi illi putabant se non esse perfectos, nisi viderent loca sancta, quod certè falsum erat.

AD SECUNDVM dico: Illa pericula rectè probare peregrinationem non esse omnibus accommodatam; sed solum viris maturis, & quibus parum aut nihil periculi immineat. Gregorius igitur rectè argumentatur: quia de sanctimonialibus agit, cum dicit propter pericula debere omitti eiusmodi peregrinationes; nulli enim hominum generi magis cauenda sunt pericula tentationum, quàm sanctimonialibus, quibus & sexus, & professio, cautionem maximam indicit.

AD TERTIVM dico, nihil esse Hierosolymis, quod non possit alibi inueniri, si agamus de rebus essentialibus, & necessarijs ad religionem: nam Deus est vbique: templa, altaria, sacramenta etiam vbique inueniri possunt: & hoc sufficiebat Gregorio, vt suaderet Monachis, & virginibus, ne solliciti essent pro itinere Hierosolymitano. Tamen interim negari non potest, quin aliquid sit Hierosolymis, quo deuotio iuuari possit, quod alibi non inuenitur, nimirum sepulchrum Domini, & loca sancta, quæ toties Dominus calcauit, & in quibus personaliter tot miracula operatus est. Sed hæc non tanti facienda sunt, vt propterea oporteat deserere maiora bona.

Caput III.

DE OFFERTORIIS.

ERasmus Rotherodamus in colloquijs, dialogo, qui inscribitur, Peregrinatio religionis ergò, offertoria & oblationes Christianorum ridet dicens. Alia alijs locis ostenduntur, vt vberior fiat largitio, iuxta illud:

Fit citò, per multas præda petita manus:

OFFERTORIA ET OBLATIONES, QUAE FIUNT, ET
FIERI DEBENT IN ECCLESIA CATHOLICA, SCRIPTVRIS TAM VETERIS QUAM NOVI TESTAMENTI
CONFIRMANTVR.

Primum

Primum, Offertoria esse de præcepto, quia scriptum est: Exo. 23. Item, ibidem 34. & Deuter. 16. *Non apparebis in conspectu meo vacuus.*

Item, Leuitici 12. *Quod si non inuenerit manus eius, nec poterit offerre agnum, sumet duos turtures, vel duos pullos columbarum, unum in holocaustum, et alterum pro peccato: orabitq; pro ea sacerdos, et sic mundabitur.*

Item Numerorum cap. 5. *Omnes quoq; primitiæ, quas offerunt filij Israël, ad sacerdotem pertinent: & quidquid in Sanctuarium offertur à singulis, & traditur manibus sacerdotis, ipsius erit.*

Item, Deuterono. cap. 12. & 13. *Locutusq; est Dominus ad Moysen dicens: Sanctifica mihi omne primogenitum, quod aperit vuluam in filiis Israël, tam de hominibus, quam de iumentis: mea enim sunt omnia.*

E X E M P L A.

HOc præceptum Dei sciuit, & obseruauit diligenter, vnde & in scripturis cōmendatur, Anna mater Samuelis 1. Regum cap. 1. *Et adduxit eum, id est, puerum Samuelem, secum, postquam ablactauerat, in vitulis tribus, & tribus modis farinæ, & amphora vini: & adduxit eum in domum Domini in Silo.*

Non solum autem Offertoria, quæ præcepta sunt in lege confirmantur exemplis, & antiquo vsu, verumetiam Anathemata, quæ vel circa sepulchra sanctorum martyrum, vel in parietibus templi suspenduntur, confirmantur antiquo vsu & exemplis, quia scriptum est, 1. Regum cap. 6. vt Philistini à se possent amouere & auertere plagas, secundum consilium sacerdotum, non solum arcam Dei Israël remiserunt, sed etiam anathemata, hoc est, quinque anos aureos, & quinque mures aureos fecerunt, & pendere fecerunt de plaustro, in quo arca Dei ducebatur.

Item, Iudith cap. 16. *Porrò Iudith vniuersa vasa bellica Holophernis, quæ dedit illi populus, & conopæum, quod ipsa sustulerat de cubili ipsius, obtulit in Anathema obliuionis.*

IN NOVO TESTAMENTO, Offertoria similiter de præcepto: quia scriptum est Math. 5. *Si ergo offers munus tuum ad altare, & ibi recordatus fueris, quia frater tuus habet aliquid aduersum te; relinque ibi munus tuum ante altare, & vade prius reconciliari fratri tuo: & tunc veniens, offeres munus tuum.*

Item, Primo ad Corinth. 9. *Scriptum est enim in lege Moysi, Deut. 15. Non alligabis os boui trituranti: Nunquid de bobus cura est Deo? An propter vos utiq; hoc dicit? Nam propter nos scripta sunt: Quoniam debet in spe qui anat anare, & qui triturat, in spe fructus percipiendi.* SI NOS VOBIS SPIRITUALIA SEMINAVIMVS, MAGNUM EST, SI NOS CARNALIA VESTRA METAMVS? Et paulò post ibidem: *Nescitis, quoniam, qui in*
Sacario

facrario operantur, quæ de sacratio sunt edunt, & qui altario deseruiunt, cum altario participant? ita enim Dominus ordinauit, qui Euangelium annunciant, de Euangelio viuere.

EXEMPLA.

PRIMUM EXEMPLVM. Sciuit hoc præceptum, & hanc ordinationem Dei, sancta Dei genitrix virgo Maria, & obseruauit fideliter, sicut scriptum est Lucæ 2. cap. *Tulerunt puerum Iesum in Ierusalem, ut sisterent eum Domino, & ut darent hostiam, secundum quod dictum est in lege Domini, Leuit. 12. par turturum, aut duos pullos columbarum.*

SECUNDVM EXEMPLVM legitur Matth. Cap. 2. de tribus Magis. Nam dicitur: *Et apertis thesauris suis, obtulerunt ei munera: aurum, thuris, & myrrham.* Et Lucæ 21. *Respicens autem vidit eos, qui mittebant munera sua in Gazophylatium diuites: vidit autem & quandam viduam pauperculam mittentem æri minuta duo. Et dixit: Vere dico vobis: quia vidua hæc pauper, plus quam omnes, misit. Nam omnes hi ex abundanti sibi miserunt in munera Dei: hæc autem ex eo, quod deest illi, omnem victum suum, quem habuit misit.*

NOTABILE SEPTIMVM.

QVia teste Aristot. li. 2. de Ani. Actus actiuorū sunt in patiēte prædisposito. Audiuius Indulgētiarū mysteria: videamus vicissim & discamus ex Scripturis præcepta fidei, & præcepta moralia, quæ in Ecclesia Catholica præparant & disponunt hominem ad gratiam Iubilei & indulgentiarum iuxta illud Iosue cap. 3. *Dixitq; Iosue ad populum: Sanctificamini: cras enim faciet Dominus inter vos mirabilia.* Et paulò post ibidem: *In hoc, inquit, scietis, quod Dominus Deus viuens in medio vestri est, & disperdet in conspectu vestro Chanaanæum, & Hethæum, Heuæum & Phereusæum, Gergesæum quoque, & Iebusæum, & Amorruæum, & est secundum Origenem, septem peccata mortalia. Et ecce arca fæderis Domini omnis terræ, antecedit vos per Iordanem.*

Ergo, si volumus gratiam indulgentiarum obtinere, debemus nos prius secundum media, consilia, & remedia scripturarum disponere.

Caput I.

QVIA SINE FIDE NEMO POTEST CONSEQUI
INDVLGENTIAS.

REX & Propheta Dauid, Psalm. 68. dicit: *Quærite Deum & viuet anima vestra.* Et Sapiens, Sapientiæ cap. 1. quasi exponens hæc verba

ba Psalmographi dicit: *Sentite Domino in bonitate.* & statim quomodo quærendus Deus docet: *& in simplicitate cordis, quærite illum:* quia scriptura dicit Ecclesiast. 1. *Ne accesseris ad Deum duplici animo:* Et Eccles. 2. *Ve duplici corde.* Et Iac. cap. 1. *Vir duplex animo, inconstans est in omnibus viis suis, &c. Quoniam inuenietur ab his, qui non tentant illum.* Obsecro, non tentemus Christum: quia dicit Apostolus, 1. ad Corint. 10. *Neq. tentemus Christum, sicut quidam eorum tentauerunt, & à serpentibus perierunt:* Quærite Deum charissimi: Vultis videre Deum? audite, audite: Apparet autem eis, qui fidem habent in illum. Ergo credite in Deum: nam fides disponit ad indulgentiam, & homini seipsum manifestat Deus per fidem. Vnde Apostolus ad Hebr. cap. 11. dicit: *Sine fide autem, impossibile est placere Deo: credere enim oportet accedentem ad Deum, quia est: & inquirentibus se remunerator sit.* Et Salomon Prouer. cap. 15. *Per misericordiam & fidem, purgantur peccata: per timorem autem Domini, declinat omnis à malo. Mens iusti meditabitur obedientiam: & os impiorum redundat malis.*

Item Actorum 15. *Fide purificat Deus corda gentium:* Ergo fides disponit ad indulgentiam: quia purgat peccata: quia reconciliat Deo: & quia homini manifestat Deum. Stemus itaque in fide, quando sub indulgentia quærimus Deum.

Caput II.

NEMINI DESPERANDVM DE INDVLGENTIA.

BEatus Paulus Apostolus, ad Roma. cap. 5. dicit: *Spes autem non confundit.* Et ad Roma. 8. *Spe enim salui facti sumus.* Propterea Dauid spem plurimis locis in Psalmis extollit: vt Psalm. 33. & Psalm. 83. &c. *Beatus vir qui sperat in eo.* Item, Prouer. 16. *Eruditus in verbo reperiet bona, & qui sperat in Domino, beatus est.* Item, Iob 13. *Etiam si occiderit me, in ipso sperabo.* D. Augustinus sermone 58. de Tempore: *Non qui peccauerit, sed qui in peccatis perseuerauerit, odibilis, & abominabilis Deo erit.* Nam, vt de indulgentia diuina, nemo diffidat, Dominus per Prophetam Ezechiel. 13. & 18. velut Pater pijsimus consolatur, dicens: *Nolo mortem peccatoris, sed vt conuertatur, & viuat.* Et illud: *Impietas impij non nocebit ei, in quacunque die conuersus fuerit ab impietate sua.* Sed ista tam magna misericordia tunc nobis prodest, si non tardauerimus conuerti ad Dominum, nec crimina criminibus superaddimus. Denique etiam in ipsis vulneribus, vel fracturis corporum, infirmitates cognoscere possumus animarum. Si enim ali-

cui pes

cui pes frangatur, aut manus, cum labore solet ad pristinum officium reuocari: si verò secundo & tertio, & adhuc frequentius in eodem loco membra ipsa frangantur; potest intelligere charitas vestra, cum quantis doloribus vulnera ipsa curanda sunt: & tamen post longas, & multas tribulationes, vix erit antequam ad pristinum statum membra ipsa valeant reuocari. Similis ratio in animarum fracturis, seu vulneribus esse credenda est: si semel aliquis, vel secundo peccauerit, & sine aliqua dissimulatione, ad poenitentiae medicamenta confugerit; pristinam incolumitatem sine aliqua mora, & forsitan sine aliqua foeditate recipiet. Si verò peccata peccatis coeperint addi, & animarum vulnera magis tegendo, vel defendendo putrescere, quam confitendo & poenitendo curari; timendum est, ne in illo impleatur illud, quod Apostolus ad Romanos cap. 2. dixit. *An ignoras, quia benignitas Dei ad poenitentiam te adducit? tu autem secundum duritiam cordis tui, et cor impoenitens thesaurizas tibi iram in die irae, & reuelationis iusti iudicii Dei.*

Sed fortè cogitat aliquis, tam grauiam se admisisse peccata, vt iam Dei misericordiam promereri non possit. *Absit hoc à sensibus omnium peccatorum. O homo, quicumque illam peccatorum multitudinem attendis; cur & omnipotentiam caelestis medici non attendis? Cum enim Deus velit misereri, quia bonus est: & possit, quia omnipotens est; ipse contra se diuinae pietatis ianuam claudit, qui Deum sibi misereri aut non velle, aut non posse credit, eumq; aut bonum, aut omnipotentem esse diffidit. Nemo ergo nec post centum peccata, nec post mille crimina de misericordia diuina desperet: sic tamen non desperet, vt sine vlla mora Deum sibi repropitiari festinet; ne fortè, si consuetudinem peccandi fecerit, etiamsi velit, de diaboli laqueis liberari non possit.* Hæc D. Augustinus.

Caput III.

QVIA CHARITAS, IN QVA DECALOGVS, DISPO-
NIT HOMINEM AD INDVLGENTIAM.

Quicumque criminum rei sunt, & grauioribus peccatis offenderunt, vt indulgentiam consequantur; ad maiorem charitatem & dilectionem, lege Euangelica obligantur. Nam Magister saluator & legislator noster, Lucae capite 7. hanc legem tulit: *Dico tibi: Remittuntur ei peccata multa, quoniam dilexit multum. Cui autem minus dimittitur, minus diligit.* Ergo, qui crimina & grauiora peccata commiserunt, debent ita charitate præpollere; vt grauiora mala, & omnia aduersa, æ-

K

quo

quo animo semper vbiq̃ue perferant: quia teste Apostolo 1. ad Corin. 13. *Charitas patiens est, benigna est: charitas omnia suffert, omnia credit, omnia sperat, omnia sustinet.* Charitas, 1. Petri cap. 4. *operit multitudinem peccatorum.* vnde Apostolus ad Roma: cap. 8. *Certus sum, quòd neq; mors, neq; vita, neq; angeli, neq; principatus, neq; virtutes, neq; instantia, neq; futura, neq; fortitudo, neq; altitudo, neq; profundum, neq; creatura alia, poterit nos separare à charitate Dei, quæ est in Christo Iesu Domino nostro.*

Prosper, Regiensis Episcopus lib. 3. de vita contemplatiua capit. 13. *Charitas est, vt mibi videtur, recta voluntas ab omnibus terrenis, ac presentibus prorsus auersa, iuncta Deo inseparabiliter, & unita igne quodam sancti Spiritus, à quo est, & ad quem reffertur incensa: inquinamenti omnis extranea: corrumpi nescia: nullo vitio mutabilitatis obnoxia: supra omnia, quæ carnaliter diliguntur, excelsa: affectionum omnium potentissima: diuinæ contemplationis auida: in omnibus semper inuicta: summa actionum bonarum: salus morum: finis cælestium præceptorum: mors criminū: vita virtutum: virtus pugnantium: palma victorum: anima sanctarum mentium: causa meritorum bonorum: premium perfectorum. In peccatis suis mortuos suscitāt: languentes sanat: perditos instaurat: spem desperatis inspirat: pacificatas mentes inhabitat: fructuosa in pœnitentibus: leta in proficientibus: gloriosa in perseuerantibus: victoriosa in martyribus: operosa in omnibus omninò fidelibus. quam fides concipit: ad quam spes currit: cui profectus omnium seruit: ex qua, quidquid est boni operis, viuūt. Sub qua obedientia crescit: per quam patientia vincit: propter quam carnalia blandimenta, deuotio religiosa contemnit: sine qua nullus Deo placuit: cum qua nec potuit aliquis peccare, nec poterit. Hæc est charitas vera, germana, perfecta, quam excellentiorem viam nominauit sanctus Apostolus. Et verè ipsa est via, quæ ducit per se ambulantes ad patriam: quia sicut siue via peruenit nullus quò intendit; ita sine charitate, quæ dicta est via, non ambulare possunt homines, sed errare. Et cap. 15. Ergo si charitatem Deo exhibeamus, & proximo de corde puro, & conscientia bona, & fide non ficta; facile peccato resistimus, bonis omnibus abundamus, sæculi blandimenta contemnimus, & omnia quæ difficilia sunt humanæ fragilitati, vel asperam etiam cum delectatione perficimus; si tamen Deum charitate perfectam, quæ nobis ex illo est, ex toto corde, ex tota anima, & ex totis viribus diligimus.*

Ergò vt nos præparemus ad Iubileum & Indulgentiam, & vt gratiam iubilei & indulgentiæ retineamus, conseruemus vt thesaurum, & indulgentia vtamur; debemus diligere Deum, & proximum, sicut in Decalogo nobis præcipitur.

Porro

Porro, non tantum illi proximi nostri credendi sunt, quos nobis gradus sanguinis iungit: sed proximi nostri credendi sunt, omnes homines naturæ nostræ participes. Nam si propinquos nostros, quamvis incompósitos, turpes, ac malè moratos, plus, quàm quoslibet sanctos, quos à nobis secundum sanguinem vocamus extraneos, diligamus; non solum carnaliter diligimus; sed etiam grauius, in tali eorum dilectione peccamus. Proinde, secundum nos, proximos omnes diligimus, quando ad mores bonos, & ad æternam vitam consequendam, sicut nobis, salutem eorum consulimus: quando nos in eorum peccatis, ac periculis cogitamus, & sicut nobis subueniri optamus; ita eis pro viribus subuenimus: aut si facultas defuerit, voluntatem subueniendi tenemus. Quapropter hæc est proximi tota dilectio, vt bonum, quod tibi conferri vis, velis proximo: & malum, quod tibi nolis accidere, nolis proximo. Hæc Prosper.

Itaque, si ante omnia mutuam in nobismetipsis charitatem continuam habebimus: si Decalogum seruabimus, dicit Propheta Psalm. 102. *Miserator & misericors Dominus, longanimis & multum misericors, Non in perpetuum irascetur, neq; in æternum comminabitur. Non secundum peccata nostra fecit nobis, neq; secundum iniquitates nostras retribuit nobis. Quoniam secundum altitudinem cæli à terra, corroborauit misericordiam suam super timentes se. Quantum distat ortus ab occidente, longè fecit à nobis iniquitates nostras. Quomodo misereatur pater filiorum, misertus est Dominus timentibus se: quoniam ipse cognouit figmentum nostrum. Recordatus est, quoniam puluis sumus: homo sicut fenum: dies eius tanquam flos agri, sic efflorescit. Quoniam spiritus pertransibit in illo, & non subsistet, & non cognoscet amplius locum suum. Misericordia autem Domini ab æterno, & usq; in æternum super timentes eum. Et iustitia illius in filios filiorum, his, qui seruant testamentum eius. Et memores sunt mandatorum eius ad faciendum ea. Seruemus igitur mandata Dei, & consequemur gratiam Iubilei & Indulgentiæ. Honoremus obsecro parentes: quia scriptum est, Ecclesia. cap. 3. *Fili, suscipe senectam patris tui, & non contristes eum in vita illius: etsi defecerit sensus, veniam da: & ne spernas eum in vita tua: eleemosyna enim patris, non erit in obliuione: nam pro peccato matris, restituetur tibi bonum, & iniustitia edificabitur tibi: & in die tribulationis commemorabitur tui: & sicut in sereno glacies, soluentur peccata tua.**

Caput IIII.

QVIA TIMOR DEI ET FRATERNA RECONCILIATIO DISPONUNT HOMINEM AD INDVLGENTIAM.

Scriptum est, Ecclesiastici cap. 1. *Timor Domini, expellit peccatum: nam, qui sine timore est, non poterit iustificari.*

De timore Dei, est bona & satis prolixa doctrina, Ecclesiastici toto cap. 2. quod hîc poterit totum de verbo ad verbum poni. Item, Ecclesiastici cap. 4.

Dominus per Prophetam Isaiam capite 1. nos ad indulgentiam disponit sic: *Dicit Dominus: Lauamini & mundi estote: auferte malum cogitationum vestrarum ab oculis meis. Quiescite agere peruerse, discite bene facere. Quærite iudicium, subuenite oppresso, iudicate pupillo, defendite viduam, & venite, & arguite me dicit Dominus. Si fuerint peccata vestra vt coccinum, quasi nix dealbabuntur: & si fuerint rubra quasi vermiculus, velut lana alba erunt. Si volueritis, & audieritis me, bona terræ comedetis. Quod si nolueritis, & me ad inuicundiam prouocaueritis, gladius deuorabit vos: quia os Domini locutum est.*

Item Dominus per Isaiam cap. 58. nos ad indulgentiam præparat sic: *Dissolue colligationes impietatis, solue fasciculos deprimentes, & cæt.* Super quibus verbis Diuus Hieronymus.

Septuaginta συναλλαγμάτων commutationes pro chyrographis interpretati sunt. Significat autem chartarum fasciculos, in quibus fœnemitorum calumniæ continentur, & opprimuntur pauperes ære alieno. (Iacob. 2. Nonne diuites per potentiam opprimunt vos, & ipsi trahunt vos ad iudicia? nonne & ipsi blasphemant bonum nomen, quod inuocatum est super vos?) quæ in cunctis urbibus seditionis causa, vel maxima est. unde et Romanus populus vicinos occupat montes, & tabulæ nouæ, quas Græci appellant χρεων αποκοπῆς, Non ergo præcepit Propheta, ne exigat quisq., quod debitum est, maximè quod iustè dedit, & iustè repetit: alioquin Tribunitiæ esset seditionis assertor: sed ubi iniqua est cautio, ubi opprimuntur pauperes calumnia; ibi fasciculi cautionum, & omnia iniquitatis vincula rumpenda sunt. Vel certè hoc dicendum: quia de ieiuniis sermo est, & ieiunium afflictionem, atq; humiliationem habet animæ: afflictio autem corporis peccatorum, indulgentiam deprecatur: docet scriptum diuina, vt dimittamus debitoribus nostris, vt & pater cælestis dimittat nobis debita nostra. Vetus narrat Historia Leuit. 25. & 27. anno remissionis septimo, vel quinquagesimo, qui est verus Iubileus: omnes possessiones redire ad dominos, & reddi seruis pristinam libertatē, cunctaq; nomina, quæ vulgò appellantur Cautiones, irrita fieri. Sin autem hoc veteri lege præcipitur; quantò magis in Euangelio, ubi omnia quæ bona sunt duplicantur, & nequaquam oculum pro oculo, dentem pro dente iubemur eruere; sed verberanti præbere maxillam? atq; vt sciamus illud, quod supra diximus, Omnes debitores vestros repetitis, de creditoribus scribi. de debitoribus iungitur manifestius: Dimitte

mitte eos qui confracti sunt liberos, hoc est, qui paupertate sunt fracti, quos afflixit inopia: ne liberos sinas mendicare, & omne onus quo deprimitur rumpe: pro quo septuaginta: Et omnem scripturam iniquam conscinde: quod Symmachus transtulit, Et omnem cautionem falsam disrumpe. Sed poterat fieri, ut aliquis diceret: Non habeo debitores: quid facere debeo, ut suscipiatur ieiunium meum? Sequitur: Frange esurienti panem tuum: non plures panes, ne de paupertate causeris; sed unum panem: nec ipsum totum, sed partem panis, quam, si non ieiunares, comesurus eras, ut ieiunium tuum non sit lucrum marsupij, sed saturitas animæ. Hæc Diuus Hieronymus. Ergo semper vbique, sed præcipue in diebus iubilei, & in loco indulgentiarum, timeamus Deum, dimittamus & reconciliemur proximis, agamus poenitentiam: quia hic mundus, est poenitentiae locus. Humiliemus nos Deo, ieiunemus, eleemosynas, & alia pia opera faciamus, sine intermissione oremus, & pro peccatis nostris satisfaciamus. Sic indulgentiam gratia Dei in Ecclesia Catholica consequemur. Illud autem Sapientis semper ante oculos habeamus, Prouerb. 16. *Cor hominis disponit viam suam; sed Domini est dirigere gressus eius.* Et illud Saluatoris, Lucæ 17. *Et vos, cum feceritis omnia quæ præcepta sunt vobis, dicite, Serui inutiles sumus: quod debuimus facere, fecimus.* Nam dicit Dominus Ieremiæ 10. *Quis est iste, qui applicat cor suum, ut appropinquet mihi?* Propterea Apostolus ad Rom. cap. 9. dicit: *Non volentis, neque currentis; sed misentis est Dei.*

Caput V.

DE MODO CELEBRANDI, ET SANCTIFICANDI IN ECCLESIA IVBILEVM, ET INDVLGENTIAS.

CUM igitur nos prædicto, vel aliquo meliori modo, preparauerimus & disposuerimus benè fundati in fide, tum in Cæremoniis, & in moribus ad indulgentias, tum ipsemet Dominus per Prophetam Ioëlem cap. 2. præscribit, & ostendit nobis omnibus in commune, tam sacerdotibus quàm populo, modum & viam, qua debeamus Domino Deo nostro celebrare, & sanctificare indulgentias, sic dicens:

Canite tuba in Sion, ululate in monte sancto meo, conturbentur omnes habitatores terræ: quia venit dies Domini.

Nunc ergo dicit Dominus: *Conuertimini ad me in toto corde vestro, in ieiunio & fletu, & in planctu: & scindite corda vestra, & non vestimenta vestra. Et conuertimini ad Dominum Deum vestrum: quia benignus & misericors est, & patiens, & multæ misericordiæ, & præstabilis super malitia.*

malitia. Quis scit, si conuertatur & ignoscat, & relinquat post se benedictionem? Sacrificium & libamen Domino Deo vestro. Canite tuba in Sion, sanctificate ieiunium, vocate cœtum, congregate populum, sanctificate Ecclesiam, coadunate senes, congregate paruulos, & sugentes vbera: egrediatur sponsus de cubili suo, & sponsa de thalamo suo: inter vestibulum, & altare plorabunt sacerdotes, ministri Domini, & dicent, Parce Domine, parce populo tuo, & ne des hæreditatem tuam in opprobrium, ut dominantur eis nationes. Quare dicunt in populis, ubi est Deus eorum? Zelatus est Dominus terram suam, & pepercit populo suo.

Sic positis & præmissis Notabilibus, infertur Conclusio prima.

CONCLUSIO PRIMA.

Catholici summo consensu credunt, confitentur, prædicant, & docent, Messiam, legislatorem, mediatorem, Christum Dominum, indulgentias vnâ cum sacerdotio, lege, sacrificio, & benedictione, ex Synagoga, ad Ecclesiam transtulisse, reformasse, & perfecisse, ad Hebræ. cap. 7. & 8. Item, redemptorem, & saluatorem eundem Christum Dominum, indulgentiarum potestatem in Ecclesia reliquisse: atq; vsum indulgentiarum Christiano populo summoperè necessarium, & maximè salutarem esse.

Tria sunt huius Conclusionis pūcta: PRIMVM PVNCTVM est, Catholici summo consensu credunt, confitentur, prædicant, & docent, Messiam legislatorem Christum Dominum, indulgentias, vnâ cum sacerdotio, lege, sacrificio, & benedictione, ex Synagoga ad Ecclesiam transtulisse, reformasse, ac perfecisse: ad Hebr. 7. SECVDVM PVNCTVM. Item, Mediatorem, redemptorem, & saluatorem Christum indulgentiarum potestatem in Ecclesia reliquisse. TERTIVM PVNCTVM, atque vsum indulgentiarum, Christiano populo, summoperè necessarium, & maximè salutarem esse.

QVANTVM AD PRIMVM PVNCTVM, Veritas conclusionis patet, ex Notabili secundo cap. 2. 3. 4. 5. 6. Item Notabili 3. cap. 1. 2. 3. 4. 5.

Item, probatur autoritate scripturæ ad Hebr. cap. 7. vbi dicit Apostolus: *Translato enim sacerdotio, necesse est, vt & legis translatio fiat.*

Super

Super quibus verbis dicit D. Ambrosius, & Glosa ordinaria. Si igitur sacerdotii translatio est, necesse est & legis (in qua ponuntur & continentur indulgentiæ) esse translationem. Neque enim sacerdos potest sine Testamento esse, & sine lege, & sine præceptis.

Item, Dionysius Carthusianus, & Anselmus Archiepiscopus Cantuarien. super iisdem verbis Apostoli dicunt: Lex namque, & sacerdotium simul sunt, & se concomitantur, nec vnum prodest sine officio alterius: ideo quod de vno dicitur, de alio intelligitur: vnde vno mutato, mutatur & aliud: & dum alterum perficitur, alterum perfici simul necesse est: & si euacuatur, & cessat vnum, alterum euacuari, & cessare est necesse. Porro, cum scriptura dicit 2. Corint. 3. quia figura euacuatur per manifestationem veritatis, exponit Anselmus, id est, visibilis gloria legis euacuatur, per gloriam Euangelii. Ita enim euacuatur, vt proficiat: sicut infantia euacuatur in iuuentute, & semen in fructu, &c. Propterea Saluator Math. cap. 5. dicit: *Nolite putare, quoniam veni soluere legem, aut Prophetas: non veni soluere, sed ad implere.* Ergo Christus Dominus, quando adimpleuit legem, adimpleuit simul & indulgentias: quia in lege continentur indulgentiæ, vt patet Notabili secundo, & Notabili 5. cap. 4. Leuit. 25. & 27.

Item, quando Christus Dominus transtulit legem, & sacerdotium; transtulit simul sacrificium, transtulit benedictiones, & indulgentias ex Synagoga ad Ecclesiam: cum propter causam superius dictam; tum vt impleret promissionem Ioan. 12. *Et ego si exaltatus fuero à terra, omnia traham ad meipsum:* si omnia, ergo & indulgentias.

Vnde D. Augustinus, in Psalmum centesimum trigesimum secundum: Ecce quam bonum, & quam iucundum &c. *Verum tamen, inquit, dilectissimi, si consideremus de illo pariete circumcisionis; ibi prius nata est benedictio* (& per consequens & indulgentia: quia benedictio & indulgentia sunt cognata) *Num enim omnes Iudæi perierunt? Et vnde Apostoli filij Prophetarum, filij excussorum? Vnde illi Quingenti, qui Dominum post resurrectionem viderunt, quod commemorat Apostolus Paulus? unde illi centum viginti, qui simul erant in vno loco post resurrectionem Domini, & ascensionem in cælum: quibus in vno loco constitutis superuenit Spiritus sanctus die Pentecostes missus de cælo, sic missus, sicut promissus? Omnes inde erant, &c.* Et post pauca: *Ergo ipsi prius audierunt benedictionem* (& indulgentiam) *Primi audierunt; sed non soli audierunt: non enim vsque ad illos ista dilectio, & unitas fratrum venit, venit enim & ad posteros ista charitas, exultatio, votum Deo* (adde benedictio, & indulgentia) Hæc Diuus Augustinus.

PORRO, QVIA INDVLGENTIAE EX SYNAGOGA
AD ECCLESIAM SVNT TRANSLATAE, HIS
RATIONIBVS PROBATVR.

PRIMA RATIO. Deus vineam ex Aegypto transtulit in
Palestinam : igitur & indulgentias vnâ cum sacerdotio, lege, &
sacrificio ex Synagoga transtulit in Ecclesiam.

CONSEQUENTIA à toto ad partem, & à simili.

ANTECEDENS Psalm. 79. *Vineam de Aegypto transtulisti, eiecisti gen-
tes & plantasti eam. Dux itineris fuisti in conspectu eius, & plantasti ra-
dices eius, & impleuit terram.*

SECVNDA RATIO, Cùm sacerdotio & lege, ex Syna-
goga ad Ecclesiam Catholicam, benedictiones sunt translatae :
igitur & indulgentiae cum Iubileis.

CONSEQUENTIA à cognatis, siue à genere ad speciem.

ANTECEDENS est Ioannis Eckij, Homel. 1. Dominicæ post Christi
Natalem, super illis verbis Lucæ 2. *Et benedixit illis Simeon*, vbi dicit
sic : Et quod ad benedictionem attinet, crediderim ego illam fuisse,
de qua Num.ca.6.sic habetur. *Loquutus est Dominus ad Moysen, dicens:
Loquere Aaron etc.* vt infra Cōcl. 4. Arg. 5. & statim addit: Magnū verò
est, quod non abiecti nominis quidā ex Rabbiniis Iudeorū Moyses Ma-
imonis, in libro More dicit, Sacerdotes benedictione hac vsos, vsque
ad Simeonem Iustum, nec post eum amplius. Quæ sanè fidei nostræ
longè efficacissima probatio est. Cùm enim sacerdotium Aaronis, in
sacerdotio Christi cessarit, Paulo teste ad Hebræ. 7. & 8. illius quoq;
sacerdotij cessauit benedictio, quod idē iudicium est de indulgentijs.

TERTIA RATIO. Quidquid fuit in Synagoga, & iam nō
est : illud ad Ecclesiam translatum est. sed Iubileus & indulgen-
tia fuit in Synagoga, & iam non est : ergo Iubileus & indulgen-
tia, ad Ecclesiam translata est.

MAIOR vera à signo: nam & arbor vnâ ex horto in hortum trāsfer-
tur. Sic & angelus Marci 16. dicit : *Surrexit non est hic, ecce locus ubi
posuerunt eum*, & locum vacuum ostendit.

MINOR patet ex scripturis, quæ citantur in notabili quinto, tum
ex suprâ dictis. Patet item ad sensum : quia Iudæi nullum habent sa-
cerdotium : igitur nullam indulgentiam; quia sunt hæc inseparabilia,
sacer-

sacerdotium, lex, sacrificium, altare, benedictio, & indulgentia, ut supra ostensum est ex sententia Patrum: vacuum est apud Iudæos, ut dictum est in Notabili quinto, cap. 3.

QUARTA RATIO. A quacunque gente regnum aufertur, ab eadem & libertas simul aufertur. sed à gente Iudæorum ablatum est regnum: ergo à gente Iudæorum ablata libertas simul, & per consequens à Synagoga Iudæorum ablata est eadem opera & indulgentia, & translata ad Ecclesiam Catholicam.

MAIOR vera à Consequentibus. Item, à signo exteriori ad signatum interius.

MINOR, Matth. 21. Legislator & Saluator noster Christus Dominus dicit: *Ideo dico vobis, quia auferetur à vobis regnum Dei, & dabitur genti facienti fructus eius.*

QUINTA RATIO. Fides ex Synagoga ad Ecclesiam Catholicam est translata: igitur & indulgentiæ.

CONSEQUENTIA, à proprio fundamento ad suum fundatum.

ANTECEDENS, ad Hebræ. 10. & est D. Gregorij Magni, sanctorum Patrum, ut patet Conclusionem. 2. Coroll. 3.

SEXTA RATIO. Vbicunque est populus Dei, & regnum Dei, ibi est benedictio Domini, & indulgentia. sed in Ecclesia Catholica est populus Dei, & regnum Dei: ergo in Ecclesia Catholica est benedictio Domini & Indulgentia. & per consequens, Indulgentia est translata ex Synagoga ad Ecclesiam.

MAIOR vera, quia scriptum est Psal. 3. *Domini est salus, & super populum tuum benedictio tua.*

MINOR I. Pet. cap. 2. Iudæi non credunt, in quo & positi sunt: *Vos autem genus electum, regale sacerdotium, gens sancta, populus acquisitionis; ut virtutes annuncietis eius, qui de tenebris vos vocavit in admirabile lumen suum.* Item, Exodi 19. ad illum populum dictum est à Domino. *Mea est enim omnis terra, & vos eritis mihi in regnum sacerdotale, & gens sancta.* Item, ad Coloss. cap. 1. *Qui eripuit nos de potestate tenebrarum, & transtulit in regnum filij dilectionis suæ, in quo habemus redemptionem, & remissionem peccatorum.* Item, 1. Ioan. 3.

SEPTIMA RATIO. Christus in cruce ad se traxit omnia: ergo & indulgentias, & per consequens transtulit ad Ecclesiam.

CON-

CONSEQUENTIA, à genere ad speciem.

ANTECEDENS, Ioan. 12. *Et ego si exaltatus fuero à terra, omnia traham ad meipsum.*

OCTAVA RATIO. Quæcunque Christus claudit, nemo aperit: & quæcunque aperit, nemo claudit. sed Christus indulgentias Synagogæ clausit, & Ecclesiæ eadem opera aperuit: ergo in Ecclesia Catholica sunt indulgentiæ.

MAIOR est Apocal. 3. *Hæc dicit Sanctus & verus, qui habet clauem David, qui aperit & nemo claudit: claudit & nemo aperit.*

MINOR Patet ad sensum: quia clausum est Synagoge sacerdotium, lex, &c. ergo & indulgentiæ: & patet latius in Notabili Quinto ca. 3.

De primo puncto Conclusionis primæ, est controuersia inter Hæreticos: Nam Ebion & Cherintus, dicunt veterem legem iuxta omnia præcepta illius, cum noua lege simul seruandam esse.

Hanc hæresim tutati sunt etiam Samsæi & Elcessæi, qui Ebionitarum dogma in vniuersum amplexati sunt. Istos omnes, & istorum similes, beatus Paulus Apostolus scribens ad Galatas, qui eodem errore fuerunt infecti, ad Galatas cap. 3. redarguit dicens: *Prius autem quam veniret fides, sub lege custodiebamur, conclusi in eandem fidem, quæ reuelanda erat. Itaque lex pædagogus noster fuit in Christo, ut ex fide iustificemur. At ubi venit fides, iam non sumus sub pædago.* Et iterum ad Galat. cap. 4. de duobus Testamentis loquens, sub Allegoria duorum filiorum Abrahamæ, ait: *Sed quomodo tunc is, qui secundum carnem natus fuerat, persequabatur eum, qui secundum spiritum; ita & nunc: sed quid dicit scriptum? Ejce ancillam, et filium eius: non enim erit hæres filius ancillæ, cum filio liberæ. Itaque fratres, non sumus ancillæ filij, sed liberæ, qua libertate Christus nos liberauit.*

CONTRA MANICHÆI, Veterem legem non solum non seruandam, sed simpliciter reiiciendam tanquam malam. Hanc hæresim tutati sunt Cerdon, Marcion, & Caiani: Istos omnes & istorum similes refutat Beatus Paulus Apostolus ad Romanos cap. 7. dicens: *Nunc autem soluti sumus à lege mortis, in qua detinebamur, ita ut seruiamus in nouitate spiritus, & non in vetustate literæ. Quid ergo dicemus? Lex peccatum est? Absit: Sed peccatum non cognoui, nisi per legem. Nam concupiscentiam nesciebam, nisi lex diceret: Non concupisces. Occasione autem accepta, peccatum per mandatum, operitum est in me omnem concupiscentiam. Sine lege enim peccatum mortuum erat: Ego autem vivebam sine lege ali-*

ge aliquando. Sed cum venisset mandatum, peccatum reuixit. Ego autem mortuus sum, & inuentum est mihi mandatum, quod erat ad vitam, hoc esse ad mortem: nam peccatum occasione accepta per mandatum, seduxit me, & per illud occidit. Itaque lex quidem sancta, & mandatum sanctum, & iustum, & bonum. Quod ergo bonum est, mihi factum est mors? Absit. Sed peccatum, ut appareat peccatum, per bonum operatum est mihi mortem, ut fiat supra modum peccans peccatum per mandatum.

Eandem Hæresim Manichæi, refutant multi sancti Patres: sed præcipuè Diuus Augustinus.

IAM IGITUR CIRCA PVNCTVM PRIMVM, Conclusio-
nis primæ, meritò dubitari, & quæri potest: Vtrum tota lex vetus, omninò sit euacuata, abrogata, destructa, & funditus sublata: an aliquid remaneat ex lege?

Et videtur quòd vetus lex non omninò est sublata, abrogata, & destructa: quia scriptum est, Math. cap. 5. *Nolite putare, quoniam veni soluere legem, aut Prophetas: non veni soluere, sed adimplere.* Vnde ad Roman. cap. 2. *Non enim qui in manifesto Iudæus est, neque quæ in manifesto in carne est circumcisio: sed qui in abscondito Iudæus est, & circumcisio cordis in spiritu, non litera, cuius laus non ex hominibus, sed ex Deo est.*

Atque hoc ipsum pluribus rationibus confirmatur.

PRIMA RATIO. Nulla lex continens in se sanctum nomen Domini Dei, debet solui, & destrui. sed tota lex vetus cum Prophetis continet in se sanctum nomen Domini Dei: igitur nulla lex vetus debet solui vel destrui.

MAIOR vera. Psalm. 71. *Ante solem permanet nomen eius.* Item, Psalm. 134. *Domine, nomen tuum in æternum: Domine, memoriale tuum in generationem & generationem.*

MINOR, est Exodi 3. *Ego sum, qui sum. &c.*

SECUNDA RATIO. Nullum bonum iustum & sanctum corrumpendum, neque destruendum. sed lex vetus, cum prophetis bona iusta, & sancta: igitur lex vetus cum prophetis neque corrumpenda, neque destruenda.

MAIOR vera MINOR, Psalm. 18. *Lex Domini immaculata, conuertens animas, testimonium Domini fidele, sapientiam præstans paruulis.* Item ad Rom. 7. *Itaque lex quidem sancta, & mandatum sanctum, & iustum, & bonum.* Item I. ad Timoth. cap. 1. *Scimus autem, quia bona est lex, si*

lex, si quis ea legitime utatur: sciens hoc, quia lex iusto non est posita; sed iniustus & non subditus.

TERTIA RATIO. Quidquid nos manu ducit ad Christum, bonum est. sed lex vetus nos manu ducit ad Christum: ergo lex vetus est bona.

MAIOR vera: nam quod nos abducit, & retrahit à Christo, malum est.

MINOR, est Apostoli ad Galat. 3. Itaque; lex pædagogus noster fuit in Christo, ut ex fide iustificemur. Si ergo lex fuit noster pædagogus in Christo, videamus quod nos ducit: & duxit nos lex ad fidem Christi. Si ergo fides Christi est bona; non est possibile, quin lex vetus, quæ ad illum duxit, fuerit bona.

SED CONTRA est, quod Apostolus 2. ad Corinth. cap. 3. dicit: *Lex euacuatur in Christo*, hoc est, tanquam umbra in luce. Item, ad Galat. cap. 5. *Ecce ego Paulus dico vobis, quoniam si circumcidimini, Christus vobis nihil proderit. Testificor autem rursus omni homini circumcidenti se; quoniam debitor est uniusæ legis faciendæ. Euacuati estis à Christo: qui in lege iustificamini, à gratia excidistis. Nos enim spiritu ex fide spem iustitiæ expectamus. Nam in Christo Iesu, neque circumcisio aliquid valet, neque præputium; sed fides, quæ per charitatem operatur.*

Item, ad Hebræ. cap. 7. *Reprobatio quidem fit præcedentis mandati, propter infirmitatem eius, & inutilitatem.*

Atque hoc ipsum ratione confirmatur tali.

Quidquid antiquatur & senescit, propè interitum est. sed lex Moyfi & cum prophetis antiquatur & senescit: ergo lex Moyfi cum prophetis propè interitum est: & per consequens, destruitur & destructa est.

MAIOR, est Apostoli ad Hebræ. cap. 8. MINOR ibidem.

SOLVITVR. Negatur consequentia: nam lex antiquatur, & senescit in litera, secundum quam occidit: sed vivit in spiritu, secundum quem vivificat. 2. Corinth. 3. &c.

Porro, ad illam authoritatem scripture ad Hebræ. cap. 7. *Reprobatio quidem fit præcedentis mandati propter infirmitatem eius, & inutilitatem.* D. Thomas super iisdem Apostoli verbis, dicit sic: *Notum est, quod vetus testamentum fuit secundum legem carnalis mandati, & introducit aliud.* Ergo primum mutatur. Et hoc est, quod Apostolus dicit, quod sit prioris mandati reprobatio. Sed contrà. Non reprobatur nisi malum, Isaia 11. *Ut sciat reprobare malum.* Illud autem mandatum non est

non est malum, ad Rom. 7. *Lex quidem sancta, & mandatum sanctum, et iustum, & bonum.* Respondeo, dicendum est, quod non erat malum secundum se; sed ut inconueniens tempori: non enim seruanda sunt in nouo sacerdotio, quæ fuerunt in antiquo. Psalm. 39. *Holocausta & pro peccato non postulasti, tunc dixi, Ecce venio.* Et ideò, dicitur quod illud reprobatur: & hoc, propter infirmitatem & inutilitatem. Illud autem dicitur infirmum, quod non potest exequi effectum suum: proprius autem effectus legis & sacerdotij, est iustificare: hoc autem lex non potuit facere, ad Rom. 8. Nam quod erat impossibile legi, in quo infirmabatur secundum carnem, ad Gal. 4. *Quomodo conuertimini iterum ad infirma & egena elementa, quibus denuò vultis seruire?* Item, inutile dicitur, quod non valet ad finem consequendum: hoc autem non potest lex: quia non adducebat ad beatitudinem, quæ finis est hominis; sed tamen suo tempore fuit utilis, in quantum disponebat ad finem, ut dicitur ad Hebræ. ii. *Iuxta fidem omnes defuncti sunt, non acceptis repromissionibus.* Quare autem sit infirmum & inutile, ostendit cum dicit: *Nihil enim ad perfectionem, nec scilicet iustitiæ, nec patriæ adduxit.* Vnde erat imperfecta; sed perfecta fuit per Christum.

CAETERVM PRO SOLVTIONE HVIVS QVAESTIONIS, recurrendum est ad Patres, & interrogandum, quid de ea re sentiant.

D. AVGVSTINVS lib. i. de Moribus Ecclesiæ Catholicæ cap. 28. dicit: *In his duobus Deus ipse, cuius bonitate atq; clementia sit omninò ut aliquid simus, duobus testamentis, vetere & nouo, disciplinæ nobis regulam dedit. Quanquam enim utrumque in utroque sit; præualet tamen in vetere timor, amor in nouo: quia ibi seruitus, hic libertas ab Apostolis prædicatur. De quorum testamentorum admirabili quodam ordine, diuinòq; concentu longissimùm est dicere, & multi religiosi doctiq; dixerunt: multos libros res ista flagitat; ut pro merito, quantum ab homine potest, explicari & prædicari queat. Qui ergo diligit proximum, agit quantum potest; ut sanus corpore, sanusq; animo sit: sed cura corporis ad sanitatem animæ referenda est.* Idem D. Augustinus, contra duas Epistolas Pelagianorū, ad Bonifacium lib. 3. cap. 4. &c. *Et vetus igitur testamentum Deus condidit: quia Deo placuit, usque ad plenitudinem temporis, promissis terrenis, tanquam in premio constitutis, promissa velare cælestia: & populo terrenis bonis inbianti, & propterea durum cor habenti, quamuis spiritua-lem, tamen in tabulis lapideis legem dare; exceptis quippe librorum veterum sacramentis, quæ sola significandi ratione præcepta sunt, quanquam & in eis spiritualiter intelligenda sunt, rectè lex dicitur spiritualis. Cætera certè, quæ ad pietatem bonosq; mores pertinent, non ad aliquam significationem vlla interpretatione referenda; sed prorsus, ut sunt dicta, faciendâ sunt.*

Profecto, illam Dei legem, non solum illi tunc populo, verum etiam nunc nobis ad instituendam recte vitam necessariam nemo dubitauerit. Si enim Christus nobis abstulit illud grauissimum multarum obseruationum iugum: ne carnaliter circumcidamur: ne pecorum victimas immolemus: ne sabbatho septeno dierum volumine redeunte, ab operibus etiam necessarijs quiescamus, & cetera huiusmodi; sed ea spiritaliter intellecta teneamus, remotisq; vmbris significantibus, in rerum ipsarum, quae significantur, luce vigilemus. Numquid propterea dicturi sumus, non ad nos pertinere, quod scriptum est, ut alienum quodcunque perditum quisque inuenerit, reddat ei, qui perdidit, & alia multa similia, quibus pie recteq; viuere discitur, maximeq; ipsum Decalogum, qui duabus illis lapideis tabulis continetur, excepta sabbathi obseruatione carnali, quae spiritualem sanctificationem, quietemq; significat? Quis enim dicat non debere obseruare Christianos, ut vni Deo religionis obsequio seruiatur: ut idolum non colatur: ut nomen Domini non accipiat in vanum: ut parentes honorentur: ne adulteria, homicidia, furta, falsa testimonia perpetrentur: ne uxor, ne omnino res vlla concupiscatur aliena? Quis est tam impius, qui dicat, Ideo se ista legis non custodire praecpta; quia est ipse Christianus, nec sub lege, sed sub gratia constitutus? Verum haec plane magna distantia est, quod faciunt ista sub lege positi, quos litera occidit, terrenam felicitatem vel cupiditatem adipiscendi, vel timore amittendi: & ideo non vere faciunt: quoniam carnalis cupiditas, qua peccatum augetur, cupiditate alia non sanatur. Hi ad vetus pertinent testamentum, quod in seruitutem genuit: quia facit eos carnalis timor, & cupiditas seruos; non euangelica fides, spes, charitas, liberos. Sub gratia vero positi, quos viuificat Spiritus, & fide ista faciunt, quae per dilectionem operatur in spe bonorum, non carnalium, sed spiritualium: non terrenorum, sed caelestium: non temporalium, sed aeternorum, praecipue credentes in mediatorem, per quem sibi non dubitant & spiritum gratiae subministrari, ut bene ista faciant, & ignosci posse cum peccant. Hi pertinent ad testamentum nouum, filij promissionis, & regenerati à Deo patre, & libera matre. Huius generis fuerunt antiqui omnes iusti, & ipse Moyses testamenti minister veteris, haeres noui: quia ex fide, qua nos viuimus, una eademq; vixerunt, incarnationem, passionem, resurrectionemq; Christi credentes futuram, quam nos credimus factam, usque ad ipsum Ioannem Baptistam, tanquam praeteritae dispensationis limitem quendam: qui mediatorem ipsum non aliqua umbra futuri, vel allegorica significatione, nec vlla prophetica praenuntiatione venturum esse significans; sed digito demonstrans, ait: Ecce agnus Dei, ecce qui tollit peccatum mundi. Tanquam dicens: quem multi iusti videre concupierunt: in quem venturum ab ipsis humani generis initio crediderunt: de quo Abrahae dictae sunt promissiones: de

nes: de quo scripsit Moyses, de quo lex & prophetæ sunt testes: Ecce agnus Dei, ecce qui tollit peccatum mundi. Ab hoc Ioanne, & deinceps cœperunt de Christo fieri præterita velut præsentia, quæ ab illis omnibus anterioris temporis iustis credebantur, sperabantur, desiderabantur futura. Eadem igitur fides & in illis, qui nondum nomine, sed re ipsa antea fuerunt Christiani: & in istis, qui non solum sunt, verumetiam vocantur: & in utrisque eadem gratia per Spiritum sanctum. Unde dicit Apostolus 2. ad Corint. 4. Habentes autem eundem Spiritum fidei, secundum quod scriptum est, Psal. 115. Credidi, propter quod locutus sum: & nos credimus, propter quod & loquimur. Aliter itaque dicitur, iam obtinente loquendi consuetudine, vetus testamentum, lex et prophetæ omnes, qui usque ad Ioannem prophetauerunt; quod distinctius vetus instrumentum, quam vetus testamentum vocatur: aliter autem, sicut Apostolica appellat authoritas, siue hoc nomen exprimens, siue significans: exprimit enim ubi dicit: 2. ad Corinth. 2. usque in hodiernum diem, quam diu legitur Moyses id ipsum velamen in lectione veteris testamenti manet, quod non reuelatur; quia in Christo euacuatur: sic enim utique vetus testamentum ad Moysi retulit ministerium. &c. Cætera vide apud Diuum Augustinum.

NOTANDVM SECUNDÒ: quia lex & Euangelium inter se conueniunt & differunt. D. Thomas super cap. 4. ad Galatas Lect. 6. dicit: Apostolus ponit unum, in quo lex & Euangelium conueniunt: & duo, in quibus differunt. CONVENIUNT quidem in uno Patre: unde Apostolus dicit: Scriptum est, quoniam Abraham duos filios habuit: Habuit etiam alios quam istos duos filios: quia post mortem Saræ, alios genuit de Cetbura, ut dicitur Gen. 25. de quibus mentionem non fecit Apostolus: quia non pertinent ad hanc significationem. Possunt tamen per istos duos, scilicet, filium ancillæ, & filium liberæ, duo populi, scilicet, Iudæorum & Gentium designari. Per alios verò filios Cetburæ, Schismatici & Hæretici. Qui quidem duo populi conueniunt in uno patre: quia Iudæi filij sunt Abrahæ secundum carnem: Gentiles verò secundum imitationem fidei: vel sunt filij Abraham, id est Dei, qui est Pater omnium, Malach. 2. Nonne Deus pater omnium, &c. & ad Roma. 3. An Iudæorum tantum Deus? &cæt.

DIFFERUNT autem in duobus, scilicet in conditione matris: quia vnus est de ancilla, ut dicitur Gene. 21. Nec tamen peccauit Abraham, ad eam accedens: quia accessit ad eam coniugis affectu, & ordinatione diuina. Alius autem est de liberâ, scilicet Isaac, quem genuit ei Sara, uxor sua: Gene. 18. Veniam ad te tempore isto, vitu comite, & Sara uxor tua, &c. Item, differunt in modo generationis: quia, qui de ancilla, scilicet Ismaël, secundum carnem natus est: qui autem de liberâ, scilicet Isaac, per repromissi-

onem. Sed vitandus est hic duplex falsus intellectus: unus, ne intelligatur per hoc, quod dicit, Secundum carnem natus est; ut accipiatur hic caro pro actu peccati, secundum illud ad Roma. 8. Si secundum carnem vixeritis, moriemini, &c. 2. Corint. 10. In carne enim ambulantes, non secundum carnem militamus, quasi Abraham peccante natus sit Ismael. Alius intellectus, ut per hoc, quod dicitur, Per repromissionem, credatur, Isaac non secundum carnem natus, id est, secundum carnalem commixtionem; sed per Spiritum sanctum. Est ergo dicendum, quod secundum carnem, id est, secundum naturam carnis natus est Ismael: nam naturale est in hominibus, quod ex muliere iuuenula fecunda, sicut erat Agar, & Sene nascatur filius: & quod per repromissionem, id est, supra naturam carnis, natus est Isaac. Non enim ad hoc se extendit natura carnis, ut ex viro sene, & vetula sterili, sicut fuit Sara filius nascatur.

Non licet igitur, non decet hominem Catholicum nescire, quantum distent æra lupinis: & quantum differat Euangelium Christi, à lege Moyfi.

ITEM NOTANDUM, quia Sancti Apostoli dicuntur seruasse legalia. unde D. Thomas super cap. 5. ad Galat. Lect. 1. *Iugum legis nocuum & onerosum. Nocuum quidem est iugum legis: quia aufert Domine passionis effectum, & ideo dicit Apostolus: NOLITE CONTINERI IUGO SERVITUTIS: quia ecce ego Paulus, qui, supple, voce authoritatis dico, & bene: quoniam si circumcidimini, Christus vobis nihil proderit, id est fides Christi.* Sed contra Actorum 14. dicitur, quod Paulus circumcidit Timotheum: ergo fecit, quod Christus ei nihil prodesset, ergo decepit eum. Respondeo, dicendum est secundum Hieronymum, quod Paulus non circumcidit Timotheum, quasi legem seruare intenderit: sed simulauit se circumcidere faciendo opus circumcisionis. Nam secundum ipsum, Apostoli simulatorie seruabant legalia, ad vitandum scandalum fidelium ex Iudæis. Faciebant autem actus legalium, non tamen cum intentione seruandi legalia, & sic non exhibant à fide, unde non decepit Timotheum.

Secundum verò AUGUSTINUM dicendum est, quod Apostoli secundum veritatem seruabant legalia, & cum intentione ea seruandi: quia secundum Apostolorum sententiam, licebat fidelibus ex Iudæis illo tempore scilicet, ante gratiam diuulgatam, ipsa seruare. Et ideo, quia Timotheus fuit ex matre Iudæa, circumcidit eum Apostolus, cum intentione seruandi legalia. Quia verò Galathæ ponebant spem in legalibus, post gratiam diuulgatam, quasi sine eis gratia non sufficeret ad salutem, & ideo ea seruare volebant: ideo dicit eis Apostolus: *Si circumcidimini, Christus vobis nihil proderit.* Sequebatur enim ex hoc

hoc, quòd non reputarent Christum, in cuius signum data fuit circumcisio. Genes. 17. Vt sit in signum foederis inter me & vos, &c. Qui ergo circumcidebantur, credebant adhuc signum durare, & tunc signatum nondum venisse, & sic excidebant à Christo. Sic ergo patet onus legis esse nociuum.

TERTIÒ NOTANDVM, quia scriptum est, Deute. cap. 6. *Hæc sunt præcepta & cæremonie, atq; iudicia.* Sunt igitur triplicia præcepta in lege, scilicet, Moralia, Cæremonialia, & Iudicialia: D. Thomas 1. 2. quæ. 99. Arti. 4. *Præcepta autem Antonomastice dicuntur Moralia, sub quibus continetur Decalogus in tabulis lapideis scriptus: in signum: quia moralia præcepta non mutantur, præter tertium præceptum de Sabbatho. Cæremonialia, quæ tantum historicè durabant ad passionem Christi: sed mortua deinceps, mortifera verò post diuulgationem Euangelij 1. 2. quæ. 103. Arti. 3. Præcepta Iudicialia post Christum non obligant, nec seruans ea peccat: nisi seruet, vt obligatus ex lege 1. 2. quæ. 104. Arti. 3. Hæc præcepta Iudicialia communicant in aliquo cum Moralibus, & in aliquo cum Cæremonialibus 1. 2. quæ. 99. Arti. 4. Vnde patet, quia indulgentiæ pertinent ad clauem iurisdictionis, magis quodammodo ex iudicialibus, quàm ex cæremonialibus præceptis videntur desumptæ.*

ITEM NOTANDVM, Quia S. Hieronymus super cap. 4. ad Galat. super illis verbis Apostoli: *Unum quidem in monte Sina, in seruitutem generans, dicit sic: Iudei, metu præsentium cogeantur, vt feræ: nos verò præmiis inuitamur vt liberi. & illi quasi serui præter moralia præcepta, etiam diuersis operibus premebantur: nobis autem quasi filiis moralibus monitis adimpletis, seruilia onera auferuntur: sed illi sacerdotibus suis ex debito seruientes, tributa etiam reddere cogeantur: nos præter charitatem nihil debentes, antistites nostros voluntariè honoramus.*

Ad decidendam igitur Controuersiam huius primi puncti de lege, ponamus Conclusiones & Corollaria.

CONCLUSIO PRIMA.

INter Ebionem, Cherintum, & Manichæum, tanquam inter extremos scopulos Scyllam, & Charybdim, horribilia monstra in mari, Sancta mater Ecclesia Catholica, tenendo viam mediam, ad portum secura nauigat aura.

Veritas huius Conclusionis ex ventilatione Quæstionis eiusdem de lege patet.

COROLLARIUM PRIMVM.

Ebionem & Cherintum, Euangelij iustitiæ, & veritatis, & fide Catholicæ hostes, Sanctus Petrus Apostolus iusto decreto damnauit, Actorum cap. 15.

PROBATVR Corollarium, authoritate Scripturæ, Act. vti suprâ. *Surrexerunt autem quidam de hæresi Phariseorum, qui crediderunt dicentes: quia oportet circumcidi eos, præcipere quoq; seruare legem Moysi. Conueneruntq; Apostoli & seniores, videre de verbo hoc. Cum autem magna conquisitio fieret, surgens Petrus, dixit ad eos: Viri fratres, vos scitis, quoniam ab antiquis diebus in nobis elegit Deus, per os meum audire gentes, verbum Euangelij, & credere. Et qui nouit corda Deus, testimonium perhibuit, dans illis Spiritum sanctum, sicut & nobis, & nihil discreuit inter nos, & illos, fide purificans corda eorum. Nunc ergo, quid tentatis Deum, imponere iugum super ceruices discipulorum, quod neq; nos, neq; patres nostri, portare potuimus? sed per gratiam Domini Iesu credimus saluari, quemadmodum & illi.*

COROLLARIUM SECVNDVM.

Similiter Sanctus Paulus Apostolus ad Galat. cap. 1. dicens: *Sed licet nos, aut Angelus de cælo, euangelizet vobis, præterquam quod euangelizauimus vobis, præter id, quod accepistis, anathema, anathema sit.*

COROLLARIUM TERTIVM.

Manicheum aduersarium legis, & antiquum veteris testamenti hostem, Sacrosanctum Concilium Triden. Sessio. 4. Generali decreto damnauit dicens: *Si quis autem libros ipsos integros, cum omnibus suis partibus, prout in Ecclesia Catholica legi consueuerunt, & in veteri vulgata latina editione habentur, pro Sacris, & Canonicis, non susceperit, & traditiones prædictas, sciens & prudens contempserit; anathema sit.*

CONCLUSIO SECUNDA.

SCimus autem, quia bona est lex, si quis ea legitime vtatur: sciens hoc, quia lex iusto non est posita, sed iniustis, & non subditis, impiis & peccatoribus, 1. ad Thimo. 1.

Veritas Conclusionis huius patet Notabili Primo eiusdem Controuersia de lege.

Item,

Item, probatur auctoritate scripturæ, ad Roma. cap. 7. Lex quidem sancta, & mandatum sanctum, & iustum, & bonum: sed contingit, quòd aliquis homo vtatur malè. Cùm ergo lex sit bona, requiritur, quòd homo benè ea vtatur. Data est ergo lex, vt cognoscatur peccatum: ad Roma. 7. *Quia concupiscentiam nesciui peccatum, nisi lex diceret: Non concupisces.*

COROLLARIUM PRIMVM.

Legitimè vtitur lege, qui intelligens, quare sit data per eius comminationem confugit ad gratiam liberantem. Ratio Corollarij est: quia prudens, vbi videt comminationem, occurrit statim, ne incidat in poenam aut verbera.

COROLLARIUM SECVNDVM.

Qui seclusa lege paratus est facere, quæ lex esset præceptura; hic non opus habet lege. Probatio Corollarij patet Notabili secundo.

Pro maiori euidencia Corollarij, sciendum est, quia Doctor sanctus super primæ ad Timot. cap. 1. lectio. 3. dicit: *Intentio bonorum debet esse, vt alios inducant ad virtutes. Quidam autem per se, sunt benè dispositi ad virtutes: alij habent mentem benè dispositam, sed per alium: et de istis sufficit paterna monitio non coactiua. Alij autem nec per se, nec per alium benè disponuntur; ideò eis omninò necessaria est lex, vt patet in Ethicis.*

COROLLARIUM TERTIVM.

Quanquam iustus, non indigeat lege: Sancta tamen, iusta, & bona est lex, per quam mali cohibentur, & arcentur à peccatis, & vrgentur ad emendationem cõmissorum, ad Roma. 7. Probatio Corollarij patet ex probatione præcedentis.

CONCLUSIO TERTIA.

Vetus lex non simpliciter, sed secundùm quid euacuatur, & secundùm quid remanet: euacuatur quidem in signo, sed permanet in signato: quia veritas Domini manet in æternum, Psalm. 116.

Veritas Conclusionis, patet Notabili primo.

Item, probatur auctoritate scripturæ, ad Rom. 7. Lex spiritalis est.

COROLLARIUM PRIMVM.

C O N T R O V E R S I A

Lex vetus ita euacuatur, vt proficiat, sicut infantia euacuatur in iuuentute, & semen in fructu. Probatur Corollarium in principali Conclusionem prima: Et est expresse apud Anselmum Cantuariensem super 2. ad Corint. 3.

C O R O L L A R I V M S E C V N D V M.

Moralia legis præcepta manent, sed ita, prout ab Ecclesia Catholica traduntur. Probatur Corollarium, Notabili primo, & tertio.

C O R O L L A R I V M T E R T I V M.

Cæremonialia legis præcepta, quæ tantum historicè durabant, ad passionem Christi: sed mortua deinceps, mortifera verò post diuulgationem Euangelij. Corollarij probatio, patet Notabili primo, & tertio.

C O R O L L A R I V M Q V A R T V M.

Iudicialia legis præcepta, post Christum non obligant: nec seruans ea peccat, nisi seruet vt obligatus ex lege. Probatur Corollarium Notabili 3.

C O R O L L A R I V M Q V I N T V M.

Præcepta iudicialia, communicant in aliquo cum moralibus, & in aliquo cum cæremonialibus. Corollarij probatio patet Notabili tertio.

C O R O L L A R I V M S E X T V M.

Indulgentiæ, quia principaliter pertinent ad clauem iurisdictionis, magis ex iudicialibus, quàm ex cæremonialibus præceptis videntur desumptæ. Probatio Corollarij ex supradictis, & Notabili. 3. patet.

C O R O L L A R I V M S E P T I M V M.

Neque lex, neque iustitia ex lege, sed verbum & promissio Dei, & fides, quæ per charitatem operatur, conciliat homini apud Deum gratiam & indulgentiam. Hoc Corollarium B. Paulus Apostolus in Epistola ad Romanos & Galatas sufficienter probat.

C O R O L L A R I V M O C T A V V M.

Quæstio cum suis Conclusionibus & Corollaris, ex Sacra scriptura proposita, & secundum sensum, & consensum Ecclesiæ Catholicæ determinata, est vera, & ideo concedenda. Et hæc de primo Conclusionis primæ puncto.

QVAN-

QUANTVM AD SECVNDVM PVNCTVM, probatur Conclusio Notabili 5. cap. 3.

Item, probatur autoritate scripturæ, Ioan. cap. 14. *Pacem relinquo vobis, pacem meam do vobis, non quomodo mundus dat, ego do vobis.*

Item, probatur autoritate Bullæ Pii Quarti, super forma iuramenti professionis fidei, vbi expresse est scriptum: Credo & affirmo indulgentiarum potestatem à Christo in Ecclesia relictam fuisse: Lege in S. Concilio Tridentino.

QUANTVM AD TERTIVM PVNCTVM, probatur Conclusio Notabili quarto, cap. 1.

Item, probatur autoritate scripturæ, Ioan. cap. 4. *Omnis qui bibit ex aqua hac, sitiet iterum: qui autem biberit ex aqua, quam ego dabo ei, non sitiet in æternum. Sed aqua quam ego dabo ei, fiet in eo fons aquæ, salientis in vitam æternam.*

Item, probatur autoritate Bullæ Pii Quarti, super formam iuramenti professionis fidei, vbi expresse scriptum est: Credo & affirmo indulgentiarum vsum, Christiano populo maximè salutarem esse.

COROLLARIVM PRIMVM.

Fidelis sermo, & omni acceptione dignus: quia Messias legislator & mediator Dominus noster Iesus Christus, indulgentias vnâ cum sacerdotio, lege, sacrificio, & benedictione, ex Synagoga ad Ecclesiam transtulit, reformauit, & perfecit.

Probatio Corollarij patet ex Conclusionem prima.

Item, patet ex Notabili 1. cap. 3. & Notabili 2. cap. 2.

REFORMAVIT. Hanc reformationem B. Hieronymus interpretatur super Isa. cap. 58. vt annotatum est Notabili 7. cap. 4. quia omnia quæ bona sunt duplicantur in Euangelio, iuxta illud Lu. ca. 6. *Mensuram bonam, & confertam, & coagitatam, & supereffluentem dabunt in sinum vestrum.*

COROLLARIVM. SECVNDVM.

Indulgentiæ sunt de fide: quia ad decimum articulum fidei, *Credo remissionem peccatorum*, reducuntur.

Probatio Corollarij posita est Notabili 7. cap. 1.

Item, probatur autoritate scripture, Matth. cap. 9. vbi eadem verba Christi bis leguntur: *Confide fili, remittuntur tibi peccata tua.*

Item, probatur Bulla Pij Papæ IIII. super forma iuramenti professionis fidei. Item, Quamvis principia, & articuli fidei, apud Catholicos non probantur: quia non egent probationis: nam simpliciter cre-

ter creduntur: tamen propter hæreticos possunt probari. Itaque Corollarium rationibus probatur.

PRIMA RATIO. Articuli fidei sunt principia, & creduntur: igitur & Indulgentiæ principia, quæ credi debent.

CONSEQUENTIA à toto ad partem.

ANTECEDENS, est omnium Scholasticorum, & Catholicorum, & Diui Hieronymi, vt dictum est Notabili 6. cap. 2.

SECUNDA RATIO. Necessè est Christianum credere Euangelio: ergo & indulgentijs.

CONSEQUENTIA, à genere ad speciem, siue toto ad partem.

ANTECEDENS, Matth. 28. Marci 16. Lucæ 24. Item, Marci. 1. *Pœnitimini, & credite Euangelio.* Item, Ioan. 3. *Qui autem non credit, iam iudicatus est.*

TERTIA RATIO. Necessè est Christianum peccatorem media iustificationis, credere & tenere: igitur & indulgentias.

CONSEQUENTIA, à genere ad speciem.

ANTECEDENS. Psalm. 118. *Longè à peccatoribus salus: quia iustificationes tuas non exquisierunt.*

COROLLARIUM TERTIUM

Sicut sine fide impossibile est placere Deo; ita sine fide impossibile est consequi Indulgentiam, & remissionem peccatorum: quia Christus Dominus Matth. 9. dixit: *Confide fili, remittuntur tibi peccata tua.*

Huius Corollarij probatio, patet ex Notabili præcedenti Corollario posito.

D. HIERONYMVS super cap. 5. ad Gala. super illis verbis Apostoli: *Sed fides quæ per charitatem operatur: Ergo & fides, inquit, operatur per charitatem, non per timorem: qui enim credit Deo, attendit mandatis: nam qui credit futuris, amplius operatur, quàm qui præsentem metuit pœnã.*

Item, ANSELMVS CANTVARIEN. super iisdem verbis Apostoli dicit sic: *Nam siue circumcisis, siue præputiatus sit quisquam; non propter hoc aut dignior, aut vilior est in Christiana religione; sed sola fides est ibi magnæ dignitatis, & fides quæ per charitatem operatur, id est, non mortua, sed viua. Sicut enim corpus sine spiritu mortuum est; ita & fides sine operibus mortua est: nec fides veteris testamenti seruiens ex timore: sed fides euangelica, faciens ex charitate opera bona: non expectans temporalem retributionem; sed videndam perpetuò creatoris faciem. Hæc est fides electo-
rum, quæ*

rum, quæ perducit ad salutem: nam & demones credunt, & contremiscunt; non tamen diligunt, nec benè operantur. Et ideò fides, quæ non habet charitatem, & opera bona, fides demonum est, non Christianorum. Illa ergo sola fides, quæ charitate flagrat, et bonis operibus insudat, valet in Christo Iesu.

Sed potest etiam rationibus confirmari.

PRIMA RATIO. Sine quo nemini vnquam datur indulgentia, illud ad consequendam inprimis est necessarium. sed sine fide nemini vnquam in Ecclesia datur indulgentia: igitur ad consequendam indulgentiam fides est necessaria.

MAIOR vera à definitione.

MINOR, est Apostoli ad Hebræ. II. *Sine fide impossibile est placere Deo.* Porro, qui vult obtinere Indulgentiam, debet laborare sic, vt placeat Deo.

SECUNDA RATIO. Quo placatur Deus, illud ad indulgentiam est necessarium. sed fide placatur Deus: ergo fides ad indulgentiam est necessaria, & per consequens impossibile est sine fide obtinere indulgentiam.

MAIOR vera. MINOR. Mat. 15. Chanaëa mulier pro exemplo.

NOTA: quia secundum doctrinam, & consilium M. T. Ciceronis in Oratione pro lege Manilia, homini timidè de potestate Dei, & pauca dicenda sunt: sed in indulgentiis Ecclesiæ Catholicæ est manifesta potestas Dei, quam experientia ad sensum cognoscunt, & confitentur Catholici, homines pii, timentes Deum. Vnde D. August. in lib. de vera & falsa pœnitentia, cap. 5. *Qui autem multos cæcos, & diuerso tempore illuminauerit, & multos debiles confortauerit; ostendit in diuersis illis eadem sæpè peccata dimitti; vt quem prius sanauit leprosum, alio tempore illuminauit cæcum. Ideò enim tot saluauit febricitantes, tot languidos, tot claudos, cæcos, & aridos; ne desperet de se peccator. Ideò non scribitur aliquis nisi semel sanatus; vt timeat quisq. iungi peccato. Videmus adhuc quotidie in Ecclesia sæpè febricitantes, sæpè languidos, sæpè passionibus captos, sæpè liberari; vt appareat totiens opus miserantis, quotiens confessio sit pœnitentis. Quomodo enim corpus quod vilius est, & ab ipso dissimilius sæpè seruat, & animam digniorem, & redemptam non totiens liberaret? Medicum se vocat, & non sanis, sed malè habentibus opportunum. Sed qualis hic medicus, qui malum iteratum nesciret curare? Medicorum enim est centies infirmum visitare, centies curare: qui ceteris minor esset, si alijs possibilia ignoraret. Memor est sui, qui dicit: Nolo mortem*

mortem peccatoris, sed ut conuertatur & uiuat. Quem enim peccatorem excludit? Et quod omnibus promisit indulgentiam, aliis promissionibus declinat: Qui me confessus fuerit coram hominibus, id est, omnis, quantumcunque; & quotienscunque, peccator, cuiuscunque ordinis, etiam si fuerit sacerdos, confitebor & ego eum coram patre meo. Nam qui inuocauerit nomen Domini, Ioël. 2. id est, secundum quod nominatur Dominus, id est, qui inuocauerit eum ad se seruiendo, non contradicendo, ut forsitan sæpè fecit. Omnis, id est, quicunque, sit ille peccator, saluus erit. Omnem enim animam iste promissor saturauit bonis, etiam sedentes in tenebris, & in umbra mortis, nullam excipiens animam. Hæc D. Augustinus. Item ibidem, cap. 5. Sic sacerdos & timeat peccare, sed magis timeat desperare. Ex supradictis patet, quia homini timidè de indulgentiis Ecclesiæ Catholicæ & pauca dicenda sunt. Mala ergo & impia consuetudo est, contra Deum, contra fidem, contra Ecclesiam Catholicam, & contra indulgentias disputandi, siue ex animo id fit, siue simulatè.

COROLLARIUM QVARTVM.

Credendum est omnes orationes Ecclesiæ, Eleemosynas quoque, & opera iustitiæ, succurrere recognoscenti mortem suam ad conuersionem. Verba Corollarii huius sumpta sunt ex lib. D. Augustini, de vera & falsa pœnitentia, cap. 12. ubi dicit: *Laboret itaq; pœnitens in Ecclesia esse, & ad Ecclesiæ unitatem tendere. Nisi enim unitas Ecclesiæ succurrat: nisi quod deest peccatori, sua opitulatione compleat: de manibus inimici non eripitur anima mortui. Credendum est enim, & pietas fidei postulat credere, quod omnes Eleemosynæ, totius Ecclesiæ & orationes, & opera iustitiæ, & misericordiæ succurrant recognoscenti mortem suam, & conuersionem suam.*

CONCLUSIO SECUNDA.

Credendum est, Orationibus, Ieiuniis, & Eleemosynis, proximum à proximo, non solum in Ecclesia; verumetiam in purgatorio, & præcipuè sub indulgentia iuuari: atque proximum pro peccatis proximi, Deo adiuuante, satisfacere posse.

Tria sunt Conclusionis puncta: PRIMVM PUNCTVM EST. Credendum est Orationibus, Ieiuniis, Eleemosynis, & aliis piis operibus proximum à proximo in Ecclesia Catholica iuuari.

SECVDVM. Credendum est, Orationibus, Ieiuniis, Eleemosynis, & alijs

& aliis piis operibus, proximum à proximo in Purgatorio iuuari.

TERTIVM. Credendum est, Orationibus, Ieiuniis, Eleemosynis, & aliis piis operibus, proximum pro peccatis proximi, Deo adiuvante satisfacere posse.

QVANTVM AD PRIMVM PVNCTVM: Probatur Cōclusionis veritas, Notabili 4. ca. 5. Item patet, quadamtenus ex vltimo Corollario Cōclusionis præcedentis: quia proximus oratione proximi, iuuari debet. Item, probatur autoritate scripturæ: quia scriptum est, Iac. cap. 5. Orate pro inuicem vt saluemini.

DIONYSIVS Carthusianus super iisdem verbis. *Hoc namq; exigit charitas, qua proximorum tenemur desiderare, & procurare salutem, quemadmodum propriam. Oratio quippè desiderij est interpret. Hinc Christus orationem, quam docuit, in plurali formavit: insinuans, vt pro proximis, sicut pro nobis ipsis oremus: ita, vt interdum eadem oratio pro se, aliisq; fundatur; interdum verò oret quis nunc pro se, & specialibus indigentibus suis; nunc pro aliis, & præsertim pro communi bono Ecclesiæ, pro reformatione eius in omnibus, pro parentibus, propinquis, comis, & benefactoribus: pro cunctis fidelibus defunctis: pro viuis ac mortuis: pro vniuersorum salute: & infidelium conuersione. Qui enim pro omnibus orat, particeps est omnium bonorum quæ fiunt: & bonum quāto communiùs, tantò diuiniùs perhibetur. Hinc debet vnusquisq; orationes aliorum humiliter ac feruenter appetere, & eos vt pro se orent, rogare. Quò enim alios humiliùs, atq; feruentiùs, vt pro nobis orent rogamus; eorum capaciores fructus orationis illorum efficimur, potissimùm tamen hominum deuotorum & notabiliter virtuosorum est appetenda oratio. Propter quod subditur: Multum enim valet deprecatio iusti assidua. Lyranus. Confessor tenetur orare pro confitente et e conuerso. Fecit hoc Apostolus S. Paulus, qui se commendat orationibus Collossensium, ad Coloss. cap. 4. Orationi instate, vigilantes in ea, in gratiarum actione, orantes simul et pro nobis, vt Deus aperiat nobis ostium sermonis, ad loquendum mysterium Christi. &c. Item, 1. ad Thess. cap. 5. Fratres orate pro nobis. Item, 2. ad Thess. 3. De cætero fratres orate pro nobis, vt sermo Dei curnat, & clarificetur sicut et apud vos. Item, ad Hebræ. 13. Orate pro nobis. Item, Act. 12. Et Petrus quidem seruabatur in carcere. Oratio autem fiebat sine intermissione ab Ecclesia ad Deum pro eo.*

DE IEIUNIO.

Hoc est, quia proximus iuuatur & iuuari debet proximi ieiunio.

Probatur autoritate scripturæ Matth. cap. 17. Saluator ait: *Hoc autem genus demoniorum, non eijcitur nisi per orationem, & ieiunium.* D. Ambrosius ait, de Quadragesima Sermone 25. *Ait enim Saluator de*

M

diabolo:

diabolo: *Hoc genus non eicitur, nisi in ieiunio & orationibus. Dicit utiq; à diabolo energumenum, non nisi ieiunijs posse purgari. Videte ergo quæ ieiunij virtus sit, quantam homini suo præstet gratiam, quod tanta præstet alteri medicinam: quemadmodum proprium sanctificet hominem, quod ita purificet alienum: mira enim res est, alter ieiunat, & alteri prodest ieiunantis utilitas. etc.* Hæc D. Ambrosius.

DE ELEEMOSYNA.

Hoc est, quia proximus iuuatur, & iuuari debet, eleemosyna proximi.

Veritas huius positionis patet Notabili 4. cap. 5. Item, patet ex probatione Corollarij vltimi, Conclusionis primæ.

Item, Probatur autoritate scripturæ Ecclesi. cap. 3. & Luc. cap. 11. *Verumtamen quod superest, date eleemosynam, & ecce omnia munda sunt vobis.* D. Ambrosius. *Dominus autem quasi bonus præceptor docuit, quomodo nostri corporis mundare contagium debeamus, dicens: Verumtamen quod superest, date eleemosynam, & ecce omnia munda sunt vobis. Vides quanta remedia: mundat nos misericordia, & indulgentia: mundat nos sermo Dei: iuxta quod scriptum est, Ioan. 13. Iam vos mundi estis propter sermonem, quem loquutus sum vobis.*

D. Augustinus de eleemosyna. *Misericors monet misericordiam fieri: & quia seruare quærit, quos magno redemit pretio, post gratiam baptismi sordidatos, docet denuò posse seruari.*

D. Chrysostomus. *Date eleemosynam, non iniustitiam: est enim eleemosyna, quæ caret iniustitia qualibet. Hæc omnia facit munda, & ieiunio est præstantior, quod quamvis sit laboriosius, illa tamen est lucuosior. Illustrat animam, impinguat, bonam efficit, & decorum. Qui cogitat misereri roganti, citius à peccatis desistit. Sicut enim medicus, qui crebrò vulneratis medetur, frangitur de facili in ærumna aliorum; sic & nos: si vacauerimus ægenorum auxilio, de facili contemnemus præsentia, & in cælum leuabimur. Non paruum est igitur eleemosyna cataplasma, cum valeat omnibus apponi vulneribus. Si omnibus: ergo & meis, & proximi.*

QVANTVM AD SECVNDVM PVNCTVM, Credendum est orationibus, ieiunijs, eleemosynis, & alijs pijs operibus, proximum à proximo in purgatorio iuuari, id est, proximum in purgatorio patientem, à proximo in Ecclesia visibili militante.

Veritas huius positionis patet Notabili 4. cap. 4. Et probatur autoritate scripturæ, 2. Machab. 12. Ioan. 11.

NOTA: quia quot modis meremur nobis ipsis, tot modis possumus mereri proximis nostris in Christo defunctis. Proinde septem sunt modi in summa, quibus nos proximos nostros in purgatorio iuuare possumus, quamdiu sumus in hoc mundo.

PRIMVS MODVS, Sacrificium. Est autem triplex sacrificium, oris, cordis, & iustitiæ. Hoc prodest animabus in purgatorio, propter inæstimabilem suum valorem, & plus quàm diuinam dignitatem, ac propriam excellentissimamque virtutem, quæ tanta est, vt angelos ipsos lætificet, viuentes iustificet, mortuos mirificè iuuat; eos tamen qui sunt in purgatorio: nam eorum poenas delet. Et tale est in primis tremendum sacrosanctum Sacrificium Missæ. Vnde Sacrum Concilium Tridentinum, Sessio. 22. cap. 2. de Sacrificio Missæ non tantùm pro viuis, sed etiam pro defunctis, sacrificia Missæ peragi debere docet his verbis: *Cuius quidem oblationis cruentæ inquam, fructus per hanc Missam vberimè percipiuntur: tantùm abest, vt passioni Christi per Missam quouis modo derogetur.*

Quare non solùm pro fidelium viuorum peccatis, poenis, satisfactionibus, & aliis necessitatibus; sed & pro defunctis in Christo, nondum ad plenum purgatis ritè iuxta Apostolorum traditionem offertur. Idem Sacrosanctum Concilium Tridentinum, Sessio. 25. statim à principio, in Decreto de Purgatorio, ordinat & præcipit sic: *Curent Episcopi, vt fidelium viuorum suffragia, Missarum scilicet, Sacrificia, Orationes, Elcemosynæ, aliæque pietatis opes, quæ à fidelibus pro aliis fidelibus defunctis fieri consueuerunt, secundum Ecclesiæ instituta, piè, & deuotè fiant: & quæ pro illis ex testatorum foundationibus, vel alia ratione debentur, non perfunctoriè, sed à sacerdotibus, & Ecclesiæ ministris, & aliis qui hoc præstare tenentur, diligenter & accuratè persoluantur.* Benè itaque, iustè, & piè faciunt, qui circa sepulturam sanctas Missas procurant: qui pro suis defunctis Tricesimas conducunt, & vtiliter, laudabiliter conducunt: quia non solùm nouæ legis, sed etiam Veteris legis sacerdotes, semper pro defunctis orabant, vt patet Numerorum cap. 16. vbi legitur Aaron pro mortuis orasse, & thura obtulisse.

SECUNDVS MODVS est, quo nos proximos nostros in Purgatorio iuuare possumus, Oratio Ecclesiæ, & orationes fidelium in communi. Propterea Iudas Machabæus, 2. Machab. cap. 12. *duodecim millia drachmas argenteas Hierosolymam misit; vt offerrentur sacrificia, pro defunctorum fratrum, qui in bello ceciderunt, peccatis, piè & religiosè cogitans de mortuis. Sancta igitur est cogitatio & salubris pro defunctis exorare, vt à pœnis & à peccatis soluantur.* Huic simile, lege apud D. Gregorium lib. 4. Dialogorum, cap. 40. vnde saluator Math. 7. 18. & Marci 11. Propterea, inquit, dico vobis, omnia quæcunq; orantes petetis, credite, quia accipietis, & fiet vobis.

TERTIVS MODVS est, quo nos proximos nostros in Purgatorio iu-

uare possumus, Inuocatio Sanctorum, iuxta illud, 2. Petri cap. 1. *Dabo autem operam, & frequenter habere vos, post obitum meum, ut horum omnium memoriam faciatis.*

QUARTVS MODVS est, quo proximos nostros in Purgatorio iuuare possumus, Processiones & Peregrinatio ad loca sancta, & ad sepulchra sanctorum: quia scriptum est, 4. Regum 13. *Quidam autem sepelientes hominem, viderunt latrunculos, & proiecerunt cadauer in sepulchro Elisei. Quod cum tetigisset ossa Elisei, reuixit homo, & stetit super pedes suos.*

QVINTVS MODVS est Ieiunium: Ad ieiunium autem reducuntur disciplina, vigilia, cilicia, maceratio & mortificatio carnis, lachryme & alia carnis afflictiones, vt est castitas, continentia, & ab omnibus peccatis, & occasionibus peccatorum discessio, & custodia. Quemadmodum enim Bethulien. ab Holoferne principe militiae Regis Assyriorum Nabuchodonosor obsessi & circumdati, oratione & ieiunio placauerunt Dominum; ita & illi in purgatorio, à demonibus obsessi & circumdati, proximorum ieiunio possunt iuari. Iuxta illud Iudith cap. 4. *Tunc Eliachim sacerdos Domini magnus circuiuit omnem Israël, allocutusq; est eos dicens: Scitote quoniam exaudiet Dominus preces vestras, si manentes permanseritis in orationibus in conspectu Domini.* Item, Math. 17. & Marci 7. cap. *Hoc autem genus demoniorum non ejcitur, & non vincitur in purgatorio, nisi per proximorum orationem & ieiunium.*

SEXTVS MODVS est Oblationes ipse, quæ sunt multiplices, vt sunt animalia, pecunia, panes, vinum, ornamenta, cærei: quibus licet non egeat Deus: quia bonorum nostrorum non eget: tamen vult per ea, & ex eis honorari. Vnde Damascenus in sermone de mortuis docet: Cereos & oleum solitum fuisse apud antiquos pro mortuis offerri.

SEPTIMVS MODVS est, quo nos proximos nostros in purgatorio iuuare possumus, Eleemosyna: iuxta illud Tobia 4. *Panem tuum, & vinum tuum super sepulchrum iusti constitue, & noli ex eo manducare & bibere cum peccatoribus.* Item, Ecclesia. cap. 11. *Mitte panem tuum super transeuntes aquas: quia post tempore multa inuenies illum.* Vnde D. Augustinus in Enchiridio cap. 110. *Neq. negandum est, inquit, defunctorum animas, pietate suorum viuentium releuari; quum pro illis sacrificium mediatoris offertur, & eleemosynæ in Ecclesia fiunt: sed eis hæc prosunt, qui cum viuerent, ut hæc sibi postea prodesse possint, meruerunt.*

QVANTVM AD TERTIVM PVNCTVM puta, Credendum est Orationibus, Ieiuniis, Eleemosynis, & aliis piis operibus, proximum pro peccatis proximi, Deo adiuuante, satisfacere posse.

Fidem habet hæc positio Notabili 4. cap. 5.

Item,

Item, probatur authoritate scripturæ Iob. cap. 42. *Postquam autem locutus est Deus verba hæc ad Iob, dixit ad Eliphaz Themaniten: Iratus est furor meus in te, & in duos amicos tuos, quoniam non estis locuti coram me rectum, sicut seruus meus Iob. Sumite ergo vobis septem tauros, & septem arietes, & ite ad seruum meum Iob, & offerite holocaustum pro vobis: Iob autem seruus meus orabit pro vobis. Faciem eius suscipiam, vt non imputetur vobis stultitia. Neq; enim locuti estis ad me recta, sicut seruus meus Iob.*

Item, testimonio D. Hieronymi, qui aduersus Vigilantium scribens, dicit sic: Vnus homo Moyſes, sexcentis millibus armatorum impetrat à Deo veniam. Exodi 32.

Item, Actuum 27. Paulus Apostolus, ducentas septuaginta sex sibi dicit in naui animas condonatas.

Item, S. Thomas super cap. 6. ad Galat. lect. 1. super illis verbis: *Alter alterius onera portate, dicit: & hoc tripliciter. VNO MODO, defectum alterius corporalem seu spiritualement, patienter tollerando, ab Ro. 15. Debemus autem nos firmiores, &c. ALIO MODO, necessitati mutua subueniendo, ad Roma. 12. Neceſſitatibus Sanctorum communicantes. TERTIO MODO, pro pœna sibi debita satisfaciendo, orationibus & bonis operibus: Prouerb. 18. Frater, qui iuuatur à fratre, quasi ciuitas firma.*

De Conclusionē secunda est Controuersia inter Catholicos & Hæreticos. Nam Catholici hanc Conclusionem, vt ponitur Catholicè in forma, non solum affirmant, sed etiam cum Patribus credunt.

Contrà Lutherus, Lutherani, & alii Hæretici, satisfactionem simpliciter negant. Et propterea quæritur: AN PROXIMVS, PRO PECCATIS PROXIMI, POSSIT, ET DEBEAT SATISFACERE?

Et videtur, quod non: quia scriptum est, Psalm. 61. *Quia tu reddis unicuiq; iuxta opera sua.*

Item, Ezechielis 18. *Anima quæ peccauerit, ipsa morietur. Filius non portabit iniquitatem patris, & pater non portabit iniquitatem filij. Iustitia iusti super eum erit: & impietas impij erit super eum.*

Item, 2. ad Corint. cap. 5. *Omnes enim nos manifestari oportet, ante tribunal Christi; vt referat unusquisq; propria corporis, prout gessit, siue bonum, siue malum.*

Item, ad Galat. cap. 6. *Unusquisq; enim onus suum portabit, &c.*

Et hoc ipsum volunt Rationibus probare.

PRIMA RATIO. Vnus pro alio non potest disponi : igitur nec satisfacere.

CONSEQUENTIA ab Antecedentibus. ANTECEDENS notum.

SOLVITVR ENTHYMEMA. Negatur Consequentia : tum quia ex puris negatiuis nihil concluditur : tum quia, sicut alia pietatis Christianæ officia, & exercitia propter charitatem sunt communia, ita & dispositio.

SECUNDÒ soluitur : Quanquam vnus pro alio non potest disponi materialiter ; potest tamen disponi formaliter, & exemplariter.

SECUNDA RATIO. Vnus pro alio non potest conteri, & confiteri : igitur nec satisfacere.

CONSEQUENTIA ab Antecedentibus.

ANTECEDENS probatur : Si quis non potest subire munus simul quarundam rerum, quæ adinuicem ordinem habent ; vnus ex illis separatim nequaquam poterit. Sed nemo potest conteri, aut confiteri pro altero : ergo nec satisfacere. Nam hæc tria, scilicet Contritio, Confessio, & Satisfactio, sunt quodammodo coniugata & connexa, quæ ad se inuicem ordinem habent, & mutuò sibi correspondent. Adde, quòd si aliquis pro altero soluendam satisfactionem susceperit, & interim nõdum soluta satisfactione moriatur ; punietur in purgatorio, vel absque satisfactione ad cælum euolabit : quòd si alius postea satisfacere debeat ; consurget duplex tribulatio, aut ita in infinitum procedetur : ergo quilibet pro se tantum debet satisfacere. SOLVITVR. Negatur Consequentia, propter causas in superiori argumento dictas : tum quia Contritio, & Confessio proximi prodest proximo, proximum imitanti in bono, similiter & Satisfactio. Porro ille migrans ex hac vita sine satisfactione, ignem in purgatorio sustinebit : & satisfactio postea si fiat, cedit in bonum facientis ; & sic non consurget duplex tribulatio, nec erit processus in infinitum. Item, SOLVITVR : quia qui non sufficit ad soluendum debita propria, suffragabuntur illi suffragia aliena, quæ charitas facit sua.

TERTIA RATIO. Poena exigitur vt morbus sanetur. sed propter poenam alterius infirmitas non sanatur : igitur propria poena seipsum quisque redimere debet.

MAIOR vera de lege iustitiæ. MINOR nota.

SOLVTIO. Minor negatur simpliciter : nam datur instantia : quia propte

propter pœnam (si ita dicere fas est) Christi, sanatus est mundus. Vnde D. Petrus 1. Pet. cap. 2. dicit: *Cuius liuore sanati estis.*

Porro ad Authoritates in principio Controuersia positas, D. Thomas Aquinas super cap. 6. ad Galat. lect. 1. generali solutione respondet sic: *Unusquisque onus suum portabit, quod videtur esse contrarium ei quod dixerat: Alter alterius onera portate. Sed sciendum est, quod ibi loquitur de onere sustinendæ infirmitatis (quando dicit, Alter alterius onera portate) quod debemus mutuo portare; hinc loquitur de onere reddendæ rationis, quod quilibet pro se portabit, siue sit onus premij, siue pœnæ: nam onus aliquando pondus pœnæ, aliquando premij significat, 2. ad Corinth. 4. Aeternum gloriæ pondus operatur. etc. Si autem dicatur, quia quidam debent rationem reddere pro alijs, puta Prælati pro subditis, secundum illud Ezechiel. 3. Sanguinem eius de manu tua requiram. etc. Et ad Hebræ. 13. Obedite præpositis vestris: ipsi enim peruigilant, quasi rationem reddituri pro animabus vestris: non est contrarium dicto Apostoli; quia non puniuntur pro peccatis subditorum, sed pro proprijs, quæ in custodia subditorum commiserunt. Est ergo vitanda superbia, & peccatum: quia unusquisque onus suum, id est, mensuram gratiæ suæ offeret Deo in die iudicij, tanquam manipulos bonorum operum. Psalm. 125. Venientes autem venient cum exultatione, portantes manipulos suos: et hoc quantum ad bonos. vel onus suum portabit, id est, pœnam pro proprio peccato. Hæc D. Thomas, ubi supra.*

IN OPPOSITVM verò est authoritas sacrae scripturae Ecclesiastici cap. 17. *Unicuique Deus mandauit de proximo.*

Item, Ecclesiast. 33. *Respicite, quoniam non mihi soli laborui, sed & omnibus exquirentibus disciplinam.* Item, ad Rom. 10. Apostolus dicit: *Cupiebam anathema esse pro fratribus meis.* Item, 1. ad Corinth. 13. *Charitas non querit quæ sua sunt.* Item, 2. ad Corint. 13. *Impendam et superimpendar in obsequium fidei vestræ.* Item, ad Galat. cap. 6. *Alter alterius onera portate, & sic adimplebitis legem Christi.* Item, ad Ephes. ca. 4. & ad Coloss. cap. 3. *Supportantes inuicem in charitate. &c.*

Atque hoc ipsum pluribus rationibus potest confirmari.

PRIMA RATIO. Quidquid est in natura, in ciuitate, in communi vita hominum, & legibus, non frustra; illud meliori modo est in Ecclesia scriptura & spirituali vita hominum. sed satisfactio est in natura, in ciuitate, in communi vita hominum, est in legibus, & non frustra: igitur satisfactio meliori modo est in Ecclesia, scriptura, & spirituali vita hominum, & non frustra.

puta vt proximus pro peccatis proximi satisfaciat Deo, nam alioqui frustra est calceus, cuius non est calceatio, teste Aristot. &c.

MAIOR A minori ad maius: nam quidquid est rerum in natura, hoc idem multò melius in gratia: similiter, quidquid boni est in Repub. & ciuitate, multò copiosius in Ecclesia Catholica, quæ est ciuitas Dei, &c.

MINOR est manifesta ex supradictis autoritatibus sacræ scripturæ. Sed & ipse M. T. Cicero suo scripto & exemplo, hoc idem probat & confirmat: nam lib. 1. Epistolarum Familiarium, Epist. 1. ad Pub. Lentulum Proconsulem, de se scribit sic: Ego omni officio, ac potius pietate erga te, ceteris satisfacio omnibus, mihi ipse nunquã satisfacio.

Ergo Satisfactio est in natura, in ciuitate, in communi vita hominum, & necessariò debet esse: nam alioqui magno bono priuaretur natura. VERVM ET CATHOLICVM est dogma: Quia Deus dat hominibus sua dona, vt alter alteri satisfaciat: sic medicus habet donum à Deo, vt satisfaciat infirmitatem patienti. vnde Isaias cap. 50. dicit: Dominus dedit mihi linguam eruditam, vt sciam sustentare eum, qui lassus est verbo. Sic pastori dat regimen, vt sciat satisfacere ouibus, &c. Sic militi dat artem militarem, vt sciat satisfacere Reipub. & Patriæ, &c. Et hæc est bona pars officii, iustitiæ, & charitatis Christianæ.

SECUNDA RATIO. Est in natura, in ciuitate, in communi vita hominum, in legibus multiplex officium, & multiplex satisfactio: igitur in Ecclesia necesse est, vt sit & est multiplex officium, & multiplex satisfactio.

CONSEQUENTIA à minori ad maius, vt suprà.

ANTECEDENS est D. Ambrosii in libris de Officiis, & M. T. Ciceronis, similiter in libris de Officiis.

Præterea, hoc officium multiplex, & multiplicem satisfactionem explicat etiam Diuus Thomas Aquinas, super caput 6. ad Galatas lect. 1. Nam si volunt suo spirituales satisfacere officio, debent secularium tam corporales quàm spirituales defectus patienter tollerare. Et hoc est, quod dicit Apostolus ad Roma. 15. cap. Debemus autem nos firmiores, imbecillitates infirmorum sustinere, & non nobis placere: vnusquisq; vestrum proximo suo placeat in bonum ad ædificationem. Etenim Christus non sibi placuit, sed sicut scriptum est Psalm. 68. *Impropria impropertium tibi ceciderunt super me.* Item, ad Rom. 14. Et 1. ad Thesal. cap. 5. *Infirmum autem in fide assumite,* &c. Debent

bent vicissim seculares si volunt officio satisfacere, spirituales honorare, & illis obedire in licitis & honestis. Item, Domini subditorum suorum debent defectus patienter tolerare. Et subditi vicissim debent dominis suis obedire, & pro se inuicem orare, si volunt officio satisfacere, &c. Ergo proximus pro peccatis proximi, potest & debet satisfacere.

TERTIA RATIO. Amicus pro amico potest debitum soluere: igitur proximus pro peccatis proximi potest satisfacere.

CONSEQUENTIA à simili.

ANTECEDENS probatur variis in vita communi exemplis.

QUARTA RATIO. Vbi est charitas & amicitia, ibi est officium & satisfactio. sed in Ecclesia Catholica est charitas & amicitia: igitur in Ecclesia Catholica est officium, & satisfactio: & per consequens proximus pro peccatis proximi potest satisfacere.

MAIOR vera: quia Apostolus 1. ad Corint. 13. dicit: *Charitas non est otiosa, & non quærit quæ sua sunt.*

MINOR: quia Christus Dominus mandauit in Ecclesia charitatem, Math. 22. Ioan. 13. *Mandatum nouum do vobis, vt diligatis inuicem, sicut dilexi vos, vt & vos diligatis inuicem.*

QUINTA RATIO. Vbi est iustitia, prudentia, iudicium, & discretio, ibi est officium, & satisfactio. sed in Ecclesia Catholica est iustitia, iudicium, prudentia, & discretio: igitur in Ecclesia Catholica est officium & satisfactio: & per consequens proximus pro peccatis proximi potest satisfacere.

MAIOR vera à Deffinitione. MINOR Math. cap. 5.

SEXTA RATIO. Vnus alteri potest mereri: igitur proximus pro peccatis proximi potest satisfacere.

CONSEQUENTIA ab Antecedentibus.

ANTECEDENS Math. 15. in exemplo mulieris Chananeæ patet: quæ ita satagebat; vt mereretur filiæ suæ, quæ erat tormentata à diabolo liberationem.

SEPTIMA RATIO. Christus pro nobis Deo patri satisfecit: igitur & nos debemus pro peccatis proximi Deo satisfacere.

CON-

CONSEQUENTIA ab autoritate & exemplo : Exemplum enim dedi vobis, vt quemadmodum ego feci, ita & vos faciatis : Dedit exemplum, dedit præceptum, Lucæ 10. *Cunim illius habe, & quodcumq; supererogaueris, ego cum rediero, reddam tibi.*

ANTECEDENS ad Colossen. cap. primo & secundo.

Hæc & alia sexcenta, possunt ad eam rem adferri argumenta. Sed si istis hæreticis nondum satis faciunt argumenta Catholicorum; audiant miseri Decretum Patrum Sacrosancti Concilii Tridentini, qui Sessio. 24. Canone 12. pronunciauerunt sic : *Si quis dixerit totam penam simul cum culpa remitti semper à Deo : satisfactionemq; penitentium non esse aliam, quàm fidem, qua apprehendunt Christum pro eis satisfecisse; Anathema sit.*

Item, ibidem Canone 14. *Siquis dixerit satisfactiones, quibus penitentes per Christum Iesum peccata redimunt, non esse cultus Dei, sed traditiones hominum, doctrinam de gratia, & verum Dei cultum, atq; ipsum beneficium mortis Christi obscurantes; Anathema sit.*

COROLLARIUM PRIMUM.

Nemo potest satisfacere Deo, nisi satisfecerit & proximo. Probat Corollarium Notabili septimo cap. 4.

Item probatur autoritate scripturæ 1. Ioan. 4. *Nos ergo diligamus Deum, quoniam Deus prior dilexit nos. Si quis dixerit, quoniam diligo Deum, & fratrem suum odit, mendax est. Qui enim non diligit fratrem suum quem videt; Deum quem non videt, quomodo potest diligere? Et hoc mandatum habemus à Deo; vt qui diligit Deum, diligat & fratrem suum.*

COROLLARIUM SECUNDUM. Contra Lutherum.

Satisfactio simpliciter paucorum est, sed satisfactio secundum quid, est communis. Probatio Corollarij patet conclusione 2. Item, probatur Notabili 1. cap. 2.

COROLLARIUM TERTIUM.

Nemini desperandum de Indulgentia, quicumque in toto corde conuersus, contrito corde egerit poenitentiam: quia nullum est peccatum, quod per veram poenitentiam non deleatur; sed poenitendum de omnibus.

Probatio Corollarij Notabili 7. cap. 2. Item, probatur autoritate scripturæ, Psalm. 40. *Nunquid, qui dormit non adiiciet vt resurgat.* Item, Psalm. 144. *Alleuat Dominus omnes qui corruunt, & erigit omnes celsos.* Item Psalm. 145. *Beatus cuius Deus Iacob adiutor eius, spes eius in Domino Deo ipsius, qui fecit cælum & terram, mare, & omnia quæ in eis*

in eis sunt. Qui custodit veritatem in seculum, facit iudicium iniuriam patientibus, dat escam esurientibus. Dominus soluit compeditos, Dominus illuminat cæcos. Dominus erigit elisos, Dominus diligit iustos. Dominus custodit aduenas, pupillum & viduam suscipiet, & vias peccatorum disperdet. Item Psalm. 146. Dominus sanat contritos corde, & alligat contritiones eorum. Similiter scriptura Noui testamenti. Saluator Matth. 9. Non enim veni vocare iustos, sed peccatores. Item, Matth. 11. Venite ad me omnes, qui laboratis, & onerati estis, & ego reficiam vos. Tollite iugum meum super vos, & discite à me, quia mitis sum & humilis corde; & inuenietis requiem animabus vestris: iugum enim meum suauis est, & onus meum leue. Item, ad Rom. cap. 14. Tu quis es, qui iudicas alienum seruum? Domino suo stat, aut cadit: stabit autem. Potens est enim Deus statuere illum. Item 1. ad Corinth. 10. Itaque qui se existimat stare, videat ne cadat. Item ad Ephes. 5. Propter quod dicit, Surge qui dormis, & exurge à mortuis, & illuminabit te Christus. Item, 1. ad Timoth. cap. 1. Fidelis sermo & omni acceptione dignus, quod Christus Iesus venit in hunc mundum peccatores saluos facere, quorum primus ego sum. sed ideò misericordiam consequutus sum, vt in me primò ostenderet Christus Iesus omnem patientiam, ad informationem eorum, qui credituri sunt illi in vitam æternam.

Porro de omnibus pœnitendum esse, docet sanctus Augustinus in libro de vera & falsa Pœnitentia cap. 9. Sunt, inquit, etiam peccata alia quæ omninò eripiunt vitam, nisi succurrat pœnitentia. Non enim omnis qui dicit mihi Domine, Domine, intrabit in regnum cælorum. Quare agenda est pœnitentia, vt deleantur crimina. Sed quoniam pœnitentia non omnis est bona, dicamus aliqua, quæ separant verum à falsa, sterilem à fructuosa. Sunt enim quos peccasse pœnitet propter præsentia supplicia: displicent enim latroni peccata, quando agitur de pœna: desit vindicta; reuertitur ad crimina. Ista est, pœnitentia non ex fide procedens, nec est charitate munita; sed sterilis & sine misericordia. Hæc non purgat conscientiam, nec lauat crimina: in hac nulla est spes veniæ: nulla expectatio indulgentiæ. Huic concordant, qui confitentur inuiti: non amore boni; sed vt fugiant damnum, vel incommodum seculi. Seruiunt mundo, quem amant: quærun't suam gloriam, quam anbelant: recipiunt mercedem, quam expectant. Si quis tali pœnitentia securus extiterit, & ad veram pœnitentiam de ista non conscenderit; deceptus & miser æternaliter peribit. Utilis ergo erit pœnitentia, si sit spontanea, Dominum quærens, quem amisisse doleat: ad illum anxians, præter quem non est vita. Sunt plures, quos pœnitet peccasse; sed non omninò, reseruantes sibi quædam in quibus delectentur, non animaduertens Dominum simul surdum & mutum à demonio liberasse, per

se, per hoc docens nos, nunquam nisi de omnibus sanari: si enim vellet ex parte peccata reseruari, habenti septem demonia, manente uno, proficere potuerat sex expulsis. Expulit autem septem, ut omnia crimina simul eijcenda doceret: legionem autem ab alio eijciens, neminem reliquit ex omnibus, qui liberatum possideret: ostendens, quod si etiam peccata sint mille, oportet de omnibus pœnitere. Laudatus est enim Dominus, quando eiecto demonio loquutus est mutus. Nunquam aliquem sanauit, quem omnino non liberauit: totum enim hominem sanauit in Sabbatho; quia & corpus ab infirmitate, & animam ab omni contagione liberauit, indicans pœnitentem oportere simul dolere de omni crimine orto in anima & corpore: scio enim Deum inimicum omni criminoso; quomodo ergo, qui crimen reseruat, de alio recipiet veniam? Sine amore Dei consequetur indulgentiam, sine quo nemo vnquam inuenit gratiam; hostis enim Dei est, dum offendit perseueranter. Quædam enim impietas infidelitatis est, ab illo, qui iustus & iustitia est, dimidiam sperare veniam: iam enim foret sine pœnitentia inuenire gratiam. Pœnitentia enim vera, ad baptismi puritatem confitentem conatur adducere. Recte enim pœnitens, quidquid sordium post purificationem in baptismo contraxit, oportet ut abluat, saltem lachrymis mentis: sed satis durus est, cuius mentis dolorem oculi carnis nequeunt declarare: sed sciat culpabiliter se durum, qui deflet damna temporis, vel mortem amici, & dolorem peccati lachrymis non ostendit. Non itaq; est, ut quis excuset se non habere fontem lachrymarum, qui nonnunquam lachrymis ostendit dolorem temporaliū. Hæc D. Augustinus vbi supra.

C O R O L L A R I U M Q V A R T U M.

Secundum verbum & sententiam Domini, cuicumque sub indulgentia plus dimittitur, ille plus debet diligere: nam cui minus dimittitur, minus diligit.

Probat Corollarium Notabili 7. cap. 3. & 4. Item, probatur Corollarium authoritate sacre scripturæ ad Rom. 15. *Gentes autem super misericordia honorare Deum.* Item, 1. Ioan. cap. 3. *Filioli mei, non diligamus verbo, neque lingua, sed opere & veritate.*

NOTA. Quia vnusquisq; particeps indulgentiarum, lege sacrosancti Euangelij, tenetur ad gratiarum actionem: nam illi nouem à lepra mundati, quia non egerunt gratias Christo Domino, medico & saluatori suo, quia se ingratos stultissimè ostenderunt, malè audiunt in Euangelio, Lucæ 17. & se maiori gratia & in melioribus beneficijs indignos coram vniuersali Ecclesia iudicant.

CON-

CONCLUSIO TERTIA.

Sicut alia media à Deo ordinata, sunt necessaria ad iustificationem: ita & indulgentiæ.

Probatio Conclusionis, patet Notabili quarto cap. 1.
Item, patet ex ventilatione Quæstionis.

COROLLARIUM PRIMUM.

Vota, Peregrinationes, Offertoria, & alia spiritualis vitæ exercitia, commendat sacra scriptura: nam per huiusmodi exercitia, homines vt plurimum consequuntur indulgentiam & iustificationem.

Probatio Corollarij, ponitur Notabili 6. cap. 1. 2. 3. Item, probatur apud Magistrum Sententiarum lib. 1. Distin. 37. Item, apud Diuum Thomam parte 1. Quæst. 8. Artic. 3.

COROLLARIUM SECUNDUM.

Qui peregrinantur, debent peregrinari non in feruore, qui sit ad tentationem: sed communicantes Christi passionibus. 1. Pet. 4.

Probatur Corollarium, Notabili 6. cap. 2. Item, probatur auctoritate scripturæ 1. ad Thimotheum cap. 4. *Ineptas autem, & aniles fabulas deuita, exerce autem te ipsum ad pietatem: nam corporalis exercitatio ad modicum utilis est; pietas autem ad omnia utilis est, promissionem habens vitæ quæ nunc est, & futuræ.*

COROLLARIUM TERTIUM

Ne despicias hominem auertentem se à peccato, neque improperes ei: memento quoniam omnes in corruptione sumus. Eccles. 8.

Probatur Corollarium Notabili 2. cap. 5. *Ne despicias hominem auertentem se à peccato.* LYRANVS, id est, Eum hypocritam, vel Papelardum vocando, sicut faciunt multi. *Memento, quoniam omnes in corruptione sumus.* id est, ad corruptionem tendimus; eò quòd ex elementis contrarijs compositi sumus. *Ne despicias hominem auertentem se à peccato.* DIONYSIVS CARTHVSIVS, id est, cùm talis sit honorandus, & in sua conuersione confirmandus, & corroborandus, *Neque improperes ei,* mala sua præterita, quæ à Deo iam sunt dimissa. Verumtamen si capitale crimen commisit, potest secundum ordinem iuris dijudicari, quamuis pœniteat. *Memento, quoniam omnes in corruptione sumus,* id est, originali peccato infecti, multumque peccatis obnoxij: *quia in multis offendimus omnes.* Iac. cap. 1. *Et si dixerimus*
N
quia

quia peccatum non habemus, nos ipsos seducimus. 1. Ioannis cap. 1. Idcirco ex consideratione propriæ calamitatis, alijs condolere discamus.

CONCLUSIO QVARTA.

QVamvis indulgentiarum nomen, non ita frequenter legatur in scripturis: res tamen ab origine mundi, semper adhuc fuit in usu.

Huius Conclusionis probatio, posita est in Notabili secundo, cap. 3. &c. Item, ex Conclusionem Prima, & Corollariis proximè sequentibus.

Item, Probatur autoritate Sacræ scripturæ, ad Hebr. cap. 9. *Habuit quidem & prius iustificationes culturæ, & sanctum seculare, &c.* Item, Apocalip. cap. 13. Et ad Hebr. 9. *Agnus occisus est ab origine mundi.* Item, Sapien. cap. 10. Salomon testatur: quia Deus Adamum eduxit à delicto suo. Item, Lucæ cap. 1. *Et misericordia eius à progenie in progenies, timentibus eum.*

PORRÒ D. AMBROSIVS super illis verbis Beati Ioannis Apostoli: *Agnus occisus est ab origine mundi*, dicit: *quia eius mors ab exordio generis humani in sanctis Patribus præfigurata est. In primo namq. homine præfigurata est, quando eo dormiente, Eva de costa eius facta est. Similiter & in Abel præfigurata est, qui à fratre Cain peremptus est. Præfigurata est et per Isaac, quem Pater in holocaustum obtulit Domino. Similiter & per Ioseph, quem fratres vendiderunt. Præfigurata est etiam mors eius in diversis sacrificiorum ritibus. Quoties ergo mors Christi à Sanctis Patribus, aut præfigurata, aut prædicta est, toties agnus occisus est.* Hæc D. Ambro.

LYRANVS super iisdem verbis: *Agnus occisus est ab origine mundi*, dicit hoc dupliciter potest intelligi. VNO MODO dispositiue: quia sic Deus disposuit, ab æterno mūdum facere: quæ quidem dispositio, potest dici quædam mundi origo, in quantum ad exemplar mundi præconcepti æternaliter à Deo, productus est mundus temporaliter in effectu. unde Boëtius lib. de consolatione. *Tu cuncta superno ducis ab exemplo: mundum mente gerens similem imagine formans.* Alio modo figuratiue: & sic ab initio mundi, Christus in Abel fuit occisus: nam occiso Abel innocentis, fuit figura occisionis huius agni: unde dicit D. Augustinus, quod fuit in Abel occisus, & in Prophetis exhononatus.

Fuit ergo signum figuraque Passionis Christi agnus, qui ab origine mundi occisus est: sed fuit & res simul: quia multa virtute futuræ passionis Christi, humano generi beneficia exhibebantur, vt patebit in Corol-

Corollario primo, &c. huius Conclusionis secundæ.

De tertia Conclusionē est certamen, & controuersia inter Scholasticos. Nam Dominicus à Soto Distin. 21. Quæst. 1. Arti. 3. ponit ea de re primam Conclusionem talem: INDVLGENTIARVM NOMEN INTER CANONICAS SCRIPTVRAS, ANTE QVADRINGENTOS ANNOS RELATVM LEGIMVS. *Prima enim scriptura, quæ de illo habetur, est C. illud. Quod autem, de pœnitentiis & remissionibus Alexandri Tertij, qui sedit Anno Domini 1160. ubi mentio fit de indulgentiis, quæ concedebantur in Dedicationibus Ecclesiarum, aut pontium. sed tamen illic non constituitur, tanquam res noua; sed memoratur veluti antiqua. Magister autem sententiarum, præcessit illum Pontificem viginti annis. Quare credibile est, sua etiam ætate in more illas indulgentias fuisse. Sed quia vidit ad remissionem peccatorum pertinere, non fecit de illis peculiarem mentionem. Quare neq; Hugo eius coætaneus, qui de sacramentis scripsit, de illis meminit.*

Sunt qui arbitrentur indulgentiarum concessiones, cœpisse à tempore Gregorij magni. De hoc autem nulla exstat historia, præterquam quod antiquissimæ stationes Romanæ ad Sanctorum Basilicas, documentum aliquod rei huius perhibent. Alij aiunt cœpisse quinquaginta annis antea: nempe sub Annum Domini 1090. quando sub Vrbanò Secundo congregata fuit Claramontana Synodus: ubi Gothfredus de Bullione, Lotharingiæ dux, cum ingenti Christianorum expeditione, ad bellum Hierosolymitanum delegatus est. In Synodo verò illa, nulla fit indulgentiarum mentio: sed quod milites rubea cruce signabatur in pectore. vnde diplomatis, quæ modò aduersus Turcas expediuntur, Cruciatæ nomen relictum est. Creduntur tamen illius Synodi indulgentiarum concessione, fuisse contentam in parte illa decisa decretalis, ad liberandam terram sanctam de Iudæis. Meminit tamen earundem indulgentiarum, quæ accedentibus in terræ sanctæ subsidium conceduntur, Innocentius Tertius cap. Excommunicamus, de Hæretic. Qui quidem Pontifex, in Concilio Lateranen. Canonem edidit, qui refertur C. cùm ex eo, de pœniten. & remissione, Anno Domini 1200. ubi mentio fit antiquæ formæ indulgentiarum, quæ in subsidium hospitalium conceduntur, cohibenturq; Episcopi, ne indiscretus indulgentias largiantur. Postea successit Innocentius Quartus, qui in Concilio Lugdunen. eundem Canonem confirmavit. Deinde Bonifacius Octauus, qui circa Annum Domini 1300. commemorans, quanta fuerit antiquitus indulgentiarum, copia concessa visitantibus Apostolorum limina, indulgit plenariam indulgentiam in anno Iubilei, in Extrauag. Antiquorum de pœniten. & remissione. Ac demum Clemens Sextus, post annos quadraginta

in allegata Extrauag. vnigenitus latissimum sermonem de thesauro Ecclesie per indulgentias dissipando fecit. Non ergo indulgentiarum vsus res est tam noua, quam Lutherus contra propriam scientiam affirmat. Sub ætate ergo Innocentij Tertij Altisiodorensis, Alexander de Ales, Albertus magnus, & Sanctus Thomas de indulgentiis scribere orsi sunt. Hæc Dominicus à Soto. qui secunda Conclusionem ibidem tempore Apostolorum, indulgentias semper fuisse in vsu affirmat, & probat scriptura 2. Corint. 2. quo loco legitur S. Paulus in cæstusoso, à suo flagitio, & crimine conuerso & pœnitentiam agenti, pœnam quam illi prius imposuerat, postea relaxasse, qua de re latius diximus, Notabili tertio, cap. 4. Fuerunt igitur indulgentiæ in vsu tempore Sanctorum Apostolorum. Verùm enimverò, an fuerint quoque sub Moyse; hoc opus, hic labor est. Nam D. Ambrosius super Psalm. 38. videtur sentire, quòd non: dicit enim: Sciebat, inquit, Propheta Dauid, indulgentias non esse iis, qui secundùm Aaron erant sacerdotibus attributas, sed Euangelio seruatas: sicut plenius Notabili tertio, cap. 4. diximus.

Atque hoc ipsum pluribus Rationibus potest confirmari.

PRIMA RATIO. Qui habebant legem peccati, non habebant indulgentiam. sed antiqui in synagoga habebant legem peccati: igitur antiqui in synagoga non habebant indulgentiam.

MAIOR vera à Repugnantibus.

MINOR est Archangeli Gabrielis apud Daniele cap. 9. *Ut consummetur præuaricatio, & finem accipiat peccatum, id est lex, & deleatur iniquitas, & adducatur iustitia sempiterna, id est Euangelium.*

MINOR probatur: Quibus dominatur peccatum, illi habent legem peccati & mortis. sed antiquis in Synagoga dominatur peccatum: igitur antiqui in Synagoga habebant legem peccati & mortis, & per consequens non habebant indulgentiam. MAIOR vera.

MINOR Dan. 9. Item, ad Galat. 3. Item, ad Roma. 7. *An nescitis fratres, quia lex in homine dominatur, quanto tempore uiuit, &c. lege totum.*

SOLVTIO, D. AVGVSTINVS in lib. octoginta trium Quæstionum, Quæst. 66. Tomo 4. pag. 407. B. Soluit argumentum sic: *Lex autem peccati dicitur, non quia lex ipsa peccatum est: sed quia peccatoribus imponitur, ideò etiam lex mortis: quia stipendium peccati mors: aculeus mortis peccatum: virtus autem peccati, lex. Peccando enim ad mortem labimur: uehementius enim peccamus lege prohibente, quàm si nulla lege prohiberemur. Accedente autem gratia id ipsum, quod lex onerosè iusserat, iam sine onere, ac libentissime implemus. Lex ergo peccati & mortis, id est, quæ imposita est peccantibus, atq; morientibus, iubet tantum ne concupiscamus, &*
tamen

tamen concupiscimus. Lex autem spiritus vitæ, quæ pertinet ad gratiam, & liberat à lege peccati, & mortis: facit, ut non concupiscamus, & impleamus iussa legis: non iam serui legis per timorem; sed amici per charitatem, & serui iustitiæ, unde illa lex promulgata est. Iustitiæ autem non seruiliter, sed liberaliter seruiendum est, id est, charitate potius quàm timore. Hæc D. August. vbi supra.

SECUNDA RATIO. Quicunque participes sunt indulgentiæ, acquirunt aliquid de perfectione. Nulli Iudæi poterant aliquid acquirere de perfectione: igitur nulli Iudæi fuerunt participes indulgentiæ, & per consequens in synagoga non fuerunt indulgentiæ.

MAIOR vera à Definitione.

MINOR est Apostoli ad Hebr. cap. 7. *Reprobatio quidem fit præcedentis mandati propter infirmitatem eius, & inutilitatem: nihil enim ad perfectum adduxit lex.*

SOLVTIO, Non valet Consequentia, quia minor est falsa: nam datur instantia, Ezechiel. 18. *Dominus dicit, in iustitia sua quam operatus est viuet: ergo & in lege, ut Prophetæ testantur, fuit iustitia & perfectio iustitiæ, non simpliciter, sed secundum quid, & secundum mensuram donationis Dei: & secundum maiorem vel minorem fidem & obseruationem legis, & mandatorum Dei.* SED SI contrà instes: quia ibi fuit minor perfectio, quia minor iustitia: ergo fuit minor indulgentia. RESPONDEO, Hoc ita fieri potuisse, melius Deus scit: verumtamen maius & minus non variant speciem.

TERTIA RATIO. Vbi est indulgentia, ibi est libertas. sed in Synagoga nulla fuit libertas: igitur in Synagoga nulla fuit indulgentia.

MAIOR vera à Definitione.

MINOR est Apostoli ad Galat. 3. & 4. *Scriptum est, quoniam Abraham duos filios habuit &c. Hæc sunt duo testamenti, unum quidem in monte Sinai in seruitutem generans, &c.*

SOLVTIO. Negatur Consequentia, quia minor est falsa, nam datur instantia: Apostolus enim ad Galat. cap. 3. dicit: *Lex propter transgressionem posita est.* Atqui non omnes transgressi sunt legem Dei. unde Dominus ad Eliam 3. Regum cap. 19. & ad Roma. 11. dicit: *Reliqui mihi septem millia virorum, qui non curuauerunt genua ante Baal.*

SED contrà est, quod tenet communis sententia: quia ipsemet Magister & saluator noster Christus Dominus, Ioan. cap. 3. dicit: *Et*

sicut Moyses exaltauit serpentem in deserto; ita exaltari oportet filium hominis: ut omnis qui credit in eum non pereat, sed habeat vitam æternam.

LYRANVS super cap. 21. Numerorum. Ergo aspicientes illum serpentem, recognoscebant afflictionem illam sibi à Deo iuste illatam, petentes ab eo misericordiam, & indulgentiam, & ipse sanabat eos. Ratio autem mystica est: quia serpens ille figurabat Christum passurum in cruce: ut habetur Ioannis 3. per cuius intuitum, & fidem, & deuotionem sanamur à moribus Sathanae.

Huc accedit, quod D. Augustinus in Psalm. centesimum trigessimum secundum, *Ecce quàm bonum, & quàm iucundum, &c.* scripsit. Verùm tamen dilectissimi, inquit, si consideremus de illo pariete Circumcisionis, ibi prius natus est benedictio: num enim omnes Iudæi perierunt? Et unde Apostoli, filij Prophetarum, filij excussorum? Unde illi Quingenti, qui Dominum post resurrectionem viderunt, quod commemorat Apostolus Paulus? Unde illi centum viginti, qui simul erant in vno loco post resurrectionem Domini, & ascensionem in cælum: quibus in vno loco constitutis superuenit Spiritus sanctus die Pentecostes missus de cælo, sic missus sicut promissus? Omnes inde erant &c. Ergo ipsi prius audierunt benedictionem, & indulgentiam, primi audierunt, sed non soli audierunt: Non enim usq; ad illos ista dilectio & unitas fratrum venit: venit enim et ad posteros ista charitas, exultatio, votum Deo, adde benedictio & indulgentia.

Quo loco D. AUGUSTINVS docere & tenere videtur benedictiones & indulgentias, iam antè in veteri Testamento in vfu fuisse: vnde saluator & legislator noster Christus Dominus, Math. cap. 5. dicit: *Nolite putare, quoniam veni soluere legem aut prophetas: non veni soluere, sed adimplere. Amen quippe dico vobis, donec transeat cælum & terra, iota vnum, aut vnus apex non præteribit à lege, donec omnia fiant, &c.*

Item Dominicus à Soto Distin. 21. quæst. 2. Artic. 1. dicit sic: *Ceremonia verò hæc Anni Iubilei, ex veteri lege desumpta est: nam instar quinquaginta dierum à Paschate usq; ad Pentecosten, iubeat Deus, ut quilibet quinquagesimus annus esset sanctus, ubi diuenditæ possessiones, ad suos dominos reuertebantur. Instar ergo illius, fiunt nunc remissiones plenissimæ iubilei.*

Atque hoc ipsum pluribus Rationibus potest confirmari.

PRIMA RATIO. Singularia sunt priora, & propinquiora sensui: igitur singularis indulgentia prior est, quàm vniuersalis. Et per consequens, prius fuerunt indulgentiæ in lege & Synagoga, quàm in Ecclesia Catholica.

CONSEQUENTIA à singularibus ad vniuersalia.

ANTE-

ANTECEDENS est Aristotelis lib. 1. Posteriorum, vbi dicit: Singularia sunt priora & propinquiora sensui; sed tamē vniuersalia notiora sunt singularibus. Item, probatur Lucae 24. cap.

SECUNDA RATIO. Vbicunque ponuntur accidentia & passionēs alicuius subiecti; ibi semper necessariō præsупponitur ipsum subiectum. sed in veteri Testamento expresse ponuntur accidentia, & passionēs Iubilei & indulgentiarum: igitur in veteri Testamento fuerunt iubilei & indulgentiæ.

MAIOR vera à necessariō consequentibus.

MINOR, quia ponitur expresse locus, tempus, &c. vti in Notabili 5. sufficienter probatur.

TERTIA RATIO. Nihil est in intellectu, nisi prius fuerit in sensu: igitur & in Euangelio & Ecclesia Catholica, nihil est quod prius non fuisset in lege & Synagoga: & per consequens in lege & Synagoga fuerunt indulgentiæ.

CONSEQUENTIA, à simili.

ANTECEDENS est Aristotelis lib. 1. Physico. & 2. de anima.

QUARTA RATIO. Moyses, Maria soror Moyse, Aaron, Heli senex, Dauid, Ozias, Ezechias, Achab, & alij, qui peccauerant in veteri lege, consequuti sunt indulgentiam: ergo fuerunt in veteri lege indulgentiæ.

CONSEQUENTIA, ab authoritate scripturæ, & à Signo.

ANTECEDENS, Est omnium Scholasticorum, & probatur in singulis exemplis, Notabili quarto capite 2.

QUINTA RATIO. Vbi fuit benedictio, ibidem fuit & indulgentia. sed in veteri lege fuit penes sacerdotes benedictio: igitur in veteri lege fuit & indulgentia.

MAIOR vera à Cognatis.

MINOR Numerorum cap. 6. *Locutusq; est Dominus ad Moysen dicens: Loquere Aaron & filiis eius: sic benedicetis filiis Israël, & dicetis eis: Benedicat tibi Dominus & custodiat te. Ostendat Dominus faciem suam tibi, & misereatur tui. Conuertat Dominus vultum suum ad te, & det tibi pacem. Inuocabuntq; nomen meum super filios Israël, & ego benedicam eis.*

SEXTA RATIO. Vbi fuit vna communis fides, ibidem

fuit vna communis indulgentia. sed in lege, & antè fuit vna cōmunis fides, quæ nunc est, id est in Ecclesia: igitur in lege, & antè fuit vna communis indulgentia: & certe quidem: quia bonum in quantum communius, in tantum melius.

MAIOR vera, quia scriptum est Actuum 15. *Et qui nouit corda Deus, testimonium perhibuit, dans illis Spiritum Sanctum, sicut & nobis: & nihil discreuit inter nos & illos, fide purificans corda eorum.*

MINOR est Sanctorum Patrum & Doctorum Scholasticorum, vt latius probatur Corollario tertio, eiusdem Conclusionis 4.

SEPTIMA RATIO. Vbi fuit vnum commune baptisma, ibidem fuit vna communis indulgentia. sed in lege fuit vnum commune baptisma: igitur in lege fuit vna communis indulgentia.

MAIOR vera.

MINOR I. ad Corinth. cap. 10. *Patres nostri omnes in Moyse baptizati sunt, in nube & in mari.* Item, ad Ephes. cap. 4. *Vnus Dominus, vna fides, vnum baptisma.*

OCTAVA RATIO. Vbi fuit Pœnitentia, ibidem & indulgentia. sed in lege fuit pœnitentia: igitur in lege fuit indulgentia.

MAIOR vera ab Antecedentibus.

MINOR patet in scripturis & exemplis: vnde Dauid Psalm. 101. *Quia cinerem tanquam panem manducabam: & potum meum cum fletu miscebam, &c.*

NONA RATIO. Vbi fuit Sacra communio, ibidem & indulgentia. sed in lege fuit sacra communio: igitur in lege fuit indulgentia.

MAIOR vera.

MINOR I. ad Corinth. cap. 10. *Patres nostri omnes eandem escam spiritualem manducauerunt, & omnes eundem potum spirituales biberunt: bibebant autem de spiritali conſequēte eos petra, petra autem erat Christus.*

NOTA, quando dicit Apostolus: *Nolo vos ignorare fratres, quoniam patres nostri omnes sub nube fuerunt. &c.* D. Thomas. Hoc dupliciter legitur: VNO MODO, de bonis & malis communiter: ALIO MODO, de malis specialiter. Verūmenimuerò, quia Iudæi sub Moyse vti sunt gratia sacramentorum, vtpotè Baptismi & Eucharistiæ, tunc arguo sic: Quibus Deus ostendit, & dedit gratiam Baptismi & Eucharistiæ, credibile est, quia illis non negauit sacramentum pœnitentiæ, & gratiam indul-

indulgentiæ. sed Deus Iudæis ostendit, & dedit gratiam Baptismi & Eucharistiæ: igitur credibile est, quia Deus Iudæis nō negauit sacramentum Pœnitentiæ, & gratiam indulgentiæ. MAIOR est vera à maiori. Si Deus dedit illis quod maius, dedit & quod minus. MINOR est Apostoli I. ad Corinth. cap. 10.

CONTRA, si tu dicis, quia Iudæi Baptizati sunt, & communicauerunt manna, sed figuraliter, vt dicit Lyra. non sacramentaliter: tunc respondet Anselmus Cantuarien. super I. ad Corinth. 10. *Iudæi baptizati sunt; quia signum baptismi acceperunt*: quod tantundem valuit eis credentibus, quantum valet nobis ipse Baptismus; quia, vt dicit Diuus Thomas, hoc Baptismo purgati sunt per fidem, & à peccatis, & ab ignorantia, submersis Ægyptijs. Exod. 14. *Timuit populus Dominum, & crediderunt Domino, & seruo suo Moysi.* Fuerunt ergo illis communia sacramenta; sed non communis gratia. Ita & nunc Baptismus, & Eucharistia, sunt nobis omnibus communia sacramenta; sed non virtus Baptismi & Eucharistiæ, iuxta illud: Sumunt boni, sumunt mali, forte tamen inæquali, vitæ vel interitus. Ergo non sufficiunt sacramenta Ecclesiæ suscepta, non sufficiunt indulgentiæ, nobis postea peccantibus; sicut neque Iudæis sacramenta & beneficia, quin postea punirentur. Sed ita vtamur sacramentis, ita vtamur Pœnitentia, & indulgentia; vt caueamus à peccatis: quia alias puniemur sicut Iudæi, de quibus dicitur: *Sed non in pluribus eorum beneplacitum est Deo: nam prostrati sunt in deserto.*

NOTA: quia Apostolus manna vocat escam spiritualem, & aquam de petra potum spiritualem, cū esset & manna corporalis, & potus ille corporalis: sed quia vtrumque miraculosè datum; propterea, quia & manna spiritualis, & aqua spiritualis erat, quò ad causam, hoc est, à spirituali, non à naturali virtute producta: mysterio siquidem angelorum producebatur manna, Sapient. 16. *Panem de cælo præstitisti eis, & omnes eundem potum spiritualem*, id est, aquam de petra. Numer. 20. *Loquimini ad petram, & ipsa dabit vobis aquam. Percussit petram, & fluxerunt aquæ. Bibebant autem de petra spirituali*: quæ dicitur spiritualis, propter effectum miraculosum, & propter futuri signum. D. Thomas. *Nota quàm diu Iudæi stabant in fide Patrum suorum, tam diu utebantur sacerdotio, lege, indulgentia, & regno: sed postquàm recesserunt à fide; & sacerdotium, & legem, indulgentias, regem, & regnum amiserunt, & sic excisi sunt, & Christiani per fidem in locum illorum sunt assumpti, & insiti.* Rom. 11.

DECIMA RATIO. Vbi fuerunt sacrificia pro peccatis, ibi fuerunt

fuerunt indulgentiæ. sed in lege fuerunt sacrificia pro peccatis: igitur in lege fuerunt indulgentiæ.

MAIOR vera. MINOR in Leuitico. Vnde Apostolus ad Hebræ. cap. 9. *Si enim sanguis hircorum, & taurorum, & cinis vitulæ aspersus, inquinatos sanctificat ad emundationem carnis: quanto magis sanguis Christi, qui per Spiritum sanctum semetipsum obtulit immaculatum Deo, emundabit conscientiam nostram ab operibus mortuis, ad seruiendum Deo viuenti? Et ideo noui testamenti mediator est; ut morte intercedente, in redemptionem earum præuagationum, quæ erant sub priori testamento, remissionem accipiant, qui vocati sunt æternæ hereditatis.*

VNDECIMA RATIO. Vbi fuit sanctificatio populi, ibi fuit indulgentia. sed sub Moyse in lege fuit sanctificatio populi: igitur sub Moyse in lege fuit indulgentia.

MAIOR à definitione. MINOR Exodi 19. Deus præcipit Moyfi: *Vade ad populum, & sanctifica illos hodie, & cras, lauentq; vestimenta sua, & sint parati in diem tertium. In die enim tertia descendet Dominus coram omni plebe, super montem Sinai. &c. tunc sequitur: Descenditq; Moyses de monte ad populum, et sanctificauit eum, & lauerunt vestimenta sua. etc.*

D E C R E T V M.

Clemens Sextus in Extrauagan. cap. Vnigenitus. *De Pœnitentijs & remissionibus Christus inquit, pretioso suo sanguine nos redemit, quæ in ara crucis innocens immolatus, non guttam sanguinis modicam, quæ tamen propter unionem ad verbum pro redemptione humani generis sufficisset; sed copiose velut quoddam profluvium noscitur effudisse. Ne autem superuacua, inanis, & superflua esset tantæ effusionis misericordia, thesaurum militanti Ecclesiæ acquisiuit; ut sic sit infinitus thesaurus hominibus, quo qui vti sunt, participes facti amicitie Dei. Quem quidem thesaurum per Pontifices Romanos commisit fidelibus salubriter dispensandum, & proprijs & rationabilibus causis, nunc pro tali, nunc pro partiali remissione pœnæ temporalis pro peccatis debitæ, tam generaliter, quàm specialiter (prout eum expedire cognoscerent) verè pœnitentibus & confessis misericorditer applicandum. Ad cuius quidem thesauri cumulum, Beatæ Dei genitricis, & omnium electorum, à primo iusto vsque ad ultimum, merita, adminiculum præstare noscuntur. De cuius thesauri minutione, seu consumptione, non est aliquatenus formidandum, tam propter infinita Christi merita, quàm pro eo, quod quanto plures ex eius applicatione tribuntur ad iustitiâ, tantò magis accre-*

accrescit ipsorum cumulus meritorum. Hęc ille, in loco superius allegato.

COROLLARIUM PRIMVM.

Indulgentiarum vsus in Ecclesia non est res noua, vt falsò credunt Hæretici: quia sicut in lege sub Moyse, sacerdotibus & prophetis Iudæi suo modo necessariò indulgentiis utebantur; ita in Euangelio, sub Petro Apostolis, & successoribus Petri, per traditionem vsque adhuc Christiani indulgentiis necessariò vtuntur.

Probatur Corollarium, Notabili secundo, cap. 3. 4. 5. 6.

Item, probatur autoritate scripturæ, Numerorum cap. 21. Cùm enim propter murmurationem Iudæorum, contra Dominum in deserto, Dominus misisset in populum ignitos serpentes: ad quorum plagas & mortes plurimorum, venerunt ad Moysen, atque dixerunt: *Peccauimus, quia locuti sumus contra Dominum, & te. Ora, vt tollat à nobis serpentes. Onuit Moyses pro populo. Et locutus est Dominus ad eum: Fac serpentem æneum, et pone eum pro signo. Qui percussus aspexerit eum, uiuet.* Hoc signum serpentis, ipsemet Magister & saluator noster Christus Dominus, ore suo sanctissimo, Ioann. cap. 3. exponit, meritum futuræ passionis suæ: vnde habet Ecclesia cælestem thesaurum indulgentiarum. Per signum igitur futuræ passionis Messia Christi, sub illa plaga, Iudæi duce Moyse, indulgentiam consequebantur & sanabantur. Ergo Iudæi sub Moyse necessariò indulgentiis utebantur, sicut & nunc Christiani sub Clemente Octauo Summo Pontifice Romano, necessariò indulgentiis vtuntur.

Vnde Apostolus 1. ad Corint. 10. *Nolo enim vos ignorare fratres, quoniam patres nostri omnes sub nube fuerunt, & omnes mare transierunt, & omnes in Moyse baptizati sunt in nube, & in mari: Et omnes eandem escam spiritualem manducauerunt: & omnes eundem potum spiritualem biberunt. Bibebant autem de spiritali consequente eos petra, petra autem erat Christus, &c.* Hęc autem omnia in figura contingebant illis: scripta sunt autem ad correptionem nostram. etc. Similiter Exod. 11. & 12. Similiter tempore belli, vt scriptum est Exodi cap. 17. *Cumq; leuaret Moyses manus, vincebat Israhel: sin autem paululum remisisset, superabat Amalech.* Patres exponunt & docent Moysen manus in figura, & signo crucis leuasse, & per signum crucis victoriam Iudæos reportasse.

Similiter sub Ezechiele Propheta, Ezechiel. cap. 9. scriptum est: *Et dixit Dominus ad virum, qui indutus erat lineis: Transi per mediam ciuitatem in medio Ierusalem, & signa, Tau, super frontes virorum gentium, & dolentium, super cunctis abominationibus, quæ fiunt in medio eius. Et illis dixit, audiente me: Transite per ciuitatem, sequentes eum, & percutite*

percutite. Non parcat oculus vester, neq. misereamini. Senem, adolescentulum, & virginem, paruulum, & mulieres interficite vsq. ad internecionem. Omnem autem, super quem videritis Tau, ne occidatis, & à Sanctuario meo incipite.

COROLLARIUM SECUNDUM.

Moyfes in passione & improperiis Christi, maiores æstimauit repositas diuitias, quàm in thesauro Ægyptiorum: & propterea, vt esset particeps promissionum, & indulgentiarum, magis eligebat affligi cum populo Dei, quàm temporalis peccati habere iucunditatem, ad Hebræ. vndecimo.

Probatio Corollarii, patet Conclusione secunda, Corollario primo, & sequentibus.

Item, patet autoritate sacre scripturæ Psalm. 83. *Elegi abiectus esse in domo Dei, quàm habitare in tabernaculis peccatorum.*

Pro maiori verò euidencia Corollarii, secundum Anselmum Cantuarien. Sciendum est: quia Moyfes cum esset puer, adoptatus est in filium à filia Pharaonis, quæ iuxta Iosephum vocabatur Thermur, nec habebat legitimam prolem: & ideò volebat, vt Moyfes post patrem suum succederet in regnum. Moyfes verò, cum creuisset fide succensus, et regnum despiciens cum idololatria, negauit iuxta Apostolum, se esse filium filię Pharaonis, & reiecit regiam dignitatem, magis eligens affligi, & variis iniuriis subiici cum populo Dei, qui seruiebat in luto, & latere; quàm habere iucunditatem temporalis ac transitorij peccati: hoc est, fide suadente, maluit, & super omnia elegit, affligi propter Deum ad bonam, quàm iucunditatem eorum in quibus erat peccatum, & quæ citò transeunt viuere. Peccatum enim putauit se lætari in aula, dum fratres sui affligerentur. Ergo postquam creuisset, egressus est ad fratres suos filios Israël, & vidit afflictionem eorum: ipse dico, æstimans improprium Christi esse diuitias maiores thesauro Ægyptiorum: improprium Christi, id est, quod patetur cum populo pro Christo: vel quod significaret improprium inferendum Christo Psalm. 68. post longa secula: vel quod sustinuit à suis, sicut & Christus postea à suis. Hoc improprium magis elegit ipse, & minus credidit opibus Ægyptiorum: quia per id æternis diuitiis se locupletari credebat, si pro Christo contumelias, & opprobria sustineret. Nam aspiciebat plena fide, in remunerationem æternam, quam Christus pro se patientibus erat daturus: hoc est, idcirco elegit esse pauper, & despicabilis temporaliter apud homines: quia sursum cor habebat, & de æternis honoribus cogitabat, quos se per paupertatem, et patientiam adepturum sperabat. Hæc Anselmus Cantuarien. super cap. ii. ad Hebræos. Ergo Moyfes in Passione & impro-

improperiis Christi, maiores æstimauit repositas indulgentiarum diuitias, quas elegit, & prætulit; quàm in thesauris Ægyptiorum, quos spreuit, & reliquit cum idôlis & regno.

COROLLARIUM TERTIVM.

Quoniam passio Christi, hoc egit implenda seu futura, quod iam facit impleta, atque præterita: propterea fides & indulgentiæ, tam veteris quàm noui Testamenti, subiecto sunt ædem, sed ratione differunt: D. Augustinus.

Probatur Corollarium Notabili secundo, cap. 2. 3. 4. 5. Item, Notabili 4. cap. 2.

Item, probatur autoritate scripturæ vniuersalis, ad Roma. cap. 3. *Non enim est distinctio: Omnes enim peccauerunt, et egent gloria Dei.* Item, 1. ad Corint. 10. vbi Apostolus dicit: *Nolo enim vos ignorare fratres, quoniam patres nostri omnes sub nube fuerunt: & omnes mare transierunt: & omnes in Moyse baptizati sunt, in nube, & mari. Et omnes eandem escam spiritualem manducauerunt: et omnes eundem potum spiritualem biberunt. Bibebant autem de spiritali consequente eos petra, petra autem erat Christus.* Item, 1. Petri cap. 1. *De qua salute exquisierunt atque scrutati sunt Prophetæ, qui de futuro in vobis gratia prophetauerunt: scrutantes, in quod vel quale tempus significaret in eis spiritus Christi, pronuntians eas, quæ in Christo sunt, passionem et posteriores glorias, quibus reuelatum est: quia non sibiipsis, nobis autem ministrabant ea, quæ nunc nunciata sunt vobis per eos, qui Euangelizauerunt vobis, Spiritu sancto misso de cælo, in quem desiderant angeli prospicere.*

PRO MELIORI EVIDENTIA COROLLARIUM sciendum est: quia eadem est fides antiquorum & nostra, vt docent copiosè sancti Patres, & Doctores scholastici: Nam D. Gregorius Magnus Homelia 16. super Ezechielem, super illis verbis Ezechiel. 40. *Et mensura una frontium ex utraque parte. Ex utraque enim, inquit, parte, est mensura frontium: quia patres nostri, vel prius à veteri, vel nunc à nouo testamento venientes, in una mediatoris fide conueniunt.* Idem, Homel. 17. super Ezechielem: *Sed qui præibant et qui sequebantur, clamabant: Hosanna. Præcessit quippè Iudaicus populus, sequutus est gentilis: & quia omnes electi, siue qui in Iudæa esse potuerunt, siue qui nunc in Ecclesia existunt, in mediatorem dei et hominum crediderunt, et credunt; qui præeunt, & qui sequuntur, Hosanna clamant. Hosanna autem latina lingua, salua nos dicitur: ab ipso enim salutem & priores quæsierunt, & præsentem quærunt, & benedictum qui venit in nomine Domini confitentur: quoniam una spes, una fides est præcedentium, atque sequentium populorum.* Eadem ergo

fides à Iudæis ad gentes est translata, & manet integra in Ecclesia sancta Catholica. D. AMBROSIVS lib 5. super caput 7. Lucæ, titulo de missione discipulorum Ioannis ad Iesum prope finem, dicit sic: *Quia sicut fides à veteri incipit testamento; ita impletur in nouo.*

D. AVGVSTINVS Epistola 89. ad Hilarium: *Ut sciamus etiam antiquos iustos quicunque esse potuerunt, non nisi per eandem fidem liberatos, per quam liberamur & nos, fidem scilicet incarnationis Christi, quæ illis prænunciabatur, sicut à nobis facta annuntiatur. &c.* Vnde & Apostolus 2. ad Corinth. cap. 4. dicit: *Habentes autem eundem Spiritum fidei. &c.* Idem, Epistola 157. ad Optatum: *Eadem namq; fides est, inquit, nostra & illorum: quoniam hoc illi crediderunt futurum, quod nos credimus factum.* Idem, de peccato originali, contra Pelagium & Cælestinum, lib. 2 cap. 25. *Eadem quippe & ipsi mundabantur fide, qua & nos. &c.* Idem repetit li. 10. Confess. cap 43. Idem Epistola 48. ad Vincentium, prope finem. Idem Episto. 115. circa medium. Idem lib. de vera & falsa Pœnitentia cap. 6. dicit: *Omnis bonus ante aduentum Domini saluus factus est, per venturum.* Idem de natura & gratia contra Pelagianos cap. 44. *Ea quippe fides iustos sanat antiquos, quæ sanat & nos, id est, mediatoris Dei, & hominum, hominis Iesu Christi, fides sanguinis eius, fides crucis eius, fides mortis & resurrectionis eius. Habentes ergo eundem Spiritum fidei, & nos credimus, propter quod & loquimur.*

D. HIERONYMVS super caput 2. ad Galat. *Sanctos autem, qui antiquitus fuerunt, ex fide Christi iustificatos: siquidem Abraham vidit diem Christi, & lætatus est. Et Moyses maiores diuitias æstimauit thesauro Ægyptiorum, improprium Christi: aspicebat enim in remunerationem. Et Isaias vidit gloriam Christi, vt Ioannes Euangelista commemorat: & Iudas de omnibus generaliter: Commonere, inquit, vos volo, scientes semel omnia, quoniam Iesus populum de terra Ægypti saluans, secundo eos, qui non crediderunt, perdidit.*

NOTA. Quia D. Hieronymus ibidem fidem Patriarcharum, Prophetarum, & antiquorum, fidem imperfectam appellat: ergo Deus perfectiorem fidem requirit in Christianis. Vnde Saluator Matth. ca. 5. *Nisi abundauerit iustitia vestra plus quàm Scribarum & Phariseorum, non intrabitis in regnum cælorum.* Hæc eadem est sententia Doctorum Scholasticorum. Vnde D. Thomas super cap. 11. ad Hebræ. Lect. 5. *Eadem est, inquit, fides antiquorum quæ & nostra. &c.* Est ergo unus Deus, unus mediator, una fides, unum Baptisma, una oblatio, qua consumauit in æternum sanctificatos. ad Hebræ. cap. 10.

NOTA. Quia patres, vt D. Ambrosius & D. Augustinus, &c. Fidem appellant Regnum: ergo toto cap. 11. ad Hebræ. Apostolus tractat de fide

fide tam Iudæorum, quàm Christianorum in communi.

COROLLARIUM QVARTVM.

Quia indulgentiæ veteris testamenti, figura & vmbra fuerunt indulgentiarum Noui testamenti: itaque scripturæ, quæ leguntur de Iubileis & indulgentijs Veteris testamenti, sunt priuilegia Iubileorum & indulgentiarum Noui testamenti.

Probatio Corollarij patet Notabili 2. cap. 3. 4. 5. 6. 7.

Item, probatur autoritate scripturæ 1. ad Corinth. 10. *Omnia in figura contingebant illis.* Item, probatur testimonio D. Augustini, qui lib. 4. cap. 1. contra Faustum Manichæum dicit sic: *Veteris testamenti testificatio fidem Nouo conciliat. Unde Dominus, posteaquam resurrexit à mortuis, seq; non solum intuendum discipulorum oculis, sed etiam contrahendum manibus obtulit, ne quid tamen cum suis mortalibus & carnalibus sensibus fallaciter agi arbitrentur, magis eos de veterum librorum testificatione firmavit, dicens: Oportebat impleri omnia, quæ scripta sunt in lege Moysi, & Prophetis, & Psalmis de me. Non itaq; spes nostri in temporalium rerum promissione defixa est, quandoquidem nec ipsos illius temporis sanctos, & spirituales viros, Patriarchas & Prophetas, his terrenis rebus fuisse deditos, credimus. Intelligebant enim, reuelante sibi spiritu Dei, quid tempori illi cognueret, & quibus modis Deus per illas omnes res gestas & dictas futura figuranda, & prænuncianda decerneret, magisq; desiderium eorum de Nouo testamento erit; sed præsens functio corporalis ad significanda noua ventura pollicitationibus veteribus præbebatur. Ita illorum hominum non tantum lingua, sed & vita prophetica fuit: carnalis autem populus promissis vitæ præsentis inhærebat, de quo tamen etiam populo nihilominus significabantur futura.* Hæc D. Augustinus vbi suprâ.

NOTANDVM verò, Si quis fortè reiiciat authoritates scripturæ veteris Testamenti, huiusmodi cauendum & metuendum est, ne incidat in periculofam hæresim Manichæorum: qui reiiciunt libros veteris Testamenti. Apostolus autem ad Roma. cap. 15. vbi multas scripturas veteris Testamenti adducit, expresse dicit: *Quæcunq; enim scripta sunt, ad nostram doctrinam scripta sunt: ut per patientiam, & consolationem scripturarum, spem habeamus.*

Item, ad Hebr. 10. *Vmbra enim habet lex futurorum bonorum.* Idem ad Colof. 2. Item Nota, quia S. Thomas super cap. 7. Ioann. lect. 2. dicit: *In lege humana, præcepta posteriora præiudicant prioribus: sed in diuinis est è conuerso.*

COROLLARIUM QVINTVM.

Vel sola traditio Sanctorum Patrum, possessio, & perpetuus usus fructus indulgentiarum in Ecclesia Catholica, bene legitime, & sufficienter probant, & confirmant causam indulgentiarum, contra Hæreticos.

Probatur Corollarium, Notabili secundo, cap. 2. & 3.

COROLLARIUM SEXTUM.

Vbicunq; in sacris Cōciliis, & Canonibus historia indulgentiarum habetur; inducitur non tanquam noua institutio, sed tanquam memoria rei antiquæ.

Probatur Corollarium, Notabili tertio, cap. 5. Item, ex supradictis & exsequentibus patet. Item, confirmatur testimonio Scholasticorum, & præcipue Dominici à Soto Distinct. 21. Quæst. 1. Arti. 3. statim à principio.

COROLLARIUM SEPTIMUM.

Sicut morbus & medicina sunt simul naturà; ita peccatum & indulgentia simul naturà.

Probatio Corollarij, Notabili 2. cap. 6. Item, videtur Corollarij probatio dependere ex principio Logicorum, qui relatiua dicunt esse naturà simul. Item, ex principio Physicorum, qui docent: quia posito vno contrario in natura, necessario ponitur & aliud. Item, ex principio Theologorum: ergo videntur quasi omnes facultates in eo Corollario conuenire.

COROLLARIUM OCTAuum.

Indulgentiæ in stationibus Romæ, à Beato Gregorio sunt institutæ. Corollarij probatio, patet Notabili 3. cap. 5.

Item, probatur testimonio D. Thomæ super 4. Senten. Distin. 20. Et hæc est communis sententia Scholasticorum.

COROLLARIUM NONVM.

Non esse laborandum de nomine, quando de re constat.

Probatio Corollarij, patet Notabili sexto, cap. primo.

Item, est commune Axioma in omnibus scholis usu receptum, & ita confirmatum, & approbatum; vt non egeat probationis.

COROLLARIUM DECIMUM.

Quòd si ministratio mortis literis deformata in lapidibus fuit in gloria, ita vt non possent intendere filij Israël in faciem Moyfi, propter gloriam vultus eius, quæ euacuatur; quomodo non magis ministratio spiritus erit in gloria? Nam si ministratio damnationis in gloria est,

ria est, multò magis abundat ministerium iustitiæ, 2. ad Corinth. cap. 3. Et Exodi cap. 34.

Probatur Corollarium, Notabili secundo cap. 3. &c. Et Notabili 3.

D. THOMAS Aquinas, super iisdem verbis Apostoli, arguit sic: *Gloria magis debetur iustitiæ, quàm damnationi: sed ministerium noui testamenti, est ministerium iustitiæ: quia iustificat interius uiuificando: ministerium autem veteris Testamenti, est ministerium damnationis occasionaliter: quia litera occidit, Spiritus autem uiuificat. Cum ergo ministratio damnationis, id est, ministratio veteris Testamenti, quæ occasionaliter est causa damnationis, ut dictum est, est in gloria, quæ apparuit in facie Moysi; constat quòd multò magis abundat in gloria: id est, dat abundantem gloriam ministris eius. Ministerium iustitiæ, id est Noui testamenti, per quod datur Spiritus, per quem est iustitia, & consumatio virtutum, Prouerb. 3. Sapientes gloriam possidebunt.*

Idem, ibidem secundo argumento arguit sic: *Illud, quod datur ut transeat, nihil est in respectu ad illud, quod datur ut semper maneat. Si ergo Testamentum vetus, quod euacuatur, tollitur: 1. Corint. 14. Cum venerit quod perfectum est, euacuabitur: per gloriam enim Moysi ministratum, saltem per particularem gloriam: constat, quòd Testamentum nouum manet: quia hic inchoatur, & perficitur in patria, Luca 21.*

Sicut ergo Noui Testamenti maior est gloria, quàm Veteris Testamenti; ita & indulgentiarum Noui Testamenti maior virtus & gloria, quàm indulgentiarum veteris Testamenti, quæ quidem euacuatur in indulgentiis noui Testamenti, ut dictum est Notabili 5. cap. 3.

ANSELMVS Cantuarien. super iisdem verbis Apostoli, dicit sic: *Licet hæc ministratio esset mortis, id est, per Moysen ministrata, quamuis præuaricatoribus esset causa mortis; tamen ita ministro Moysi fuit in gloria, ut filij Israël non possent aciem visus sui intendere in faciem eius: propter gloriam vultus eius, quam acceperat ex colloquio Domini, non poterant aspicere splendorem vultus eius. Qua re significatum est: quia spirituale sensum legis, non erant visuri. Facies enim Moysi splendida, figuram habebat veritatis, quæ figura euacuatur, per manifestationem veritatis: id est, visibilis gloria Legis, euacuatur per gloriam Euangelij. Ita enim euacuatur, ut proficiat, sicut infantia euacuatur in iuuentute, & semen in fructu. Euacuatur ergo Moysi gloria, quoniam omnes umbræ significantes euacuantur, cum res quæ significatur aduenerit. Quemadmodum enim scientia, quæ nunc est, euacuabitur cum venerit illa, quæ erit facie ad faciem; sic & ista, quæ in umbris tradita erat Iudeis in veteri Testamento, necesse fuit euacuari reuelatione noui Testamenti. Itaque, si ministratio mortis fuit Moysi in tanta gloria; quomodo non multò magis*

nobis erit in gloria ministratio Spiritus, id est, nouum Testamentum, quod ministramus, in quo fides impetrat Spiritum viuificantem? Erit utiq; nobis in gloria multò magis, quàm vetus fuit Moyſi. Illa enim gloria Moyſis fuit temporalis, hæc autem æterna: illa terrena, hæc cælestis: vel in se ipſo habet nouum Testamentum maiorem gloriam, quàm vetus: quia maior gloria est peccatorem iustificare, quàm damnare. Quamuis enim iuste damnet, tamen ad laudem magis proficit si indulgeat, ut possit se reus corrigere, & ad iustitiam resurgere. Hæc Anselmus.

Ita ut non possent intendere filij Israël in faciem Moyſi. Aristoteles lib. 2. de anima: Excellens sensibile, corrumpit sensum.

CONCLUSIO QUINTA.

EX superabundantia satisfactionum, supererogationum, passionum, & meritorum Messiae, mediatoris, redemptoris, & saluatoris Domini nostri IESU CHRISTI, Beatæ Dei genitricis virginis Mariæ, & omnium electorum, à primo iusto, vsq; ad vltimum, hoc est capitis, & membrorum, sicut Synagoga, ita Ecclesia Catholica, habet cælestem thesaurum indulgentiarum.

Veritas Conclusionis, patet Notabili primo, cap. 4. Item, probatur autoritate scripturæ, Psalm. 2. Item, Psalm. 21. Item, Psalm. 68. *Quæ non rapui, tunc exsoluebam.* Item, Psalm. 117. Item, Psalm. 129. *Quia apud Dominum misericordia, & copiosa apud eum redemptio.* Item, ad Roma. 8. *Deus proprio filio suo non pepercit, sed pro nobis, &c.* Item, 2. ad Corinth. 8. Item, ad Ephes. 3. ad Philippen. 2. Item, ad Colos. 1. 2. 3. &c. Et hæc de Christi meritis.

DE MERITIS autem Beatæ Dei genitricis virginis Mariæ, Luca 2. *Et tuam ipsius animam pertransibit gladius, &c.*

DE MERITIS verò Sanctorum electorum, Iob cap. 6. *Utinam appenderentur, &c.* Item, ad Colos. cap. 1. *Ego Paulus adimpleo ea, quæ defunt passionum Christi, &c.* Item, probatur testimoniis Sanctorum Patrum, & præcipuè Scholasticorum. Nam D. Thomas Aquinas Tilmanus apud Ioannem Eckium, &c. dicunt sic: *Scito tibi thesaurum indulgentiarum fieri ex superabundantia meritorum, quatenus satisfactoria erant, Christi & sanctorum.*

DE SUPERABUNDANTIA passionum Christi pro nobis, dicitur ad Colos.

Coloss. cap. 1. & 2. & 1. Ioan. cap. 2. *Ipse est propitiatio pro peccatis nostris: non nostris autem tantum, sed totius mundi.* Vnde manifestum est, Passionem Christi sufficienter satisfacere pro toto mundo, ac per hoc, cum exequutiue pro paucis tantum satisfaciatur, infinitum thesaurum satisfactionum Christi superesse, non solum in sacramentis, verum etiam extra sacramenta, quibus eadem passio Christi satisfecit.

DE SANCTORVM autem passionum & meritorum superabundantia, quod ad officium satisfaciendi pro nobis, patet ex Iob cap. 6. vbi Iob dicit: *Utinam appenderentur peccata mea, quibus inum merui, & calamitas quam patior in statem, quasi arena maris hæc grauior appareret.* Ex his Iob verbis claret, ipsum plus passum fuisse, quam pro peccatis suis pati debuerit. In superabundantia autem passionum, consistit superabundantia satisfactionum. Et hoc idem de multis sanctis apertissimum est.

DE SANCTORVM verò intentione, quod scilicet voluerint pati, passi que sunt libenter, non solum pro se sed etiam pro nobis, testatur Apostolus ad Coloss. cap. 1. dicens: *Ego Paulus minister, nunc gaudeo in passionibus pro vobis, et adimpleo ea, quæ desunt passionum Christi, in carne mea, pro corpore eius, quod est Ecclesia.* Vide, vide, quia miseriæ sanctorum adiungendæ sunt pressuris Christi, ad communem thesaurum & vtilitatem Ecclesiæ. Et hic est cælestis thesaurus meritorum, de quo dicit Ecclesia, *Precibus, & meritis sanctorum.* Nam, quod Paulus adimpleuit, quis negabit de alijs sanctis crucem Christi portantibus, & eum sequentibus? ut dicitur Corollario 4. Ergo ex superabundantia satisfactionum, supererogationum, passionum, & meritorum Christi, Beatæ Dei genitricis virginis Mariæ, & omnium electorum, à primo iusto vsque ad vltimum, hoc est, capitis & membrorum, colligitur, adimpletur, cumulat, perficitur, seruatur, & dispensatur, in Ecclesia Catholica cælestis thesaurus indulgentiarum; quo etiam Patres in veteri lege, in fide venturi Messias Christi utebantur. Vnde Saluator Lucæ cap. 11. dicit: *Qui non est mecum, contra me est: & qui non colligit mecum, dispergit.*

Porro, eundem cælestem thesaurum esse infinitum, probatur sic. Quantitas effectus, sequitur quantitatem suæ causæ. sed satisfactionum, passionum, & meritorum thesaurus est infinitus: igitur & indulgentiæ, de quibus propter influentiam capitis in membra, & propter communionem sanctorum Catholici participant, sunt infinitæ.

MAIOR est Aristotelis lib 3. Topicorum cap. 1.

MINOR ex suprà dictis patet.

De Quinta Conclusionem, est controuersia

inter Catholicos & hæreticos: nam Catholici hanc Conclusionem, vt ponitur Catholicè in suo sensu & forma, non solum affirmant, sed etiam credunt cum Patribus. CONTRA Lutherus, Lutherani simpliciter negant. Nam Gabriel Prateolus in Cathalogo hæreticorum scribit: quia circa Annum Domini M. D. XXIII. sub Carolo V. Cæsare Germano, & Clemente Septimo huius nominis, Summo Pontifice, fuit quidam Iacobus Præpositi Ordinis Eremitarum Sancti Augustini, Flander natione, & secta Lutheranus. Hic, cum apud Antuerpiam varijs in locis Lutheri dogmata loco Euāgelij disseminasset; tandem comprehensus, & ad Palinodiam decantandam damnatus, in maiori ecclesia Bruxellensi, coram ingenti hominum multitudine, Sacra Imperiali Maiestate, cum sua Curia illic residente, solennem fecit suorum dogmatum reuocationem. Is inter alios errores, tutabatur hunc errorem, Nulli merita sanctorum applicari possunt: Omnia opera sanctorum peccata sunt, & egent misericordia ignoscente & remittente: Nullus est Ecclesiæ thesaurus præter Christi merita, quæ duntaxat per ipsum Christum unicuique secundum suam fidem applicantur: Lutherus cum sua doctrina, non est legitime per sedem Apostolicam condemnatus. &c. Sed idem in errorem pristinum relapsus, in eundem lapidem offendit: ex quo effectum est, vt fratres illius Conuentus, quos ille seduxerat, vinculis & custodijs sint mancipati, & Conuentus eisdem ex mandato Adriani Sexti, Summi Romanorum Pontificis, apud Antuerpiam funditus deletus sit, & solo adæquatus. Hæc Prateolus.

Quamobrem, quia Catholici Conclusionem cum suis punctis affirmant, Hæretici verò negant: propterea quæritur, AN PASSIONES, MERITA, ET SATISFACTIONES SANCTORVM, VNA CVM CHRISTO THESAURIZENT IN ECCLESIA THESAVRVM INDVLGENTIARVM? Et videtur quòd non: quia scriptum est Isai. cap. 63. *Tu enim Pater noster, & Abraam nesciuit nos, & Israel ignorauit nos: tu Domine pater noster, redemptor noster, à seculo nomen tuum.*

Item, Ieremiæ cap. 15. Et dixit Dominus ad me. *Si steterint Moyses & Samuel coram me, non est anima mea ad populum istum: ejce illos à facie mea, & egrediantur. Quòd si dixerint ad te, Quòd egrediemur? dices ad eos. Hæc dicit Dominus: Qui ad mortem, ad mortem: & qui ad gladium, ad gladium: & qui ad famem, ad famem: & qui ad captiuitatem, ad captiuitatem. Et visitabo super eos quatuor species dicit Dominus: gladium ad occisionem, & canes ad lacerandum, & volatilia cæli, & bestias terræ,*

ex terræ, ad deuorandum & dissipandum. Et dabo eos in feruorem vniuersis Regnis terræ, propter Manassen filium Ezechie regis Iuda, super omnibus quæ fecit in Ierusalem. Item, Ioan. cap. 5. Nolite putare, quia ego accusaturus sum vos apud patrem: est qui accusat vos Moyses, in quo vos speratis, &c.

Item, ad Roma. 8. Existimo enim, quod non sunt condignæ passionēs huius temporis, ad futuram gloriam, quæ reuelabitur in nobis.

Et hoc ipsum Rationibus volunt probare.

PRIMA RATIO. Tota Scriptura passim testatur & demonstrat, vnum solum Christum esse satisfactorem, pro peccatis totius mundi: igitur merita Sanctorum ad thesaurum Ecclesiæ non pertinent.

CONSEQUENTIA ab autoritate scripturarum, & patet sic: quia si ille vnus sufficit, quid opus est alieno vti patrocinio?

ANTECEDENS patet autoritate Isaïæ cap. 53. *Posuit Deus, inquit, in eo iniquitates omnium nostrum.* Et Ioan. 1. *Ecce agnus Dei, ecce qui tollit peccata mundi.* Item, ad Colos. cap. 1. *Per sanguinem crucis, omnia reconciliata sunt, siue quæ in cælis, siue quæ in terris sunt.* Item, 1. Petri 2. *Christus peccata nostra pertulit in corpore suo, super lignum.* Item 1. Ioan. 2. *Ipse est propitiatio pro peccatis nostris: non pro nostris autem tantum, sed etiam pro totius mundi.*

SOLVITVR ENTHYMEMA. Negatur Consequentia: quia licet sacra scriptura testatur Christum satisfecisse: tamen nusquam excludit merita Sanctorum.

SECUNDÒ soluitur sic: quia Christus qui est caput, & Sancti membra eiusdem capitis sunt, vnum mysticum corpus: ergo hæc non sunt diuidenda: quia qui diuidit Christum, Antichristus est.

TERTIÒ soluitur. Aliud est liberari à pœna æterna, & à culpa peccati: aliud verò à temporalium pœnarum supplicio. Hæc enim distinguuntur ab inuicem, scilicet remissio culpæ, & remissio temporalium pœnarum. Siquidem culpa, ira, siue pœna æterna, sanguine Christi tolluntur: pœnæ verò temporales, bonis operibus, & fructibus poenitentiae, 1. ad Corinth. 11. *Quod si nosmetipsos diiudicemus, non utiq; iudicemur: dum iudicamur autem, à Domino corripimur, vt non cum hoc mundo damnemur.*

SANE, triplex reperitur satisfactio coram Deo, coram proximo, & coram Ecclesia. De satisfactione proximo, Math. 5. & 6. loquitur Dominus: *Vade reconciliare fratri tuo.* Lucæ cap. 6. *Dimittite, et dimittimini*

temini: Date, & dabitur vobis. ad Roma. 13. *Nemini quidquam debeatis, nisi ut inuicem diligatis: qui enim diligit proximum, legem impleuit:* Ergo qui odit proximum, prauaricator est legis. De satisfactione quæ debetur Deo, certum est, neminem Deo satisfacere posse, nisi satisfecerit & proximo. Satisfactio coram Ecclesia, olim erat in poenitentia publica, quæ Satisfactio dicebatur: Hodie Ecclesia ad poenas arbitrarias reduxit. Ex his ergo patet à culpa, & à poena æterna, sanguine Christi nos liberari: à poenis verò temporalibus, meritis & satisfactionibus Sanctorum plurimum adiuuari.

SECUNDA RATIO. Scriptum est, Ioan. 19. & ad Ephes. cap. 4. Christum consummasse & adimpleuisse omnia: igitur Apostolus nullas passionem pro Ecclesia adimpleuit.

CONSEQUENTIA ab autoritate scripturarum.

ANTECEDENS Ioan. 19. & ad Ephes. cap. 4.

RESPONDEO. Negatur Consequentia. nam Christus Dominus adimpleuit suo tempore, suo loco, & suo modo: & Apostolus ut minister suo loco, suo tempore, & suo modo: & tamen illud manet verum, quod Apostolus dicit: *Adimpleo quæ desunt passionum in carne mea, pro corpore illius, quod est Ecclesia.* Huc pertinet & illud præclarum testimonium, Iob capite 6. ubi dicit: *Utinam appenderentur peccata, quibus iram merui: & calamitas, quam patior in statem; quasi arena maris, hæc grauior appareret.* Quod ergo Iob plus poenarum sustinuit, quàm promeruit; in bonum totius corporis Ecclesiæ cessit, cuius erat ipse membrum: *quia particeps ego sum omnium timentium te, & custodientium mandata tua.* Adde, quia Apostolus ad Galat. cap. 2. dicit: *Christo confixus sum Cruci, & uiuo iam non ego, uiuit verò in me Christus:* igitur opera, passionem, & satisfactionem Pauli, erant opera Christi in Paulo uiuentis & operantis. Si quid ergo detraxeris meritis sancti Pauli, detrahas necesse est meritis Christi.

SECUNDO soluitur per instantiam: quia ad Ephes. cap. 4. dicitur Christum dedisse in Ecclesia alios quidem Apostolos, Prophetas, pastores, Doctores, propter consumationem Sanctorum. &c.

TERTIA solutio, Christus adimpleuit omnes Passionem, quæ de ipso scriptæ erant: ideoque cum Spiritum redderet Patri, Euangelista commemorat sic fuisse locutum, *Consumatum est:* id est, quæ de me scripta, & dicta fuerant, omnia sunt completa. Christi ergo passionibus defuit nihil, quin à Christo fuerit susceptum, perfectum, & absolutum.

lutum. Fateor rem ita se habere, sed attende quid diuinus Apostolus dicat: *Adimpleo*, inquit, *ea quæ defunt passionum Christi, in carne mea, pro corpore eius, id est, Ecclesia*. Relictæ ergo erant passionibus Christi in Ecclesia sua adimplendæ: non dixit, *passiones Ecclesiæ*, sed, *passiones Christi*: sicut dictum est Saulo Act. 9. persecutionem in Christianos obstinatissimo animo commouenti: *Saule, Saule, quid me persequeris?* Quidquid certè in beneficium, vel detrimentum membrorum corporis cedit; in caput redundat corporis: si ergo Paulus adimplet, id est, suis meritis & laboribus pro alijs fidelibus satisfacit, & coronam iustitiæ pro suis certaminibus est consequutus; quid reliquum est dicendum, nisi similiter asserere, opera S. Apostoli non solum sibi fuisse meritoria; sed etiam alijs satisfactoria: non enim de se gloriatur, sed in Domino: *Quid habes quod non accepisti?*

TERTIA RATIO. Sanctus Apostolus ad Romanos cap. 8. dicit: Non sunt condignæ passionibus huius temporis ad futuram gloriam, quæ reuelabitur in nobis: ergo ex satisfactionibus, passionibus, & meritis sanctorum nihil superabundat, nihil redundat, nihil superest, quod in thesaurum Ecclesiæ deponatur, seruetur, & pro indulgentijs dispensetur, & per consequens alijs merita sanctorum suffragari non possunt.

CONSEQUENTIA, ab authoritate scripturarum.

ANTECEDENS, patet in scripturis.

SOLVITVR. Negatur consequentia, propter causas suprâ dictas.

PORRÒ autem D. Thomas Aquinas super cap. 8. ad Romanos Lectione 4. hoc Enthymema soluit sic: *Passiones huius temporis, si secundum se considerentur, multum deficiunt à quantitate huius gloriæ. Isaiæ 54. Ad punctum in modico dereliquite, & in miserationibus magnis congregabo te. Sed si considerentur huiusmodi passionibus, in quantum eas aliquis voluntariè sustinet propter Deum, ex charitate quam in nobis Spiritus S. facit, sic ex cōdigno, per huiusmodi passionibus homo meretur vitam æternam: nam Spiritus sanctus est fons, cuius aquæ, id est, effectus, saluant in vitam æternam, ut dicitur Ioan. cap. 4.*

SECUNDA SOLVTIO. Quamuis temporalia & illa cælestia æterna differunt inter se, plus quàm in infinitum: tamen præueniente & subsequente gratia Christi, sicut actus, ita passionibus si fuerint ordinaria, hoc est, si in fide, spe, charitate, & si bona intentione & voluntate, cum requisitis circumstantijs, propter Deum, modo & ordine debito suscipiuntur, & patiuntur; procul dubiò ut condignæ à Deo acceptantur. Om-

tur. Omnia opera tua operatus es in nobis Domine : sed si sunt casualia, extraordinaria, non propter Deum suscepta, sunt mala. Vnde Petrus Apostolus 1. Pet. cap. 4. *Nemo autem vestrum patiatur vt homicida, aut fur, aut maledicus, aut alienorum appetitor.*

TERTIA SOLVTIO. Premium de condigno, siue condigni, merito respondeat necesse est, quod in Christo potissimum splendet, qui & sibi & nobis meruit, & premium vtrumque tam essenziale quam accidentale recepit. Vnde si nihil restat de meritis sanctorum, consequens est, vt nihil restet de meritis Christi; recepit enim tam animam, quam corporis gloriam plenissimam. Amplius, quemadmodum oratio, ieiunium, eleemosyna, & alia pia opera sanctorum, non solum ipsis profuerunt; sed & alijs, sicut oratio Dauid, & ipsum regem & populum Hierosolymitanum ab angelo percutiente liberauit. Et oratio Ezechiae Regis ab exercitu Sennacherib. Sic etiam sanctorum satisfactiones, passionis, & merita, non solum sibi profuerunt, verum etiam & alijs, qui in hoc corpore degentes meruerunt, vt alijs possent prodesse. *Omnia*, inquit Paulus 2. ad Timoth. 2. *sustineo propter electos, vt & ipsi salutem consequantur.*

QUARTA RATIO. Omnia facta semper vbique ad eam intentionem reduci, interpretari, accipi, & iudicari debent, qua fiunt. sed omnes sancti egerunt & passi sunt fortia, non intentione pro alijs satisfaciendi, aut indulgentias alijs thesaurizandi; sed ea qua prudentes virgines pro se, Matth. 25. agunt, & dicunt, Ne forte non sufficiat nobis, & vobis: igitur merita sanctorum ad indulgentiarum thesaurum addunt nihil.

MAIOR vera. MINOR Matth. 25.

SOLVTIO. Negatur Consequentia: quia de satisfactione arguitur, non in genere; sed extra genus: nam strictè intentionem alienam heretici interpretantur, & quia Minor est falsa.

SECUNDA SOLVTIO. De Christo satis constat, quod suos labores & sanguinem nobis applicauerit: *Ergo*, inquit, *non pro eis tantum rogo; sed & pro illis qui credituri sunt per verbum eorum in me.* Pro omnibus igitur se obtulit, qui pro omnibus dignatus est nasci, & mori. Sed de iustis viris habemus etiam testimonium diuini Pauli Apostoli, ad Rom. 10. *Cupiebam anathema esse pro fratribus meis. &c.* & 2. ad Corin. 13. *Impendam, & superimpendar in obsequium fidei vestrae.* Cupiebat ergo S. Paulus Apostolus suos labores esse maximè communes, volebat suis laboribus omnibus prodesse. Sanè, nemo Deo gratus & acceptus sine cha-

fine charitate inueniri potest: charitas enim facit omnia communia: quia non quæ sua sunt quærit, sed quæ aliorum. Hac ergo intentione sancti viri multa egerunt, & multa passi sunt fortia, vt sibi & omnibus qui sunt corporis Ecclesiæ membra prodesse possent; & si non actuali, virtuali tamen intentione, quæ ad hoc officium & beneficium peragendum potest sufficere.

CONTRA. Ioannes dicit I. Ioan. cap. 5. *Si dixerimus, quia peccatum non habemus, nos ipsos seducimus, & veritas in nobis non est.* Et in Oratione Dominica quilibet orat: *Et dimitte nobis debita nostra.* Igitur nihil superabundat, nihil superest sanctis hominibus, quod in nos possit erogari.

CONSEQUENTIA ab authoritate scripturarum, & quotidiana oratione. ANTECEDENS ex Euangelio & Canonica S. Ioannis Apostoli & Euangelistæ.

SOLVITVR. Non valet Consequentia: nam scripturæ allegatæ, non de debitis pœnarum; sed potius de peccatis venialibus loquuntur, à quibus, excepta sancta Dei genitrice virgine Maria, liber extitit nemo, iuxta illud Prouerb. 14. *Septies in die cadit iustus.* Venialia autem non obsunt iustis viris, quo minus alijs siue nobis suppetias ferre possint. Illa enim, id est, venialia, aut sola oratione, aut feruore dilectionis abluuntur, & sicut cera à facie ignis, & nubes à facie venti delentur. D. Hieronymus. *Si cadit, quomodo iustus? si iustus, quomodo cadit? sed Iusti vocabulum non amittit, qui per pœnitentiam semper resurgit: & non solum septies, sed etiam septuagies septies delinquenti. si conuertatur ad pœnitentiam, peccata donantur: Cui plus donatur, plus diligit.* Hec ille.

QVINTA RATIO. Ille censendus est iustus & sanctus, qui imagini filij Dei conformis efficitur, ad Rom. 8. sed hanc iustitiæ metam, se non attigisse diuinus Paulus I. ad Corinth. 4. profitetur: Nihil enim, inquit, mihi conscius sum; sed non in hoc iustificatus sum. Si autem tantus Paulus de se ipso hoc sentit, & dicit; quid alij de se sentire debent? igitur sancti non plura sibi parauerunt bona, quàm ipsis necessaria essent ad salutem, vt ex reliquijs eorum, aliquid nobis supererogaretur.

MAIOR à definitione. MINOR, I. ad Corinth. cap. 4.

SOLVTIO. Duplex est meta nobis proposita, Iustitiæ vna, Perfectionis altera. Et primam quidem omnes iusti attigerunt; ad eam enim sola mandatorum obseruatione peruenitur. Secunda verò, à Doctoribus subdiuiditur, in Perfectionem in genere, & in Perfectionem ab-

P

solutam.

solutam. Primam autem multos adeptos fuisse scriptura testatur. *Noë vir iustus & perfectus in generationibus suis.* Diuinus Paulus ad Philip. 3. *Quicumque sumus perfecti.* De secunda verò in eodem capite negat se esse perfectum: *Non quòd perfectus sim: sequor tamen, si quo modo comprehendam, in quo & comprehensus sum.* Erat enim diuinus Paulus perfectus viator, sed non perfectus comprehensor. Itaque licet sancti & iusti homines Christi imagini per omnia conformes esse nequiverunt; ita tamen copiosissimis donis Spiritus sancti cumulati sunt, vt illorum merita membris Ecclesię plurimum proficerent ac prodesse, ad Romanos 8. & in cumulum diuitiarum, ac Ecclesię Catholicę thesaurum cederent. Quamobrem rectè dictum est à Clemente Papa, huius nominis Sexto in Extrauagan. Vnigenitus: de Pœnitent. & remis. *Non, inquit, corruptibilibus auro & argento, sed sui ipsius agni incontaminati, & immaculati, pretioso sanguine nos redemit Dei filius, quem in ani crucis innocens immolatus, non guttam sanguinis modicam, quæ tamen propter vni-onem ad verbum, pro redemptione totius humani generis suffecisset; sed copiose, veluti quoddam profluium noscitur effudisse; ita vt à planta pedis, usque ad verticem capitis, nulla sanitas inueniretur in ipso. Quantum ergo exinde, vt neque superuacanea, inanis, atque superflua tantæ effusionis misentio redderetur, thesaurum militanti Ecclesię acquisiuit, volens suis thesaurizare filiis pius pater, vt sit infinitus thesaurus hominibus. Ad cuius quidem thesauri cumulum, Beatæ Dei genitricis virginis Mariæ, omniumq; electorum merita adminiculum præstant.* Hæc ille.

SEXTA RATIO. Illa opera non sunt censenda satisfactoria, & modum habere iustitiæ, quæ modum habent impetrationis. sed huiusmodi sunt merita sanctorum, quibus conati sunt pro virili gratiam Dei sibi reconciliare, quam summis laboribus querebāt, & summis precibus efflagitabant: igitur merita sanctorum pro alijs satisfactoria esse non possunt.

MAIOR vera. MINOR probari potest scripturis & exemplis.

SOLVTIO. Negatur Consequentia: nam in peccato duo veniunt consideranda, scilicet, ratio Pœnæ, & ratio Culpæ. Culpæ verò ratio, qua Dei inimici efficimur per modum impetrationis, & proprii meriti, saltem de congruo remouetur: Pœnæ autem ratio per modum iustę compensationis, vel de proprio, vel de communi, & alieno satisfaciendo condonatur.

Quippè, quia hominis nondum iustificati nulla potest esse iustitia, quæ iustæ compensationis rationē subire valeat; post consecutam verò iusti-

rò iustitiam, cùm eius reatus & obligatio cum Dei amicitia non pugnet, per modum iustæ solutionis & compensationis redimi potest: idque potissimum ex gratia Dei acceptantis, qui largitus est gratiam, vt sanctorum merita alijs membris Ecclesiæ possint prodesse. Merita ergo sanctorum duplici sunt prædita virtute: scilicet, Merendi, & Satisfaciendi, vt dictum est satis. Porro virtus illa Satisfaciendi pro mortaliū peccatorum commissione, locum non habuit in Sancto Ioanne Baptista, in sanctis Apostolis, & in quàmplurimis insigni sanctitate præditis, sicut legitur de S. Zacharia, & S. Elizabeth Lucæ 1. Cùm ergo illis non esset necessaria, & sine premio non manserit; in Ecclesiæ thesaurum celsit. Vnde non sunt audiendi qui dicunt, in premium accidentale virtutem illam Satisfactoriam sanctis hominibus celsisse; alioqui de Christi meritis, quæ personale, essentiale, & accidentale premium acceperunt, similis ratio, & iudicium simile possit haberi. Insuper, essentialis, siue accidentalis premij coronæ, non satisfactoriæ, sed meritoriæ potius virtuti innituntur.

SEPTIMA RATIO. Petrus & eius successores, auctoritate clauium sibi à Christo concessarum, possunt hanc gratiæ largitionem indigentibus impendere. Ergo non habent opus thesauro Ecclesiæ uti: præsertim cùm verba Saluatoris, Matth. 16. de huius thesauri patrocínio nullam fecerint mentionem.

CONSEQUENTIA ab autoritate.

ANTECEDENS patet legenti scripturas.

SOLVITVR. Negatur Consequentia. Summus Pontifex potest per modum auxiliij, siue suffragij, nempe sola Ecclesiastici thesauri applicatione indulgentias tribuere, & poenas peccatis mortalibus impositas relaxare. Etenim, si liberam habet huius thesauri dispensationem; poterit eo uti prout decet, & Ecclesiæ necessitas & utilitas postulat. Inest quoque siue concessa est Petro, eiusque successoribus, potestas iurisdictionis, siue authoritatis, qua sine priori uti potest. Est ei demum vtraque potestas simul, quando vtraque vitur: itaque reatus & obligationes peccatorum potest vtroque modo relaxando condonare; vel sola potestate à Christo accepta, vel thesauri applicatione, vel vtroque modo simul. Optimum autem est, quādo poenitens in seipso punit, quod malè gessit: tunc enim profunt indulgentiæ; cùm læto, & contrito corde suscipiuntur. Quod si poenitens propter impotentiam, aut aliquam aliam rationabilem causam, seipsum punire non valet; tunc Papali auctoritate redimitur & liberatur. Aliquando verò thesauro &

iurisdictione utitur, quando peccator clauibus Petri se præbet idoneum & docilem, præsertim quando non satisfacit eo animi feruore quo debet. SED DICES, Si ita res se habet, igitur qui per indulgentias consecutus est poenarum temporalium remissionem, iniunctam non tenetur adimplere poenitentiam. DICI potest, eum qui indulgentias adeptus est, adimplendam poenitentiam non teneri, patet in capite, Cum ex eo: de poenitentiis & remissionibus. quod enim erat per poenitentiam satisfaciendum; poenitens per indulgentias satisfecit. Sed hæc intelligenda sunt de indulgentiis generaliter, vel specialiter concessis: de poenitentiis tantum iniunctis. Consultius tamen aget, si iniunctam adimpleuerit poenitentiam, eò quòd opera poenalia, & sunt satisfactoria, si existant in gratia poenitentes: & medicina peccatoribus ad peccata extenuanda, abolenda, prætereunda, & postea fugienda.

SED CONTRA EST, quod in probatione Conclusionis positum est. Item, 2. ad Corinth. cap. 4. *Idem quod in præsentibus momentaneum, & leue tribulationis nostræ; supra modum in sublimitate æternæ gloriæ pondus operatur in nobis.*

Item, Actuum cap. 9. *In Ioppe autem fuit quædam discipula nomine Tabitha, quæ interpretata dicitur Dorcas, hæc erat plena operibus bonis, & eleemosynis quas faciebat.*

Atque hoc ipsum pluribus rationibus potest confirmari.

PRIMA RATIO. Scriptum est 1. ad Corinth. cap. 6. Corpora Christianorum esse templa Spiritus sancti: tunc sic formatur Ratio.

Ex bonitate & virtute agentis operum merita, penduntur, æstimantur, & censentur. sed Spiritus Sanctus in faciendis bonis operibus in nobis est instar primi mouentis, & principalis agentis, nostro libero arbitrio cooperante: igitur merita Sanctorum, virtute Spiritus Sancti, in eis operantis, præueniente & subsequente gratia Dei, & virtute promissionis diuinæ, & nostri liberi arbitrii, sic diuinitus adiuti, cooperantis, & sibi meritoria sunt, & aliis satisfactoria.

MAIOR vera: Nam alioqui non rectè dictum fuisset à Sancto Propheta Iob cap. 6. *Utinam appenderentur peccata mea, quibus iram merui, et calamitas quam patior in statera, quasi arena maris hæc grauior appareret.* Neque Diuinus Paulus auderet dicere 2. ad Thimot. cap. 4. *Bonum certamen certavi, cursum consummaui, fidem seruavi. In reliquo reposita est mihi corona iustitiæ, quam reddet mihi Dominus, in illa die iustus iudex*

iudex : non solum autem mihi, sed et iis, qui diligunt aduentum eius.

MINOR Isa. 26. *Omnia enim opera operatus es nobis Domine.* Item, Matth. 10. *Non enim vos estis qui loquimini, sed Spiritus patris vestri, qui loquitur in vobis.*

SECUNDA RATIO. Quibus Deus dedit potestatem filios Dei fieri, illis dedit gratiam & potestatem, & sibi mereri, & pro aliis satisfacere. sed Deus sanctis, qui credunt in nomine Iesu Christi, dedit potestatem filios Dei fieri: ergo Deus sanctis dedit gratiam & potestatem, non solum sibi mereri; sed etiam pro aliis satisfacere: & per consequens, thesaurizare thesaurum indulgentiarum.

MAIOR vera: nam cui Deus dat quod maius, dat & id, quod minus est.

MINOR Ioan. cap. 1. *Quotquot autem receperunt eum, dedit eis potestatem filios Dei fieri, his qui credunt in nomine eius.*

TERTIA RATIO. Omnis persona Deo grata, facit opera Deo grata, & rata, meritoria, & satisfactoria. sed omnis Sanctus est persona Deo grata: igitur omnis Sanctus, facit opera Deo grata, rata, meritoria, & satisfactoria: & per consequens, suis meritis & satisfactionibus thesaurizat thesaurum indulgentiarum.

MAIOR vera: quia scriptum est: Genes. 4. *Respexit Dominus ad Abel, & ad munera eius.*

MINOR Psalm. 20. *Quoniam praeuenisti eum in benedictionibus dulcedinis: posuisti in capite eius coronam de lapide pretioso: vitam petijt à te, et tribuisti ei longitudinem dierum in seculum seculi. Magna est gloria eius in salutaris tuo, gloriam & magnum decorem impones super eum. Quoniam dabis eum in benedictionem in seculum seculi: lætificabis eum cum vultu tuo.* Quia hoc sanctis suis promisit Deus, proculdubio dedit.

Item, probatur: Deo beneplacitum est in sanctis: ergo opera illorum sunt meritoria, & satisfactoria.

CONSEQUENTIA ab Antecedentibus.

ANTECEDENS Psalm. 146. *Beneplacitum est Domino super timentes eum, & in eis qui sperant super misericordia eius.*

QUARTA RATIO. Quos Deus iustificauit, illos & glorificauit. sed Deus sanctos iustificauit: igitur & glorificauit. &

per consequens voluit opera illorum esse meritoria, & ita satisfactoria, vt cederent in thesaurum indulgentiarum.

MAIOR vera, ad Roma. cap. 8. Item, Psalm. 4. *Scitote quia Dominus mirificauit sanctum suum.* MINOR Nota.

QVINTA RATIO. Qui diues est, cum pro pluribus pauperibus satisfacere possibile est. sed omnis Sanctus est diues: & quilibet peccator est miser: quia miseros omnes facit peccatū: igitur omnem Sanctum pro pluribus pauperibus satisfacere possibile est: & per consequens, quilibet Sanctus thesaurum indulgentiarum benè thesaurizare potest.

MAIOR vera à possibili.

MINOR, 2. ad Corint. cap. 8. *Scitis enim gratiam Domini nostri Iesu Christi, quoniam propter vos egenus factus est, cum esset diues, ut illius inopia vos diuites effectis.* Item Magister, Senten. lib. 1. Distin. 48. idem docet. D. Thomas Aquinas, Lectio. 2. super 2. ad Corint. cap. 8. *Scitis enim gratiam, id est, quam quidem humano generi contulit.* Ioan. 1. *Gratia & veritas per Iesum Christum facta est. Et hæc dicitur gratia: quia, quidquid filius Dei pœnalitatem nostrarum assumpsit, totum gratiæ est imputandum: quia nec præuentus alicuius bonitate, nec alicuius virtute coactus, nec inductus sua necessitate. Est autem gratia ista, quomodo propter nos egenus factus est: ad Philippenses 2. Et dicit egenus, quod plus est, quàm pauper. Nam egenus dicitur ille, qui non solum parum habet, sed qui indiget seu eget: pauper verò ille, qui parum habet. Ad significandum ergo maiorem paupertatem, dicit, Egenus factus est, scilicet, in temporalibus. Lucæ 9. Filius hominis non habet ubi caput reclinet: Threnorum 3. Recordare paupertatis meæ. Est autem factus egenus, non ex necessitate; sed ex voluntate: quia ista gratia non esset gratia. Et ideo dicit, cum diues esset, scilicet in bonis spiritualibus: & D. Hieronymus in bonis cælestibus, (in quibus Sacrum Concilium Tridentinum ponit indulgentias) ad Rom. 10. Idem Deus diues in omnes, qui inuocant illum: Prouerb. 8. Mecum sunt diuitiæ: Dicit autem, Esset, non fuisset, ne videretur Christus amisisse diuitias spirituales, cum assumpsit paupertatem: Sic enim assumpsit hanc paupertatem, quod illas inæstimabiles diuitias non amisit. Psalm. 48. Simul in unum diues & pauper: diues in spiritualibus, pauper in temporalibus. Et hoc est propter duo: propter exemplum, & propter sacramentum. Propter exemplum quidem: quia si Christus dilexit paupertatem, & nos exemplo suo debemus diligere eam. Diligendo autem pau-*

pertatem

perstatem in temporalibus, efficitur diuites in spiritualibus. Iac. 2. Nonne Deus elegit pauperes in mundo diuites in fide? &c. Et ideo dicit, ut illius inopia vos diuites esetis. Propter sacramentum autem: quia omnia quæ Christus egit, vel sustinuit, fuit propter nos: unde sicut per hoc, quod sustinuit mortem, liberati sumus à morte æterna, & restituti vitæ; ita per hoc, quod sustinuit inopiam in temporalibus, liberati sumus ab inopia in spiritualibus, & facti sumus diuites in spiritualibus: i. ad Corinth. 1. Diuites facti estis in illo, in omni scientia. Hæc D. Thomas.

Similiter Anselmus Canthuariën. super iisdem verbis Apostoli, multa pulchra lectione digna, quæ breuitatis causa omitto, annotauit: vide, lege, ubi dicit: Christus intus diues, foris pauper. Per Christum omnes homines omnis generis habent diuitias, & quod facile primum est, sanitatem. Qui verò habent sanitatem, etiam si fuerint pauperes, diuites sunt, &c.

SEXTA RATIO. Christus dedit dona hominibus, vt alij aliis ministrent, & satisfaciant: igitur & Sanctis suis dedit dona, non solum sibi mereri, sed etiam pro aliis satisfacere: & per consequens thesaurizare thesaurum indulgentiarum.

CONSEQUENTIA ab imperfectiori ad perfectius. Nam si dat Deus dona imperfectioribus; quomodo eadem & maiora negabit suis electis perfectioribus?

ANTECEDENS Math. 25. & Lucæ 19. sub illa parabola. *Homo quidam peregrè proficiscens, vocauit seruos suos, & tradidit illis bona sua. Et uni dedit quinq; talenta: alij autem duo: alij verò unum, secundum propriam virtutem, & profectus est statim, &c. Item hoc idem ad Roma. cap. 12. Item, 1. ad Corinth. 12. Vnicuiq; autem datur manifestatio spiritus ad utilitatem. alij quidem per Spiritum datur sermo sapientiæ: alij autem sermo scientiæ, secundum eundem Spiritum: alteri fides in eodem Spiritu: alij gratia sanctorum in vno Spiritu: alij operatio virtutum: alij prophetia: alij discretio spirituum: alij genera linguarum: alij interpretatio sermonum. Hæc autem omnia operatur vnus atq; idem Spiritus, diuidens singulis prout vult, &c. Hoc idem ad Ephes. cap. 4. Vnicuiq; autem nostrum data est gratia secundum mensuram donationis Christi: propter quod dicit: Psal. 67. Ascendens in altum, captiuam duxit captiuitatem: dedit dona hominibus, &c. Et ipse dedit quosdam quidem Apostolos: quosdam autem Prophetas: alios verò Euangelistas: alios autem Pastores, & Doctores ad consumationem Sanctorum: in opus ministerij, in ædificationem corporis Christi, donec occurramus omnes in unitatem fidei, & agnitionis filij Dei, in virum perfectum, in mensuram ætatis plenitudinis Christi, etc.*

SEPTIMA RATIO. Serui pigri & mali, puniuntur in Euangelio, propter negligentiam & abusum donorum: igitur electi premiantur magis ac magis, propter satisfactiones pro aliis, & propter diligentiam, fidelitatem, & bonum usum donorum: & per consequens Sancti thesaurizant thesaurum indulgentiarum.

CONSEQUENTIA à Contrariis.

ANTECEDENS sub Parabola Math. 25. & Lucæ 19. &c. vt suprà: ibi enim singulorum discutiuntur merita, & demerita: & secundum cuiusque propria merita, vel demerita, redduntur unicuique premia vel poenæ, &c.

Hæc & alia sexcenta possunt ad eam rem adferri argumenta. sed si hæretici blasphemii, non acquiescunt sanis sermonibus Ecclesiæ Catholicæ, & certis rationibus Catholicorum, tunc audiant horribile Decretum iudicis Christi, Math. 18. *Si autem Ecclesiam non audierit, sit tibi sicut ethnicus & publicanus.*

COROLLARIUM PRIMUM.

Vniuersalis indulgentia, incipiendo ab Hierosolyma, & inde ab Ecclesia Sancta Romana, in omnem terram, & in fines orbis terræ, per omnes & singulas Ecclesiæ Catholicæ partes, exit, manat, ac funditur: sicut fluuius Paradyfi, qui irrigat terram: sicut vnguentum in capite, quod descendit in barbam, barbam Aaron, quod descendit in oram vestimenti eius: sicut ros Hermon, qui descendit in montem Sion, Psalm. 132. Osee 14. Lucæ 24.

Probatur Corollarium, Notabili quinto, cap. 1. 2. 3. 4.

Item, probatur testimonio Prosperi Aquitanici super Psalm. 132.

Per Aaron, inquit, sacerdotem, ille indicatur sacerdos, qui veri Pontificis sacramentum, non in alieni generis hostia; sed in oblatione corporis, & sanguinis sui solus impleuit: idem sacerdos, idem victima, propitiator & propitiatio, omniumque mysteriorum, quibus nunciabatur effector, qui mortuus, sepultus, resuscitatus, ascendit in cælos, naturam humanam super omne nomen exaltans, & mittens Spiritum sanctum: cuius unctio, omnem Ecclesiam procuraret. A capite enim, id est, à Christo manans benedictio, non solum in barbam, sed etiam in oram vestimenti eius: id est, usque ad infima membra descendit. In barbam autem, quæ vnguentum fluens à capite prima suscepit, Apostoli significantur, & Martyres, in quibus virtus capitis, & sacramento eminet & exemplo. Ros descendit, supernæ gratiæ significatio est, quæ Sanctorum est origo meritorum. A Christo enim ex Hermon in Sion, id est ex Synagoga in Ecclesiam venit pluuia charismatum.

rismatum, exoritur ex tota compage fructus benedictionum, indulgentiarum, et fortitudo virtutum, Hæc Prosper.

NOTA: mandat legislator, mediator, & saluator noster Christus Dominus, primam indulgentiam, primis redemptionis diebus, primò in Ierusalem prædicare, propterea, quia Math. 15. dixit: *Non sum missus nisi ad oues, quæ perierunt domus Israël.* SECUNDÒ, quia ibi omnium maximum perpetratum est parricidij scelus & crimen: vt videntes gentiles, hanc infinitam misericordiam, qualis erat ignoscere huic ciuitati, inde erga Christum maximè afficerentur, ne desperarent de misericordia ipsius. Siquidem adeò bonus & misericors, vt non solum parcere huic ciuitati, Ierusalem voluerit Math. 23. sed etià eam aliis omnibus prætulerit, & exaltauerit. TERTIÒ, voluit vt ab Ierusalem inciperet indulgentiæ prædicatio, vt ex Iudæorum conuerforum fide, Gentiles animarentur, ad amplexandam fidem Christianam. Si enim in Christum credere non dubitauerunt illi, à quibus in cruce suspensus est; quare non crederent in eum Gentiles, qui tantum nefas contra Christum non attentauerunt, non perpetrauerunt? Et si Iudæi homicidæ, & parricidæ post tot flagella simul atque resipuerunt, tantæ gratiæ facti sunt participes; quomodo Gentiles non possunt bonâ spem concipere veniæ? Ergo incipiendo ab Hierosolyma prædicatum est Euangelium Poenitentiae, & Indulgentiæ Romanis, & inde deriuatum in vniuersum orbem terrarum: propterea, quia Legislator, Magister, & Saluator Dominus noster Iesus Christus, Lucæ 24. dixit: *Quoniam sic scriptum est, & sic oportebat Christum pati, & resurgere à mortuis tertia die: & prædicari in nomine eius poenitentiam, et remissionem peccatorum in omnes gentes, incipientibus ab Hierosolyma.*

COROLLARIUM SECUNDUM.

Christus peccata nostra ipse pertulit in corpore suo super lignum, vt peccatis mortui, iustitiæ viuamus, cuius liuore fanati estis. 1. Pet. 2.

Corollarium probatur Notabili 4. cap. 2. Item probatur auctoritate B. Pauli Apostoli ad Colof. cap. 2. vbi ait: *Et vos cùm mortui essetis in delictis, & præputio carnis vestræ, conuiuificauit cum illo, donans vobis omnia delicta, delens quod aduersum nos erat chyrographum decreti, quod erat contrarium nobis, & ipsum tulit de medio, affigens illud cruci; & expolians principatus, & potestates triduxit confidenter palam triumphans illos in semetipso.*

COROLLARIUM TERTIUM

Beata Dei genitrix virgo Maria, cùm sæpè aliàs, tum in hora passionis

onis Christi thesaurum Indulgentiarum Ecclesiæ thesaurizauit, quando gladius doloris animam eius pertransiuit. Lucæ 2.

Probatio Corollarij, patet Notabili 4. cap. 5.

COROLLARIUM QVARTVM.

Sancti, thesauro redemptionis, & indulgentiarum ita utebantur; vt etiam ipsi aliquid apponerent, non solum propter præceptum & exemplum Christi; verum etiam quia non debent filij parentibus thesaurizare, sed parentes filijs. 2. ad Corinth. 12.

Probatur Corollarium Notabili 1. cap. 4. Item, probatur suprà Conclusionem tertiā. Item, probatur exemplo, & autoritate B. Pauli Apostoli 2. ad Corinth. cap. 12. *Ego autem libentissimè impendam, & superimpendar ipse, pro animabus vestris; licet plus vos diligens, minus diligar.* Item ad Colos. ca. 1. *Ego Paulus factus sum minister Euangelij, qui nunc gaudeo in passionibus pro vobis, & adimpleo ea quæ desunt passionum Christi in carne mea, pro corpore eius, quod est Ecclesia.*

Item confirmatur testimonijs Patrum. D. GREGORIUS in caput nonum 1. Reg. in illa verba: *Dixit Samuel Coco. Non omnia nostri, inquit, Christus expleuit: per crucem quidem suam omnes redemit; sed remansit, vt qui redimi & regnare cum eo nititur, crucifigatur. Hoc profecto residuum viderat, qui dicebat ad Romanos 8. Si tamen compatimur, vt & conglorificemur. Quasi dicat: Quod expleuit Christus, non valet nisi ei, qui id, quod remansit adimplet.* Hinc B. Petrus Apostolus 1. Petri cap. 2. dicit: *Christus passus est pro nobis, vobis relinquens exemplum, vt sequamini vestigia eius.* Hinc Paulus ait, *Adimpleo ea, quæ desunt passionum Christi in carne mea, pro corpore eius, quod est Ecclesia.*

Item, D. BASILIUS Quæst. 12. in Regulis breuioribus, seu Compendio explicatis quæstionibus. *Deus pro remissione peccatorum nostrorum demisso vnigenito filio suo, quantum in ipso est, ea antè iam omnibus condonauit. Quoniam autem misericordiam & iudicium sanctus vir canit, et testatur Deum misericordem esse et iustum; necesse est, vt quæ et à Prophetis & ab Apostolis suis locis de Pœnitentia dicta sunt, ea à nobis præstentur; vt appareant iudicia iustitiæ Dei, & misericordia eius confirmetur ad condonationem peccatorum.* Hinc villicus ille, qui dissipat bona Domini sui, diffamatur apud Dominum Lucæ 16. Hoc ipsum Dominus expressit, quando dixit Lucæ 11. *Qui non colligit mecum, dispergit.* Igitur & nos eundem thesaurum thesaurizare debemus.

COROLLARIUM QVINTVM.

Hæc duo non pugnant, nempè, Non esse condignas passiones huius tem-

ius temporis ad futuram gloriam, quæ reuelabitur in nobis ad Rom. 8. & tamen fieri posse per adiutorium gratiæ Dei, vt possint inueniri passiones condignæ: quia scriptum est, Id quod in præsentī est momentaneum & leue tribulationis nostræ, supra modum in sublimitate æternæ gloriæ pondus operatur in nobis. 2. Corinth. cap. 4. Et apud D. Augustinum Sermo. 44. de sanctis.

Probatur Corollarium Notabili 4. cap. i. Item autoritate Sacrosancti Concilii Tridentini, Sess. 6. cap. ii. Item probatur autoritate scripturæ Ecclesiast. 9. cap. *Sunt iusti atque sapientes, & opera eorum in manu Dei: & tamen nescit homo, utrum amore an odio sit dignus. Sed omnia in futurum seruantur incerta, eò quòd vniuersa æque eueniunt iusto & impio, bono & malo, mundo & immundo, immolanti victimas & sacrificia contemnenti. Sicut bonus, sic & peccator; vt peiurus, sic ille qui verum deierat.* Vnde D. Gregorius Magnus li. 14. Moralium cap. 3. *Plerumque verò hæretici, cum quosdam in sancta Ecclesia, vel inopia, vel flagellis laborantes aspiciunt, semetipsos mox in arrogantiam iustitiæ extollunt, & quidquid aduersum fidelibus euenisse conspiciunt, hoc factum pro eorum iniquitatibus putant: nescientes nimirum, quia actionum meritum præsentis vitæ qualitas, nullatenus probat: nam plerumque & bona malis, & mala bonis eueniunt, pro eo, quòd & vera bona bonis, & vera mala malis in æterna retributione seruantur. &c.* Iuxta illud Ecclesiast. 12. *Cuncta quæ fiunt, adducet Deus in iudicium, pro omni errato, siue bonum, siue malum sit.*

Item probatur per inductionem. Deus passiones Isaac Gene. 22. acceptauit: passiones Ioseph acceptauit, Gene. 39. passiones Iob acceptauit, Iob 42. & suis meritis Iob, non solum ipse gratiam apud Deum inuenit; verumetiam iram Dei contra Eliphaz Themaniten, suis meritis placauit. Similiter Deus passiones Tobie acceptauit. Tob. 12. Similiter Deus passiones Dauid acceptauit, 3. Regum 11. & suis meritis Dauid obtinuit, vt regnum integrum maneret Salomoni filio. &c.

Ergo Deus sanctorum suorum passiones condignas fecit, quando eas acceptauit: sed sancti propter charitatem erga Deum, & propter gloriam nominis eius, passiones suas non esse condignas confitentur & prædicant; hoc enim iustum est coram Deo: scit tamen Deus quos elegit, scit quos vocauit: nam quos vocauit, hos & iustificauit, quos autem iustificauit illos & glorificauit. Quid ergo dicemus ad hæc? *Si Deus pro nobis, quis contra nos?* ad Rom. cap. 8. Scit ergo Deus, quos elegit, & sciunt sancti, cui crediderunt 1. Timoth. 1.

CONTRA. Quidquid datur, assumitur, & ponitur, contra principia logicorum, metaphysicorum, physicorum, &c. illud nulla ratione de-

ne defendi, nullo modo subsistere potest. sed hoc Corollarium quintum datur, assumitur, & ponitur contra principia logicorum, metaphysicorum, & physicorum. &c. igitur hoc Corollarium quintum nulla ratione defendi, nullo modo subsistere potest.

MAIOR Nota, Primo cæli: Patribus credendum: Et unicuique in sua arte perito credendum est.

MINOR probatur primò: Quia hoc Corollarium quintum, datur contra principia Logicorum: Nam Aristoteles in libro Perihermenias dicit: De quolibet affirmatio vel negatio, de nullo ambo simul. Idem lib. 2. Posteriorum: Duo habitus contrarij non sunt, nec esse possunt in eodem simul. Idem lib. 1. Metaph. De natura contrariorum est se mutuò expellere. Idem 12. Metaph. Duo accidentia non possunt esse simul in eodem subiecto. Idem lib. 1. Physico. Duo contraria in eodem subiecto, simul stare non possunt, quamvis ex seipsis contraria fiant.

PRIMA SOLVTIO. Negatur Consequentia: quia scriptum est, 1. ad Cor. ca. 1. Scriptum est enim Isaie 29. & 33. *Perdam sapientiam sapientium, & prudentiam prudentium reprobabo. Ubi sapiens? Ubi scriba? Ubi inquisitor huius seculi? nonne stultam fecit Deus sapientiam huius mundi?* &c. Hoc idem B. Apostolus repetit, 1. ad Corint. cap. 3. &c.

SECUNDA SOLVTIO: Non valet Consequentia: quia licet talia argumenta aliquid videantur concludere in Schola Logicorum Metaphysicorum, Physicorum, &c. Verumtamen in schola Theologorum nihil concludunt. Vnde Magister Sententiarum, lib. 2. Distinct. 34. dicit sic: *Ideoq; in his contrariis, quæ mala & bona vocantur, illa Dialecticorum regula deficit, qua dicunt, nulli rei, duo simul inesse contraria. Nullus enim cibus, aut potus simul dulcis est & amarus: nullum simul ubi album ibi & nigrum: & hoc in multis, ac penè in omnibus reperitur contrariis, ut in una re simul esse non possint. Cum autem bona & mala nullus ambigat esse contraria, non solum simul esse possunt, sed mala omnino sine bonis, & nisi in bonis esse non possunt. Et hæc duo contraria ita simul sunt, ut si bonum non esset, in quo esset; prorsus nec malum esse potuisset: quia non modo ubi consisteret, sed vnde oriretur corruptio non haberet, nisi esset quod corrumpere: quoniam nihil aliud est corruptio, quam boni exterminatio. Ex bonis ergo mala orta sunt: et nisi in bonis non sunt, nec fuit prorsus vnde oriretur ulla mali natura, nisi ex angeli & hominis naturæ bona, vnde primitus orta est voluntas mala. Ergo Regula Logicorum Metaphysicorum & Physicorum de contrariis fallit.*

Propterea D. AUGUSTINVS Sermo. 44. de sanctis, hæc puncta ut in Corollario quinto ponuntur coniungit, addens: quia hæc in promissione

missione Dei fundantur : ergo non in subtili argumentatione Logi-
corum, &c.

Quamobrem SS. Concilium Tridentinum, Sessio. 6. cap. II. docet
sic. *Licet enim in hac mortali vita, quantumvis sancti & iusti, in leuia
Iuam & quotidiana, quæ etiam venialia dicuntur peccata, quandoq; ca-
dant; non propterea desinunt esse iusti: iuxta illud Prouerb. 24. Ne insidi-
eris, & ne quæras impietatem in domo iusti, neq; vastes requiem eius: Se-
pties enim in die cadit iustus, & resurget: impij autem corrueant in malum.*

D. HIERONYMVS ad Rusticum monachum, & habetur de Pœni-
ten. & Remission, Distinct. 3. *Septies si cadit, quomodo iustus? Si iustus,
quomodo cadit? Sed iusti, vocabulum non amittit, qui per pœnitentiam
semper resurgit: & non solum septies; sed etiam septuagies septies delin-
quenti: si conuertatur ad pœnitentiam, peccata donantur: cui plus dona-
tur, plus diligit.* Hæc ille. Vnde constat eos Orthodoxæ religio-
nis doctrinæ aduersari, qui dicunt iustum, in omni opere bono saltem
venialiter peccare, aut, quod intollerabilius est, pœnas æternas mere-
ri. Contra quos SS. Concilium Tridentinum, tale Decretum dedit
Sessio. 6. Canone 25. *Si quis in quolibet bono opere iustum saltem venia-
liter peccare dixerit, aut, quod intollerabilius est, mortaliter, atq; ideo pœnas
æternas mereri, tantumq; ob id non damnari, quia Deus ea opera non im-
putat ad damnationem, Anathema sit.*

COROLLARIUM SEXTVM.

Sancta mater Ecclesia Catholica, est fidelis depositi thesauri in-
dulgentiarum testis & custos: nam ab immemorabili tempore ita in-
dulgentiis vtitur; vt & ipsa suis meritis promoueat filios ad indulgen-
tiam, & iustificationem, tanquam Rebecca Iacobum filium ad bene-
dictionem, Gene. 27.

Probatio Corollarii, Notabili 4. cap. 3. 4. 5. &c. Item, patet ex
suprà dictis & sequentibus.

Item, probatur testimonijs Sanctorum Patrum: D. GREGORIUS
Magnus, super 29. ca. Iob, li. 19. moralium, cap. 14. dicit: *Sancta mater
Ecclesia Catholica, ita est sollicita pro filiis, vt sicut Iob dicit: Oculus fui
cæco, & pes claudo: ita sancta mater Ecclesia, quæ duos in se populos colle-
git, Iudaicum scilicet atq; Gentilem, rectè potest cæco Gentilis, claudo au-
tem Iudaicus populus designari. Gentilis quippe, quasi oculos non habuit:
quia non recepta lege, non vidit, quo ire debuisset. At, contra Iudaicus, ha-
bens oculos, claudus fuit: quia legem quidem sciendo tenuit, sed in ea gres-
sum recti operis non tetendit. Si enim Gentilis populus cæcus minime fuisset,
Propheta non diceret: Populus qui sedebat in tenebris, vidit lucem*
Q magnam,

magnam. Rursum, si Israeliticus populus à bono opere minime claudicaret, nequaquam voce Domini Psalmista dixisset: Filij alieni mentiti sunt mihi: filij alieni inuenerunt me, & claudicauerunt à semitis suis. Ergo Ecclesia pro suis est sollicita: quia est oculus cæco, & pes claudus, tanquam mater.

D. AVGVSTINVS lib. I. de moribus Ecclesiæ Catholicæ cap. 30. Merito Ecclesia Catholica mater Christianorum verissima, non solum ipsum Deum, cuius adeptio vita est beatissima, purissime atq; castissime colendum prædicas, nullam nobis adorandam creaturam inducens, cui soli homo subijciendus est, cui soli rationalis anima coherendo non misera est, excludens omne quod factum est, quod obnoxium commutationi, quod subditum temporis, &c. sed etiam proximi dilectionem atq; charitatem ita complectens, ut variorum morborum, quibus pro peccatis suis animæ egrotant, omnis apud te medicina præpolleat. Tu pueriliter pueros, fortiter iuvenes, quiete senes, prout cuiusq; non corporis tantum, sed & animi ætas est, exerces ac doces. Tu fæminas viris suis, non ad explendam libidinem; sed ad propagandam prolem, & ad rei familiaris societatem casta, & fidei obedientia subijcis. Tu viros coniugibus non ad illudendum imbecillioris sexum, sed sinceri amoris legibus præficias. Tu parentibus filios libera quadam seruitute subiungis, parentes filiis pia dominatione præponis. Tu fratribus fratres religionis vinculo firmitate, atq; arctiore quam sanguinis nectis. Tu omnem generis propinquitatem, & affinitatis necessitudinem, seruatis naturæ voluntatisq; nexibus, mutua charitate constringis. Tu dominis seruos, non tam conditionis necessitate, quam officij delectatione, doces adhaerere. Tu dominos seruis, summi Dei scilicet, communis domini consideratione, placabiles, & ad consulendum quam coërcendum propensiores facis. Tu ciues ciuibus, gentes gentibus, & prorsus hominibus homines primorum parentum recordatione, non societate tantum, sed quadam etiam fraternitate coniungis. Doces reges prospicere populis: mones populos se subijcere regibus, &c. Lege totum, quia pulchrum: Tomo I. pagina 535. A B &c.

Idem D. AVGVSTINVS in Enchiridio ad Lauren. cap. Sexagesimo quarto, dicit: Per remissionem peccatorum stat Ecclesia, quæ in terris est: per hanc non perit, quod perierit, & inuentum est. Excepto quippe baptismatis munere, quod contra originale peccatum donatum est, ut quod generatione attractum est, regeneratione detrahatur; & tamen ætæna quoq; peccata, (veniant veniant, & audiant auribus Nouatiani) quæcumq; corde, ore, opere commissa inuenerit, tollit. Hac ergo excepta magna indulgentia, vnde incipit hominis renouatio, in qua soluitur omnis reatus, & ingeneratus, & additus, ipsa etiam vita, cætera iam ratione vten-

ne utentis ætatis, quantalibet præpolleat fecunditate iustitiæ, sine remissione peccatorum non agitur. quoniam filij Dei, quàm diu mortaliter uiuunt, cum morte conflagunt. Et quamuis de illis sit uenaciter dictum, ad

8. Quotquot Spiritu Dei aguntur, hi filij Dei sunt: sic tamen Spiritu Dei excitantur, & tanquam filij Dei proficiunt ad Deum; ut etiam spiritu suo maxime aggrauante corruptibili corpore, tanquam filij hominum, quibusdam motibus humanis deficiant ad seipsos, & ideo peccent. Hæc D. Augustinus.

Ergo sancta mater Ecclesia Catholica, tanquam Rebecca, sollicita est pro filiis, & magna pietate procurat indulgentiam filiis, & propterea seruat & custodit cælestem indulgentiarum thesaurum.

Quod & Ratione probatur tali.

Vbi est cælestis thesaurus indulgentiarum; ibidem perpetua custodia, & fidelis dispensatio. sed in Ecclesia Catholica est cælestis thesaurus indulgentiarum: igitur in Ecclesia est perpetua custodia, & fidelis dispensatio.

MAIOR vera, & probatur à simili: quia Regnum & Ciuitas solent custodire thesauros.

MINOR ex supradictis patet, &c. Quemadmodum igitur Christus purgat indulgentia Ecclesiam; ita vicissim Ecclesia mater, purgat filios indulgentia: & ubi est talis ordo, ibi Deus est, ad Roma. 13.

CONTRA, S. Apostolus ad Ephe. cap. 5. dicit: *Christus tradidit seipsum pro Ecclesia, ut illam sanctificaret, mundans eam lauacro aquæ, in uerbo uitæ, ut exhiberet ipse sibi gloriosam ecclesiam, non habentem maculam, aut rugam, aut aliquid huiusmodi*: Igitur Christus mundat Ecclesiam, & non Ecclesia filios.

SOLVITIO. Negatur Consequentia: nam Deus quidquid agit, agit semper per ordinata media, in quibus est Summus Pontifex, cum Episcopis & sacerdotibus.

Porro, ad authoritatem Apostoli, D. Augustinus lib. 1. Retractat. cap. 19. & lib. 2. Retractat. cap. 18. dicit: *Ubiunq; autem in his libris commemoravi Ecclesiam, non habentem maculam, aut rugam, non sic accipiendum est, quasi iam sit; sed quæ præparatur ut sit, quando apparebit etiam gloriosa: nunc autem propter quasdam ignorantias, & infirmitates membrorum suorum, habet unde quotidie tota dicat: Dimitte nobis debita nostra, etc.* Idem, D. Thomas Aquin. Idē dicit Anselmus Cantuariē. &c.

COROLLARIUM SEPTIMUM.

Deus, sicut contra peccatum originale procurauit, ordinauit, &

dedit circumcisionem, & fontem baptismi; ita contra peccata actualia procuravit, ordinavit, & dedit poenitentiam, absolutionem, satisfactionem, & fontem indulgentiarum.

Probatur Corollarium, Notabili Quarto, cap. 2.

Item, probatur autoritate Sacrosancti Concilij Tridentini, Sessione 6. cap. 14. De lapsis & eorum reparatione. *Qui verò, inquit, ab accepta iustificationis gratia per peccatum exciderunt, rursus iustificari poterunt, cum excitante Deo per poenitentiae sacramentum, merito Christi amissam gratiam recuperare procuraverint: hic enim iustificationis modus est lapsis reparatio, quam secundam post naufragium deperditæ gratiæ tabulam sancti Patres aptè nuncupaverunt. Etenim pro iis, qui post baptismum in peccata labuntur, Christus Iesus sacramentum instituit poenitentiae, cum dixit Ioan. cap. 20. Accipite Spiritum sanctum: quorum remiseritis peccata, remittantur eis: & quorum retinueritis, retenta sunt. Unde docendum est Christiani hominis poenitentiam post lapsum, multum aliam esse à Baptismali, eaq; contineri non modò cessationem à peccatis & eorum detestationem, aut cor contritum & humiliatum; verumetiam eorundem sacramentalem confessionem, saltem in voto, & suo tempore faciendam, & sacerdotalem absolutionem. Itemq; satisfactionem, per Ieiunia, Eleemosynas, orationes, & alia pia spiritualis vitæ exercitia: non quidem pro poena æterna, quæ vel sacramento, vel sacramentali voto, unà cum culpa remittitur; sed pro poena temporali, quæ ut Sacræ literæ docent, non tota semper, ut in baptismo fit, dimittitur illis, qui gratiæ Dei, quam acceperunt ingrati, Spiritum sanctum contristauerunt, & templum Dei violare non sunt veriti. De qua poenitentia scriptum est, Apocal. 2. Memor esto unde excideris, age poenitentiam, & prima opera fac. Et iterum, 2. ad Corint. 7. quæ secundum Deum tristitia est: Poenitentiam in salutem stabilem operatur. Et rursus, Matth. 3. Luc. 3. Poenitentiam agite, & facite dignos fructus poenitentiae.*

NOTA, quia Deus non omnibus dat poenitentiam, sed quibus vult tantum: 2. ad Timoth. 2. Seruum autem Dei, non oportet litigare; sed mansuetum esse, ad omnes docibilem, patientem cum modestia, corripientem eos qui resistunt veritati, ne quando Deus det illis poenitentiam ad cognoscendam veritatem, & resipiscant à Diaboli laqueis, à quo captiui tenentur ad ipsius voluntatem.

CONTRA ad Hebr. 12. *Ne quis fornicator, aut profanus ut Esau, qui propter unam escam vendidit primitiua sua. Scitote enim quoniam & postea, cupiens hæreditare benedictionem, reprobatus est: non enim inuenit poenitentiae locum, quanquam cum lachrymis inquisisset eam. Ergo Deus cui vult miseretur, & quem vult indurat, ad Rom. 9.*

Item

Item probatur Corollarium testimonio Theodoret, in Epitome diuinorum Decretorum, capite de poenitentia. *Sunt ergo medicabilia, inquit, etiam quæ post baptismum fiunt vulnera: medicabilia autem non ut olim per solam fidem data remissione; sed per multas lachrymas & fletus, & luctus, & ieiunium, & orationem, & laborem facti peccati commoderatum. Qui enim non sic affecti sunt, eos nec admittere quidem didicimus, nec diuina sunt eis manu impertienda. Nolite, inquit Matth. 7. dare Sanctum canibus, nec margaritas porcis. Has habet Ecclesia leges de poenitentia. Hæc ille. Vnde D. Ambrosius, de dignitate sacerdotali cap. 3. Quanto gradus altior, tanto casus grauior.*

COROLLARIUM OCTAVVM.

Deus vult, ut peccatores adulti, per aliqua officia poenalia fiant participes indulgentiarum.

Probatio Corollarij, patet Notabili primo cap. 2. Item patet ex Corollario proximè præcedenti. Item patet ex Corollario secundo, Conclusionis secundæ. Item patet ex Corollario tertio, Conclusionis sextæ. Item, probatur Iac. ca. 5. *Ecce iustificamus eos, qui sustinuerunt.*

COROLLARIUM NONVM.

Necesse est sub indulgentijs maiore patientia, iustitia, & humilitate portare crucem, & non dimittere iniunctas poenitentias: tum quia scriptum est Ecclesiast. cap. 5. De propitiatu peccatorum, noli esse sine metu, & ne adijcias peccatum super peccatum: tum quia in multis offendimus omnes, Iac. 3. tum quia satisfactionis opera sunt præseruatiua à futuris peccatis, teste D. Thoma.

Probatio Corollarij patet Notabili 1. cap. 2. & Notabili 7. cap. 3. & ut ex Conclusionem 2. Corollario tertio.

Item probatur testimonio B. Augustini, qui in lib. de vera & falsa poenitentia cap. 2. dicit: *Poenitentia itaq; acquirit Indulgentiam, sine qua nemo peruenit ad veniam.*

NOTA: quia D. Thomas in opusculis docet sic: *Præceptum est quadruplex, scilicet, Primæ necessitatis, Secundæ necessitatis, Tertiæ necessitatis, & Quartæ necessitatis. Primæ necessitatis præceptum est, Diligere Deum: Secundæ necessitatis est, ut est Satisfactio pro peccatis. Tertiæ necessitatis est, ut Votum & Consilia. Quartæ necessitatis præcepta sunt, quæ prælati Ecclesiarum instituunt, scilicet quæ instituit Papa in Ecclesia, aut Archiepiscopus in sua prouincia, aut Episcopus in sua Diocesi, aut Abbas in sua Abbatia.*

COROLLARIUM DECIMVM.

Indulgentiæ suppleant vicem satisfactionis, ut est satisfactio Punitiua, non ut est Medicatiua. D. Thomas.

Probatur Corollarium Notabili tertio cap. 4. & Notabili 4. cap. 3. 4. 5. Item probatur autoritate scripturæ 1. ad Corinth. cap. 5. *Ego quidem*, inquit B. Paulus Apostolus, *absens corpore, præsens autem spiritu, iam iudicaui ut præsens, cum qui sic operatus est, in nomine Domini nostri Iesu Christi, tradere huiusmodi hominem Sathanae, in interitum carnis, ut spiritus saluus sit in die Domini nostri Iesu Christi.* Cætera lege 2. ad Corinth. cap. 2.

COROLLARIUM VNDECIMUM.

Fidelis sermo, & omni acceptione dignus, quod Christus Iesus venit in hunc mundum peccatores saluos facere, quorum primus ego sum. Sed ideò misericordiam consequutus sum, ut in me primo ostenderet Christus Iesus omnem patientiam, ad informationem eorum, qui credituri sunt illi in vitam æternam. 1. ad Timotheum 1.

Probatio Corollarij ex suprâ dictis patet.

CONCLUSIO SEXTA.

Solus Papa, cui primo & principaliter dispensatio una cum clauibus credita, & tradita est, habet plenariam potestatem dandi indulgentias. Concilium autem Legati Episcopi commissarij & alij, secundum taxationem & dispensationem eius. D. Thom.

Veritas Conclusionis patet Notabili secundo cap. 8. & Notabili 4. cap. 5. &c.

Item, probatur autoritate Sacræ scripturæ Math. cap. 16. *Et ego dico tibi, quia tu es Petrus, & super hanc petram ædificabo Ecclesiam meam: & portæ inferi non præualebunt aduersus eam. Et, tibi dabo clauis regni cælorum: Et quodcunq; ligaueris super terram, erit ligatum et in cælis: & quodcunq; solueris super terram, erit solutum & in cælis.* Item, Math. 24. & Luc. 12. *Fidelis dispensator, siue seruus, & prudens, quem constituit Dominus super familiam suam, ut det illis in tempore tritici mensuram.*

Item, probatur testimonio Sacrorum Canonum, de poenitentiis & remissionibus, cap. Quod autem. Et cap. Nostro, & in Extrauag. cap. Vnigenitus. *Thesaurum*, inquit, *Ecclesiæ, Deus in sudario noluit esse repositum, neq; in agro absconditum; sed per B. Petrum cæli clauigerum eius-*

rum, eiusq; successores, suos in terris Vicarios, commisit salubriter fidelibus dispensandum. Et propiis & rationalibus causis, nunc pro totali, nunc pro partiali remissione pœnæ temporalis, pro peccatis debita, tam generaliter quàm specialiter verè pœnitentibus & confessis, misericorditer applicandum. Vnde dispensatio tam magni, tam sancti thesauri in casibus fieri debet, in quibus verisimiliter appareat Deum Dominum magnū, cuius propriè is est thesaurus, in dispensationem huiusmodi consentire, & eam approbare. Sciendum autem, quia Episcopus non tantum præsens, sed electus, nondum consecratus, nondum sacris initiatus, indulgentias concedere potest. Nam electus ad Episcopatum, etiam antequam consecratur, iurisdictionem habet, quæ sufficit ad indulgentias concedendas, ut habetur de Electio. cap. Transmissam. Nullus Episcopus potest alicui, non sibi subdito, nisi ex facultate proprii Episcopi, indulgentiam concedere, ut expressè patet in cap. Quod autem: de pœnitentiis & remissionibus. Item, omnes Episcopi, excepto duntaxat Summo Pontifice Romano, Sanctissimo Papa, non possunt nisi quadraginta dies, ex rationabili causa, vel annum indulgentiarum, ratione ædificandi aliquam Basilicam concedere, patet ex cap. Cum ex eo: de pœnitentiis & remissionibus.

Summus autem Pontifex Romanus Papa, habet plenitudinem potestatis, sicut Rex in regno. Episcopi verò assumuntur in partem solitudinis, quasi iudices singulis ciuitatibus præpositi. Quamobrem Episcopi à Summo Pontifice fratres nuncupantur, filij verò cæteri fideles. Ergo Papa cum sit vniuersalis totius Ecclesiæ pastor, & iudex, potest prout libet, secundum suum beneplacitum, modò adsit rationalis causa dare indulgentias. Alij verò Episcopi, in suis diocesis, quantum à Vicario Christi concessum est. Legati autem in sua prouincia indulgentias concedere valent. Archiepiscopi verò in Episcopatibus Suffraganeorum suorum. Extra, de pœnitent. & remissione, Cum ex eo. Ex quo patet quod potestas Papalis in concedendis indulgentiis sit omninò plenissima: Episcoporum verò limitata, & determinata: nam tota pendet ex arbitrio, & iudicio Summi Pontificis; ne abusus in contemptum clauium verteretur; ne disciplina Ecclesiastica, & pœnitentialis satisfactio eneruaretur.

De Conclusionem Sexta, est Controuersia inter Catholicos & Hæreticos. Nam Catholici hanc Conclusionem, ut ponitur Catholicè in forma, non solum affirmant; verum etiam ut edocti sunt à Magistro Spiritu sancto in Ecclesia Catholica, cum Patribus credunt.

CONTRA HÆRETICI indulgentias, & auctoritatem clauium blasphemant & negant. Nam Nouatiani clauēs & indulgentias negant. Vnde D. Ambrosius super Primam ad Corinth. cap. 5. & in libro de Pœnitentia: *Quid isti Nouatiani, inquit, possunt consortium tecum habere, qui clauēs regni cœlorum non suscipiunt, negantes improbè, in Ecclesia posse condonari, cum Petro dictum sit: Tibi dabo clauēs regni cœlorum: & quæcunq; ligaueris super terram, sint ligata & in cœlis, vel soluta in cœlis.*

Lutherus in Sacramento pœnitentiæ ac remissionis culpæ, dicit: quia non plus facit Papa aut Episcopus, quàm infimus Sacerdos: imò vbi non est sacerdos, æquè tantum quilibet Christianus, etiam si mulier aut puer esset. Eundem errorem tutati sunt sectatores Lutheri.

Item, Ioannes Vuicleffus, teste Gabriele Prateolo, dicit: Fatuum est credere indulgentias Papæ, & Episcoporum aliquid momenti habere. Item, Ioan. Westphalus in eo tractatu, quem de indulgentiis Ecclesiæ inscripsit, asserit thesaurum meritorum sanctorum, non posse per Papam distribui, nec etiam pensationem pœnarum pro peccatis debitarum posse fieri, per pœnas quas sustulit Christus, & quòd indulgentiæ sunt piæ fraudes fidelium.

PROPTEREA QVÆRITVR. AN SOLVS PAPA HABEAT POTESTATEM CONCEDENDI INDVLGENTIAS? Et videtur quòd non: quia scriptum est Ezechiel. cap. 18. *Et cum auerterit se impius ab impietate sua, quam operatus est, & fecerit iudicium & iustitiam, ipse animam suam uiuificabit.*

Item, Ioan. 20. *Accipite Spiritum sanctum* (hoc dicitur ad omnes Apostolos, non solùm ad Petrum) *quorum remiseritis peccata, remittuntur eis: & quorum retinueritis, retenta sunt.*

Et hoc ipsum Rationibus volunt probare.

PRIMA RATIO. Quod omnibus indifferenter Apostolis à Christo cōmissum, & concessum est; illud non est vni tantum tribuendum. sed auctoritas ligandi & absoluendi, indifferenter omnibus Apostolis commissæ & concessa est: igitur ex illo Math. 16. potestas dandi indulgentias rectè probari nō potest.

MAIOR vera: quia communibus vt communibus, priuatis autem vt suis vtendum est.

MINOR Math. 18. Ioan. 20. Porro, Math. 16. Petrus in persona omnium Apostolorum ligandi atque soluendi potestatem accepit.

SOLVITVR. Negatur Consequentia. Nam totus ille verborum cōtextus

textus, ad solam Petri personam, dimissa aliorum Apostolorum mentione, dirigitur. ideoque non immerito ad potestatem & auctoritatem concedendarum indulgentiarum refertur. Nam auctoritatem absolueri, & ligandi, post Christi ascensionem, Apostoli acceperant Ioan. 20. *Accipite Spiritum sanctum, &c.*

NEC VALET DICERE. Illa sententia Petro ferendi leges, pro Reipublicæ Christianæ regimine administrando, & non pro indulgentiis concedendis potestatem esse tributam: illa enim Petro, quatenus est princeps absolutè competit: quia omnis princeps sibi subditos legibus ligare & soluere potest. In quantum verò princeps Ecclesiasticus, potestas ligandi & soluendi tributa est illi: *Tu, inquit, es Petrus, & super hanc Petram ædificabo Ecclesiam meam, & portæ inferi, id est, peccata, non præualebunt aduersus eam: quia clauēs regni cælorum dabo tibi: & quodcunque ligaueris super terram, erit ligatū & in cælis: & quodcunque solueris super terram, erit solutum & in cælis.*

De aliqua ergo potestate loquitur Christus, quam soli Petro per modum quasi propriæ auctoritatis concessit, qua scilicet temporales pœnas, relaxare, diluere, soluere, purgare, & remouere potest. Præterea, potestas ligandi sibi subditos per leges, fundatur in auctoritate Polytica: hæc autem in fide: & ideo post confessionem fidei Petro cōceditur & tribuitur, *Et portæ inferi, non præualebunt aduersus eam*: id est, peccatorum reatus & obligationes, eò quòd clauibus Petri confringuntur, & præualere non valent. Et hæc quidem potestas Petro concessa est, ob egregiam illam fidei confessionem, qua confessus est, Christum esse verè filium Dei.

CONTRA. Si illis verbis Matth. 16. Petro conceditur potestas indulgentias largiendi, cū alijs etiam erat communicanda; quid opus fuit illam seorsum Petro exhibere? SOLVITVR. Quemadmodum omnibus Apostolis in commune dictum est, *Euntes docete omnes gentes*, & Petro seorsim, *Pasce oues meas*: quia reliquis Apostolis pro suis successoribus data potestas in suis Diocæsesibus, Petro autem in tota prorsus vniuersali Ecclesia, cuius ipse Princeps est, Pontifex, & caput: sic & seorsim Petro est data illa potestas, veluti pastori totius Ecclesiæ vniuersalis, alijs verò veluti particularibus orbis principibus.

CONTRA Math. 18. dicitur: *Amen dico vobis, quæcunq; alligaueritis super terram, erunt ligata & in cælo: & quæcunq; solueritis super terram, erunt soluta & in cælo.* Igitur omnes Apostoli indifferenter, insolidum acceperunt potestatem, omnes in vniuerso orbe terrarum absolueri & ligandi, & non solus Petrus Apostolorum princeps & caput.

SOL-

SOLVITVR. Petrus pro se, & suis successoribus, alij autem pro seipfis tantum, potestatem illam acceperunt: alioqui confusa esset Ecclesie gubernatio, quae tamen terribilis est, ut castrorum acies ordinata, & ordinata ordine Monarchiae, sub vno Petro Papa. Episcopi autem quamuis sint veri & legitimi successores, & haeredes Apostolorum, funguntur officiis in suis Dioecesibus: excepto duntaxat Summo Pontifice Petro Papa Romano, successore illo, qui vniuersalis Ecclesie pastor est, princeps pastorum, & caput. Porro, Apostoli omnes, infolium per vniuersum orbem terrarum, propter nouae ciuitatis Ierusalem, id est Ecclesiae fundandae necessitatem, auctoritatem habebant seminandi Euangelium, fundandi Ecclesiam, & alia, quae ad Apostolici culminis auctoritatem spectant; Petrum tamen Papam, qui iubente Domino, ducit in altum, & in toto orbe terrarum principem se esse declarauit, Principem esse voluerunt, caput Ecclesiae, & Papam, Christi Vicarium agnoscebant, & summo honore prosequiebantur.

CONTRA, Paulus ad Galath. cap. 2. dicit: *Cum autem venisset Cephas Antiochiam, in faciem ei restiti, quia reprehensibilis erat.* Igitur &c.

SOLVITVR. Paulus restitit Petro secundum quid, non simpliciter. Praeterea, prudens seruus in quibusdam solet aliquando resistere Domino, & amicus amico suo, sine transgressione officii, sine offensione, & salua domini & amici auctoritate & dignitate.

SECVNDA RATIO. Ad sponsum spectat, disponere de rebus sponsae. sed quilibet Episcopus est propriae Ecclesiae sponsus: igitur quilibet Episcopus, habet potestatem Ecclesiae, thesaurum dispensandi: & per consequens indulgentias concedendi.

Adde, quod si Papae haec potestas competit, ratione ordinis, similiter & Episcopo: quia idem est ubiq; ordo: nam quod dicitur Romano Pontifici, id competere ratione iurisdictionis, hoc à ratione alienum videtur: quia iurdictio pertinet ad forum contentiosum: indulgentiae vero ad forum & Sacramentum poenitentiae. Ergo quilibet Episcopus potest concedere indulgentias.

MAIOR vera. MINOR nota.

SOLVITVR. Negatur Consequentia: Licet enim quilibet Episcopus sit assignatae sibi Ecclesiae sponsus; non tamen est vniuersalis Ecclesiae sponsus, sicut Papa, qui est totius Ecclesiae pastor vniuersalis, cuius gratia competit ei potestas (potestas nimirum sedi Apostolicae reseruata) dispensandi indulgentias.

TERTIA RATIO. Sicut nullus potest absoluerè à peccatis,

tis, nisi actu sacerdos; ita etiam nullus nisi actu sacerdos, indulgentias legitime potest concedere. sed solus actu sacerdos potest absolvere in foro poenitentiae: ergo solus actu sacerdos indulgentias legitime potest concedere.

MAIOR vera, quia per indulgentias tantum remittitur de poena, quantum fuerit per sacerdotem in foro poenitentiae pensatum & taxatum.

MINOR nota.

SOLVITVR. Negatur Consequentia: nam dimissio culpae, respicit potestatem Ordinis: dimissio vero poenae temporalis per indulgentias, respicit potestatem Iurisdictionis: quia praesupponit culpam dimissam, & sic non est simile. Itaque concedere siue facere indulgentias, non ad clauem Ordinis, sed ad clauem Iurisdictionis spectat, ut saepe dictum est.

QUARTA RATIO. Si indulgentiae virtute clauium conceduntur, & quilibet sacerdos habet clauis: igitur quilibet actu sacerdos legitime potest indulgentias facere, instituire, & concedere.

Adde, quod quilibet homo possit sua merita pro suo beneplacito alteri communicare, & sic eius poenam minuere, quod ad indulgentias pertinet.

CONSEQUENTIA à causa ad effectum. ANTECEDENS notum.

SOLVITVR. Negatur Consequentia: nam clauis iurisdictionis, & thesauri dispensandi autoritas, legitime potest indulgentias concedere: haec cum simul desint Parocho, ex suo ordinario officio non habet potestatem indulgentias concedendi. Ad Confirmationem: licet quilibet habens charitatem, possit alijs sua merita communicare; non tamen potest indulgentias concedere: quia hoc pertinet ad officium & actum iurisdictionis, quae pendet ex iure diuino, & dispensatione Summi Pontificis.

NOTA. Quia Dominicus à Soto tenet, quod Episcopi à Parochis in conferendis indulgentijs, non diuino, sed positiuo iure differunt.

PORRO, si quis urgeat & instet, parochialem sacerdotem posse indulgentias concedere. Ad hoc non temere dici potest, quod Parochialis sacerdos, sicut non habet auctoritatem excommunicandi; ita neque indulgentias concedendi. Etenim Parochi se habent in Ecclesia, sicut diuersarum familiarum praefecti in vna eademque ciuitate, cuius ciuitatis princeps & rector solus est Episcopus vniuersalis, apud quem proprie residet potestas excommunicandi, & indulgentias conce-

concedendi; & sic patet, quia hæc omnia pendent ex dispensatione Summi Pontificis.

QVINTA RATIO. Anima mutari non potest: igitur indulgentiæ non profunt.

CONSEQUENTIA nota. ANTECEDENS patet.

SOLVITVR. Negatur consequentia. Antecedens autem D. Augustinus libro de vera religione cap. 13. soluit, dicens: *Mutari autem animam posse, non quidem localiter, sed tamen temporaliter, suis affectionibus quisque cognoscit: corpus verò & temporibus, & locis esse mutabile, cuius aduertere facile est.*

SED CONTRA EST, quod legislator, & saluator Christus Dominus Math. cap. 16. dicit: *Et ego dico tibi, quia tu es Petrus, & super hanc petram ædificabo Ecclesiam meam, & portæ inferi non præualebunt aduersus eam. Et tibi dabo claues regni cælorum: & quodcunq; ligaueris super terram, erit ligatum & in cælis: & quodcunq; solueris super terram, erit solutum & in cælis.*

In hunc locum scripturæ communis est expositio S. August. Tract. 22. & 49. in Ioannem, Hilarij, Hieronymi, Anselmi, & aliorum: Dominum loqui de potestate clauium, qua Apostoli & eorum successores ligant, vel absoluunt peccatores. Et quamvis hîc tractari videatur præcipuè de potestate iurisdictionis, qua peccatores excommunicantur; tamen Patres iam nominati, locum hunc de vtrâq; potestate ordinis videlicet, & iurisdictionis exponunt.

Item ad Ephes. cap. 5. *Mulieres viris suis subditæ sint, sicut Domino; quoniam vir caput est mulieris, sicut Christus caput est Ecclesiæ, ipse saluator corporis eius est. Sed sicut Ecclesia subiecta est Christo, ita & mulieres viris suis in omnibus. Viri diligite uxores vestras, sicut Christus dilexit Ecclesiam, & seipsum tradidit pro ea, ut illam sanctificaret, mundans eam lauacro aquæ in verbo vitæ, ut exhiberet ipse sibi gloriosam Ecclesiam non habentem maculam, aut rugam, aut aliquid huiusmodi; sed ut sit sancta, immaculata.* **NOTA.** Christus est caput Ecclesiæ; sed inuisibile: visibile autem caput Ecclesiæ est Papa, cuius est officium purgare, illuminare, & perficere Ecclesiam.

Atque hoc ipsum pluribus rationibus potest confirmari.

PRIMA RATIO. Vnius corporis vnum debet esse caput, vnius domus vnus œconomus, vnius ouilis vnus pastor, vnius nauis vnus debet esse gubernator, vnius exercitus vnus dux & imperator, vnius regni vnus rex. sed Ecclesia Catholica visibilis est vnum

est vnum mysticum corpus, vna domus, vnum ouile, vna nauis, vnus exercitus, vnum regnum: igitur Ecclesia Catholica visibilis necessario debet habere vnum caput, vnum œconomum, vnum pastorem, vnum gubernatorem, ducem, imperatorem, & vnum regem. MAIOR à simili, & probatur pro singulis partibus.

Pro prima parte, Cantic. 7. *Caput tuum*, inquit, *sponsus ad sponsam sicut Carmelus*. Et sponsa de sponso, Cantic. 5. *Caput eius aurum optimum*. Item ad Ephes. 5. Ex capite autem in totum corpus, & in singula membra sensus & motus.

Pro secunda parte 1. ad Timoth. 3. *Suæ domui benè præpositum*. &c. Si quis autem domui suæ præesse nescit, quomodo Ecclesiæ Dei diligentiam habebit?

Pro tertia parte Ioan. 10. *Et fiet vnum ouile, & vnus pastor*.

Pro quarta parte. 1. Pet. 3. Solus Noë arcam regebat, & in ea tam hominibus, quàm iumentis imperabat.

Pro quinta parte Cant. 6. *Quæ est ista, quæ progreditur, quasi aurora consurgens, pulchra ut luna, electa ut sol, terribilis ut castrorum acies ordinata?*

Pro sexta parte Lucæ 11. *Omne regnum in seipsum diuisum desolabitur, & domus supra domum cadet*. Vnde Homerus Iliados 2. dicit. οὐκ ἄρα ποτὶ πολὺ κοίραν ἢ εἰς κοίραν ἐσὼ, εἰς βασιλίδος. & hæc sententia apud omnes penè scriptores est celebris.

MINOR similiter pro singulis partibus probatur.

Pro prima parte ad Ephes. cap. 4. *Vnum corpus, vnus spiritus*.

Pro secunda parte, Psal. 67. *Deus in loco sancto suo, Deus qui inhabitare facit vnus moris in domo. Qui educit vinctos in fortitudine, similiter eos qui exasperant, qui habitant in sepulchris*. Item Act. 1. Apocal. 21.

Pro tertia parte. Ioan. 10. Vnum ouile, non multa ouilia, vnum aluearium, vnum collegium, vna caterua, vna societas, vna congregatio.

Pro quarta parte, Lucæ 5. *Ascendit autem in vnauim, quæ erat Simonis*.

Pro quinta parte D. Hieronymi ad Rusticum Monachum. In quâuis grandi exercitu, vnus signum expectatur.

Pro sexta parte Lucæ 10.

In summa quemadmodum rex vnus est apibus, & grues vnum sequuntur ordine literato; ita debet Ecclesia vniuersa vnum habere & sequi ducem, & ductorem primum, penes quem summa rerum omnium, penes quem potestas iurisdictionis & ordinis, penes quem authoritas ligandi atque soluendi, penes quem authoritas excommunicandi; & indulgentias concedendi.

R

SE-

SECUNDA RATIO. Cælum necessario agit in hæc inferiora: igitur & Papa in subiectum populum, & per consequens solus papa habet potestatem concedendi indulgentias.

CONSEQUENTIA à simili: nam sicut cælum agit in hæc inferiora, motu, lumine, & influenza; ita Papa in Ecclesia agit in subiectum populum purgando, illuminando, & perficiendo.

ANTECEDENS est Aristotelis, & omnium Physicorum, & Mathematicorum. &c.

TERTIA RATIO. Quidquid est ordinis in domo prudentis patrisfamiliæ; hoc idem multò melius & perfectius est, & esse debet in domo Dei, in Ecclesia Catholica. sed in domo prudentis patrisfamiliæ est talis ordo; quia inter fratres est similitudo amoris & honoris, attamen est etiam discretio potestatis: igitur in Ecclesia Catholica fuit inter sanctos Apostolos similitudo amoris & honoris. attamen fuit etiam discretio potestatis: & per consequens solus Petrus Romanus principaliter habet potestatem ligandi & soluendi, excommunicandi, & indulgentias concedendi.

MAIOR est vera à simili, & à minori ad maius.

MINOR est de lege naturæ, de lege scripta, & satis patet in scripturis de primogenitis, tum ex prærogatiuis & Priuilegijs primogenitorum. Vnde S. Leo Epistola 84. ad Anastasium Episcopum Thessalonicensem. *Inter beatissimos, inquit, Apostolos, in similitudine honoris, fuit quedam discretio potestatis: & cum omnium par esset electio, uni tamen datum est, ut cæteris præemineret.* Idem S. Leo, de anniuersario assumptionis suæ ad Pontificatum, ubi explicat hoc verbum, *Tibi dabo claves: Transiit, inquit, in alios Apostolos vis potestatis istius, & ad omnes Ecclesiæ principes decreti huius Constitutio commeauit.*

Fuerunt igitur Sancti Apostoli pares inter se, honore, & potestate secundum quid, & non simpliciter.

ADDE, quia non tantum inter filios apud patrem hæc inuenitur harmonia; verum etiam apud Dominum prudentem inter seruos, inter quos sæpenumerò inuenitur Maior domo.

QUARTA RATIO. Quidquid optimum fuit in Synagoga, hoc totum translatum est ad Ecclesiam. sed monarchia fuit quid optimum in Synagoga: igitur monarchia translata est ad Ecclesiam: & per consequens penes vnum debet rerum omnium esse summa

summa & indulgentiarum.

MAIOR vera:

MINOR, quia in signum huius rei, solus Moyses ascendit in montem ad Deum Exod. 19. & 24.

Item, Minor probatur: primò conueniunt in hac sententia veteres scriptores omnes Hebræi, Græci, Latini, Theologi, Philosophi, Oratores, Historici, Poëtæ. Ex Theologis Hebræis, Philo in libro de confusione linguarum, laudans Homeri sententiam: Illud, inquit, multos imperitare, malum est: Rex vnicus esto: non ad ciuitates & homines magis pertinet, quàm ad mundum & Deum.

Ex Græcis, B. IUSTINVS in Oratione exhortatoria ad gentes, multorum principatum noxium esse dicit: & contrà principatum vnus, vtilem & salutarem: vnus enim, inquit, principatus à bellis, dissidiisque solutus ac liber esse solet.

Beatus quoque ATHANASIVS in Oratione aduersus idôla, vt inquit, multitudo deorum, nullitas est deorum; ita quoque necesse est multitudinem principum id efficere, vt nullus esse princeps videatur: vbi autem princeps non est; ibi prorsus disturbatio nascitur.

Ex Latinis idem docet B. CYPRIANVS, qui in Tractatu de Idolorum vanitate, ex eo potissimùm probat, Deum esse vnum: quia Monarchia, sit optimum & naturalissimum regimen. *Ad diuinum, inquit, imperium, etiam de terris mutuemur exemplum, quomodo vnquam regni societas, aut cum fide cœpit, aut sine cruore desit?*

Et B. HIERONYMVS in Epistola ad Rusticum Monachum: *Vnus, inquit, Imperator, Iudex vnus provincie: Roma, vt condita est, simul habere duos reges non potuit.*

Denique SANCTVS THOMAS in I. parte Quæ. 103. Arti. 3. & lib. 4. contra gentes cap. 76.

Item, ex Philosophis PLATO in Polytico vltra medium: Vnius, inquit, dominatio, bonis instructa legibus, sex illarum omnium optima est. Gubernationem verò eam, in qua non multi imperant, mediam censere debemus: cæterùm, multorum administrationem, omnibus in rebus debilem atque infirmam.

Platonem secutus ARISTOTELES lib. 8. Eticor. cap. 10. Postea quàm tres illas formas regiminis enumerauerat, ista verba subiecit: Harum optima regnum: pessima Respublica est.

Idem 12. Methaphi. Mala est pluralitas principum: Sit ergo vnus princeps.

SENECA lib. 2. de Benefic. Marcum Brutum, ait, non fatis prudenter egisse: cùm Iulium Cæsarem, spe libertatis occidit: & rationem reddens, ait: cùm optimus ciuitatis status sub rege iusto sit.

PORRÒ, PLUTARCHVS integrum opusculum de Monarchia, cæterisque formis, regendæ multitudinis conscripsit: in quo opusculo sententiam suam ita expresse: Si optio, inquit, eligendi concessa fuerit, non aliud eligat, quàm vnus potestatem. Et rursus idem Plutarchus in Solone: cùm dixisset Athenis plurimas seditiones ortas fuisse, cùm Democratia vigeret, addit continuò: Vna autem superesse ratio videbatur, ad salutem & quietem, si res delatæ ad dominatum essent.

Ex Orationibus Isocratis, in ea oratione, quæ inscribitur, Nicocles, multis rationibus hoc ipsum probare contendit.

IOANNES verò Stobæus 45. sermonum, hoc titulo prænotauit ὁ τίς ἄλλος ἢ μοναρχία. atque in eo sermone Hesiodi, Euripidis, Serini, Æfantis, & aliorum multorum, ad hoc ipsum confirmandum testimonia producit.

HERODOTVS ex Historicis lib. 3. qui Thalia inscribitur, cùm exposuisset cædem Magorum, qui regnum in Perside occupauerant, exponit etiam disputationem, quæ inter principes versata fuerat de Re-pub. constituenda. Cuius disputationis is exitus fuit, vt diligenter excussis eorum sententiis, qui pro Aristocratia, vel Politia certabant, omnium concessione, vno tantum excepto Monarchia vtilissima & præstantissima iudicaretur, & propterea etiam in Perside retineretur.

Denique ex Poëtis HOMERVS in lib. 2. Iliados, sententiam illam protulit, ab omnibus penè scriptoribus celebratam: οὐκ ἀγαθὸν πολυκίς
 εἶναι εἰς κοίραν ἔσθω, εἰς βασιλευσά.

CONTRA, non per vnum, sed per multos voluit Deus Synagogam gubernari: igitur ibi non fuit Monarchia: quia scriptum est, Numerorum 11. Et dixit Dominus ad Moysen: *Congrega mihi septuaginta viros de senibus Israël, quos tu nosti, quod senes populi sint ac magistri: Et duces eos ad ostium tabernaculi fœderis: faciesq; ibi stare tecum, vt descendam, & loquar tibi: Et auferam de spiritu tuo, tradamq; eis, vt sustentent tecum onus populi, & non tu solus graueris.*

SOLVITVR. Negatur Consequentia: Nam quamuis Deus septuaginta viros propter causas iudicandas Moyse addidisset, tamen summa rerum & gubernationis, & summa potestas in illo exercitu populi fuit semper penes vnum Moysen, vt scriptura testatur.

PORRÒ, ad illud quod dicitur: *auferam de spiritu tuo.* D. Augustinus lib. 5. de Trinitate, cap. 14. &c. *Hoc, inquit, & de Moyse intelligendum est, cùm ait ei Dominus: Tollam de spiritu tuo, & dabo eis, hoc est, dabo illis de Spiritu sancto, quem iam tibi dedi.* Hæc ille.

QVINTA RATIO. Cui à Deo, præter cæteros, data est hierarchia, & monarchia Ecclesiastica, cum clauibus datum imperium, & regnum; eidem simul cum omni harmonia datus est & thesaurus. sed soli Petro Romano Papæ à Deo præter cæteros data est hierarchia, & monarchia Ecclesiastica, cum clauibus datum imperium & regnum: igitur soli petro Romano Papæ, cum omni harmonia datus est & thesaurus: Et per consequens, solus Petrus Romanus Papa, debet dispensare thesaurum, & concedere indulgentias.

MAIOR probatur autoritate scripturæ, Daniel cap. 4. *Excelsus dominatur super regnum hominum, & cuicumq; voluerit dat illud.* Porro, cui dat regnum, dat cum regno & thesauros regni.

MINOR probatur autoritate scripturæ, Math. 16. cap. *Et ego dico tibi, quia tu es Petrus, & super hanc petram ædificabo Ecclesiam meam, & portæ inferi non præualebunt aduersus eam: & quodcunq; ligaueris super terram, erit ligatum & in cælis: & quodcunq; solueris super terram, erit solutum & in cælis.*

Hæc & alia sexcenta possunt ad eam rem adferri argumenta. Sed si Hæretici blasphemæ non acquiescunt, sanis & veris sermonibus Sanctæ matris Ecclesiæ Catholicæ, & certis argumentis Catholicorum; audiant igitur horribile Decretum SS. Concilij Tridentini Patrum, qui Sessio. 23. De Sacramento Ordinis, Canone 6. definiuerunt, & pronunciauerunt sic: *Si quis dixerit in Ecclesia Catholica non esse hierarchiam, diuina ordinatione institutam, quæ constat ex Episcopis, Præ-* Eph. 4.
sbyteris, & Ministris, Anathema sit.

Item, ibidem Cano. 7. *Si quis dixerit Episcopos non esse presbyteris superiores, & per consequens Papam ipsis Episcopis, &c. Anathema sit.*

COROLLARIUM PRIMUM.

Infinitus thesaurus Ecclesiæ non est diuisus, sed est vnus & indiuisus in tota Ecclesia: ideoq; ad vnum & primum caput Ecclesiæ, hoc est ad Papam potissimum spectat eius dispensatio: Episcopis verò competit, tanquam coadiutoribus Summi Pontificis, qui in partem sollicitudinis Ecclesiæ gubernandæ sunt assumpti.

Probatur Corollarium, Notabili quinto, cap. primo.

Item, probatur autoritate scripturæ Ioã. 19. *Erant autem tunica inconsutilis, desuper contexta per totum. Dixerunt ergo adinuicem: Non scindamus eam, sed sortiamur de illa, cuius sit.*

NOTA: quia hæc tunica inconsutilis, coadunata, significat secundum Patres vnitatem fidei, vnitatem Ecclesiæ, vnitatem Sacramentorum, & per consequens vnitatem indulgentiarum: sed præterea quæ dicta sunt, significat vnitatem charitatis, quæ est vinculum perfectionis, ad Colos. cap. 3. Item, probatur Ratione tali.

Vnus est mediator Dei & hominum, homo Christus Iesus indiuisibilis: igitur & indulgentia vna & indiuisibilis.

CONSEQUENTIA à causa ad effectum: qualis enim est causa, talis est & effectus: & vnius causæ tantum vnus est effectus, 1. Posterior.

ANTECEDENS 1. ad Corinth. 1. cap. *Nunquid diuisus est Christus?* Item, ad Ephes. cap. 4. *Vnus Dominus, vna fides, vnum baptisma, vnus Deus & pater omnium, qui est super omnes, & per omnia, & in omnibus nobis,* Item, 1. ad Timot. cap. 2. *Vnus enim Deus, vnus & mediator Dei & hominum, homo Christus Iesus, qui dedit redemptionem semetipsum pro omnibus.* Ergo vna redemptio, vna indulgentia, sicut vna oblatio, ad Roma. 10.

PORRÒ, si quispiam ex 3. Physic. arguat sic: Infinitum est diuisibile: ergo & indulgentia est diuisibilis. Tunc negatur Consequentia, & soluitur primo: quia infinitum Physicū potest aliquo modo concedi, quod sit diuisibile. sed infinitum Theologicum est indiuisibile. Rursum, Si quispiam dicat, quia indulgentia datur per partes: ergo est diuisibilis. Tunc soluitur sic: Negatur Consequentia, & soluitur: quia si indulgentia diuiditur; tunc non per se, sed per Accidens, vt dicit Caietanus parte I. quæst. 7. Arti. 3.

COROLLARIUM SECVNDVM.

Solus Petrus Romanus claudit & aperit regna cælorum: alij verò ab eo missi, claudunt & aperiunt regnū cælorum: Orig. super Math. Probatio Corollarij, patet Notabili quarto, cap. quinto.

Item, probatur testimonio Origenis, Homelia 6. in Mattheum: *Oportebat, inquit, aliquid maius habere Petrum præ alijs, ideoq; sic dicit: Et tibi dabo claves regni cælorum, & quæcunq; solueris super terram, erunt soluta & in cælis: & quæcunq; ligaueris super terram, erunt ligata.* Non ergo modica differentia est, quòd Petro quidem datæ sunt claves, non vnius cæli; sed multorum cælorum: vt quæcunque ligauerit super terram, sint ligata: non tantum in vno cælo, sed in omnibus cælis. Ad eos autem, qui multi sunt ligatores & solutores in terra, sic dicit: vt soluant & alligent, non in cælis sicut Petrus; sed in vno cælo: quia non sunt in tanta perfectione sicut Petrus, vt alligent vel soluant

soluant in omnibus cælis. quantò ergo melior fuerit qui ligat, tantò qui alligatur amplius, quàm in vno cælo alligatur : & quantò melior fuerit qui soluit, tantò beatior erit qui soluitur, quoniam in omnibus solutus est cælis.

COROLLARIUM TERTIUM.

OEcumenicum generale Concilium, legitimè cum autoritate consensu Summi Pontificis in Spiritu sancto congregatum, habet plenam iurisdictionem indulgentias concedendi : sed capitulum Cathedralis Ecclesiæ fede vacante, non habet auctoritatem dandi indulgentias : quia est potestas Episcopalis.

Probatur Corollarium, Notabili 3. cap. 5. & Notabili 4. cap. 5.

Ratio autem Corollarij est : quia Summus Pontifex & Concilium sunt quid vnum : nam Pontifex est caput, Concilium autem membra : ergo per communicationem capitis cum membris, Concilium generale legitimè congregatum, habet plenariam iurisdictionem indulgentias concedendi. Nam Summus Pontifex, hanc suam iurisdictionem, potest cum aliis communicare, & communicat, propter commune bonum, & propter salutem Ecclesiæ.

CONTRA, Apostolus sanctus Paulus, ad Ephes. cap. 4. scripsit : *Vnum corpus, unus spiritus, &c. Omnes inuicem sumus membra, &c.* igitur Corollarium est malè positum.

CONSEQUENTIA ab Autoritate.

ANTECEDENS ad Ephes. cap. 4. &c. vt supra.

SOLVITUR ENTHYMEMA : Negatur Consequentia, nam datur instantia : quia idem Apostolus ad Roma. cap. 12. dicit sic : *Sicut enim in vno corpore multa membra habemus : omnia autem membra, non eundem actum habent ; ita multi vnum corpus sumus in Christo : singuli autem alter alterius membra habentes donationes, secundum gratiam quæ data est nobis, differentes, &c.*

Item secundò soluitur sic : Christus est caput Hierarchiæ visibilis & inuisibilis, Petrus autem hierarchiæ visibilis tantum.

Tertia Solutio : Membra sunt duplicia, superiora & inferiora (sicut genus & species diuiditur apud Logicos) superiora membra capitis Papæ, sunt Cardinales, & Patres concilii, Episcopi, Sacerdotes, &c. Inferiora membra, communitas in Ecclesia.

COROLLARIUM QUARTUM.

Indulgentiæ dantur extra sacramenta : quia pertinent ad clauem iurisdictionis.

Probatio Corollarii, patet Notabili 1. cap. 2. & Notabili 4. cap. 5. Item patet Corollarium, testimonio Magistri Sententiarum lib. 4. Distinctione 1. & 17.

Item, probatur testimoniis Scholasticorum: & præcipue Reueren. Bartholomæi Fumi, qui in Summa, quam Auream Armillam appellauit, dicit sic: *Quòd autem ad Prælatos Ecclesiæ, huius thesauri dispensatio pertineat, patet per determinationem Leonis Decimi, qui determinauit, quòd dispensatio huius thesauri conuenit Prælati Ecclesiæ: & maxime Papæ, etiam sine sacramentis: quia bona communia Ecclesiæ, quæ possunt dispensari aliter quàm per sacramenta, à Præsede Ecclesiæ communicari possunt. Huiusmodi autem sunt merita Christi, & Sanctorum in hoc thesauro reposita: nam Sancti potuissent huiusmodi bona communicare membris Ecclesiæ, si uoluissent absq; sacramentis: ergo sunt sine sacramentis communicabilia, ex natura sua. Et licet Papa non habeat potestatem excellentiæ: & consequenter, non possit conferre totalem effectum sacramenti sine sacramento; tamen bene potest partialem effectum conferre: & huiusmodi est remissio pænæ temporalis pro actuali peccato debitæ: propterea sine sacramentis potest dare indulgentiam.*

Item, testimonio Dominici à Soto, Distinctione 21. quæst. 1. Art. 3. Conclusione 3. ubi dicit sic: *Usus condonandi pœnas, remissorum criminum extra sacramenta, ex duplici fonte frequentari cœpit. Primus fuit, quòd in ortu Ecclesiæ, ut pœnitentiales Canonès testantur, pœnitentiæ ita ad iustum solitæ fuerint imponi; ut nihil iudicio sacerdotis relinquere-tur in purgatorio soluendum. Alioqui, Sancti illi Patres, non arbitrabantur legitime clauium potestate uti: tunc enim feruor sanguinis Christi in causa erat, ut Christiani ad nutum essent Ecclesiæ obsequentes. Deinde uerò, aucta Christiana familia, tepesfactoq; illo calore, cœpit rigor ille canonum languere: & arbitrio sacerdotum impositio pœnitentiarum committi. Sed tandem, cum neq; illud onus satis populus ferre ualeret, apertus est alius fons pietatis; ut pœnitentiarum rigor in eleemosynas commutaretur, quæ in causas pias, et publicam utilitatem conducerent: ut notatur in cap. Alexandri: Quod autem. At uerò iam nostra tempestate, tum quia pœnitentiæ nimium tenues esse cœperunt, tum quia Turcarum incursus sunt nobis infestissimi; factum est, ut in subsidium aduersus illos indulgentiarum usus percrebuerit. Iam ergo hæc Conclusio maneat firma, et fixa: quòd indulgentiarum facultas, non solum fundatur in doctorum sententia, aut in sacro Ecclesiæ Canone et usu; uerum in Sacrosancto Euangelio. Quare eius assertio est de iure diuino: eiusq; adeò negatio manifestaria hæresis. Hæc ille.*

CONTRA: Ad potestatem Excellentie, quæ solius Christi est, spectat; ut effectus sacramenti, sine sacramento detur. Sed pœnæ peccato

cato debitæ dimissio secundum totum aut partem debiti est effectus sacramenti poenitentiae: nullus ergo purus homo potest aliquid de poena peccato debita dimittere, nisi quantum dimittitur sacramentalis absolutionis virtute. Per indulgentias ergo, quæ sine sacramento poenitentiae conceduntur, nihil de poenæ peccato debitæ dimittitur. Sanè inferior non potest, neque debet præfixum & præscriptum à superiore iustitiæ ordinem mutare & inuertere. sed Deus absoluendo à culpa obligat hominem ad poenam temporalem persoluendam: igitur purus homo non potest aliquid de poena temporali extra sacramenta dimittere.

MAIOR est D. Thomæ Aquinatis super I. ad Corinth. cap. I. Lect. 2. ubi dicit: *Ad propriam virtutem Christi secundum humanam naturam pertinet: quia potest effectum sacramentorum sine sacramento conferre.*

MINOR est Magistri Sententiarum, lib. 4. Distinct. 16.

SOLVITVR. Duplex est sacramenti effectus: remissio culpæ, & collatio gratiæ vnus: & remissio, vel dimissio poenæ alter. Hanc igitur Dei ordinationem indulgentiæ non tollunt, sed faciunt potius & implent: nam Deus culpam remittens, & ad poenam temporalem obligans voluit huiusmodi poenam, vel per proprium debitorem, vel per aliquem alium, qui vicem illius suppleret, malum tolli & expiari. Itaque Prælatus poenis à Deo taxatis, satisfacit per indulgentias de thesauro Ecclesiæ; idque Christi autoritate etiam sine sacramentis: sacerdos verò in foro poenitentiae per virtutem sacramenti, potestate clauium partem poenitentiae à Deo taxatæ remittit.

CONTRA. Scriptum est Ezechielis cap. 18. *Et cum auerterit se impius ab impietate sua, quam operatus est, & fecerit iudicium & iustitiam, ipse animam suam viuificabit.* Ergo si ipsemet impius conuersus animam suam potest viuificare, & viuificat: ergo non habet opus solutione & absolutione, tam sacramentali, quam sine sacramento: & per consequens non opus habet indulgentijs.

SOLVITVR. Negatur Consequentia: quia conuersus impius non simpliciter animam suam viuificat; sed obseruatis conditionibus, & circumstantijs illis. Prima, si auerterit se ab impietate. Secunda, si fecerit iudicium: iuxta illud I. ad Corinth. II. *Si nos ipsos iudicauerimus, non utiq; iudicemur. etc.* Tertia, si fecerit iustitiam. Porrò facere iudicium & iustitiam, est dolere, & submittere sese Summo Pontifici danti indulgentias, & proprio sacerdoti pro peccatis: tum, sub indulgentia habere cor contritum & humiliatum, confiteri peccata; & cum Matthæo, Zachæo, & Maria Magdalena satisfacere per poenitentiam pro peccatis: & hoc est facere iudicium & iustitiam, hoc est, seipsum iudicare.

iudicare. i. ad Corinth. ii. Vnde Hilarius : *Circumstantiæ scripturarum, solent scripturæ sensum aperire.*

COROLLARIUM QUINTVM.

Nullus potest sibi soli dare indulgentiam ; sed potest uti ea, quam dat pro alijs.

Probatur Corollarium Notabili 4. cap. 5.

Ratio autem Corollarij est : quia nihil agit in seipsum. Vnde neque sacerdos seipsum absoluit : iuxta illud Ioan. 13. *Et vos debetis alter alterius lavare pedes.* Neq; rex seipsum iudicat; sed commissarij regis causam iudicant : neque medicus seipsum curat, sed eget opera & consilio alterius medici. Quemadmodum igitur nemo potest seipsum à peccatis proprijs absolvere; ita nemo potest ipsemet sibi ipsi indulgentiam dare.

Porro, si quispiam dicat : quid ergo profunt indulgentiæ Prælati qui eas concedunt ? Respondetur eis prodesse : quia non sunt peioris conditionis, quàm cæteri homines : vnde quamvis primò & principaliter non possunt sibi indulgentias concedere, possunt nihilominus uti, sicut & alij ad poenæ remissionem. Licet ergo non possit sibi directè indulgentiam concedere; præstando tamen, quod alijs faciendum præcipit, sine dubio indulgentias consequitur. Papa ut subdit se sacerdoti, à quo à peccatis absoluitur : eodem modo potest se alio subdere, & ei facultatem concedere, ut sibi indulgentiam etiam citra confessionem impertiatur : concedere enim indulgentias est actus iurisdictionis; nullus autem supra seipsum iurisdictionem exercere debet, ut supra.

CONTRA, Sicut Prælatus auctoritatem non habet absoluendi se à culpa; ita etiam non potest seipsum absolvere à poena : igitur indulgentia non poterit Prælato prodesse.

SOLUTIO. Non valet consequentia : quia licet Prælatus non potest directè seipsum absolvere; potest tamen indirectè, hoc est, auctoritatem absoluendi alteri concedendo.

COROLLARIUM SEXTVM.

Homo per se cadere potest; sed sine gratia Dei resurgere non potest, contra Pelagium.

Probatio Corollarij Notabili 4. cap. 5.

Item probatur auctoritate scripturæ, Osee 13. *Perditio tua ex te Israël, tantum modò in me auxilium.* Item patet Lucæ 10. de homine qui incidit in latrones, qui etiam despoliauerunt eum, & plagis imposi-

impositis abierunt femiuiuo relicto. &c. Item Ioan. cap. 15. *Sine me nihil potestis facere.* Item 2. ad Corinth. cap. 3. *Fiduciam autem talem habemus per Christum ad Deum, non quod sufficientes simus cogitare aliquid à nobis, quasi ex nobis; sed sufficientia nostra ex Deo est.*

Super quibus verbis D. Tho. Aqu. dicit sic: *Nam in quolibet processu operis, primò est assensus qui fit cogitando: deinde collatio per verbum: & postmodum impletio per opus. Unde fit, ut si nec cogitare quis à se habeat, sed à Deo, non est dubium, quod non solum perfectio boni operis est à Deo, sed etiam inchoatio, ad Philip. 1. Qui cœpit in vobis opus bonum. &c. Et hoc est contra Pelagianos dicentes, Quod inchoatio boni operis est ex nobis; sed perfectio à Deo. Isaïæ 26. Omnia enim opera nostra operatus est nobis. Sed ex hoc ne videatur tollere libertatem arbitrij, dicit, A nobis, quasi ex nobis: Quasi dicat, possum quidem aliquid facere quod est liberi arbitrij: sed hoc quod facio non est ex me, sed à Deo, qui hoc ipsum posse confert; ut sic & libertatem hominis defendat, cum dicit, A nobis, id est, à nostra parte: & divinam gratiam commendat, cum dicit, Quasi ex nobis, scilicet procedat, sed à Deo. Hoc etiam Philosophus vult, quod nunquam homo per liberum arbitrium potest quoddam bonum facere, sine adiutorio Dei. Et ratio est: quia in his quæ facimus, quærendum est illud, propter quod facimus. Non est autem processus in infinitum; sed est devenire ad aliquid, puta ad consilium, quod est à Deo. Hæc D. Thomas.*

COROLLARIUM SEPTIMUM.

Dispensatores indulgentiarum, quia redemptionis thesaurum dispensant, & mediatoris officio funguntur, debent exemplo mediatoris sui capitis Christi medium tenere: non debent esse nimium seueri propter infirmos, neq; nimium faciles propter discolos & inquietos, ne disciplina Ecclesiastica eneruetur.

Corollarium patet Notabili tertio cap. 5.

Item probatur autoritate scripturæ, 1. ad Corinth. cap. 9. *Factus sum infirmis infirmus, ut infirmos lucrificarem.* Item 1. ad Thessal. cap. 5. *Rogamus autem vos fratres, corripite inquietos, consolamini pusillanimes suscipite infirmos, patientes estote ad omnes. Videte ne quis malum pro malo alicui reddat; sed semper quod bonum est, sectamini in inuicem, et in omnes.*

Item probatur autoritate SS. Concilij Tridentini, Sess. 25. Decreto de indulgentijs. Vide suprâ.

COROLLARIUM OCTAVUM.

Apud liberalem Dominum dispensator non debet esse parcus. D. Chrysostomus.

Proba-

Probatur Corollarium Notabili 3. cap. 5. & Notabili 4. cap. 4. & 5.

Item probatur autoritate scripturæ. Psalm. 129. & 2. ad Corinth. cap. 9. *Qui parçe seminat, parçe & metet: & qui seminat in benedictionibus, de benedictionibus & metet. Unusquisque prout destinavit in corde suo non ex tristitia, aut ex necessitate: hilarem enim datorem diligit Deus. Potens est autem Deus omnem gratiam abundare, facere in vobis; ut in omnibus semper omnem sufficientiam habentes, abundetis in omne opus bonum, sicut scriptum est: Dispersit dedit pauperibus, iustitia eius manet in seculum seculi.*

Item probatur ratione.

Apud liberalem Dominum, dispensator debet esse fidelis, & prudens: igitur non debet esse parcus.

CONSEQUENTIA ab honesto & decoro.

ANTECEDENS Matth. 24. Lucæ 12. *Fidelis dispensator & prudens, quem constituit Dominus super familiam suam; ut det illis in tempore tritici mensuram.* D. Thomas prima secundæ Quæst. 97. Articuli. 4. *Fidelis est qui dispensat, non habens intentionem ad bonum commune. Impudens autem, qui non habet rationem dispensandi.* Item & Gabriel, li. 3. Distinct. 39. Quæst. 1. Articuli. 2. Conclusi. 9. *Dispensator fidelis est, si ad honorem domini sui, & iustitiam, ac salutem subditorum, auctoritatem acceptam dispensat. Talis fuit Moyses; & propterea habet bonum & magnum testimonium in scriptura Numero. cap. 12. Moyses in omni domo mea fidelissimus est: & idem Moyses erat mitissimus super omnes homines, qui morabantur in terra. Contra quidam dispensator in Euangelio accusatur, diffamatur; & propterea priuatur, ut Luc. cap. 16. Quid hoc audio de te? redde rationem villicationis tuæ; iam enim non poteris amplius villicare: propterea Apostolus 1. ad Corinth. cap. 4. dicit: Hic iam quæritur inter dispensatores, ut fidelis quis inveniatur.*

COROLLARIUM NONVM. *Contra Lutherum.*

Indulgentiæ non dantur pro temporalibus secundum se; sed ut temporalia ordinantur ad spiritualia, ideò non est Symonia.

Corollarij probatio patet Notabili 4. cap. 4. Et in solutione argumenti decimi.

Item probatur autoritate sacre scripturæ, Lucæ cap. 6. *Date, & dabitur vobis.* Danda sunt igitur temporalia, ut habeantur spiritualia, iuxta illud Apostoli 1. ad Corinth. cap. 9. *Si nos vobis spiritualia seminavimus, magnum est, si nos carnalia vestra metamus? Si alij potestatis vestræ participes sunt, quare non potius nos?*

CONTRA. Spiritualia non debent dari pro temporalibus. sed indul-

indulgentiæ nonnunquã dantur ad edificandas basilicas, Scholas, Ptochodochia, Xenodochia : ergo non debent dari.

MAIOR Act. cap. 8. Petrus dixit ad Simonem Magum: *Pecunia tua tecum sit in perditionem; quoniam donum Dei existimasti pecunia possideri.*

MINOR ad sensum est in communi vsu hominum in Ecclesia Catholica, neque hoc prohibent sacerdotes.

SOLVITVR. Negatur Consequentia : propterea, quia D. Augustinus lib. 2. de moribus Manicheorũ ca. 13. dicit: quia intentio diuersificat species; & quia hæretici benefacta Catholicorum, in malam accipiunt partem. Ergo secundum verbum Christi Matth. cap. 6. *Si oculus tuus fuerit simplex, totum corpus tuum lucidum erit: si autem oculus tuus fuerit nequam, totum corpus tuum tenebrosum erit.* Et secundum verbum Apostoli ad Titum cap. 1. *Omnia munda mundis: coinquinatis autem, & infidelibus nihil est mundum; sed inquinatæ sunt eorum & mens, et conscientia. Confitentur se nosse Deum, factis autem negant, cum sint abominati & incredibiles, & ad omne opus bonum reprobi.*

SECUNDA SOLVTIO. Negatur Consequentia : quia spiritualia, & indulgentiæ in Ecclesia Catholica, non dantur pro temporalibus; sed vtique homines debent pro officio dare honorem Deo, iuxta illud Prouerbiorum 3. *Honora Deum de tua substantia.* Et in recognitionem gratitudinis suæ, pro gratia debent secundum facultates respondere.

COROLLARIUM DECIMUM.

Indulgentiæ non mensurantur secundum deuotionem, vel laborem recipientis, aut secundum quantitatem dati, aut secundum causam pro qua dantur; sed secundum intentionem dantis.

Corollarium patet Notab. 4. cap. 3. 4. 5. Item, est D. Thomæ super 4. Distinct. 20. & aliorum Scholasticorum, qui præcipiunt formam verborum, in Bulla semper diligenter obseruandam esse, propter cognoscendam intentionem Pontificis.

COROLLARIUM VNDECIMUM.

Indulgentiæ datæ ab existenti in mortali peccato, tantum valent quantum à sanctissimo, cum non remittat ex vi suorum meritorum; sed ex vi meritorum depositorum, creditorum, & reconditorum, in thesauro Ecclesiæ.

Corollarium probatur, Notabili 4. cap. 5.

Ergo potestas dandi indulgentias, non adimitur Episcopis, qui vite probitate non pollent. RATIO. Nam si maius est in foro conscien-

S

tiæ sine

tia, sine poenitentia à culpa absolueret; multò magis poterunt à poena temporali per scripta liberare. Qui igitur aliqua malitiæ labe aspersi sunt Pastores, si fas sit ita loqui, indulgentias concedere valent: quippe, quia non faciunt indulgentias de proprio merito, quo iam sunt priuati; sed de thesauro Ecclesiæ, qui illorum malitia non inficitur, nec euanescit potestas dispensandi. Ratio autem, quare dispensandi thesauri Ecclesiæ solis Episcopis commissæ sit potestas, hæc est: quia ipsi sunt sponsi Ecclesiæ, quorum interest filios Ecclesiæ perfectos, & imperfectos nutrire, iuuare, sustentare, erigere, & ad perfectum statum deducere. Habet enim Ecclesia hunc thesaurum ex dispensatione sua, cum vnico viro suo Christo Domino, cui filios seu fideles quotidie parit, ad quorum educationem sustentandam, Deus prouidit de thesauro inexhausto, & incorruptibili, quem tinea non potest corrumpere.

CONTRA prædicta arguitur sic: Riuus in quem fons non influit, nusquam potest profluere: quia mox arefcit & euanescit. sed instar riui, sine fonte, malus prælatus se habet: ergo in alios non potest profluere, qui sibi deficit.

MAIOR à simili.

MINOR Nota.

SOLVITVR. Non valet Consequentia: quia similitudo claudicat. Cæterum malus Prælatus, cum dat indulgentias, nihil dat in commune de suo, sed utitur iurisdictione sibi commissæ: ergo indulgentia à bono Prælato non melioratur, & à malo non peioratur. optandum tamen est, ut ab optimo proficiscatur.

Item, Maius est indulgentias concedere, quàm recipere: sed existens in mortali peccato, non potest indulgentias recipere: ergo multò minus potest eas concedere, quia nihil dat, quod non habet: Aristotel. Elenchorum I.

MAIOR vera.

MINOR patet in Corollario sequenti.

SOLVITVR. Negatur Consequentia: nam dare indulgentias maius est, ratione auctoritatis, non autem utilitatis: peccatum verò mortale, facilius impedit utilitatem, quàm auctoritatem.

Item, Nullus sapiens sibi inimico thesauri dispensandi committit auctoritatem. Igitur improbo Prælato Dei inimico, non est verisimile ex sententia Dei sapientis fuisse commissam.

CONSEQUENTIA à Repugnantibus.

ANTECEDENS patet ex prouerbio: Cui das, videto.

SOLVITVR. Negatur Consequentia. Nam ratio hæc, locum habet in eo, qui contra Domini voluntatem thesaurum dissipare & distrahere solet, quòd non contingit in indulgentiarum negotio: Indulgentiæ

gentiæ enim, vt profint secundùm Dei voluntatem, ex rationabili causa sunt concedendæ. Item Soluitur: Deus quando vult, & vbi vult, multa bona etiam per malos operatur.

NOTA. Quòd quemadmodum potest aliquis consequi indulgentias per ministrum peccatorem, eleemosynas largiendo; ita potest aliquis applicare indulgentias alteri existenti in gratia, quamvis sibi nō possit, si talis conditio in Bulla expressè contineatur.

COROLLARIUM DVODECIMVM.

Cùm indulgentiarum beneficium opus sit gratiæ diuinæ; nihil nisi Dei amicis valere potest. Vnde sequitur: quia indulgentiæ non valent existenti in mortali peccato, propter obicem. D. Thom.

Corollarium probatur Notabili septimo, cap. tertio.

Item, probatur autoritate scripturæ, Matth. 22. *Amice, quomodo hic intraisti, non habens vestem nuptialem?*

Item, probatur Ratione: Cuicumque remittitur pœna, eidem prius remitti debet culpa. sed existenti in mortali peccato, nondum remissa est culpa: igitur existenti in mortali peccato, non potest remitti pœna: & per consequens indulgentiæ non valent existenti in mortali peccato, propter obicem. Verùmtamen, si huiusmodi homo libenter quærit & petit indulgentias, consultè facit: disponit enim se de congruo ad remissionem peccatorum, per gratiam seu misericordiam Dei obtinendam.

MAIOR vera ex ordine, lege, & processu indulgentiarum.

MINOR Nota.

SED CONTRA est: quia Syluester ex schola D. Thomæ ponit, & tenet in sua Summa dicēs: Dimitti in indulgentiis mortalia peccata sine cōfessione, quod etiā probatur sic: Vbi maius est vulnus & peccatum; ibi maior debet esse, & ostendi gratia, misericordia, & medicina. sed homo existens in mortali peccato, grauius patitur vulnus: ergo maiori opus habet gratia, misericordia, & medicina. Et per consequens debet particeps fieri indulgentiæ, vt per eam Dei misericordia ei communicetur.

MAIOR vera. MINOR Nota.

SOLVITVR. Non valet Consequentia: nam datur instantia Matth. 15. *Non est bonum sumere panem filiorum, & mittere canibus.* Verùm quidem est, ei maiori misericordia opus esse: sed quia minus capax est, eam consequi non valet. Nemini enim dimittitur pœna, nisi prius dimissa fuerit culpa, secundùm commune ius indulgentiarum. Secus est, si concedantur indulgentiæ tali intentione, vt absque Confessione peccatores absoluantur simpliciter. Verùmtamen secundùm com-

munem formam indulgentiarum, solent poni conditiones, vt, Verè poenitentibus, contritis, & confessis, &c. Iuxta illud, Math. 16. *Si quis vult post me venire, abneget semetipsum, & tollat crucem suam, & sequatur me.*

CONTRA. Maius est gratiam impetrare, quàm remissionem poenæ. sed aliquis suis precibus potest alicui gratiam impetrare: igitur Prælati potest eidem partem poenæ condonare.

MAIOR vera. MINOR Nota.

SOLVITVR. Non valet Consequentia: quia non arguitur in genere, neque à simili. Nam gratiæ impetratio per meritum congrui, Satisfactio verò de poenis condonandis, per meritum condigni, utique per thesaurum Ecclesiæ acquiritur. unde existens in charitate, & faciens quod in forma indulgentiæ continetur; remissionem poenæ, quæ in forma indulgentiæ est concessa, assequitur.

Porro, existenti in gratia, qui parùm aut nihil curat, operibus poenalis Purgatorij poenam redimere, non profunt indulgentiæ: quia, qui sibi opem non fert, & sibiipso deest; auxilio & ope amicorum indignus esse censetur. Cupientis ergo indulgentias consequi, paratus debet esse animus, ad satisfaciendum Deo, vel per se, vel per alium: debet etiam intenta esse voluntas ad placandum Deum, & consequendam gratiam eius per sanctorum merita, nec tam poenam redimere, quàm Deum placare, intendere, & satagere debet.

Cæterum, cum Bulla non debeat pro opere malo, quale est opus moraliter malum concedi, actus in suscipiente moraliter bonus desideratur. Sinistra enim intentio, siue vana gloria, ab opere aufert bonitatem moralem. Consultius ergo est, vt quilibet fidelis, tempore, quo recipit Bullam, ipse seipsum ad Deum conuertat, seipsum corrigat, emendet, corde contrito pro commissis doleat, & propositum habeat poenitendi, confitendi, satisfaciendi, & nunquam postea ad peccata redeundi.

CONCLUSIO SEPTIMA.

Indulgentiæ tantum valent, quantum sonant, si adsit authoritas dantis, charitas recipientis, & rationabilis, iusta, & pia causa.

Veritas Conclusionis patet Notabili quarto, cap. quarto.

Pro maiori euidencia Conclusionis sciendum: quia quantitas effectus, sequitur quantitatem suæ causæ. causa autem remissionis poenæ in indul-

in indulgentiis, est abundantia meritorum (vt dictum est Conclusio-
ne quinta) quæ sufficienter se habet ad totam pœnam expiandam,
quatenus ergo huius thesauri dispensator merita illa attribuerit, siue
applicauerit, sic valere dicimus: non enim ex recipientis, aut ex cau-
sa propter quam dantur, sed ex autoritate, intentione, & voluntate
indulgentias dispensantis, valorem indulgentiarum metiri debemus.
Itaque, vt recta sit, & Deo grata indulgentiarum dispensatio, in primis
opus habet legitima autoritate dispensantis: deinde vnione eius, cui
dispensantur, attribuuntur, & applicantur ad eum, qui merebatur,
quod fit per charitatem: postremo dispensationis ratione, in quo sal-
uatur intentio illorum, qui opera meritoria compararunt: non enim
ea intentione laborarunt, vt iumenta computrescerent in stercorebus
suis; sed potius, vt qui iustus est, iustificetur adhuc, & sanctus, sancti-
ficetur adhuc: vt ita depositis malorum sarcinis & peccatorum pœ-
nis, solutisque doloribus peccator, cum prodigo filio reuertatur in
domum patris sui, & inuenta gratia, seruiat melius patri, Luca 15.

NOTA: quia indulgentiæ nobis applicantur, secundum quantita-
tem nostræ contritionis, & deuotionis, quæ ex Dei gratia procedit:
itaque excitanda est in populo contritio, & deuotio, cum aliis scri-
pturis, tum illis Prophetæ verbis, Psal. 84. *Audiam, quid loquatur in
me Dominus: quoniam loquetur pacem in plebem suam, & super Sanctos
suos, & in eos qui conuertuntur ad eor. Verumtamen prope timentes eum
salutare ipsius, vt inhabitet gloria eius in termi nostra. Misericordia & ve-
ritas, obuiauerunt sibi, iustitia & pax osculatae sunt.*

Item, Psalm. 94. *Hodie si vocem eius audieritis, nolite obdurnare corda
vestra.* Item, Matth. 13. Marc. 7. Luca. 8. *Qui habet aures audiendi
audiat.*

COROLLARIUM PRIMVM.

Prædicatores nunquam debent assertiuè publicare indulgentias,
sed recitatiuè, vel opinatiuè, ne falsas prædicent, & alios in errorem
inducant.

Probatur Corollarium Notabili 4. cap. 3. 4. 5.

Item, probatur autoritate scripturæ, Psalm. III. *Iucundus homo
qui miseretur, et commodat: disponit sermones suos in iudicio, quia in æter-
num non commouebitur.*

Item, Prouerb. 16. *Hominis est animum præparare, & Domini gu-
bernare linguam.* Item, Prouerb. 17. *Qui moderatur sermones suos,
doctus & prudens est, & pretiosi spiritus, vir eruditus, &c.*

Item, 2. ad Corint. cap. 5. *Quoniam quidem Deus erat in Christo mun-
dum reconcilians sibi: non reputans illis delicta ipsorum: & posuit in nobis*

verbum reconciliationis. Pro Christo ergo legatione fungimur, tanquam Deo exhortante per nos: obsecramus pro Christo, reconciliamini Deo. Eum qui non nouerat peccatum, pro nobis peccatum fecit, ut nos efficeremur iustitia Dei in ipso, &c.

COROLLARIUM SECUNDUM.

Forma indulgentiarum, nisi ad iniunctas, vel non iniunctas poenitentias, coarctetur, vniuersim de omnibus intelligitur: idque quantum ad poenas temporales, quæ vel hîc, vel in purgatorio sunt nobis decretæ.

Probatio Corollarii, patet Notabili 1. cap. 5. & Notabili 4. cap. 3. & 4. Item, probatur apud Dominicum à Soto, Disti. 21. quæst. 2. Art. 1.

COROLLARIUM TERTIUM

Antiquitus in more fuit, indulgentias nonnisi de iniunctis poenitentiis conferri: non tamen lata est lex, ne de aliis conferantur: quoniam nullibi talis lex est scripta.

Probatur Corollarium Notabili 1. ca. 5. & Notabili 3. cap. 5. & Notabili 4. cap. 3. & 4.

COROLLARIUM QUARTUM.

Ecclesia nunc, non modò de iniunctis, sed absolutè de omnibus poenis, indulgentias tribuit, absque vlla iniunctarum poenitentiarum mentione.

Probatio Corollarii, patet Notabili 1. cap. 2. & 5. & Notabili 4. cap. 3. & 4.

COROLLARIUM QUINTUM.

Qualitatem commendat numerus.

Corollarium probatur Notabili 4. cap. 4. &c. Et est commune adagium apud Scholasticos.

COROLLARIUM SEXTUM.

Spirituum ponderator est Dominus, Prouerb. 16.

Probatur Corollarium Notabili 4. cap. 4.

COROLLARIUM SEPTIMUM.

Consilium solum & sanum, quod absque curiosa discussione de præcisa, vel euidenti & certa quantificatione, seu mensuratione indulgentiarum, studeat homo prius, secundum possibilitatem suam, & qualitatem deuotionis suæ, tales acquirere, pondus autem valoris illi relinquere, qui omnia fecit, & facit in numero, pondere, & mensura, Sapien. 11.

Proba-

Probatur Corollarium, Notabili quarto, capite quarto.

COROLLARIUM OCTAVUM.

Melius est meritum & premium in infinitum, quàm quæcunque indulgentiæ.

Probatur Corollarium Notabili 6. cap. 2.

Item, probatur testimonio D. Thomæ Aquinatis sup. 4. Dist. 20. Ratio verò huius Corollarij est: quia querere indulgentias, ut pœnalia opera vitentur, imperfectum est. Quærunt enim indulgentias amore rerum delectabilium, odio habentes temperantiam, cuius actus sunt opera pœnalia, appetitui carnis opposita. Porro, perfecti indulgentias postulant, & petunt gratia Deo satisfaciendi, & cælestis patriæ desiderio, ne in purgatorio diutius remorentur & patiâtur: horum finis quoniam est bonus; res quoque bona esse censetur: his prodesse indulgentias, nullum dubium esse potest.

Item, confirmatur argumento tali: Finis melior est destinatis ad finem: sed premium in infinitum est finis, indulgentiæ verò sunt destinata ad finem: igitur melius est premium in infinitum, quàm quæcunque indulgentiæ. MAIOR est Aristot. lib. 3. Topico. cap. 1.

MINOR ex supradictis patet. Nam indulgentia est medium ad finem, premium autem iam est finis. Item, totum melius & nobilius est sua parte.

COROLLARIUM NONVM.

Beati quorum remissæ sunt iniquitates, & quorum tecta sunt peccata. Beatus vir, cui non imputavit Dominus peccatum, nec est in spiritu eius dolus. Psalm. 31.

CONCLUSIO OCTAVA.

Catholicis summo consensu credunt, confitentur, affirmant, & docent, Christum Dominum, Beato Petro clauigero, & eius successoribus, thesaurum Ecclesiæ reliquisse, & commississe, salubriter fidelibus dispensandum, & pro piis & rationabilibus causis, nunc pro totali, nunc pro partiali remissione pœnæ temporalis, pro peccatis debitæ, tam generaliter, quàm specialiter, verè pœnitentibus, & confessis, misericorditer applicandum.

Veritas Conclusionis patet Notabili 4. cap. 2. Item patet ex Conclusionem 4.

COROLLARIUM PRIMUM.

Catholici credunt, confitentur, & docent, in confessione debita poenitentis, & ordinata ac legitima absolutione sacerdotis, poenam æternam cum culpa remitti, sed temporalem poenam sæpè remanere.

Probatur Corollarium Notabili 4. cap. 2.

Item probatur autoritate SS. Concilij Tridentini Sess. 6. cap. 14. & Sess. 14. cap. 8. Titulo de lapsis & eorum reparatione. *Qui verò ab accepta iustificationis gratia per peccatum exciderunt, rursus iustificari poterunt, cum excitante Deo per poenitentiae sacramentum, merito Christi, amissam gratiam recuperare procurauerint: hic enim iustificationis modus, est lapsus reparatio, quam secundam post naufragium deperditæ gratiæ tabulam sancti Patres aptè nuncuparunt. Etenim pro ijs, qui post baptismum in peccata labuntur, Christus Iesus sacramentum instituit poenitentiae, cum dixit Ioannis 20. Accipite Spiritum sanctum, quorum remiseritis peccata, remittuntur eis: & quorum retinueritis, retenta sunt. Unde docendum est, Christiani hominis poenitentiam post lapsum, multò aliam esse à baptismali, eaq; contineri non modo cessationem à peccatis, & eorum detestationem, aut cor contritum & humiliatum: verumetiam eorundem sacramentalem confessionem, saltem in voto & suo tempore faciendam; & sacerdotalem absolutionem, itemq; satisfactionem per ieiunia, eleemosynas, orationes, & alia pia spiritualis vitæ exercitia: non quidem pro pœna æterna, quæ vel sacramento, vel sacramentali voto, unâ cum culpa remittitur; sed pro pœna temporali, quæ ut sacræ literæ docent, non tota semper, ut in Baptismo fit, dimittitur illis, qui gratiæ Dei quam acceperant ingratum Spiritum sanctum contristauerunt, & templum Dei violare non sunt veriti. &c. ut supra, Conclusionem 3. Corol. 7.*

Porro, contra hæreticos, qui totam poenam cum culpa simul remitti contendunt, idem Sacrosanctum Concilium Tridentinum, Sessio. 14. Canone 12. decrevit & pronunciauit sic: *Si quis dixerit totam poenam simul cum culpa remitti semper à Deo: satisfactionemq; poenitentium non esse aliam, quàm fidem, qua apprehendunt Christum pro eis satisfecisse: Anathema sit.*

COROLLARIUM SECUNDUM.

Sententia sacerdotis, qua hominem vel soluit ad gratiam, vel ligat ad poenam, rata est apud Deum.

Probatio Corollarii, patet Notabili 1. cap. 4.

Item, probatur autoritate sacræ scripturæ, Matth. 16. & Ioan. 20.

Spon-

Spontanea pœnitentia huius seculi, plus valet ad remissionem pœnæ, quàm æqualis in purgatorio : & hoc intelligitur cæteris paribus.

Probatur Corollarium Notabili quarto, cap. 3. & quarto.

Item, probatur autoritate Scripturæ, Lucæ 15. *Dico vobis, quòd ita gaudium erit in cælo, coram angelis Dei, super uno peccatore pœnitentiam agente, quàm super Nonaginta nouem iustis, qui non indigent pœnitentia?*

Item, exemplum habemus in Apostolo, qui sponte etiam à licitis abstinebat propter retributionem : vnde dicit : 1. ad Corinth. cap. 9. *Nunquid non habemus potestatem manducandi & bibendi? Nunquid non habemus potestatem mulierem sororem circumducendi, sicut & cæteri Apostoli, & fratres Domini, & Cephas? Aut solus ego, & Barnabas, non habemus potestatem hoc operandi.*

D. HILARIUS super Psalm. 118. super illis verbis : *Voluntaria oris mei. Habet hanc, inquit, consuetudinem Apostolus, ut voluntaria legitimis anteponat : ut, quando dicit 1. ad Corinth. cap. 7. De virginibus autem præceptum Domini non habeo : consilium autem do, tanquam misericordiam consecutus à Domino, ut sim fidelis.*

Item, probatur testimoniis sanctorum Patrum : D. AMBROSIVS super Psalmum centesimum decimum octauū, Sermonem decimo quarto, super illis verbis : *Voluntaria oris mei beneplacita fac Domine, dicit sic : Qui se humiliat, viuificatur secundum promissum Domini : qui viuificatur spiritu Dei, voluntarius est minister. Plurimum enim refert, utrum ex voluntate quid facias : aut ex necessitate quod placeat Deo. Deniq; voluntarius minister habet præmium : coactus dispensat obsequium, sicut Apostolo dicente 1. ad Corinth. cap. 9. cognouimus : scripsit enim : Væ enim mihi est, si non Euangelizauero : Si enim volens hoc ago, mercedem habeo : si autem inuitus, dispensatio mihi credita est. Vide voluntarium executorem cælestis arbitrij. Liber erat ex omnibus : & omnium seruus est factus, voluntate utiq; non necessitate, ut plurimos lucraretur. Is quoq; , qui legis vinculo tenebatur, quasi sub lege esset, se exhibuit ; cum sub lege non esset, ut eos seruaret, qui sub lege vivebant. Infirmis infirmus factus est, ut infirmos assumptione infirmitatis propriæ sustineret. Omnibus omnia factus est; non legitima necessitate, sed voluntatis obsequio. Aperuit mihi huius altitudinem consilij in Epistola ad Philæmonem scripta : quia quod ipse esset, alium esse vellet, ut voluntate potiùs, quàm necessitate detulisse domino videretur. Itaq; pro Onesimo interueniens, sic ait : Tu autem illum ut mea viscera suscipe, quem ego volueram mecum detinere, ut pro te mihi ministru-*

ministraret in vinculis Euangelij; sed sine consilio tuo nihil facere volui, ne velut ex necessitate bonum tuum esset, sed voluntarium. Quam sedulus suator, qui cum esset vas electionis diuinæ, consortium consilij non dedignabatur alieni, ne alterum fructu voluntatis propriæ defraudaret. Hæc D. Ambrosius vbi supra.

D. CHRISOSTOMVS, libro secundo de dignitate sacerdotali, cap. 3. *Deus enim noster non necessitate submotus à peccato, sed suo libero arbitrio, & propria sese sponte abstinens, est remuneraturus.*

Propterea Dauid, Psalm. 24. orat: *Tribulationes cordis mei multiplicatæ sunt, de necessitatibus meis erue me.*

Item, Psalm. 30. *Quoniam respexisti humilitatem meam: saluasti de necessitatibus animam meam.*

Item, Psalm. 106. *Et clamauerunt ad Dominum cum tribularentur: & de necessitatibus eorum eduxit eos.*

CONTRA. Beatus Paulus Apostolus ad Hebr. cap. 10. dicit sic: *Voluntarie peccantibus nobis, post acceptam notitiam veritatis, iam non relinquitur pro peccatis hostia: terribilis autem quædam expectatio iudicij.*

Propterea sacra Scriptura nos admonet, Ecclesiast. cap. 21. *Quasi à facie colubri fuge peccata: & si accesseris ad illa, suscipient te. Dentes leonis, dentes eius, interficientes animas hominum. Quasi romphæa bis acuta omnis iniquitas, plagæ illius non est sanitas.*

COROLLARIUM QVARTVM.

Pœnam temporalem intelligimus, tum in præsentī vita, tum in futura, siue in Purgatorio. sed pœna alterius vitæ propriè peccatis omnibus & ex condigno debetur: pœna autem huius vitæ solum ex congruo certis peccatis à Deo infligi solet.

Probatio Corollarii, patet Notabili quarto, cap. secundo.

COROLLARIUM QVINTVM.

Pœna purgatorij acerbior est, quàm aliqua, quæ fit in hac vita.

Veritas Corollarii, patet Notabili quarto, cap. tertio.

Item, Deutero. 25. *Pro mensura peccati, erit & plagarum modus.*

Item, Apocalip. 18. *Quantum glorificauit se, & in deliciis fuit; tantum date illi tormentum & luctum.*

Item, probatur testimonio Beati Augustini, qui in libro de vera & falsa poenitentia, cap. 18. dicit sic: *Sed si etiam sic conuersus euadat, vita viuatur, & non moriatur: non tamen promittimus quod euadat omnem pœnam: nā prius purgandus est igne purgationis, qui in aliud seculū distulit fructum conuersionis. Hic autem ignis, etsi æternus non sit, miro tamē modo est grauis: excellit enim omnem pœnam, quam unquam passus est aliquis*

quis in hac vita. Nunquam in carne tanta inuenta est pœna; licet mirabilia passi sint martyres tormenta, & multi nequiter iniqui tanta sustinuerint supplicia. Studeat ergo quilibet sic delicta corrigere, vt post mortem non oporteat talem pœnam tollere. Quædam enim peccata sunt, quæ sunt mortalia, & in pœnitentia sunt venialia, non tamen statim sanata: sæpè enim quidam ægri morerentur, nisi medicarentur, nec statim sanantur. Languet victurus, qui prius erat moriturus: qui autem impœnitens moritur, omninò moritur, & æternaliter cruciabitur. Qui enim impœnitens moritur, vel finitur; si semper viueret, semper peccaret. At Dei est misericordis, qui operatur finem peccantis; ob hoc etiam sine fine torquetur: quia nunquam ditatur virtute, semper plenus iniquitate, semper sine charitate, torquetur sine fine. Omnia ista mala deuitat pœnitentia, quæ dolorem semper expetit in pœna. Continuè enim dolendum est de peccato, quod declamant ipsa dictionis virtus. Pœnitere enim est pœnam tenere, vt semper puniat in se vlciscendo, quod commisit peccando. Pœna enim propriè dicitur læsio, quæ punit & vindicat, quod quisq; commisit. Ille igitur pœnam tenet, qui semper punit quod commississe dolet. Suprà dictis itaq; modis requirat indulgentiam, qui dolet de culpa: non erubescat confiteri peccata peccatori. Si enim sacerdos peccata non haberet, erubescere posset, qui peccata sua ei manifestaret. Sacerdos itaq; cui omnis profertur peccator, antè quem statuitur omnis languor, in nullo eorum sit iudicandus, quæ in alio iudicare est promptus: iudicans enim alium, qui est iudicandus, condemnat seipsum. Cognoscat igitur se, & purget in se, quod alios videt sibi offerre: Caueat ergo, vt à se abiecerit, quidquid in alio damnosum repererit. Animaduertat, quòd, qui sine peccato est, primus in eam lapidem mittat: Ideò enim libenit peccatricem; quia non erat qui iustè proijceret lapidem. Quomodo lapidaret, qui se lapidandum cognosceret? nullus enim erat sine peccato. In quo intelligitur, omnes crimine fuisse reos: nam venialia semper remittebantur per cæremonias: si quod igitur peccatum in eis erat, criminale erat. Deteriores itaq; in hoc sunt sacerdotes, se prius non ædificantes, illis, qui Dominum obseruabant insidijs. In hoc itaq; patentissimum crimen est sacerdotum, & vltimò modum detestabile, qui non prius se iudicant & alios alligant: deberent enim in se timere crimen, quod in alijs timuerunt, & detestabile senserunt. Illi quidem adèò cæci erant, quòd summam sapientiam sperabant capere suis insidijs. Quod illis patuit, quod tunc quisq; vitauit; vitet sacerdos, qui in hoc errore peior illis Iudæis extiterit. Caueat spiritualis index, vt sicut non commisit crimen nequitie; ita non careat munere scientie. Hæc D. Augustinus vbi suprà: lege totum, quia pulchrum & verum.

COROL.

C O R O L L A R I U M S E X T U M.

Reatum poenæ temporalis, qui interdum remanet post reconciliationem cum Deo, bonis operibus redimi posse, & per laboriosa opera, quæ etiam spontè suscipiuntur, per partes minui & expiari.

Probatur Corollarium Notabili 3. cap. 5. & Notabili 4. cap. 2.

C O R O L L A R I U M S E P T I M U M.

Quamvis aliena satisfactione potest poena temporalis remitti: tamen indignus aliena satisfactione pro poena sibi debita, non consequitur veraciter fructum indulgentiæ.

Probatio Corollarij patet Notabili 4. cap. 2. Item probatur Conclusionem secundam.

C O R O L L A R I U M O C T A V U M. *Contra Lutherum.*

Quamquam Deus & Ecclesia, fingit laborem in præcepto Psalm. 93. tamen omnia possibilia sunt credenti. Marci 9.

Probatur Corollarium Notabili 1. cap. 2.

Item Deutero. 30. & ad Rom. 10.

Item probatur autoritate scripturæ Matth. cap. 11. *Venite ad me omnes, qui laboratis, & onerati estis, & ego reficiam vos. Tollite iugum meum super vos, & discite à me, quia mitis sum & humilis corde; & inuenietis requiem animabus vestris: iugum enim meum suave est, & onus meum leue.* Item ad Philippenf. cap. 4. *Omnia possum in eo, qui me confortat.* Item 1. Ioan. 5. *Et mandata eius graui non sunt.*

Item probatur testimonio D. HIERONYMI, qui in expositione fidei Catholicæ dicit sic: *Anathema sit, qui dicit Deum aliquid impossibile præcepisse. Onus præceptorum legalium importabile fuisse Iudæis asseritur: non quia simpliciter obseruare non poterant; sed difficillimum fuit vniuersa seruare: sicq; patres legis dicuntur ea non potuisse implere ob difficultatem; non ob absolutam impossibilitatem. Unde nonnulli eorum ea seruasse noscuntur, sicut de Iosue scriptum est: Iosue 11. Non præterijt Iosue de vniuersis mandatis Domini, nec unum quidem verbum, quod iusserat Dominus Moysi.*

Similiter scriptum est de Zacharia & Elizabeth Lucæ 1. *Erant autem iusti ambo ante Deum, incedentes in omnibus mandatis & iustificationibus Domini sine querela.*

Item 3. Regum cap. 14. Deus de Dauid ad Ieroboam dicit: *Non fuisti sicut seruus meus Dauid, qui custodiuit mandata mea, & ambulauit post me in toto corde suo.*

Item D. HIERONYMVS super caput 5. Matth. *Multi præcepta Dei imbecillitate*

imbecillitate sua, non sanctorum viribus aestimantes, putant esse impossibilia, quæ præcepta sunt: & dicunt sufficere virtutibus non odisse inimicos; cæterum diligere plus præcepti, quàm natura humana patiatur. Sciendum est ergo, Christum non impossibilia præcipere, sed perfectæ, quæ fecit Dauid in Saul & in Absolō: Stephanus quoque, martyr, pro inimicis lapidantibus deprecatus est: & Paulus anathema cupit esse pro persecutoribus suis. Hæc autem Iesus fecit, & docuit dicens: Pater, ignosce illis: quod enim faciunt, nesciūt.

Item D. HIERONYMVS ad Damasum: Execramur etiam eorum blasphemiam, qui dicunt, impossibile aliquid homini præceptum esse, & mandata non à singulis posse seruari.

D. AVGVSTINVS de spiritu & litera: Lex Dei ciuitas est, lex data est, vt gratia quaereretur, gratia data est vt lex impleretur.

D. BASILIUS in regula monachorum cap. 82. vbi dicit de dilectione inimicorum, dicit sic: Nunquam autem præciperet hoc iustus, & clemens Deus, nisi utique etiam possibilitatem nobis donasset.

Idem docet S. CHRYSOSTOMVS. Idem docent sancti Patres.

Vnde SS. Concilium Tridentinum, Sess. 6. Canone 18. decreuit & pronunciauit sic: Si quis dixerit Dei præcepta homini etiam iustificato, & sub gratia constituto, esse ad obseruandum impossibilia, anathema sit.

CONCLUSIO NONA.

QVia actus actiuorum sunt in patiente prædisposito; idcirco, quantò quis melius se preparat & disponit ad indulgentiam, tantò maiorem acquirit & reportat indulgentiarum gratiam.

Veritas Conclusionis patet Notabili septimo.

Item probatur autoritate scripturæ Prouerb. Cap. 16. Cor hominis disponit viam suam: & Domini est dirigere gressus eius.

Item probatur Matth. cap. 9. Videns autem turbas, misertus est eis; quia erant vexati, & iacentes, sicut oves non habentes pastorem. Tunc dicit discipulis suis: Messis, quidem multa, operarij autem pauci. Rogate ergo Dominum messis vt mittat operarios in messem suam.

Item Mat. 20. Pater familias primo mane conducit operarios in vineam suam. 1. ad Cor. ca. 3. Et ego fratres non potui vobis loqui quasi Spiritualibus, sed quasi carnalibus. Tanquam paruulis in Christo, lac vobis potum dedi, non escam. Nondum enim poteratis, sed ne nunc quidem potestis: adhuc enim carnales estis. Cum enim sit inter vos zelus & contentio; nonne carnales estis, & secundum hominem ambulatis? Cum enim quis dicat:

T

ego

ego quidem sum Pauli, alius autem, ego Apollo; nōne homines estis? Quid igitur est Apollo? Quid verò Paulus? Ministri eius cui credidistis, & vnicuique, sicut Dominus dedit. Itaque, neque, qui plantat est aliquid, neque, qui rigat, sed qui incrementum dat, Deus. Qui autem plantat, & qui rigat vnum sunt. Vnusquisque autem propriam mercedem accipiet secundum laborem. Dei enim sumus adiutores: Dei agricultura estis, Dei ædificatio estis. Subditi ergo estote Deo: resistite autem Diabolo, & fugiet à vobis. Appropinquate Deo, & appropinquabit vobis. Emundate manus peccatores: & purificate corda duplices animo. Miseri estote, & lugete, & plorate: risus vester in luctum conuertatur, & gaudium in mœrorem. Humiliamini in conspectu domini, & exaltabit vos. Nolite detrabere alterutrum fratres mei: qui detrahit fratri, aut qui iudicat fratrem suum; detrahit legi, & iudicat legem. Si autem iudicat legem, non est factor legis, sed iudex: vnus enim legislator, & iudex, qui potest perdere, & liberare. Tu autem quis es, qui iudicas proximum tuum? Iacob. cap. 4.

In Summa: Quia Deus cor contritum, & humiliatum non despicit; idcirco, tam actiui, quam passiui, in timore Dei, ad poenitentiam, ad indulgentias, ad orationem, & ad Sacramenta, non nisi contrito corde, & in Spiritu humilitatis accedant: quia Dominus Isa. cap. 66. dicit: *Ad quem autem respiciam, nisi ad pauperculum, & contritum Spiritu, & trementem sermones meos?*

C O R O L L A R I U M P R I M U M.

Syncerum est, nisi vas quodcunque infundis, acescit. Horatius lib. 1. Epistola 2. ad Lollium.

Probatur Corollarium Notabili Septimo: cap. 1. 2. 3.

Item probatur autoritate scripturę Mat. 9. *Neque mittunt vinum novum in vtres veteres: alioquin rumpuntur vtres, & vinum effunditur, et vtres pereunt. Sed vinum novum in vtres novos mittunt, & ambo conseruantur.* Item probatur 1. ad Thessal. cap. 4.

Hæc est autem voluntas Dei sanctificatio vestra, vt abstineatis vos à fornicatione; vt sciat vnusquisque vestrum vas suum possidere in sanctificatione, & honore: non in passione desiderij, sicut & gentes, quæ ignorant Deum. Et ne quis supergrediatur, neque circumueniat in negotio fratrem suum: quoniam vindex est Dominus de his omnibus, sicut prædiximus vobis, & testificati sumus. Non enim vocauit nos Deus in immundiciam, sed in sanctificationem. Itaque, qui hæc spernit, non hominem spernit, sed Deum, qui etiam dedit Spiritum sanctum in nobis. Propterea Dauid Psal. 68. orat: Eripe me de luto, vt non insigam: libera me, ab ijs qui oderunt me, & de profundis aquæ. Non me demergat tempestas aquæ, neque absorbeat me profundum, neque urgeat super me puteus os suum. Exaudi me Domine, quoniam

quoniam benigna est misericordia tua : secundum multitudinem miserationum tuarum, respice me. Et ne auertas faciem tuam à puero tuo, quoniam tribulor : velociter exaudi me, &c.

COROLLARIVM SECVNDVM,

Contra Lutherum & hæreticos.

Non modò cessatio à peccatis, & eorum detestatio, cor contritum & humiliatum, fides, spes, charitas; verùm etiam timor Dei, prudentia, iustitia, fortitudo, temperantia, patientia, confessio, absolutio, satisfactio, oratio, ieiunium, Eleemosyna, & alia pia spiritualis vitæ exercitia, vtiliter præparant & disponunt hominem ad indulgentiam, & fideliter præseruant à futuris peccatis.

Corollarium probatur Notabili septimo. cap. 1. 2. 3.

Item probatur autoritate sacrosancti Concilij Tridentini sessione sexta cap. 14. titulo de lapsis, & eorum reparatione.

COROLLARIVM TERTIVM,

Pars est satisfactionis, charitas erga Deum, & proximum : signum autem charitatis erga proximum, *Si tu dissolvas colligationes impietatis, solvas fasciculos deprimentes, & ubi iniqua est cautio, ubi iniqua chyrographa, ubi opprimuntur pauperes calumnia; ibi fasciculi cautionum, & omnia iniquitatis vincula sunt rumpenda : quia facere misericordiam & iudicium, magis placet Deo, quàm victimæ* Prouerb. 21.

Probatio Corollarij patet Notabili septimo. cap. Quarto.

COROLLARIVM QVARTVM.

Qui quærit & petit indulgentiam in Ecclesia, si quod habet odium erga proximum, abijciat : abijciat iram, vindictam, malitiam, & eat prius reconcilietur proximo suo; & tunc veniens quærat, pulset, & petat in Ecclesia indulgentiam : quia scriptum est Ecclesiast. 28. Relinque proximo tuo nocenti te; & tunc deprecanti tibi peccata soluentur. Homo homini reseruat iram; & à Deo quærit medelam. In hominem similem sibi non habet misericordiam; & de peccatis suis deprecatur. Ipse dum caro sit, reseruat iram, & propitiationem petit à Deo. Quis exorabit pro delictis illius? memento nouissimorum & desine inimicari.

Corollarij probatio patet Notabili septimo. cap. 3. & 4. &c.

COROLLARIVM QVINTVM.

Extra Ecclesiam Catholicam, nulla pœnitentia, nullus iubileus,

nulla indulgentia, nulla peccatorum remissio, nulla salus. Corollarium probatur Notabili. 4. cap. 5. &c.

Item probatur testimonio D. Augustini. Beatus Augustinus in lib. de vera & falsa poenitentia cap. 11. & 12. dicit sic: *Laboret itaq; poenitens in Ecclesia esse, & ad Ecclesie unitatem tendere. Nisi enim Ecclesie unitas succurrat, nisi quod deest peccatori sua opitulatione compleat; de manibus inimici non eripietur anima mortui. Credendum est enim, & pietas fidei exoptulat credere, quod omnes Eleemosynæ totius Ecclesie, & orationes, & opera iustitiæ, & misericordiæ succurrant recognoscenti mortem suam, ad conuersionem suam. Ideoq; nemo dignè poenitere potest, quem non sustineat unitas Ecclesie. Ideoq; non petat sacerdotes per aliquam culpam ab unitate Ecclesie diuisos. Iudas enim poenitens iuit ad Phariseos, reliquit Apostolos: nihil inuenit auxilij; sed augmentum desperationis. Dixerunt enim Matth. 27. Quid ad nos, tu videris. Si peccasti, tibi sit, non tibi succurrimus: non peccata tua charitate suscipimus: non comportanda promittimus: non qualiter deponas onus docemus. quid enim nobis & misericordiæ, qui nec opera sequimur iustitiæ? Si isset ad fratres: si isset ad illos, qui orauerunt pro socru Petri febricitante, qui Chanaanæam improbam misericordiæ obtulerunt: interrogasset Petrum pro se lacrymas effundentem: non fugisset Mariam & Martbam, quæ vitam Lazaro impetrauerant: non turbam plorantem, quæ vnicum filium adquiserat viduæ. Iuit ad diuisos: & diuisus perijt. Hanc unitatem omnis boni sentit operatricem, qui dixit, Vineam fuit pacifico in ea, quæ habet populos. Nisi enim in Ecclesia vniuersali populos se continentes cognosceret; se vineam impetraturum non præsumeret. Sic enim & experimento cognoscit; utpote, qui pro omnium salute laborauerat, se absq; auxilio Ecclesie stare non posse. Non enim est parum, cui omne bonum succurrit, siue in cælo siue in terra constitutum. Hoc amittens per excommunicationem, nisi recuperet per sanctæ matris unitatem vel pietatem, & indulgentiam; quomodo unquam poterit poenitere? quomodo Deum beneuolum poterit inuenire, qui eius sanctissimam sponsam, & matrem, filiam, & sororem non dubitauit offendere, & eius auxilium omninò contemnere? Hæc D. Augustinus.*

COROLLARIUM SEXTVM.

Tentant Christum, qui sub indulgentia, non indulgentia, sed plagis & carcere digna committunt.

Corollarium probatur Notabili tertio, capite quarto.

Item probatur autoritate sacre scripturæ, Isaia cap. 26. vbi Propheta dolet & deflet, stultitiam, malitiam, & ingratitudinem istorum peruersorum, & scandalosorum, sic dicens: *Indulxisti genti Domine, indulxisti genti, numquid glorificatus es? Elongasti omnes terminos terræ Domine*

Domine, in angustia requisierunt te, & in tribulatione murmuris doctrina tua eis. Propterea Mediator, redemptor, & saluator noster Christus Dominus, Matth. cap. 7. dicit: *Nolite dare sanctum canibus, neq; mittatis margaritas vestras ante porcos.* Vnde Apostolus 1. ad Corin. cap. 10. *Neque tentemus Christum, sicut quidam tentauerunt, & à serpentibus perierunt. Neq; murmuraueritis, sicut quidam eorum murmurauerunt, & perierunt ab exterminatore.*

Item, probatur Ratione tali.

Nulli dementes scandalosi & ingrati sunt indulgentia digni. sed omnes abutentes gratia indulgentiarum, sunt dementes, scandalosi, & ingrati: ergo nulli dementes, scandalosi, & ingrati, sunt indulgentia digni.

MAIOR vera ex Euangelica Parabola, Luc. cap. 14.

MINOR est D. Gregorij Magni, lib. 8. Epistolarum ex Registro, cap. 41. vbi dicit sic: *Nam in flagellis positos, flagellis digna committere, contra ferientem est specialiter superbire, & seuioris arctius iracundiam irritare: Atq; est primum genus dementiæ, nolle quempiam à malis suis iniuste quiescere, & Deum iniuste à sua velle ultione cessare.*

Idem libro 11. Epistolarum ex Registro, cap. 2. *Percussus quisq; antè rapitur, quàm ad lamenta pœnitentiæ conuertatur. Pensate ergo, qualis ad conspectum districti iudicis peruenit, cui non vacat flere quod fecit.*

COROLLARIUM SEPTIMUM.

Ad euitanda scandala, vt non vituperetur ministerium Ecclesiæ, Sacrosanctum Concilium Tridentinum, omnes & singulos abusus circa indulgentias, vt sunt prauis quæstus, superstitiones, ignorantia, & irreuerentia, sub anathemate prohibet, abrogat, tollit & damnat.

Probatio Corollarij Notabili Tertio, cap. quinto.

Item, probatur autoritate Sacrosancti Concilij Tridentini, Sessione 25. Decreto de indulgentiis.

COROLLARIUM OCTAVVM.

Fidelem & prudentem Christianum abusus non possunt, nec debent scandalizare: quoniam pax multa diligentibus legem Dei, & Ecclesiæ indulgentias, & non est illis scandalum, Psalm. 118.

Probatio Corollarij patet Notabili septimo, cap. primo.

Item patet ex Conclusionem Primam, &c.

C O N T R O V E R S I A
C O R O L L A R I V M N O N V M.

Sacrofanctum Concilium Tridentinum generali decreto decreuit, ordinauit, & mandauit; vt Lociordinarii, omnes & singulos abusus, circa indulgentias deferant: & vt Sancta sedes Apostolica, eosdem abusus corrigat & emendet; ne hoc insigne & sanctum nomen indulgentiarum ab hæreticis blasphemetur.

Probatur Corollarium Notabili Tertio, cap. quinto.

Item probatur autoritate SS. Concilij Tridentini, Sess. 25. Decreto de Indulgentijs.

C O R O L L A R I V M D E C I M V M.

Hæretici, qui indulgentias negant, blasphemant, & oppugnant, toto cælo errant nescientes scripturas: de fide sine fide disputant: cœci sunt & duces cœcorum: qui non solum alijs, & sibi iniuriam faciunt; sed etiam ore suo se indulgentia, gratia, & auxilio Dei indignos, & poena dignos iudicant, & condemnant: homines alioqui miseri & infirmi cum sint, tamen cum superbis Phariseis, Scribis, Nouatianis, & Pelagianis, medicum cum medicina, tanquam insani contemnunt, spernunt, & conculcant: inimici crucis Christi, principia religionis contra conscientiam, contra sensum & consensum, omnium fidelium impudentissimè negant: tenebras pro luce, lutum & fordes pro fonte & lauacro, maledictionem pro benedictione, carcerem pro luce publica, stultissimè & iniquissimè peruersi eligunt: nesciunt, de quibus affirmant vel negent: & ideo metas contradictionis ipsi manifestè incurrunt, & iam rei contradictionis publicè tenentur: quia remissionem peccatorum ponunt, & indulgentias negant. Væ illis, qui in contradictione Choræ perierunt. Ergo iustè à Synodo Tridentina anathematizantur.

Probatio Corollarij patet in ventilatione Quæstionis in Notabilibus & conclusionibus.

Item probatur multiplici scripturæ autoritate Matth. 22. Erratis nescientes scripturas, atq; virtutem Dei.

Item Matth. 15. Sinite illos, cœci sunt, & duces cœcorum: cæcus autem si cœco ducatum præstet, ambo in foueā cadunt. Item ad Phil. 3.

Item Psal. 7. *Ecce parturit iniustitiam, concepit dolorem, & peperit iniquitatem. Lacum aperuit, & effodit eum, & incidit in foueam quam fecit. Conuertetur dolor eius in caput eius, & in verticem ipsius iniquitas eius descendet, &c.*

Item Psal. 72. *In labore hominum non sunt, & cum hominibus non flagellabun-*

DE INDVLGENTIIS.

223

gellabuntur. Ideo tenuit eos superbia: operi sunt iniquitate, & impietate sua. Prodiit quasi ex adipe iniquitas eorum, transierunt in affectum cordis. Cogitauerunt, & locuti sunt nequitiam, iniquitatem in excelsis locuti sunt. Posuerunt in cælum os suum, & lingua eorum transiit in terra, &c.

Item, Psal. 108. Et dilexit maledictionem, & veniet ei: & noluit benedictionem, & elongabitur ab eo. Et induit maledictionem sicut vestimentum, & intrauit sicut aqua in interiora eius, & sicut oleum in ossibus eius. Fiat ei sicut vestimentum quo operitur, & sicut zona, qua semper praecingitur, &c.

Item, 2. ad Thimoth. cap. 3. Hoc autem scito, quia in nouissimis diebus instabunt tempora periculosa, & erunt homines seipsos amantes, cupidi, elati, superbi, blasphemii, parentibus non obedientes, ingrati, scelesti, sine affectione, sine pace, criminatores, incontinentes, immites, sine benignitate, proditores, proterui, tumidi, cæci, & voluptatum amatores magis quam Dei, habentes speciem quidem pietatis, virtutem autem eius abnegantes, & hos deuota. Ex ijs enim sunt, qui penetrant domos, & captiuas ducunt mulierculas oneratas peccatis, quæ ducuntur varijs desiderijs: semper discantes, et nunquam ad scientiam veritatis peruenientes. Quemadmodum autem Iamnes & Mambres resistenterunt Moysi: ita et hi resistunt veritati, homines corrupti mente, reprobi circa fidem, sed ultra non proficient. Insipientia enim eorum manifesta erit omnibus, sicut et illorum fuit, etc. Et paulo post. Mali autem homines & seductores proficient in peius errantes, & in errorem mittentes etc.

COROLLARIUM VNDECIMUM.

Qui nocet, noceat adhuc: & qui in sordibus est, sordescat adhuc: Et qui iustus est, iustificetur adhuc: & sanctus, sanctificetur adhuc.

Apoc. 22. Probatur Corollarium Notabili Tertio cap. 4.

Item ex supra dictis patet, & est per se notum, &c.

COROLLARIUM DVODECIMVM.

Infinitus & indiuisus est thesaurus indulgentiarum, quo, qui vsi sunt, participes facti sunt amicitiae Dei, Sapient. cap. 7.

Corollarij probatio patet Notabili 5. cap. 1. &c.

COROLLARIUM TREDECIMUM.

Nemo vnquam Catholicus pro indulgentia & remissione peccatorum (magis quam gentiles pro aris & focis, pro Repub. & libertate) mortem oppetere dubitauit.

Corollarij probatio patet Notabili Sexto cap. 2. &c.

Item probatur autoritate scripturae 2. Machab. cap. 6. & 7. Item Matth cap. 16. Lucae 9. Qui enim voluerit animam suam saluam fa-

cere, perdet eam. Qui autem perdiderit animam suam propter me, inueniet eam. &c.

COROLLARIUM QUATVORDECIMUM.

Quæstio cum suis Conclusionibus & Corollarijs, ad intentionem, & Canonem sacræ scripturæ, iuxta definitionem sanctæ matris Ecclesiæ Catholicæ Apostolicæ, Romanæ, secundum sensum & consensum sanctorum Patrum, est vera, & non nisi Catholicè defendenda.

Veritas Conclusionis ex supra dictis Corollarijs, Conclusionibus, & Notabilibus patet. Ad authoritates verò, quas allegant hæretici, tum ad argumenta Hæreticorum, iam suprâ responsum est, simulq; posita, & demonstrata sunt Decreta sanctorum Conciliorum, &c.

Finem loquendi pariter omnes audiamus :

SIT NOMEN DOMINI BENEDICTVM,
EX HOC NVNC ET VSQ. IN SECVLVM.

Psal. 112.

NON NOBIS DOMINE NON
NOBIS, SED NOMINI TVO
DA GLORIAM. Psal. 113.



Index eorum, quæ hoc libro tractantur.

<p style="text-align: center;">A.</p> <p><i>Abbas non potest dare indulgentias.</i> fol. 84</p> <p style="text-align: center;">B.</p> <p><i>Bona malis, & mala bonis plerumq; in vita eueniunt.</i> 179.</p> <p style="text-align: center;">C.</p> <p><i>Canones pœnitentiales arbitrarij.</i> 30.</p> <p><i>Carena quid.</i> ibidem</p> <p><i>Charitas quid? qualis, & quæ illius operatio.</i> 110.</p> <p><i>Christianum decet districtioris esse disciplinae.</i> 32.</p> <p><i>Clemens Papa I. constituit quadragenam.</i> 30.</p> <p style="text-align: center;">D.</p> <p><i>Desperandum non est.</i> 88. 108. 142.</p> <p><i>Dies mortis quamobrem incertus.</i> 16.</p> <p><i>Dispensator quis fidelis.</i> 204.</p> <p style="text-align: center;">E.</p> <p><i>Ecclesia habet Hyerarchiam.</i> 197.</p> <p><i>Elemosyna danda.</i> 134.</p> <p><i>Æquivalentis æquivalentia aliquorum adinuicem, multipliciter dicitur.</i> 13.</p> <p><i>Epicuræi à societate hominum excluduntur, quia sua tantum querunt, & priuata curant.</i> 28.</p> <p><i>Euangelium cum lege in quo conuenit, & in quo differt.</i> 123.</p> <p style="text-align: center;">F.</p> <p><i>Fides antiquorum cum nostra eadem est.</i> 157.</p> <p><i>Fides quæ non habet charitatem, & bona opera, dæmonum est.</i> 131.</p> <p><i>Fides ad indulgentiam necessaria.</i> 107.</p> <p><i>Figure & Prophetiæ ponuntur de autoritate & iurisdictione summi pontificis.</i> 47.</p> <p style="text-align: center;">G.</p> <p><i>Gregorij Magni precatio.</i> 52.</p>	<p style="text-align: center;">H.</p> <p><i>Harmonia veteris & nouæ Legis.</i> 121.</p> <p><i>Hæreticus quis habendus.</i> 39.</p> <p><i>Hæretici ad suam Hæresim scripturæ abutuntur.</i> 11.</p> <p><i>Homo non resurgit sine Dei gratia.</i> 202.</p> <p><i>Homines non sunt despiciendi, auertentes se à peccatis.</i> 145.</p> <p style="text-align: center;">I.</p> <p><i>Impius conuersus obseruatis conditionibus iustificatur.</i> 201.</p> <p><i>Ieiunium quid requirit.</i> 136.</p> <p><i>Indulgentiæ nomina.</i> 28.</p> <p><i>Indulgere quid sit.</i> Ibidem,</p> <p><i>Indulgentiæ vocabulum multiplex.</i> 31.</p> <p><i>Indulgentia quid?</i> 34. 35. 36.</p> <p><i>Indulgentia duplex.</i> 36.</p> <p><i>Indulgentiæ hominem ex faucibus Diaboli liberant.</i> 14.</p> <p><i>Indulgentiæ probantur traditione Sanctorum Patrum, 38. Authoritate scripturæ Veteris testamenti, 40. Noui testamenti, 48. Testimoniis S. Patrum, 52. Canonibus & Decretis Sacrorum Conciliorum. 56. Exemplis Noui testamenti. 51. Rationibus. 21.</i></p> <p><i>Indulgentiæ ex Synagoga ad Ecclesiam translata, probantur.</i> 116.</p> <p><i>Indulgentiarum aduersarius Lutherus.</i> 37.</p> <p><i>Indulgentiarum causa.</i> 68.</p> <p><i>Indulgentiarum concessiones quando coepta.</i> 147.</p> <p><i>Indulgentias conditionaliter promissit Deus.</i> 40. 55.</p> <p><i>Indulgentiæ non definiuntur essentiali definitione.</i> 34.</p> <p><i>Indulgentiarum dies dicuntur, dies salutis, dies propitiationis.</i> 29.</p> <p><i>Indulgentiarum dispensatores non sint seueri.</i> 203.</p> <p><i>Indulgentiarum efficiens causa.</i> 81.</p> <p><i>Indulgentiarum forma.</i> 78.</p> <p><i>Indulgentiarum finis.</i> 85.</p> <p><i>Indulgentiarum tempus.</i> 92.</p> <p><i>Indulgentiæ thesaurus celestis.</i> 34.</p> <p><i>Indulgentiarum infinitus thesaurus.</i> 86.</p> <p style="text-align: right;"><i>Indul-</i></p>
--	---

I N D E X.

<i>Indulgentiarum locus.</i>	88.	<i>Parochus non habet potestatem concedendi</i>	
<i>Indulgentiarum materia.</i>	68.	<i>indulgentias.</i>	191.
<i>Infinium Theologicum indiuisibile.</i>	198.	<i>Peccati grauitas.</i>	49.
<i>Iusti vocabulum non amittit, qui per pœnitentiam semper resurgit.</i>	181.	<i>Peccatorum remissiones quantæ sint in Euangelio.</i>	32.

L.

<i>Lex vetus an tota sublata.</i>	119.	<i>Peccata actualia, pœnitentia curantur.</i>	47.
<i>Lutheri Apostasiæ causa, & quare contra indulgentias insurrexerit.</i>	37.	<i>Peccatum vbi maius, ibi maior gratia.</i>	207.
<i>Lutheranorum contra indulgentias argumenta, & eorum solutiones.</i>	12.	<i>Peccatorum remissionem, potius quam aurum, aut lapides preciosos, postulat à Deo D. Gregorius Magnus.</i>	52.

M.

<i>Mediator vnus est Dei & hominum.</i>	198.	<i>Pœnalitates filius Dei propter nos assumpsit.</i>	
<i>Merita Christi quomodo infinita.</i>	86.	<i>Pœnitendum de omnibus peccatis.</i>	143.
<i>Merita Sanctorum & Christi thesaurisant in Ecclesia Thesaurum indulgentiarum.</i>	164. & seq.	<i>Pœnitentia non est exclusa post Baptismum.</i>	20.
<i>Merita Sanctorum duplici virtute prædita sunt.</i>	171.	<i>Peregrinationes non inanes. fol. 100. Testimonijs probantur. fol. 101. earum utilitates. 103. quo animo suscipiendæ: & quibus conuenit peregrinari.</i>	104.
<i>Miserantis opus totiens apparet, quotiens confessio fit pœnitentis.</i>	131.	<i>Præceptum est quadruplex.</i>	185.
<i>Modus celebrandi indulgentias.</i>	113.	<i>Præcepta Dei non sunt impossibilia.</i>	216.
<i>Moses cur Aegyptiacas opes spreuerit.</i>	156.	<i>Processus operis tria habet.</i>	203.
<i>Mundus est pœnitentiæ locus.</i>	113.	<i>Propheta verba (solue fasciculos deprimentes) explicantur.</i>	112.

O.

<i>Oblationes debent fieri in Ecclesia sub indulgentia.</i>	10.	<i>Prophetiæ ponuntur super futuris Indulgentijs in Noua lege.</i>	46.
<i>Offertoria & oblationes sacra scriptura probantur.</i>	105.	<i>Proximus noster quis.</i>	111.
<i>Onus alter alterius potest portare triplici modo.</i>	137.	<i>Proximus an pro peccatis proximi possit & debeat satisfacere.</i>	132.
<i>Operatio Dei non vbiq; equalis.</i>	88.	<i>Proximus nostros septem modis in purgatorio iuuare possumus.</i>	135.
<i>Orandum pro proximis.</i>	133.	<i>Purgatorij ignis grauis.</i>	214.
<i>Orant conuersi pro indulgentia.</i>	43.	<i>Purgatorij pœna acerbissima.</i>	ibid.
<i>Originale peccatum remittitur per Baptismum vnâ cum pœna damni.</i>	35.		

P.

<i>Papa habet potestatem concedendi Indulgentias.</i>	188.		
---	------	--	--

<i>Papæ priuilegia & autoritates super iurisdictione ex nouo Testamento ponuntur.</i>		<i>Sacramenti duplex effectus.</i>	201.
		<i>Sacerdos non est immunis à peccato.</i>	215.
		<i>Sancti</i>	

Q.

<i>Quadragesimæ quis autor.</i>	30.
<i>Quadragesimæ horarum indulgentiæ.</i>	60. 94.
<i>Quarta & sexta feria ieiunium antiquum.</i>	58.
<i>Quid est facere, quod in se est?</i>	30.

S.

I N D E X.

<i>Sancti non solum pro se, sed etiam pro nobis passi.</i>	163.	<i>Thesaurus coelestis, sunt indulgentiae.</i>	34.
<i>Sacrificia Missae pro viuis & mortuis peragenda.</i>	135.	<i>Thesaurus indulgentiarum est infinitus.</i>	86.
<i>Satisfactio nostra inuititur satisfactioni Christi.</i>	14.	<i>Timor Dei disponit ad indulgentiam.</i>	112.
<i>Synagogam Ecclesia vincit.</i>	49.	<i>Traditiones sanctorum patrum seruanda.</i>	38.
<i>Spes nostra in temporalium rerum promissione defixa non est.</i>	159.	<i>Traditio, & scriptura, eandem vim & auctoritatem habent.</i>	40.
<i>Serpentem cauet, qui eius versutias non ignorat.</i>	53.	<i>Tristitia non debet esse nimia.</i>	53.
<i>Statuta maiorum pro lege tenenda.</i>	39.	V.	
T.		<i>Vacuum vbi.</i>	91.
<i>Temporalia danda sunt, vt habeantur spiritalia.</i>	204.	<i>Valor indulgentiarum.</i>	78.
<i>Temporalibus subesse, durum est seruitutis pondus.</i>	50.	<i>Vetus lex habuit indulgentias.</i>	151.
<i>Testamentorum vtrumq; in vtroq; est.</i>	121.	<i>Votum quid?</i>	95.
		<i>Vota persoluenda.</i>	ibid.
		<i>Vota sanctis nuncupare licet.</i>	96.
		<i>Vota quando sunt vota, & quando non.</i>	97.
		<i>Vota sunt Deo in sanctis.</i>	98.
		<i>Vniuersale est causa suorum singularium.</i>	38.

Corrigenda.

Fundatur, lege funditur, fol. 4.
 Poenitentia, lege patientia, fol. 5.
 Tentat, lege tentant, fol. 9.
 Consequendas, lege consequendis, fol. 27.
 Arbitrij, lege arbitrarij, fol. 3.
 In principio, lege principio, fol. 31.
 Vriam, lege Naboth. fol. 54.
 Consilio, lege Concilium, fol. 56.
 Mysterium, lege ministerium, fol. 84.
 Indiscreto, lege indiscrete, fol. 78.
 De tertia Conclusionem, lege
 De quarta Conculsione, fol. 147. &c.

F I N I S.

M. VALENTINI
LAVRENTII VIDA VIENSIS
PRO SCHOLASTICA
THEOLOGIA

Oratio.



Magna prudentia, iustitia, & nobilitas est, Auditores Nobilissimi, bonorum, honestorum, & nobilium maiorum, bonos, honestos, nobiles, & pios mores imitari: & à nobilitate, iustitia, & pietate Catholicorum parentum non degenerare. Magna virtus est, res, & artes ad vitam necessarias, bonis, & honestis rationibus, & modis via ordinaria cum labore quærere: sed non minor est prudentia, ars, & fortitudo, hæreditatem quam à maioribus acceperis, fideliter custodire, defendere, augere, & ornare, iuxta vetus prouerbum: Spartam, quam nactus es, orna. Propterea scripsit Ennius, ut refert Cicero, libro quinto de Republica:

Moribus antiquis res stat Romana, virisque.

Post Ennium, Ouidius poeta prudenter ad rem præsentem dixit:

Non minor est virtus, quam quærere parta tueri:

Casus inest illic: hic erit artis opus.

Malè audit in sacra Scriptura 2. Machab. cap. 5. Menelaus quidam, qui legum & patriæ fuit proditor. Sed benè audiunt, quos sacra Scriptura commendat, 2. Machab. cap. 7. Septem fratres, qui pro patriis, & Dei legibus impio Antiocho Regi se opposuerunt. Nam vnus ex illis, qui erat primus, sic ait: Quid quæris? & quid vis discere à nobis? Parati sumus mori magis, quam patrias & Dei leges præuaricari: quod idem re ipsa statim cum sua immortalī laude præstiterunt, ut ibidem, non minus copiosè, quam luculenter narrat historia. Quæ res, cum in homine fideli sit mirabilis, tum verò in infideli multò admirabilior. Sic enim Horatius, libro 1. Episto. 16. ad Quinctium dicit:

Vir bonus & sapiens, audebit dicere: Pentheu,

Rector Thebarum; quid me perferre, pati que

Indignum coges? adimam bona: nempe pecus, rem,

Lectos, argentum: tollas, licet: in manicis, &

Compedibus sæuo te sub custode tenebo.

Ipse Deus simulatque volam, me soluet opinor:

Hoc sentit moriar: mors vltima linea rerum est.

Verum enimverò, quia teste Cicerone, libro i. de officiis, optima hæreditas à parentibus traditur liberis, omniq[ue] patrimonio præstantior gloria virtutis, rerumq[ue] gestarum; cui dedecori esse, nefas, & vitium iudicandum est: idcirco nos, Auditores Nobilissimi, si non degeneres, sed generosi: si non noti & suspecti, sed legitimi, boni, honesti, & prudentes filij sumus: non solum bonos, honestos, & nobiles mores maiorum nostrorum imitari debemus; verumetiam dum res, & artes necessarias ad vitam bonis rationibus, & honestis modis quarimus, optimam hæreditatem, famam videlicet, gloriam virtutis, rerumq[ue] gestarum, sicut à maioribus accepimus, nullis artibus auerti, nullis infidiis surripi, nulla vi nobis eripi, patiamur: tantum abest, ut stationem nostram deferamus, aut aliqua negligentia, ac socordia illa bona turpiter amittimus. Porro, quia inter alia bona, quæ in Academia morte maiorum relicta habemus, Scholasticam Theologiam facile primo loco numeramus & ponimus; obsecro charissimi, hanc hæreditatem, hoc depositum, hoc insigne patrimonium teneamus, possideamus: hunc diuinum thesaurum tueamur, & defendamus, magna cura, ac perpetua diligentia, & custodia seruemus; ut posteris integrum reddamus. Nam Martinus Cromerus, Episcopus Varmie[n]s. in Polonia, sic scriptum reliquit: Seueriores autem disciplinas, ad nostra usque tempora potissimum consecrati sunt Poloni. Non defuere nobis sanè (sed ne nunc quidem Dei gratia defunt) superioribus temporibus, insignes Mathematici, Astrologi, Dialectici, & Philosophi, atque etiam Theologi: ij præsertim, qui vocantur Scholastici: cum instituta Cracouiæ, ante centum septuaginta annos, Academia, magistri eius generis, Lutecia, Pragaq[ue] acciti, admirationi essent vulgò, & primoribus, atque etiam ipsis Regibus. Hæc Cromerus. Et quamvis Scholastica Theologia sit per se tam illustris, tam pulchra, tam splendida; ut amplius pigmentis, & coloribus externis non egeat; utpote quæ tam sublimi loco in Ecclesia constiterit, ut neque humanis vocibus, & laudibus altius euehi, neq[ue] fraude hostium inde detrahi possit, præsertim cum de ea illud Dauidicum Psal. 44. verè sit dictum: Mirra, & gutta, & cassia, à vestimentis tuis, à domibus eburneis, ex quibus delectauerunt te filia regum in honore tuo: Astitit regina à dextris tuis in vestitu deaurato, circumdata varietate: tamen, quia sunt nonnulli, qui de re optima, & præstantissima malè sentiunt; operæpretium est, ut hunc scrupulum eximamus, & remoueamus: hunc errorem

rorem ex animis hominum euellamus, & bonas opiniones inferamus: quia iuxta prouerbiū, Incognitum non amatur: & Ignoti nulla est cupido. Dum ergo quorundam ignorantia succurrimus, quorundam sinistram opinionem corrigimus, & aliorum manifestas hæreses refutamus; Vos Auditores nobilissimi, inprimis oramus, vt nos, cum ea attentione & beneuolentia, qua soletis Præceptores, audiatis. Theologia communiter in scholis, in Positiuam, & Scholasticam diuiditur. Quibus appellationibus, vnus & idem habitus significatur: prout diuerso modo versatur in suo munere explicandi, & fidem faciendi, atque confirmandi. Positiua enim Theologia dicitur, quatenus occupatur potissimum in explicando ipso sacrae Scripturae sensu: ad eumque eliciendum, tum aliis adminiculis, tum præcipue autoritate sanctorum Patrum utitur. quo ipso, quasi principia firma aliarum conclusionum Theologicarum ponit. Et ideo Positiua videtur dicta: quia scilicet ponit, atque statuit, ex scriptura principia Theologiae firma: nam genuina Scripturae sacrae sententia, vel maxime continet ea principia, ex quibus Theologus argumentatur. Scholastica verò Theologia vocatur, vt explicat vberius, & confirmat, ac defendit latius, & acuratus fidei, & verae, sanæ, Catholicae doctrinae sententiam: & vt disputat acutius. nam subtiliter non minus, quam diligenter res illas vbique speculatur, & vndique perlustrat, quæ rem quampiam, vel antecedunt, vel consequuntur, vel repugnant: vt cum obseruat, quæ res vel antecedunt, vel consequuntur fidem, vel fidei repugnant. Quarum quidem rerum perspicientia, & notitia, velut clarissimum quoddam lumen adeo iuuat, vt tenebræ, quas hæretici suis fallacibus argumentis veritati fidei nituntur offundere, facillime dispici, & dissipelli possint. Itaque ob eam causam Theologia, vt eum vsum habet, Scholastica nuncupatur: quia reuera id præstat, quod nemo recte præstare potest, nisi exquisitam doctrinam consecutus fuerit, quam acri ingenio, tempore longo, studio magno, & constanti labore in scholis Dei gratia cooperante, sub doctis magistris didicerit. Nam & olim ante mille & ducentos annos, in Ecclesia sancta Catholica, vsitatum fuit; vt qui eruditione, & ingenij laude excellerent, in eis nomē Scholasticorum poneretur. Hinc enim D. Hieronymus, in libro de scriptoribus Ecclesiasticis, memorat Serapionem quendam in Ægypto Episcopum, ob ingenij, inquit, elegantiam, cognomen Scholastici meruisse, quem & refert scripsisse librum egregium contra Manicheum. Nec mirum, si doctissimi quique olim vocabantur Scholastici, quandoquidem scholarum etiam vsus erat præcipuus, in quibus diuina doctrina, sacra scriptura, à præcipuis Doctoribus acurate explicaretur:

vt refert D. Hieronymus eodem libro in Pantano. Quin etiam ex D. Augustino in Psalmum 44. sub initium : & ex D. Gregorio lib. 10. Regestri, Epistola ad Authemium intelligi potest; vt qui in aliqua doctrina essent clari, Scholastici nominarentur. In hoc genere excelluit D. Augustinus, quem in primis secuti sunt, qui postea Theologicam disciplinam via ac ratione tradiderunt. Constat item ex D. Hieronymo in Cathalogo scriptorum Ecclesiasticorum in Pantano, & ex Eusebio lib. 5. Historiæ Ecclesiasticæ, cap. 10. & 11. à temporibus Sancti Marci Euangelistæ, fuisse Alexandria Scholam Ecclesiasticam (ita enim Eusebius nominat) cui præfuerunt diuinarum rerum, & Sacræ scripturæ Magistri & Doctores, Philosophiæ etiam peritissimi: vt Pantanus, Clemens Alexandrinus, Origenes, & alij, sicut idem Eusebius lib. 6. cap. 3. narrat. Quis autem dubitet, quin hi doctores vti fuerint in docendo arte, & methodo scholastica, hoc est, discipulis commoda, & apta, vt res ipsas benè perciperent? Cumque in schola Ecclesiastica, vt Eusebius nominat, Theologiam, methodicè, tanquam Philosophi, & sacerdotes docuerint; certè Scholastici Theologi & re, & nomine fuerunt, idque non sine Ecclesiæ maxima vtilitate. Porro, hanc Scholasticam Theologiam, illos antiquos Patres excoluisse, non est mirum. Siquidem ipsemet magister Christus Dominus, firmissimum fundamentum in Euangelio Scholasticæ Theologiæ posuit: nam & definit, vt Matth. 19. Si vis perfectus esse, vade, vende omnia quæ habes, & da pauperibus, & habebis thesaurum in cælo, & veni sequere me. Et Ioan. cap. 14. Ego sum via, veritas, & vita: nemo venit ad patrem, nisi per me. Item, quæstiones proponit, vt Matth. 22. Congregatis autem Phariseis, interrogauit eos Iesus dicens: Quid vobis videtur de Christo? Cuius filius est? Dicunt ei, Dauid. Ait illis: Quomodo ergo Dauid in Spiritu vocat eum Dominum, dicens Psalm. 109. Dixit Dominus Domino meo, sede à dextris meis: Donec ponam inimicos tuos, scabellum pedum tuorum. Si ergo Dauid vocat eum Dominum, quomodo filius eius est? Et nemo poterat ei respondere verbum, neque ausus fuit quisquam ex illa die eum amplius interrogare. Non solum autem proponit, sed etiam propositas quæstiones decidit, & soluit. Item, idem ipse magister Christus Dominus, argumentatur, vt Marci 12. Luc. 11. Ipse autem vt vidit cogitationes eorum, dixit: Omne regnum in seipsum diuisum, desolabitur: & domus super domum cadet. Si autem & Sathanas in seipsum diuisus est, quomodo stabit regnum eius? quia dicitis, in Beelzebub eiicere me dæmonia. Si autem ego in Beelzebub eiicio dæmonia, filij vestri in quo eiiciunt? ideo ipsi iudices vestri erunt. Porro, si in digito Dei eiicio dæmonia, profectò

perfectò peruenit in vos regnum Dei. Talia argumenta Christi, magistri nostri, plura ibidem posita leguntur. Item, Ioan. 8. Qui ex Deo est, verba Dei audit: propterea vos non auditis, quia ex Deo non estis. Et alia multa similia argumenta, magistri Christi Domini passim leguntur in Euangelio. Item, idem ipse magister Christus, quæstiones & argumenta, tum alijs modis, tum præcipue per diuisionem soluit, vt Matth. 22. Reddite ergo quæ sunt Cæsaris, Cæsari: & quæ sunt Dei, Deo: &c. Præterea, exemplo magistri Christi Domini, discipulus beatus Paulus Apostolus, ad Heb. cap. 11. fidē definit: Fides est substantia rerum sperandarum, argumentum non apparentium. Item, idem diuidit, vt ad Roma. cap. 2. Non enim qui in manifesto Iudæus est, neq; quæ in manifesto in carne est circumcisio: sed qui in abscondito Iudæus est, & circumcisio cordis in spiritu, non litera: cuius laus non ex hominibus, sed ex Deo est. Item, ad Roma. cap. 11. vbi etiam de Iudæis dicit, tunc diuidit sic: Secundum Euangelium quidem inimici propter vos: secundum electionem autem charissimi propter Patres: sine poenitentia enim sunt dona, & vocatio Dei. Similiter, 1. ad Corinth. cap. 6. Omnia mihi licent, sed non omnia expediunt: Omnia mihi licent, sed ego sub nullius redigar potestate. Idem repetit, 1. ad Corinth. 10. Omnia mihi licent, sed non omnia expediunt: Omnia mihi licent, sed non omnia ædificant. Idem Apostolus quæstiones proponit, vt ad Galath. cap. 3. Hoc solum à vobis volo discere, ex operibus legis spiritum accepistis, an ex auditu fidei? &c. Non solum autem quæstiones ipsemet Apostolus scholasticus, vt fit in Theologia Scholastica proponit; verumetiam, quæ, & quales quæstiones proponendæ, & quales vitandæ, & reiiciendæ sunt, suos Scholasticos in Theologia docet. Nam 2. ad Timoth. cap. 2. scribit sic: Stultas autem, & sine disciplina quæstiones deuota: sciens quia generant lites. Similiter admonet Titum, ad Titum cap. 3. dicens: Stultas autem quæstiones, & genealogias, & contentiones, & pugnas legis deuota; sunt enim inutiles, & vanæ. Similiter, linguam, stilum, genus dicendi & phrasim scholasticam Beatus Apostolus scholasticorum suorum erudit & informat, 2. ad Timoth. cap. 2. cum dicit: Profana autem, & inani loquia deuota: multum enim proficiunt ad impietatem. Item, ibidem: Noli contendere verbis: ad nihil enim vtile est, nisi ad subuersionem audientium. Sollicitè autem cura te ipsum probabilem exhibere Deo, operarium inconfusibilem, rectè tractantem verbum veritatis, &c. Item, idem Apostolus contra Saducæos argumentatur, vt 1. ad Corinth. cap. 15. Nam si mortui non resurgunt, neque Christus resurrexit. Quod si Christus non resurrexit, inanis est prædicatio

nostra : inanis est fides nostra, &c. Idem quomodo argumenta soluit, ex supràdictis patet. Summum magistrum Christum, & doctorem Paulum sequuntur sancti patres : nam & ipsi, vt fidē assererent, magna ex parte iisdem modis differendi, quibus nunc scholastici, quandoq; utebantur. Proponebant enim & explicabant quæstiones, vt Augustinus, & Athanasius, & Theodoretus, & alij : utebantur interdum compendiis, vt Cyprianus, Epiphanius Maximus, &c. definiebant, diuidebant, & argumentabantur ; vt passim omnes : & contra falsas Philosophorum opiniones, ex principiis etiam verę Philosophiæ differabant ; vt Iustinus, Tertullianus, Lactantius, Athanasius, & alij, qui scripserunt ex instituto pro religione Christiana, contra gentes. quibus adde Ambrosium in Hexamero, Basilium, Chrysostomum, & alios qui in Genesim scripserunt. Quos secutus est S. Thomas de Aquino, & omnium scholasticorum facilè princeps : cuius scripta, & multitudine, & varietate, & facilitate explicandi, res difficiles adeò excellent ; vt ob eam causam, nomen doctoris angelici iure sit adeptus. Qui proponendis, ordinandis, ac inter se more Geometrico connectendis, ventilandis, discutiendis, & soluendis quæstionibus est felicissimus, ita, vt studiosi verè dicere possint. Ille se in sacra Theologia profecisse sciat, cui Diuus Thomas Aquinas valde placeat. Quamobrem Cassiodorus author doctissimus, qui ante mille annos floruit, libro de Institutione diuinarum lectionum disertè, & luculenter commendat modum disputandi, quo iam vtuntur Scholastici. Eos, inquit, Catholicos, magistros studiosissimè legamus, qui propositionibus factis, soluunt obscuras quæstiones. Nam certè Scholastici vnius cuiusq; rei, quantum fieri potest, principia contemplantur, causas considerant, antecedentia, consequentia, & repugnantia cominus & eminus speculantur : ita fit, vt non solum ipsimet insidias, & pericula, quę hostes moliuntur, & maligni machinantur, effugiant ; verumetiam suos amicos & socios, conseruent, defendant, ac tueantur. Item, Clemens Alexandrinus, lib. 1. & 5. Stromatum, inter cætera scribit sic : Meritò Apostolus variam ac multiplicem dixit Dei Sapientiam, ad Hebr. cap. 1. vt quæ multifariam multisque modis per artem, per scientiam, per fidem, per prophetiam suam ostendat potentiam ad nostrum beneficium. Et libro 5. Eam, inquit, quæ vna cum fide conuenit quæstionem, quæ supra fundamentum fidei superædificat, splendidam, ac magnificam veritatis cognitionem, optimam esse scimus. Contrà, omnes huius temporis sectarij, pertinacissimè negant scholasticam Theologiam vtilem esse, vel quia vim eius non intelligunt, vel quia suis erroribus vehementer illam aduersari vident : idcirco eam

eam multis maledictis, conuitiis, & contumeliis onerant & infectantur. Martinus Lutherus, in libro contra Latomum ait: Theologiam Scholasticam, nihil aliud esse, quàm ignorantiam veritatis, & inanem fallaciam. Et libro de abroganda Missa priuata, Academias, vbi ea docetur (docetur autem in Academiis omnibus Italarum, Hispanorum, Gallorum, Germanorum, Polonorum, &c. insuper in scholis Græcorum, vbi Latinus Thomas, vt fertur, translatus in linguam Græcam, legitur) vocat Antichristi lupanaria: imitatus videlicet impudentiâ Wiclefi, qui Collegia, & Vniuersitates appellabat, Castra Cainitica: & gradus in scholastica Theologia, dicebat introductos esse gentiliter; vt videre est apud Valdensen, Tom. 1. lib. 2. doctrinæ fidei, cap. 67. & sequentibus. Item, Philippus Melanchton in Apologia, contra Parrhisiens. profanam vocat Theologiam scholasticam, eamq; dicit Parrhisiis natam, & obscurauisse Euangelium, & fidem extinxisse. Calvinus item, lib. 3. Institut. cap. 2. Sect. 2. de fide tractans, ait, Scholasticos Theologos, velut obducto velo, Christum texisse, & plurima mala illi accepta ferri debere. Deniq; passim alij quoque sectarij, scholasticam Theologiam vocant errorum, & abominationum sentinam, & lernam: scilicet, si errores, & abominationes sunt: veritates illæ doctrinæ orthodoxæ, quas Scholastici non minus egregiè tuentur, quàm sectarij perfidè negant, & dolosè oppugnant. Et in istis impletur illud sapientis, Prouerb. cap. 17. Plus proficit correctio apud prudentem, quàm centum plagæ apud stultum. Adde, quia etiam Erasmus Rotherodamus in præfatione, in Diuum Hilarium, reprehendit disputandi modum scholasticorum, tanquam nimis curiosum & superuacuum. Verùmenimverò, præter istos, quos enumerauimus hæreticos, multos etiam inter Catholicos hoc tempore reperiatis, & videas, qui scholasticam Theologiam, quam ignorant, inutilem existimant: tum quia difficilima quæque mira breuitate, subtiliter explicat, & resoluit: tum quia prudenter, & iustè, & verè pretiosum à vili, & verum à falso separat: tum quia hæreticos erroris, blasphemix, & impietatis fortiter & feuerè conuincit. Volunt isti, contra antiquam, diuinam scholasticam Theologiam, nouam suam humanam & aulicam, introducere Theologiam. Sed istis valdè timendum est, ne fidem Catholicam prius amittant, quàm istam aulicam Theologiam, quam frustra moluntur, in lucem producant & proferant, & in Iudaicam Theologiam prolabantur. Cum istis ergo, & istorum similibus, erat Doctoribus Catholicis cominus congregiendum: punctim erant pugionibus confodiendi: breuissimis, atque aculeatis argumentis in angustias redigendi, vnde non possent elabi: erat definiendum,

endum, diuidendum, argumentandum, tota istorum intricata Soritarum series euoluenda. Quid enim aliud ageres cum Berengario, acutissimo sui temporis Dialectico? Quid cum Petrobrusianis, Albigen sibus, Wiclefitis, Stancaribus, qui totam ætatem in syllogismis nendis & texendis contriuerant? Quamobrem magna prouidentia Dei Opt. Max. factum & perfectum est, ut quamprimum hæc monstra ex inferis eruperunt, statim quoque apud nos extiterint, Algerij, Alexandri, Lanfraci, Lombardi, Bandini, Aquinates, Scoti, Eckij, Sadkouij, Nouicampiani, Pilznenses, Obremscij, & alij Theologi scholastici acutissimi, præstantissimi, qui arte artem nossent eludere, & cum argutis illis, argutiis instructi, possent & scirent, exëplo Moysis (cuius serpens, magorum Pharaonis serpentes deuorauit) congregari. Et quia nihil vnquam est Sophista pertinacius, qui sexcenties turpiter victus, volens tamen se victum non videri, pugnam quoque redintegrat, in qua adhuc grauius, & turpius prosteratur, arma Catholicis viris erant semper in promptu habenda, ad istos peruicaces, peruersos subuersores assidue profligandos. Magno igitur cõsilio, magna inquam bonitate, & sapientia Dei omnipotentis, in maximum Ecclesiæ Catholicæ cõmodum factum est; ut ars quædã inciperet scribi Theologica, quàm Scholasticam appellârunt: per quam cælestis hæc doctrina, magna postea cum breuitate, facilitate, sed & sufficienter ac feliciter incepta est publicè doceri, & disci. Ea nostri deinde tanquam firmissimo aliquo præsidio, & fortalicio, contra hæreticorum insultus assidue se munierunt, & subsidia sibi comparârunt, ad castra hostium inuadenda, & disturbanda. Calumnientur eam licet Catholicæ religionis oppugnatores, veritatis aduersarij; parum nostra refert, imò id est argumento, eam fortissimam, velut fidei arcem esse, ad quam tot machinis expugnandam, vniuersæ hæreticorum cateruæ confluxerunt. Sed nihil propterea proficiunt in hoc, furibundos canes imitantes, qui lapides, quibus se malè percussos sentiunt, maximo etiam cum suorum dentium detrimento mordent, nihil tamen elidentes: & reuera, nulla alia ratione melius huiusmodi canum dentes obteruntur, hoc est, eorum effrenata audacia retunditur, quàm Scholasticis disputationibus, his in angustias coguntur, vnde euadere nequeant. Cùm ad scholastica certamina prouocantur, quoad licet refugiunt, cùm eò deueniunt, & in hanc metam adducuntur; ut detrectare non amplius possint: tunc videas eos, toto corpore, atque artubus contremiscescere, vbi manus conferendæ vix argumento vno proposito, hærent, conticescunt, & ne hiscere quidem audent, homines alioqui audacissimi, & loquaciores, quàm disertiores, qui habent loquentiæ multum, & sapientiæ

sapientiæ parum, imò nihil. Cùm primum victi ex certamine discesserint; tunc repentè ex Scriphia rana facti vocalissimi, contra scholasticam Theologiam, & contra Theologos, vt indoctos, insulsos, atque adeò infantes clamitant, vociferantur, debacchantur: interim à manuum cum illis consertione, quàm longissimè refugiunt, atque in eo maximè sapiunt, non fecus ac semelicti piscatores. Sed tamen libenter interim ex eis scirem, quid sit, cur eam scientiam tanto hominum consensu, iam diu in omnibus Catholicorum scholis, susceptam & approbatam, tam methodicam, tam ordinatam, tam vniuersæ Ecclesiæ utilem, tam necessariam, ipsi nunc primùm calumnientur? extinctam velint? An fortè, vt septis his, atque custodibus, cum sua armatura ab Ecclesia remotis, liberius postea in Christi ouile grassari possint? Atqui, propterea mater Ecclesia Catholica eam retinebit: & in dies magis ac magis Domino cooperante, augebit, excolet, & illustrabit: vtpotè, cui secundùm Deum, sui tutelam, securitatem, atque adeò incolumitatem debeat. Nos iam charissimi Theologiæ Scholasticæ, pro virili exemplo sanctorum Patrum, & in hac alma vniuersitate Cracouien. professorum, promouendæ, quæ tantum operæpretium in commune adfert, Deo adiuuante, diligentissimam nos operam nauaturos in Dei nomine, pollicemur: in hoc studio elaborabimus: sint modò plurimi, qui in bellum contra fidei hostes dent nomina: eos omnes Panoplia instructos curabimus: qua muniti non solum tela ab aduersariis immissa, absque vlla læsione excipiant; sed & eosdem paruo negotio & labore partim prosteruant, partim in fugam vertant.

M. VALENTINI
LAVRENTII VIDA VIENSIS
ORATIO,

IN FVNERE REVERENDI, ET CLARISSIMI D.

M. MARTINI PILSNEN: PHILOSOPHIAE, ET S.

Theologiae Doctoris, Canonici

Cracouien. &c.



Ntequam pro solennitate Exequiarum, & huius officij, cuius gratia frequentes huc conuenimus, aliquid propter ædificationem & consolationem nostram dicemus; omnes, cum ea qua decet reuerentia, ad Euangelium consurgamus, & verba beati Pauli Apostoli, ad Ephes. cap. 6. attentè & cum timore Dei audiamus. Apostolus itaque in loco superius allegato docet & præcipit sic: Filij obedite parentibus vestris in Domino, hoc enim iustum est: Honora patrem tuum, & matrem tuam, quod est mandatum primum in promissione; vt benè sit tibi, & sis longæuius super terram. Et vos patres, nolite ad iracundiam prouocare filios vestros; sed educate illos in disciplina, & correptione Domini. Hæc sunt verba beati Apostoli. Super quibus, vt doctrinas salutares audiamus, secundum publicum, antiquum, & laudabilem in Ecclesia morem & consuetudinem, iam humiliter positis genibus, gratiam & auxilium Spiritus sancti deuotè inuocemus, dicentes: Pater noster, &c. Ave Maria. Quemadmodum patres naturaliter amant filios; ita vicissim boni filij patres suos debent redamare: debent inquam filij, non dico nunc corporum, sed animorum patres timere, honorare, & imitari: nam ita naturà ordinatum, & comparatum est; vt patres, secundum rectam rationem, legitimè imperent: Filij verò, cum ea, qua decet fide, & reuerentia obediant. Siquidem patres sunt naturales Domini filiorum suorum: iuxta illud Ecclesiast. cap. 3. Sicut qui thesaurizat, ita, qui honorificat matrem suam. Et paulò post, ibidem: Qui obedit patri, refrigerabit matrem. Qui timet Dominum, honorat parentes, & quasi dominis seruiet his, qui se genuerunt. Est ergo
lex

lex naturalis, & lex scripta, quam in scripturis legimus, didicimus, & à natura hausimus; vt maiores imperent, minores seu filij obediant: itaque ferendi & audiendi non sunt, qui docent patres se suis filiis humiliare debere. Nam Diuus Ambrosius super cap. 1. ad Colossen. dicit: Qui se subiectis humiliat, totus errat: quia non tenens caput, truncus est, ex quo totum corpus continetur ad vitam. Et D. Augustinus, Pastores, non à vobis exigitur, vt vos à subditis veniam postuletis: ne apud eos, quos oportet esse subiectos, dum nimium seruatur humilitas regnandi, frangatur autoritas. Ita fit, vt in quacunque domo talis inuenitur ordo, talis seruatur Harmonia, talis custoditur regula; vt maiores tanquam caput impetrent, & minores tanquam membra obediant: in illa domo semper vbique est ordo, pax, iustitia, felicitas: talis domus semper crescit, dilatatur, viret, floret: in domo tali gloria, & diuitiæ. Contrà, In quacunq; domo pueri non deferunt honorem maioribus suis, vbi non timent, non amant, non imitantur, non sequuntur pueri vestigia maiorum suorum, vbi non obediunt in licitis & honestis membra capiti; in illa domo perpetua confusio, iniquitas, inimicitia, odia, miseria: illa domus semper minuitur, decrefcit, & conteritur: iuxta illud Psalm. 13. Contritio & infelicitas in viis eorum, & viam pacis non cognouerunt: non est timor Dei ante oculos eorum. Ego propter veritatem, & mansuetudinem, & iustitiam, matri meæ Academiæ Cracouiens. eam opto Harmoniam, eum à Deo Opt. Max. precor proprium ac perpetuum ordinem, eam rationem, & propter temporalem felicitatem, & propter æternam beatitudinem; vt caput, hoc est Patres, legitime semper imperent: & membra, hoc est, minores obediant: quoniam hæc est voluntas Dei: ita ipsemet ordinauit Dominus, iuxta illud Deuterono. 17. & 32. Interroga patrem tuum, & anuntiabit tibi: maiores tuos, & dicent tibi. Et 1. ad Thimoth. cap. 3. Non Neophitum. Sed & Philosophus inuenit eandem veritatem, quando dixit: Imperare & regere nesciet, qui parere non didicit: vnde & prouerbialiter, currus bouem trahere dicitur; vbi minores contra maiores insurgunt, & dominari temere præsumunt, qui nondum parere didicerunt. Fuit igitur apud nos hæc Philosophia veteris Academiæ, Reuerendi Patres, Magistri Venerabiles: fuit hæc felicitas matris nostræ Vniuersitatis Cracouiens: vt non solum apud domesticos, verumetiam apud externos bene audiret: vt iurisdictio Academiæ sartatecta nobis, & successoribus nostris maneret: vt falsitas subderetur veritati, & iniquitas vbique caderet æquitati: vt omnia studia nostra suo procederent ordine, & propria tractarentur methodo; quando Patres Imperabant, & filij obtemperabant:

ex quibus patribus fuit ad salutem Academiae huius datus Reuerendus olim bonae memoriae, Martinus Pilznensis, bonus, iustus, doctus, pius, humilis pater, sacrae Theologiae Doctor, cum inter nos 16. commutationibus, sine elatione, sine querella, officio Rectoris, cum immortali laude fungeretur. Vnde igitur te ornando & laudando, quominus tam multis praesentibus repraesentar, ipse Pater Martine Pilzneſi. incipiam? An à patria, & genere, & parentibus? haec certe talia sunt, ut cum ipsa magnam tibi attulerint laudem; tum verò etiam à te acceperint non minorem. Omittam nunc alia, dicam de pietate, iustitia, prudentia, fortitudine, modestia, & liberalitate patris Martini: & dicam quam breuissimè: vos oro, ut soletis, attente audite; ut & virtutes illius imitemur: nam in virtute docuit, in virtute ministravit, propter exemplum: tum verò si quid in hoc mundo scandalorum, laqueorum, peccatorum pleno, pro humana fragilitate contraxit, ut orationibus, eleemosynis, sacrificiis, totum illud, si non penitus abstergere, saltem minuere fatagamus: abiiciamus obsecro, inuidiam, odia, & malevolentiam: Si quidem teste Poëta,

Pascitur in viuis liuor post fata quiescit.

Vnde Horatius, libro 3. Carminum. Ode 24. in auaros:

Virtutem incolumem odimus

Sublatam ex oculis quærimus inuidi.

Prima igitur & maxima cura fuit, domini Doctoris Martini, Praeceptoris nostri fidelissimi, charissimi, idque à teneris statim vnguiculis; ut pietatem, & iustitiam coleret. COLUIT magno studio pietatem Christianam, & religionem Catholicam: quia fidem sanctam Apostolicam nunquam mutauit: nihil à fide & religione Catholica alienum vnquam docuit: imò Blasios, Stephanos, & alios haereticos in viam reuocauit, Ecclesiae reconciliauit, animas Deo lucrificavit. COLUIT pietatem: nam & templa quaedam noua aedificauit, & multa collapsa, & vetustate consumpta, quantum fieri potuit reformauit, cuius rei vel haec ipsa Sanctorum Omnium Collegiata Ecclesia, in qua iam dormit, & in qua pro mortuo oramus, fidelis testis esse poterit, ut nunc breuitatis causa, pietatis alia exempla similia omittam. COLUIT pietatem: quia saepenumero sibiipso non satisfecit, ut Academiae Magistris, in grauissimis, difficilissimis, & periculosis negotiis & causis satisfaceret. COLUIT pietatem, quia patriam, parentes, amicos, Polonos, & studiosos in genere, quantum fieri potuit, semper vbique promouere, ornare, erudire, excolere, & sicubi opus erat, liberius admonere, corrigere nusquam omisit, nusquam dubitauit: auctoritatem cum humilitate, pulchrè temperauit: infirmis, & errantibus condoluit,

doluit : mensuram suam cognouit, & diligenter vbique seruauit : quia metiri se quenque suo modulo ac pede, verum est. COLUIT pietatem : quia multis exemplar veræ pietatis semper fuit. nam quantum licuit per negotia, per continuos & graues labores, (quos ille in Ecclesia & Academia non solummodo moderatissimè, patientissimè, constantissimè, sed etiam felicissimè quoad vixit pertulit) Deo creatori & redemptori suo fideliter seruiuit, orationi institit : sacrificia & alia officia, non solum salubri, sed etiam tristi, suspecto, & pestilenti tempore, aliquando in maximis solennitatibus, solus pro omnibus in Ecclesia Cathedrali Cracouiens. diligentissimè, & deuotissimè, celebravit, absoluit. Deinde iustitiam sic coluit ; vt periurium (quod iam quidam vix pro peccato reputant) cane peius & angue semper vbique fugeret, & pro grauissimo peccato vti est reputaret, & aliis summopere fugiendum demonstraret. Porro, si quem aliquando animaduertit præferentem priuata publicis, ibi tum grauius commoueri & offendi videbatur : nam ipsemet, quantum fieri potuit, semper vbique publica præferebat priuatis. Extant & apud nos in Academia, quàm diutissimè manere debent, iustitiæ illius illa argumenta : quia, quæ sunt Dei, reddebat Deo : quæ sunt proximi, reddebat proximo : quæ sunt Ecclesiæ, Ecclesiæ : quæ Academia, Academia : quæ Cathedræ, Cathedræ : quæ debebat Professor, reddebat Professoribus ; ita, vt senioribus reuerentiam, æqualibus obseruantiam, inferioribus & omnibus in commune reddebat honorem, & amorem. Mores, consuetudines laudabiles, & conclusiones, antiquas leges, statuta, inclytæ matris Academia, non solum in magistratu, hoc est, dum fungeretur officio Rectoratus, verumetiam cum viueret priuatus, salua, integra, fartatecta, sancta, & ipsemet habuit, seruauit, & ab aliis sui loci, iurisdictionis, & ordinis hominibus haberi & seruari voluit. Pro legibus Academia, ad mortem certauit : adeo, vt non tam propria aliqua calumnia, iniuria, & offensione moueretur & afficeretur, quàm cum aliqua contra statuta, contra bonos Academia mores, contra honestatem publicam committi, vel incipi saltim videret. Vnde, quoties talibus hominum vitiis, pro suo officio occurreret, vel potius mederetur ; toties à quibusdam, sed secundum malam interpretationem, pro iusto seuerus, pro corripiente patre crudelis dominus reputabatur, & iudicabatur : cum tamen semper vbique, non nisi indulgentissimus esset pater, semper ad ignoscendum promptus, ad puniendum tardus : neminem ille vnquam puniuit, nisi ob aliquam magnam causam ; puniuit autem coactus, & puniuit cum misericordia, & compassione. Sciuit enim præceptum Apostoli, ad Hebr. cap. 12.

Fili mi, noli negligere disciplinam Domini, neq; fatigêris dum ab eo argueris. Quem enim diligit Dominus, castigat : flagellat autem omnem filium, quem recipit. In disciplina perseuerate. Tanquam filiis vobis offert se Deus. Quis enim filius, quem non corripit pater? Quòd si extra disciplinam estis, cuius participes facti sunt omnes : ergo adulteri, & non filij estis. Deinde patres quidem carnis nostræ eruditores habuimus, & reuerbamur eos : nōne multò magis obtemperabimus patri spirituum, & viuemus? Et illi quidem in tempore paucorum dierum, secundum voluntatem suam, erudiebant nos; hic autem, ad id quod vtile est, in recipiendo sanctificationem eius. Omnis autem disciplina in præsenti quidem videtur non esse gaudii, sed mœroris : postea autem fructum pacatissimum exercitatis, per eā reddet iustitiæ. Quamobrem Sacra Scriptura, Gene. cap. 22. commendat filium Isaacum, quia non recedit à latere Abrahamæ patris sui, sed perseuerat in disciplina patris; cui non ad oculum, sed ex animo in simplicitate cordis, tanquam Domino seruit, &c. Contrà reprehendit scriptura, 1. Reg. cap. 2. filios Heli, cùm dicit : Porro, filij Heli, filij Belial, nescientes Dominum, neque officium sacerdotum ad populum. D. Thomas super 1. ad Timoth. cap. 3. lect. 2. Filij Heli, non casti corrumpebant mulieres venientes ad templum, vnde & Heli à Domino est percussus. D. Ambrosius, super Psal. 39. Medicus minatur vt corrigat : terret vt curet : æger primò medici personam requirit, si sit idoneus, à quo sanari se posse præsumat. Vbi medicinæ audiuit auctorem, remedium poposcit, salutem inuenit, &c. Hæc D. Ambrosius. B. Augustinus, Epistola centesima quadragesima septima, ad Proculianum Episcopū Donatistarum, scribit sic : Audiui quidem de memorato fratre Euodio te fuisse conquestum, quòd nescio, quid tibi contumeliosè responderit : quod quæso te, nè illam contumeliam deputes, quam certum mihi est, non de superbo animo processisse : noui enim fratrem meum : sed si quid in disputando pro fide sua, & pro Ecclesiæ charitate dixit; fortasse feruentius, quod tua grauitas nollet audire, non illa contumacia, sed fiducia nominanda est. Collatorem enim & disputatorem, non assentatorem, & adulatorem se esse cupiebat : nam hoc est oleum peccatoris, quo Propheta non vult impinguari caput : ita enim dicit Psalm. 140. Emendabit me iustus in misericordia, & arguet me; oleum autem peccatoris, non impinguet caput meum. Mauult enim seuera misericordia iusti emendari, quàm leui adulationis vnctione laudari. Vnde etiam illud Propheticum Isaia 3. est : Qui vos felices dicunt, in errorem vos mittunt. Ideoque de homine, quem falsæ blandicię faciunt

D. MARTINI PILZENEN.

15

unt arrogantem, rectè etiam vulgò dicitur: Creuit caput, impinguat-
tum est oleo peccatoris, hoc est, non aspera virtute corrigentis; sed
leui falsitate blandientis. Idem D. Augustinus contra Vincentium:
Non omnis, qui parcat, amicus est, nec omnis, qui verberat, inimicus.
Melius est enim cum seueritate diligere, quàm cum lenitate perdere,
decipere. D. Hieronymus super Psal. 140. Corripiet me iustus in mi-
sericordia, & increpabit me: Pone hic, inquit, magistrum rectorem
aliquem, aut patrem, aut medicum. si viderit medicus in corpore car-
nes putridas, & dicat, quid ad me pertinent; scias, quia crudelis est: si
autem præcidat, & cauterium imponat, misericors est; quia sanat ani-
mam. Similiter magister & rector, si dimittit puerum, & nõ in eo exi-
git disciplinam, odit eum: si autem exigat, vt medicus curet, quæ pu-
tatur esse asperitas, clementia est. Hæc D. Hieronymus. Ergo non
omnis seueritas, disciplina, & correptio est mala: neque omnis indul-
gentia & conuiuentia est bona. Laudatur in Euangelio factum Sama-
ritani, qui vulnerato, mordax vinum, & purgans cum oleo infudit: re-
præhenditur indulgentia Leuitæ & Sacerdotis, qui vulneratum præ-
terijt. Vnde Salomon Prouerbiorum 27. Melior est manifesta corre-
ptio, quàm amor absconditus. Meliora sunt vulnera diligentis, quàm
fraudulenta oscula odientis. Parcite Reuerendi Patres, Magistri ve-
nerabiles properanti, parcite dicenti: tam enim variam & multiplicẽ
laudationem suppeditat nobis Patris Martini laudum feges & copia;
vt & oporteat properare, & nonnulla tamen attingere sit necesse. Nã
& Poëta Horatius lib. 3. Carminum Ode 2. dicit sic:

Dulce & decorum est pro patria mori.

Mors & fugacem persequitur virum,

Nec parcat imbellis iuuentæ

Poplitibus timidoque tergo.

Virtus repulsæ nescia fordida,

Intaminatis fulget honoribus:

Nec sumit aut ponit secureis,

Arbitrio popularis auræ.

Virtus recludens immeritis mori

Cælum, negata tentat iter via:

Cætusque vulgareis, & vdam,

Spernit humum fugiente penna.

Fuit igitur Reuerendus Pater Martinus pius, iustus, liberalis, pru-
dens, fortis: fuit compassius, & misericors, non vt aliqui dicunt seue-
rus, seueritate abutendo ad extrema: fuit promptus ad ignoscendum,
& tardus ad puniendum. Sed prius me dies deficeret, quàm virtutes

Martini Rectoris singulas, non dico oratione explicare, sed saltem enumerare possim. Imitemur itaque Rectorem Martinum in virtute, in pietate, iustitia, prudentia, fortitudine, temperantia. Imitemur in liberalitate, humilitate, labore, patientia, constantia, & in alijs virtutibus, quarum apud nos recens adhuc est, & esse debet memoria. Imitemur inquam in virtute: quia ille, quoad vixit, Sanctum Martinum Patronum suum, imitari nunquam desuit. Dixi de virtute Patris Martini, & dixi breuius quam dici oportuit: restat, vt de studiis & ingenio illius, pauca quedam, freti beneuolentia vestra, dicamus. Vix verisimile alijs fortasse videatur, ab ipsa pueritia Magistrum & Doctorem nostrum Martinum, tam admirabili fuisse ingenij magnitudine; vix vt vllam desiderauerit disciplinam, vt penè prius discipulos habere cœperit, quam Magistros. Anno Domini M. D. XXVIII. die selenni omnium sanctorum Pilznæ, honestis, bonis, & nobilibus parentibus natus, nihil magis statim à puero coluit, quam pietatem, iustitiam, temperantiã, honestatem, & mores nobiles: nihil magis admirari solitus, quam homines doctos, quam literas, studium, artem, & philosophiã. Annos natus 15. venit ad Academiam, optimos studiosos imitatus, lectiones publicè audiuit, apud Benedictos Kosminos, & Albertos Nouicampianos, apud Nicolaum Sadek, apud Michaëlem Wislicen. frequentissimus auditor fuit. Et nō est mirum, si pulchrè tam citò profecerit, vt multos suę ætatis iuuenes, longè post se reliquisset: quia & ordine discebat, & optimos professores audiebat. Post vigesimū suę ætatis annum, est publicè Baccalaureus in Academia promotus, & paulò post Magister, & sic cōsequenter. Anno verò M. D. LXIX. Doctoratus insignia in sacra Theologia, authoritate Reuerendissimi Domini Philippi Padnieuij, Episcopi Cracouien. Cancellarij Vniuersitatis est consecutus. Profitebatur publicè non solùm diligenter, sed etiam fideliter, secundum quod sacrosanctum iusiurandum postulabat: profitebatur cum vtilitate & honestate Academia, Ecclesiæ, & Regni Polonia. Cuius quidem rei signum est; quia multos bonos, & doctos discipulos reliquit, ex quibus facillè cognoscas, bonum & doctum magistrum: quia sicut ex fructu cognoscitur arbor; ita ex discipulis magister. Profitebatur publicè, tam in Cathedra inferiori, quam superiori supra annos 40. & potuit de se, sed pro sua modestia noluit, illa verba Sapient. 7. verè dicere: Mater omnium bonorum sapientia, quam sine fictione didici, & sine inuidia communico, & honestatem illius nō abscondo. Infinitus enim thesaurus est hominibus. Quò qui vti sunt, participes facti sunt amicitia Dei, propter disciplinę dona cōmendat. Scripsit multas doctissimas Homelias: scripsit discursus, & exami-

& examina spirituum. Fuit bonus logicus, disputator acutus, bonus Physicus, bonus Metaphysicus, Mathematicus bonus, iuris peritus, optimus Theologus, fuit Oeconomus, fuit homo Polyticus, societatis amans. Quid multa? potest equidem sine invidia, & sine contradictione, nomen viri & professoris boni, & docti in eo poni. Cuius quidem rei argumentum est non paruum: quia 16. commutationibus functus est Rectoratu feliciter: & in eo officio, in ea sollicitudine, & ministerio, vitam præsentem immortalitatis amantissimus, finiuit; ut vel eo ipso argumento doceret, & ostenderet, se etiam pro Academia mori: Maiorem charitatē nemo habet, quā ut animā suā quis ponat pro amicis suis. Ioan. 15. Et quoniam nos multum amavit, quia non sibi, sed matri Academiæ, & nobis laboravit, & thesaurizavit: quia quidquid quæsierat, Academiæ donavit, & tanquā filiis hæreditatem reliquit: dignum certē & iustum est, ut illum vicissim redamemus: dignum est, ut illi exequias solennes quotannis celebremus: nam eo pacto, non Martinum, sed virtutem, doctrinam, & cathedram honorabimus. Sunt autem tria potissimum, quæ à nobis nunc pater Martinus expectat & postulat. Primum, ut mortis memores, animā illius orationibus, & aliis piis operibus, Deo Opt. Max. commendemus: & pro ea sæpius deuotē oremus: & nos in pace viuentes inuicem diligamus. Secundò, ut officiorum, beneficiorum, & laborum, quos pro Academia fortissimè pertulit & sustinuit, simus memores, & grati. Tertiò, si non possumus maiora, saltem similia exempla, propter S. Ecclesiam Catholicam, propter Regnum Poloniæ, & propter Academiam faciamus. Imitemur obsecro charissimi, patrem Martinum, in virtute, in pietate, in studio, in labore, & constantia: quia hoc lege naturæ, lege Dei debemus patribus, debemus patri Martino. Oremus obsecro charissimi, ut Deus Optimus Maximus, animam illius iubeat suscipi in sinum Abrahæ, vbi lux perpetua luceat ei, & requiescat in sancta pace: & nos in terra benedicat Pater, & Filius, & Spiritus sanctus, Deus in secula benedictus. AMEN.

D I X I.

Executores testamenti orant, & hîc publicè omnes & singulos deprecantur; ut si quem fortè aliquando pro humana fragilitate in vita pater Martinus, verbo, vel factò, vel alio quopiam modo offenderat; ut eidem pro pietate, iustitia, & charitate Christiana, ex animo ignoscant, & dimittant; cum propter alia, tum propter eum, qui dixit: Dimittite & Dimittimini.

Iacobi

Iacobi, cap. 5.

ORATE PRO INVICEM, VT SALVEMINI

Ecclesiastici, cap. 40.


IUGVM GRAVE SVPER FILIOS ADAM, A
DIE EXITVS DE VENTRE MATRIS EO-
RVM, VSQVE IN DIEM SEPVLTVRAE IN
MATREM OMNIVM.

EPITAPHIVM

REVERENDI PATRIS M. MARTINI PILZNEN. &c.
apud Omnium Sanctorum Præpositi,
Canonici Cracouien: &c.

Quæ mihi ad incertam clauduntur lumina noctem,
Hæc eadem certam sunt habitura diem.
Tu quoque dum viuis Lector, memor esto sepulti,
Vtque, roges, viuat spiritus arce poli.

IOANNES GASSINSKI BOCHNEN.
A. L. B.



Laurentius Valentini